

ՌՌԻԲԵՆ ՉԱՐՅԱՆ

ՀՈՒՇԱՊԱՏՈՒՄ

ԳԻՐՔ ԱՌԱՋԻՆ

«ՀԱՅԱՍՏԱՆ» ՀՐԱՏԱՐԱԿԶՈՒԹՅՈՒՆ
ԵՐԵՎԱՆ • 1975

7 Ap+8 Ap.

Զ. 39

Զ $\frac{80101 (809)}{701 (01) 74}$ 219, 74 «Տ»

Խմբագիր՝ Լ. Հ. ՀԱՆՎԵՐԴՅԱՆ

ԲՈՎԱՆԴԱԿՈՒԹՅՈՒՆ

Երկու խոսք

ԱՆՄԱՀՈՒԹՅՈՒՆԸ ՀՈՂԱԹԱՓԵՐՈՎ

Նար-Դոս	9
Շիրվանզադե	27
Ակսել Բակունց	48
Եղիշե Չարենց	69
Դերենիկ Դեմիրճյան	107
Ավետիք Իսահակյան	139
Ստեփան Զորյան	224

ՃԱԿԱՏԱԳՐԻ ՊԱՐԳԵՎԱԾ ՀԱՆԴԻՊՈՒՄՆԵՐԻՑ

Թադևոս Ավդալբեկյան	269
Մանուկ Աբեղյան	279
Հրաչյա Աճառյան	299
Ստեփան Մալխասյան	312
Հովսեփ Օրբելի	326

ԳՐԻՄՈՎ ԵՎ ԱՌԱՆՑ ԳՐԻՄԻ

Արուս Ոսկանյան	347
Հասմիկ	371
Օլգա Գուլազյան	384
Հրաչյա Ներսիսյան	400
Վահրամ Փափազյան	436

ԵՐԿՈՒ ԽՈՍՔ

Ամեն մարդու կյանքում էլ հետաքրքիր կողմեր կան: Ահա մի այդպիսի կողմ էլ իմ կյանքն ունի: Գուցե իմ սերնդակիցներն ավելի բեղմնավոր եղան իրենց գործում: Գուցե: Բայց մի կողմից,— դա կարող եմ հաստատ ասել,— բախտն ինձ բավական վաղ ժպտաց և ավելի, քան ընկերներիցս որևէ մեկին:

Ահա այդ մասին էլ ուզում եմ պատմել ընթերցողին: Տասնվեց տարեկան էլ չկայի, երբ եղա Նար-Դոսի տանը: Մի տասը տարի էլ չէր անցել, որ Ջարենցի կրտսեր ընկերներից էի: Այնուհետև Բակունցի ու Զորյանի: Ուսանող ժամանակս Շիրվանզադեի հետ մի ամբողջ ամիս, գրեթե ամեն օր հանդիպել եմ, գրուցել: Մի օր էլ մտրիցս իմացա, որ Դեմիր-Նյանը մեր հեռավոր ազգականն է: Դրանից հետո ավելի շատ էի հայտնվում նրանց տանը, մանավանդ որ նույն բակումն էինք ապրում: Իսկ հետո բոլորովին երիտասարդ, հայտնվեցի գրական աշխարհի խաչմերուկներում՝ հրատարակիչ, գրական հանդեսի խմբագիր, գիտական հաստատության ղեկավար: Անխուսափելի դարձավ ծանոթությունը, ապա նաև երկար տարիների բարեկամությունը Իսահակյանի, Փափազյանի, Սարյանի հետ: Նաև ուրիշների: Դարձա ուսուցիչներիս շատերի գործընկեր: Ես գիտական խորհրդի նիստի էի լինում այնպիսի հսկաների հետ, ինչպես Աբեղյանը և Անաոյանն էին: Մի խոսքով, հարաբերությունը գրականության ու արվեստի մեծերի հետ՝ պարադոքսալ

բնավորություն ստացավ: Իրենք ավագ, ես՝ կրտսեր, իրենք մեծ, ես՝ փոքր, բայց պաշտոններին բերումով ինձ վիճակված էր դեր խաղալ նրանց կյանքում: Հետագայում այս բոլորին ավելացան նաև արտասահմանյան հաճախակի շրջագայությունները և բնականաբար, ծանոթությունը, իսկ ինչ որ դեպքերում և բարեկամությունը այնտեղ ապրող և գործող հայ ու այլագգի մասնագետների հետ:

Ես միշտ էլ, դեռևս վաղ հասակից, սիրել եմ հուշ կարդալ: Եվ հաճախ հուշերից ավելի մեծ բավականություն եմ ստացել, քան վեպից: Երբ ձեռքս ընկավ էկերմանի ծավալուն գիրքը՝ «Ջրույցներ Գյոթեի հետ», — իսկ դա 1933-ին էր, — սովորություն դարձրի գրառել հանդիպումներս:

Դժբախտաբար, միշտ չէ, որ լսածս ու տեսածս գրի եմ առել, և այժմ դրա համար, իհարկե, ցավում եմ: Քացի այդ, ամեն ինչ չէ, որ գրի եմ առել: Մտածելով, թե մի օր հրապարակվելու են այդ գրառումները, գրի եմ առել այն, ինչ ժամանակին ունեցածս պատկերացումով կարելի էր ընթերցողին առաջարկել: Մի խոսքով՝ «ներքին խմբագիրը» արգելել է գրառելու բազմաթիվ զրույցներ, որոնք մի ժամանակ մեղավոր էին թվում ինձ, բայց անցած տարիները երեկվա անբույլատրելի են այսօր թույլատրելի են դարձրել իրավամբ, բայց արդեն ուշ է և շատ բան անէացել է հիշողությանս մեջ:

Հետագոտող բանասերին երկրորդել կարելի է, գերազանցել նույնպես, իսկ հուշագիրն ինչ որ առումով անփոխարինելի է: Խոսքը չի վերաբերում լավ ու վատ գրելուն: Խոսքն այն մասին է, որ հուշագիրը հաճախ պատմում է այն, ինչ միայն իրեն է հայտնի: Եվ այդ անկրկնելիությունն էլ հուշագրությանը հաղորդում է մի առանձին արժեք:

Գրառումները լույս են տեսնում այնպես, ինչպես գրվել են ժամանակին: Իհարկե, լեզվական խմբագրումներով, կրճատումներով: Բաց եմ թողել որոշ գրառումներ, որոնք էթիկական նկատառումներով չի կարելի հրապարակել հիմա կամ ընդհանրապես: Սկզբում մտադրվեցի գրառումների հիման վրա նոր շառադրանք ստեղծել: Մի խոսքով՝ եղածը «հագեցնել» հոգեբանական այնպիսի դիտողություններով, որ բերել է իր հետ տարիների հասունությունը: Բայց հետո

հրաժարվեցի այդ մտքից և գրառումը պահպանեցի իր սկզբնական տեսքով:

Հուլիսնարկների տակ քվականներ չեն դրված, որովհետև մեծ մասը գրվել է տարիների ընթացքում: Հուլիսնարկների հաշորդականությունը որոշվել է հիմնականում ըստ «գործող անձանց» մահվան տարիների, այսինքն՝ թե ով երբ է դուրս եկել իմ կյանքից: Նախապատվությունը տրվել է այդ սկզբունքին, քանի որ հուշերս նվիրված լինելով ուրիշներին, իմ մասին են միաժամանակ:

Ռ. Չ.

W. H. Smith & Co. - Agents
San Francisco, Cal.

Handwritten text, mostly illegible due to fading and bleed-through from the reverse side of the page.

Page 1 of 5
Handwritten text, likely a title or header, possibly reading "Page 1 of 5" or similar.

Main body of handwritten text, consisting of several lines that are mostly illegible due to fading and bleed-through.

Աշակերտ էի այն ժամանակ, հազիվ 15—16 տարեկան պատանի, որի ուշքն ու միտքը ոչ այնքան դպրոցական դասերն էին, որքան գրականությունն ու թատրոնը: Կարդում կլանում էի ձեռք ընկած գիրքը, ոչ մի նոր ներկայացում բաց չէի թողնում: Ինքս էլ գրելու փորձեր էի անում: Գրում էի արձակ, գլխավորապես պատմվածքներ: Ինչի մասին՝ չեմ հիշում, ինչպես՝ այդ էլ չգիտեմ, երևի ոչ լավ, այլապես չէի հրաժարվի: Բայց միտս է, միամտաբար կարծում էի, թե լավ պատմվածք գրելու համար ոչ թե տաղանդ է պետք, այլ հնչեղ անուն, ինչպես գտել էին իրենց համար հայ գրողներից շատերը՝ Րաֆֆի, Մուրացյան, Շիրվանզադե, Վարուժան, Նար-Դոս, Սիամանթո, Տերյան, Զարենց...

24—25 թվականներն էին: Ապրում էի Հավլաբարում: Մեր տունը գտնվում էր Պոլկովայա փողոցում, այսպես կոչված՝ «կազարմի թաղում»: Զորանոցի մյուս կողմում Օբլոդնի անունով մի նեղլիկ փողոց կար: Այնտեղ ապրում էր ընկերներիցս մեկը՝ Հմայակ Պողոսյան. այժմ ճարտարապետ: Նրանց տանը հաճախ էինք լինում: Զրուցում էինք, երազում, ինչպես բոլոր պատանիները, խոսում էինք՝ գրականությունից, թատրոնից, մեր կարդացած գրքերից, դատողություններ անում, վիճում: Ես, օրինակ, տոլստոյական էի, մի ընկեր ունեի, որ հակառակը՝ դոստոևսկիական էր: Մի օր խոսք բացվեց Նար-Դոսի մասին: Այդ ժամանակ կարդում էի նրա «Սպանված աղավինին»: Ասացի, թե շատ կուզեի տեսնել հեղինակին: Ընկերոջս հայրը ծիծաղեց: Ես հարցական նայեցի նրա կողմը:

— Շա՛տ ես ուզում: Դե որ էդպես է՝ մտիկ արա: Տեսնո՞ւմ ես դուան մոտ կանգնած էն մարդուն: Տեսնո՞ւմ ես: Այ, հենց քո ասած Նար-Դոսը դա է:

Նայեցի նրա ցույց տված ուղղությամբ: Այդ մարդուն առաջ էլ էի տեսել: Աչքերիս չհավատացի: Թվում էր թե ընկերոջս հայրը կատակում է: Նա տեսավ, որ չեմ հավատում, այս անգամ արդեն լրջացավ:

— Հենց նա է, որ կա:

Նետվեցի փողոց: Մի պատրվակով անցա կողքից: Մոտիկից նայեցի: Հա՛, տեսել էի նրան և տեսել էի մի քանի անգամ: Եվ երբեք մտքովս չէր անցել, թե նա գրող է, կամ ընդհանրապես կարող է գրականության հետ կապված մարդ լինել, ուր մնաց՝ Նար-Դոսը, այն նուրբ գրվածքների հեղինակը: Շիրվանզադեին տեսել էի՝ Ճիշտ է, բոլորովին այլ կերպ էի պատկերացնում նրան, բայց այն, ինչ որ տեսա համենայն դեպս գերադանցեց երևակայությանս ուժով ըստեղծված կերպարին: Իսկ այս դեպքում՝ ճիշտ հակառակը: Ի՛նչ էի պատկերացնում և ի՛նչ տեսա:

Միջահասակ մարդ էր, բավական անշուք հագնված: Խիստ հասարակ արտաքինով, կոշտ դիմագծերով և նայողը երբեք չէր ասի, թե մտավոր աշխատանքի հետ կապված մեկն է: Ես ոչ մի կերպ չէի կարողանում հաշտեցնել իրար հետ այդ հասարակ արտաքինը նրա գրվածքների բարձր ճաշակի հետ, դիմագծերի կոպտությունը և նրա արվեստի նրբությունը:

* * *

Նար-Դոսը ցերեկով մի, երբեմն երկու-երեք ժամով գալիս էր Հայարտուն: Մի բազկաթոռ կար, սիրում էր բազմել նրա մեջ: Բոլորը գիտեին, որ դա Նար-Դոսի մշտական տեղն է: Եվ որ օրը Նար-Դոսը չէր գալիս, իսկ այդպիսի օրեր լինում էին, բազկաթոռը մնում էր թափուր:

Հավաքվում էին գրողներ, արվեստագետներ և գրուցում էին, նորություններ պատմում, վիճում: Ես էլ մեկ-մեկ փախչում էի դասերից, գնում Հայարտուն, որովհետև այստեղ տե-



դի ունեցած գրույցներից շատ ավելի նյութ էի քաղում։ Գնում էի, խոնարհ հարգանքով բարեկամ Նար-Դոսին և հետաքրքրությամբ հետևում գրողների վեճերին, լսում, թե ով ինչ է ասում։

Նար-Դոսը չէր խառնվում խոսակցությանը, վեճերին չէր մասնակցում, հորեմն նույնիսկ այնպիսի տպավորություն էր ստացվում, որ չի էլ լսում, թե ինչ են խոսում կամ ինչի մասին վիճում։ Նստում էր լուռ, նայում առաջը, մեկ մեկ էլ շուրջը։ Հարց տալին՝ կպատասխաներ, այն էլ կարճ, շատ սեղմ, իսկ եթե ոչ, իր համար լուռ կմնար։ Եվ այդպես մի հրկու ժամի շափ։ Շատ հազվագյուտ էր պատահում, որ խոսի, մի բան ասի։ Եվ եթե մի բան էլ ասում էր, ապա դա էլ մեծ մասամբ հարց էր լինում։

Մի օր Նար-Դոսը նստած իր սովորական բազմոցին, նամակ էր կարդում։ Երբ վերջացրեց, շուրջը նայեց, դիմադծերը ոչինչ չէին ասում, բայց աչքերը բավականություն էին արտահայտում, զգացվում էր, որ խոսելու կարիք ունի։ Տեսավ, որ բացի ինձանից ոչ ոք չկա, դարձավ իմ կողմը։

— Մի ուսուցչուհի է դրում, գյուղից։ Ասում է՝ ես ձեռ Աշխենն եմ, դուք իմ կյանքն եք նկարագրել, իմ հոգեբանությունը։

Լռեց։ Հուզված էր երևում։

— Իր շնորհակալությունն է հայտնում։

* * *

Հայարտանը Նար-Դոսին նվիրված հավաքույթ էր։ Զեկուցում էր Մարգարը։ Խոսեց նրա պատմվածքների մասին ընդհանրապես, բայց կանգ առավ ղիխավորապես «Մեր թաղի» վրա, որ այն ժամանակ որպես շարք Ջեռես գոյություն չուներ։ Գնահատեց շատ բարձր, ինչ-որ կապեր և ընդհանրություններ տեսավ Չեխովի ու Գոբկու հետ։ Շատ մարդ կար։ Հավաքույթը ջերմ անցավ։ Ուրիշներն էլ խոսեցին։ Ասացին թե Նար-Դոսը նուրբ արվեստագետ է, խոշոր գրող, որ մինչև հիմա արժանի կերպով չի գնահատված և այլն։ Նար-Դոսը չկար։ Տարօրինակ էր այդ և բոլորը ուշա-

դրություն դարձրին դրա վրա: Մյուս օրը, ցերեկով, Հայարտուն էր եկել և սովորականի պես՝ լուռ նստած էր բազմոցի մեջ: Մոտեցավ նրան Գարեգին Մելոյանը և հարցրեց, թե ինչու չէր եկել երեկվա հավաքույթին: Հիվանդ էր, թե՞ չգիտեր, որ հավաքույթ կա:

— Սկզբունքով, — պատասխանեց Նար-Դոսը:

Մելոյանը շփոթեցավ:

— Գրողը չպետք է ներկա լինի իրեն նվիրված հավաքույթին:

— Ինչո՞ւ:

— Որ խոսողները ազատ զգան:

Փոքրիկ դադարից հետո շարունակեց.

— Ուզեն քննադատել՝ պիտի քաշվեն, ուզեն գովել՝ ես ինձ պիտի վատ զգամ:

* * *

Երիտասարդ գրողների հավաքույթ կար Հայարտանը: Քննարկման էր դրված իմ պատմվածքը: Ոչ վերնագիրն եմ հիշում, ոչ էլ բովանդակությունը: Կարդացի պատմվածքը, հետո ելույթներ եղան: Բոլորն էլ պատմվածքի մասին խոսեցին գովեստով, ես էլ, իհարկե, հավատացի ու ոգևորվեցի:

Երբ հավաքույթը վերջացավ և մենք աղմուկով անցանք Դահլիճ՝ Նար-Դոսն իր բազկաթոռին նստած էր: Մի քանիսը շրջապատեցին նրան և սկսեցին հիացմունքով արտահայտվել նրա վեպերի մասին: Նար-Դոսը կարմրեց և, որպեսզի փոխի նյութը, հետաքրքրվեց, թե ինչով էինք այսօր զբաղված: Տղաները մատնացույց արին ինձ և ասացին, որ իմ պատմվածքն էր քննարկվում:

— Ուրեմն՝ ձեռք արձակ գրող էլ կա: Հետաքրքիր է, իսկ ես կարծում էի, թե բոլորդ բանաստեղծներ եք:

Նայեց իմ կողմը, դեմքը հանդարտ էր, բայց աչքերը ղննող արտահայտություն ունեին, կարծես արտաքինս ուսումնասիրելով՝ ուզում էր որոշել, թե ինձնից գրող դուրս էլա՞, թե չէ:

— Զարյա՞ն. այդ ազգանունով արդեն երկուսը կան,

կան և Զորյաններ, շփոթել կարող են: Ավելի լավ չի լինի՝ փոխեք, ընտրեք մի ուրիշ, չկրկնվող ազգանուն:

Ձայն չհանեցի, բայց համաձայն չէի: Այդ ստորագրութեամբ արդեն մի երկու պատմվածք էր լույս տեսել և միամտաբար կարծում էի, թե բոլորն արդեն ճանաչում են ինձ, ինչպես, ուրեմն, կարելի է փոխել:

Նար-Դոսը հասկացավ, թե ինչ եմ մտածում:

— Գուցե մի տառ փոխեք, այն ժամանակ փոփոխությունը զգալի չի լինի. կարելի է ստորագրել Զայլան:

Դրան էլ համաձայն չէի, բայց դարձյալ ձայն չհանեցի: Խոսակցութեանն այլ ընթացք տվեց մեր ընկերներից մեկը, որը Նար-Դոսին խնդրեց, որ եթե ժամանակ ունի՝ կարդա իմ պատմվածքը: Նար-Դոսը համաձայնեց: Ավելի մեծ երջանկություն չէր կարող լինել ինձ համար: Ասացի, թե այսօրվա դիտողությունները նկատի առնելով, նորից կարտագրեմ պատմվածքս և կտամ իրեն:

* * *

Մի շաբաթ հետո պատմվածքս հանձնեցի Նար-Դոսին: Ասաց, թե մի երկու օրից կարող եմ անցնել իր մոտ՝ երեկոյան դեմ, ժամը 8-ի կողմը: Ուզեց բացատրել տան տեղը, ասացի, որ գիտեմ: Նույն թաղումն եմ ապրում: Ժպտաց:

— Ուրեմն թաղակիցներ ենք. ավելի լավ:

Պատվիրած օրը, նշանակված ժամին գնացի: Առաջարկեց նստել պատշգամբում, որտեղից մի սքանչելի տեսարան էր բացվում: Ասես ափի մեջ՝ քո աչքերի դիմաց քաղաքի մեծ մասն էր, երևում էր Քուռ գետը և վրան՝ Մոխրանյան հսկայաշեն կամուրջը:

Մինչև պատմվածքի մասին խոսելը՝ մի երկու հարց տվեց, ուզեց իմանալ, թե որ դպրոցումն եմ սովորում, ով է հայոց լեզվի ուսուցիչս, որտեղից եմ, ովքեր են ծնողներս:

Նլավ տեղից, գնաց սենյակ և բերեց պատմվածքս: Հավանաբար քաջալերելու նպատակով մի երկու խրախուսական խոսք ասաց, որից հետո դիտողություններն արեց այնպես, կարծես ավելի շատ խորհուրդ էր տալիս:

— Ածական շատ եք գործածում, լավ կլինի խուսափեք: Դեղեցիկ լեզուն այն է, երբ կարդալիս չեք էլ զգում, որ գեղեցիկ է: Զգտեք միտքը ձևակերպել հստակ, ճշգրիտ:

Երբ խոսքը վերջացրեց, ժպտաց:

— Ահա բոլորը, սիրելի թաղակից:

Նա ասացի, որ չգիտեմ, թե գրածս ինչպես կոչեմ. պատմվածք, թե նովել, մեր ուսուցիչն ասում է, թե դրանք նույն բաներն են, իսկ գրականության մեջ էլ կարդացել եմ, որ տարբերություն կա:

— Ոչինչ էլ մի գրեք. թող ընթերցողն ինքը որոշի, թե ինչ է:

Հարցրի, թե իր կարդացած պատմվածքն արժե՞ տպագրության հանձնել.

— Իմ կարծիքով, ոչ:

Ասաց: Նայեց դեմքին և անմիջապես՝ իրեն համար անսովոր շտապողականությամբ ավելացրեց.

— Այդ որակի գործեր, իհարկե, տպագրվում են, բայց խորհուրդ չէի տա շտապել: Պետք է ավելի լավ գրել: Ուրիշը գրեք, ավելի երկար մշակեք:

* * *

Ստոեցավ Նար-Դոսին մեկը, ասաց, թե ինքը գրականագետ է, տվեց իր ազգանունը, որ միտս չի մնացել և չեմ հիշում, որ նրա անվանը մամուլում հանդիպած լինեմ երբեք: Բայց նա իր անունը տվեց այնպես, ասես հռչակված մի մարդ լինեիր: Խոսվածքից երևում էր, որ վանեցի է: Հագնված էր բավական լավ, կոկ, մաքուր, օսլայած օձիք, վառ կարմիր փողկապ, գունավոր թաշկինակի ծայրը դուրս էր նայում կրծքագրպանից: Ինքնահավան մի ժպիտ կար դեմքին, թեև խոսում էր սիրալիր արտահայտությամբ, բայց այնպես, կարծես այդ մի զիջում էր նրա կողմից:

Նար-Դոսը զարմացած հայացքով լսում էր նրան:

Անծանոթ գրականագետն ասաց, թե ինքը ձեռնամուխ է եղել գրելու մի աշխատություն Նար-Դոսի գրական ժառանգության մասին:

— Ես դեռ չեմ վախճանվել, — ասաց Նար-Դոսը:

— Իսկ միթե գրողի մահից հետո միայն կարելի է գիրք, այսինքն՝ ուսումնասիրություն գրել նրա մասին:

Նար-Դոսը, որ քիչ առաջ փոքր ինչ նեղացած տեսք ուներ, խաղաղված ձայնով պատասխանեց.

— Ինքներդ ասացիք, թե ուզում եք իմ գրական ժառանգություն մասին գրել:

Նար-Դոսը շեշտեց ժառանգություն բառը:

Այժմ գրականադեսն էր չոեւ աչքերը նրա վրա: Նա չէր հասկանում, թե ինչ է ասում Նար-Դոսը: Վերջինս բացատրեց նրան, որ մարդ մեռնելուց հետո է միայն ժառանգություն թողնում:

Գրականադեսը հասկացավ, թե չէ, չգիտեմ, բայց կարմրեց: Մեյույանը, որ ներկա էր զրույցին, զգաց այդ և շտապեց նրան դուրս բերել անհարմար գրությունից՝ ասելով, թե ոչինչ, պարզապես հաջող չձևակերպվեց միտքը, ավելի լավ է, որ շարունակի իր խոսքը, ասի, թե ինչ է ուզում:

Գրականագետը, սակայն կորցրել էր նախկին ինքնավստահությունը և այժմ խեղճացած ձայնով, մի մեղավոր ժպիտ դեմքին, ասես մեկը գլխին տվել էր, ասաց, թե ուզում է ծանոթանալ Նար-Դոսի մասին եղած քննադատական գրականությունը և, մտածելով, որ իբրև հեղինակ երևի ժամանակի ընթացքին հավաքել է այդ բոլորը, խնդրում է հնարավորություն տալ իրեն նայելու: Նար-Դոսը շատ հանգիստ, ինչպես առաջ, ասաց, որ չունի իր մասին գրված հոդվածները, հետևաբար և չի կարող օգտակար լինել:

Երբ գրականագետը ներողություն խնդրեց ու հեռացավ՝ Մեյույանը հետաքրքրվեց, թե իսկապես չունի, թե՞ պարզապես ուզում էր ճանապարհ դնել: Նար-Դոսը կարծես վիրավորվեց, որ ենթադրում են, թե ինքը կարող է ճիշտ չասել, բայց այդ զգացումը չարտահայտեց և ասաց միայն, որ ժամանակին չի հավաքել, չի պահպանել:

Մեյույանը զարմացավ:

Նար-Դոսն ասաց, որ իր մասին շատ չեն գրել, ընդհանրապես քննադատությունը քիչ է երես տվել իրեն, հազարից մեկ է անդրադարձել: Երեք դեպք է հիշում. Բերբերյանը,

Տերտերյանը, մեկ էլ վերջերս Մարգարը: Հատուկենտ հոգ-վածներ էլ են գրվել, այսպես ասած՝ մատենախոսականներ: Դրանց մեջ ուշագրություն արժանի հորված չի հիշում:

Լոեց: Մեկոյանն իրեն անհարմար էր զգում, կարծես ինքը մեղավոր լիներ քննադատության անտարբերության համար: Ոչ մի ձայն չէր հանում:

Նար-Դոսը շարունակեց.

— Սկզբում վշտանում էի, հետո ընտելացա: Ինձ միշտ մխիթարել եմ նրանով, որ քննադատների համար չեմ գրում, այլ ընթերցողի: Ծիշտն ասած, թե ընթերցողն ինչ կարծիք ունի, այդ էլ լավ չգիտեմ: Դե, ես որտեղից պետք է իմանամ, հո չեն զա ու ինձ ասի, թե ձեր վեպը շատ հավանեցինք, կամ ընդհակառակը՝ վատն է, ձանձրացանք:

Նորից լոեց և մի փոքր հետո ամփոփեց.

— Դե՛հ, Գարեգին, լավ, թե վատ գրել եմ, քառասուն տարի գրել եմ, երևի ավելի շատ վատ, քան լավ:

Մեկոյանն սկսեց հավատացնել նրան, որ միշտ էլ լավ է գրել, որ նա մեր հռչակավոր գրողներից է, որին ընթերցողը շատ է սիրում, հաճույքով կարդում է և այլ նման բաներ:

Նար-Դոսը սկզբում ուշադիր լսում էր, հետո սկսեց վատ զգալ, որ իրեն իր ներկայությամբ այդպես գովում են:

* * *

Մի քանի գրող շրջապատել էին Նար-Դոսին և վիճում էին: Մեկն ասում էր, մյուսն առարկում, մեկը մի փաստ էր բերում, մյուսը՝ հակադիր օրինակ: Նար-Դոսը լուռ էր, ձայն չէր հանում, թեև ամեն մի խոսող իր միտքն ավարտելիս նայում էր նրա կողմը, երևի կամենալով իմանալ, թե իր ասածին նշանավոր գրողը հավանություն տալի՞ս է, թե ոչ:

Վիճում էին այն մասին, թե գեղարվեստական գրականությունը միտում պետք է ունենա, թե՞ չէ: Մի մասը պնդում էր, որ ոչ, մյուս մասը գտնում էր, որ գրականությունը միշտ էլ միտումնավոր է եղել:

Երբ Նար-Դոսին դիմեցին, նա այն միտքը հայտնեց, թե չկա գրվածք, որով հեղինակը չկամենա մի բան ասել, բայց,

դրա մասին հեղինակը չպետք է հայտարարութիւն անի, գրողը պիտի կարողանա արժարժովոյ միտքը լավ միահշուսնել վիպական գործողութեանը և այն ժամանակ ընթերցողը գիրքը կարդալուց հետո ինքնաբերաբար կկատարի հարկավոր եզրակացութիւն:

* * *

Մի օր Նար-Դոսին հարցրին, թե ինչ կարծիք ունի այսինչ բանաստեղծի մասին: Անմիջապէս չպատասխանեց:

— Վերջերս չեմ կարդացել, — ասաց նա, — բայց առաջ, որ կարդացի ոչ մի բավականութիւն չստացա, վերացական էր ու փքուռույց, իսկ այդ տեսակ բանաստեղծութիւնը, չգիտեմ, թե ինչ կարծիքի եք դուք, իմ ճաշակովը չէ:

Լռեց: Մի փոքր հետո.

— Մեր բանաստեղծները կյանքից չեն գալիս: Սա ! նրանց դժբախտութիւնը:

* * *

Մի օր Նար-Դոսին մոտեցան Մարգարը և Գեորգ Մեսյանը: Աթոռներ քաշեցին ու նստեցին դիմացը:

Մարգարը հարցրեց.

— Նոր վեպդ ավարտե՞լ ես:

— Ավարտել եմ:

— Բա ինչի տպագրութեան չես տալիս:

Նար-Դոսը ժպտաց.

— Մտքումս ամեն ինչ պատրաստ է, մնում է թղթին տալ:

— Դե՛, արա էլի:

— Ձեռքիս գործ կա. Հայաստանի հրատարակչութեան համար հատորներս եմ պատրաստում: Պրծնեմ, թե չէ, դրան եմ ձեռնամուխ լինելու:

— Քանի հատոր է լինելու:

— Չորս: Թե սա էլ հասցնեմ՝ հինգերորդը կլինի:

— Ժողովածուից որեւէ բան մնո՞ւմ է դուրս:

— Շատ. բոլոր պիեսները, հեքիաթները, առաջին գործերս: Հա՛, ոտանավորներս:

— Դրանք էլ մի հատոր թող լինի:

— Չէ՛: Չարժեն: Մի ժամանակ շատ էի ոգևորված պիեսներով: Իմ առաջին գործը պիես է եղել: Կարծում էի, թե դրամատուրգ եմ: Հիմի էլ որ մտածում եմ, մեկ մեկ նույն մտքին եմ գալիս: Թումանյանն էլ իր մասին այդ կարծիքն ուներ, ասում էր՝ «սպասեք երբ ես դրամա գրեմ, էն ժամանակ կտեսնեք, թե ինչ գրող եմ»: Ասում էր, բայց էդպես էլ չգրեց:

* * *

Նար-Դոսը ծայրահեղ համեստ էր, խիստ անգործնական մի մարդ, որ երբեք չի կարողացել կյանքը կազմակերպել իր արժանիքների համեմատ, երբեք չի կարողացել պաշտպանել սեփական շահը: Եթե ուրիշները մտածել են նրա մասին՝ լավ, եթե չէ՝ շարունակվել է ամեն ինչ առաջվա պես: Դիմել, խնդրել՝ անհարմար էր զգում: Իսկ պահանջել՝ հակառակ էր նրա էությունը: Դրանով պետք է բացատրել, որ նա սրբագրիչի հոգեմաշ աշխատանքը շարունակեց երկար տարիներ, սովետական կարգեր հաստատվելուց հետո էլ, այն ժամանակ, երբ ուրիշ գրողներ և արվեստագետներ, Նար-Դոսի համեմատությունամբ երկրորդական դեմքեր, վաշելում էին այն բոլոր արտոնությունները, որ իշխանությունը ստեղծել էր գրականության և արվեստի աշխատողների համար:

Չէր շփվում, հասարակության մեջ հազվադեպ էր լինում: Այդ պատճառով էլ շատերն անունը լսել էին, երկերը կարդացել, բայց իրեն չգիտեին, չէին ճանաչում:

Հազարից մեկ էր պատահում, որ տեղ գնար, ճանապարհորդեր: Եվ դա հասկանալի էր, որովհետև կյանքի ամենափոքրիկ դժվարությունից հուսահատվում էր, գլուխը կորցնում, չգիտեր, թե ինչ պետք է անի: Նրա մասին միշտ ուրիշներն են հոգ տարել, տան՝ կինը կամ հարազատները, դուրսը՝ ընկերները:

Մի անգամ Նար-Դոսին հրավիրում են Երևան՝ Հայաստանում սովետական կարգերի հաստատման տարեդարձի հոբելյանական օրերին մասնակցելու։ Մեծ դժվարություններ, տանեցիկների և բարեկամների ճնշման տակ հրավերն ընդունում է և գալիս։ Հյուրեր շատ են լինում և նրան տեղավորում են հյուրանոցի այն սենյակում, ուր ապրում էր Արազին, որ Թիֆլիսից նոր էր Երևան փոխադրվել։

Հասնում է վերադարձի օրը։ Արազին տեսնում է, որ Նար-Դոսը մոռալ նստած է, հարցնում է, թե ինչ է պատահել։

— Ինչպե՞ս պիտի գնամ։

— Շատ պարզ։ Պետք է տոմս առնել։

— Հենց էդ է, որ կա, որտե՞ղ պիտի առնեմ, ինչպե՞ս պիտի առնեմ։

Արազին խոստանում է օգնել։ Միասին գնում են քաղաքային կայարան։ Մեծ հերթ է լինում։ Նար-Դոսը բոլորովին շփոթվում է։ Արազին խնդրում է սպասել, իսկ ինքն անցնում է կայարանապետի գրասենյակը և ասում, որ հայտնի դրող Նար-Դոսը պետք է Թիֆլիս մեկնի, խնդրում է զնացքի տոմս։ Անմիջապես տալիս են։ Երբ Արազին բերում է տոմսը, տալիս Նար-Դոսին, վերջինս զարմացած նայում է նրան ու ասում.

— Դու այդ ինչ գործնական մա՞րդ ես եղել, Արազի։ Զէ՛, դու կապրես, կապրե՞ս, Արազի՛։

✻ ✻ ✻

Ոչ ոքի նեղություն չէր տա և եթե պատահեր, որ որևէ մեկը նրա համար մի շնչին բան աներ, չէր մոռանա երբեք, միշտ կհիշեր, տված խոսքը խոսք էր, բարեխիղճ, պարտաճանաչ, չլինի թե մի ուրիշն իր պատճառով նեղվի, իր համար տուժի։

Պատմում են, թե ինչպես մի ծանոթ Նար-Դոսին և նրա հետ միասին մի ուրիշ ընկերոջ հրավիրում է իր տուն։ Պայմանավորված ժամին գնում են և տեսնում, որ տանը չի։ Ընկերը զայրանում է, ասում, որ եթե հանդիպեն, ինքր կշշպռի, ինչ որ պետք է՝ կասի, իսկ Նար-Դոսը խնդրում է

ձեացնել, որ իբր ինչ որ պատճառով իրենք չեն կարողացել գնալ, ներողություն խնդրել, որ խոսք են տվել ու չեն պահել, որ չլինի, թե հանկարծ այն հրավիրողն իրենց պատճառով սրտենդի, որ սրանք եկել են ու ետ դարձել: Ու այդ բավական չէ, երդում է առնում նրանից, որ հանդիպելիս իսկապես զգացնել չի տա:

* * *

Մի օր նրան շրջապատեցին մի քանի երիտասարդ գրողներ և հայտնեցին իրենց ցանկությունը զրուցելու անվանի գրողի հետ: Դեմքին մի ղոհունակ ժպիտ երևաց: Անսովոր այդպիսի հանդիպումներին՝ նույնիսկ հուզվեց: Հայտնեց իր պատրաստակամությունը պատասխանելու մեզ հետաքրքրող բոլոր հարցերին: Պայմանավորվեցինք հաջորդ երեկո գնալ նրա տուն: Գնացինք: Հարցրեց, թե որտե՞ղ ենք ուզում նստել, սենյակո՞ւմ, թե պատշղամբում: Մեկն ասաց, որ սենյակում ավելի լավ է, ավելի ամփոփ:

— Ես էլ այդ կարծիքի եմ:

Ասաց ու հրավիրեց ներս: Բոլորեցինք սեղանի շուրջ:

— Դե՛, ես ձեզ լսում եմ:

Մի երկու հարց տվին, հիմա չեմ հիշում, թե ինչ, պատասխանեց: Հետո մեկն ասաց՝ մեզ հետաքրքրում է, թե ինչպես է ինքը գրում, ինչ մեթոդով:

— Ուզում ենք գրելու արվեստը սովորել ձեզանից:

Նար-Դոսն անմիջապես չպատասխանեց: Մտածում էր, թե ասես դժվարանում էր պատասխան գտնել: Հետո ալսպես խոսեց.

— Սիրելիներս, այդպիսի հարցով պետք է դիմել կլասիկներին և ոչ թե ինձ:

Զարմացած իրար նայեցինք:

— Հա՛, ճիշտ եմ ասում, մի զարմանաք, կլասիկներին՝ Տուրգենևին, Տոլստոյին, Զեխովին: Ա՛յ թե ումից պետք է սովորել: Թե ինչպես են նրանք աշխատել, այդ մասին գրքեր և ուսումնասիրություններ կան:

Ու ասաց, որ թեև ինքը չի կարդացել, բայց հաստատա-

պես գիտե, որ կան: Բայց ավելի լավ է, որ դրա փոխարեն նրանց երկերը ուշադիր կարդանք. սկզբում այնպես, բովանդակութեան հետ ծանոթանալու համար, իսկ հետո, երբ արդեն գիտենք, թե ինչ է կատարվում, կարդանք նորից, մի քանի անգամ: Մի անգամ մեր առաջ խնդիր դնենք հետևել, թե ինչպես է տիպ ստեղծում, կամ ինչպես է հերոսներին խոսեցնում, մի այլ անգամ տեսնենք, թե ինչպես է կառուցում: Սա շատ կարևոր է ստեղծագործութեան մեջ: Ուշադիր լինենք, թե որ գրողն ինչպես է սկսում կամ ինչպես է վերջացնում: Լավ սկիզբ գտնելը մեծ բան է. պետք է կարողանալ և վերջացնել, գտնել հաջող մի կետ և կանգ առնել:

Տղաներից մեկը, որ նոր էր կարդացել «Մահը», հարցրեց, թե քանի տարի է աշխատել վրան:

Ասաց, թե դժվարանում է ասել, սկսել է գրել, որքան հիշում է, 80-ական թվականներին, վերջերին, և 25 տարի շարունակ չի հաջողել լույս ընծայել: Այդ ժամանակամիջոցում մի քանի անգամ անդրադարձել է, մշակել, սկզբում փոքր գործ էր, հետո մեծացավ, աճեց և ընդունեց այժմյան ծավալը: Երևի իրար վրա գումարած 8—10 տարի աշխատել է:

Ես հարցրի՝ եթե շահողվեր «Մահը» տպագրել, դարձյալ կմշակե՞ր:

— Անշուշտ: Մշակելուն վերջ չկա, ամեն կարգալիս մարդ ուզում է մի բան փոխել: Բայց կա մի կետ, երբ դրան հասնում է՝ արդեն վերջ, հիմքին այլևս ձեռք չի տալիս և փոփոխությունները դառնում են մասնակի, ավելի ոճական: Մարդ նայում է, որ չլինի, թե մի բառը նույն նախադասութեան մեջ երկու կամ մի քանի անգամ կրկնվի հանկարծ, որ կազմված նախադասությունը ծանր չլինի, ոչ էլ խճողված: Երբեմն կատարում է ավելի կարևոր ուղղումներ:

Լռեց: Ժպտաց:

— Այդքան երկար տարիներ աշխատել եմ, համարյա քառորդ դար աչքս վրան է եղել ու մի օր, այն էլ վերջերս, բարեկամներիցս մեկը հակասություն գտավ իմ վեպում, երկրորդ մասի վերջում պատահողոված, կտոր-կտոր եղած լրագիրը երրորդ մասում մեջտեղ է գալիս բոլորովին ան-

վթար վիճակում: Տեսնո՞ւմ եք, թե ինչքան ուշադիր պետք է լինել:

Կանգ առավ և մի փոքր հետո շարունակեց.

— Չեք կարող երևակայել, թե այդ մի վրիպումը ինչպիսի ցավ է պատճառում ինձ:

* * *

Նար-Դոսի հոբելյանն էր. լավ հիշում եմ, ասես երեկ եղած լինի: Նար-Դոսը հագել էր սև կոստյում, հնաձև մի զգեստ, որ երևի կարվել էր անցյալ դարի վերջերին: Երևում էր, որ շատ տարիներ չէր հագել: Կարծես կոստյումը իրենը չլիներ, այլ մի ուրիշից, պարզապես այդ երեկոյի համար փոխ առած: Հոբելյանը չուներ ոչ փայլ, ոչ էլ աղմկալի հանդիսավորություն. հիշեցնում էր լավ պիեսի ձախողված քեմադրություն: Նար-Դոսն այնքան ծայրահեղորեն համեստ էր, այնքան անշուք, որ ամեն մի շոնդալի խոսք, որ մի այլ դեպքում կհնչեր, տպավորություն կթողներ՝ այժմ կորցնում էր իր իմաստը:

Նստած էր լուռ և, ինչպես միշտ, դեմքը ոչինչ չէր արտահայտում: Բայց մեկ-մեկ էլ երևում էր, որ լավ չի զգում, նեղվում է, կարծես նույնիսկ ամաչում, որ իրեն այդչափ գովում են, նման այն մարդկանց, որ իրենց օտարոտի են զգում նոր կոստյում հագած առաջին երկու օրը:

Լավ հիշում եմ հոբելյարի վերջին խոսքը: Բավական երկար խոսեց. միտքն այն էր, թե անցյալում որևէ հայ գրողի մտքովը երբեք չէր անցնի, որ իր հոբելյանին կարող է ներկա լինել լուսավորության միսիստրը: Իսկ այսօր, խորհրդային իրավակարգում այդ հնարավոր է և ահա իր, մի համեստ հայ գրողի հոբելյանին ներկա է երկրի լուսավորության ժողովուրդ:

Այս նույն մտքին նա անդրադարձավ մի քանի անգամ տարբեր ձևակերպումներով: Խոսեց այնքան երկար, որ դահլիճում տրտնջացողներ եղան: Մի ուսուցիչ, որ կողքիս էր նստած, դժգոհեց.

— Ի՞նչ երկար է խոսում:

Մաթևոս Դարբինյանը, որ սկզբում նախադաճության մեջ էր, իսկ հետո եկավ դահլիճ, և բազմեց կնոջ կողքին, դարձավ դժոհոհող ուսուցչին և կամացուկ ասաց.

— Նղբայր, ի՞նչ եք ուզում, այդ մարդը քառասուն տարի չի խոսել, բա իրավունք չունի իր ամբողջ կյանքում գոնե մի անգամ երկար խոսելու:

* * *

1933 թվին էր: Այդ օրերին էր, որ ես ապրեցի իմ կյանքի առաջին ծանր և ամենամեծ հիասթափությունը: Ամռան մի շոգ օր մտա խմբագրի առանձնասենյակը: Ես այն ժամանակ կիսատ էի թողել ուսումս, եկել էի Թբիլիսի և աշխատում էի խմբագրատանը: Չեմ հիշում այժմ, թե ինչ գործ ունեի խմբագրի հետ, որը մի ազնիվ ու բարյացակամ մարդ էր: Նստած գրում էր արագ-արագ: Ասաց, որ մի բոպե սպասեմ, հետո տվեց գրածը, խնդրեց տալ մեքենագրուհուն և պատվիրեց ասել, որ շտապ կերպով մեքենագրեն: Նայեցի, տեսնեմ Նար-Դոսին նվիրված մահախոսական է:

Դիտեի, որ Նար-Դոսը ծանր հիվանդ է, լայց մահվան մասին լուր չունեի: Շրջվեցի դեպի խմբագիրը:

— Վախճանվե՞լ է:

— Դեռ չէ. բայց մի օրվա կյանք է մնացել:

Մնացի ապշած. մարդը դեռ կենդանի է, իսկ նրա մահվան առիթով հոգված են գրում արդեն: Դա ինձ սարսափելի թվաց. ուզում էի ճշալ, բողոքել: Խմբագիրը, որ ըստ երևույթին, հասկացավ, թե ինչ է կատարվում հետո, ժպտաց, կամեցավ մեղմել.

— Բժշկի ասելով, կարող է նույնիսկ այսօր մեռնել:

Հետո ավելացրեց.

— Որ մեռնի՞ գլուխներս այնքան խառը կլինի, որ գրելու ժամանակ չենք գտնի:

Դրանից հետո, բավական երկար ժամանակ, երևի մի ամբողջ տասնամյակ մահախոսական հոդվածների անկեղծությանը չէի հավատում. բոլորն էլ թվում էին վաղօրոք գրված:

Մի, թե երկու ժամ հետո խմբագիրն ասաց, որ Նար-Դոսն իրեն շատ վատ է զգում, կարգադրեց հոգվածն ուղարկեն շարելու, իսկ ինքը, պատրաստվեց գնալու հիվանդի մոտ: Խնդրեցի ինձ էլ հետը տանել: Մեզ միացավ մի ուրիշը ևս, չեմ հիշում, թե ով: Կես ժամ անց, Նար-Դոսի մոտ էինք: Շատ նիհարել էր, դեմքը մորուսած էր, աչքերը խոր ընկած, հայացքը բոլորովին անփայլ: Երբ մտանք, նայեց մեր կողմը, նայեց անտարբեր, ոչինչ չարտահայտող աչքերով և հայացքը, ինչպես առաջ էր, գամեց դիմացի պատին:

— Վերջացավ... ամեն ինչ վերջացավ...

Շատ դժվարությամբ, կարծես հեգելով ասաց Նար-Դոսը: Խմբագիրը թե.

— Ի՞նչ եք ասում. դուք դեռ երկար կապրեք:

Ես մնացի ապշած. հոգվածը տալարան է ուղարկել, իսկ իրեն ինչ է ասում: Նար-Դոսը աչքերը նրա կողմը թեքեց: Հայացքի մեջ կշտամբանք կար. միթե այդ պահին էլ կարելի է կատակ անել,— կարծես ասում էին նրա աչքերը:

Իսկապես, գոնե լոեր, ձայն չհաներ:

— Երջանկությունը...

Այլևս չշարունակեց, ավելի ճիշտ չկարողացավ, կամ դուցե չուզեց, ավելորդ համարեց: Ինչ էր կամենում ասել՝ այդպես էլ չիմացանք:

Մահամերձի սնարին կանգնած էր տիկին Օլգան և հագիվ էր զսպում արցունքը: Մի կողքին Նարն էր, տխուր աչքերով, մյուս կողքին՝ աղջիկը, որ դեմքը թաքցրել էր մոր կրծքի մեջ և միայն թիկունքն էր մատնում, թե ինչ է կատարվում հետը:

Բժիշկը շեր սխալվել. Նար-Դոսն այդ գիշեր վախճանվեց և մյուս օրը լրագրում լույս տեսավ մեր խմբագրի հոգվածը, դրված մի այնպիսի հուզիչ շնչով, որ կարծես, թե սիրելի գրողի մահվան լուրը հանկարծակիի է բերել նրան, ցնցել, տակն ու վրա է արել նրա հոգին և դրա անզոհություն տակ էլ տեղն ու տեղը նստել ու գրել է:

Թաղումը բազմամարդ չէր: Սովորականի համեմատութեամբ շատ մարդ կար, բայց Նար-Դոսի համար, իհարկե, քիչ էր: Թեև ճառեր ասացին, մեծարեցին, բայց շուք և հանդիսավորութիւն չկար: Մարդ ակամա մտածում էր, թե Նար-Դոսի մահն էլ այնպես եղավ, ինչպես կյանքը:

Ճառեր էին ասում, բայց ինձ թվում էր, որ բառերի աղմուկ եմ լսում, կարծես ոտքի տակ ընկած ընկույզի կճեպը ջարդվելիս լիներ:

Ստեղծեց, բայց չվայելեց: Տվեց, բայց չստացավ: Երազեց և երազն էլ երազ մնաց: Ինչքա՛ն շատ մարդ է կյանքից գնում, կյանքին պարտական: Եվ ինչքան քչերը, որոնց ինքը՝ կյանքն է մնում պարտք:

Ահա դրանցից էր Նար-Դոսը:

Մի օր, եթե չեմ սխալվում 1934-ի ապրիլ ամսի վերջերին էր, Գրողների տանն ինձ ասացին, թե Չարենցը դանգ է տվել ու ասել, որ մոտը գնամ: Մի փոքր ժամանակ անց նրա տանն էի արդեն: Գրասենդանի մոտ նստած պարապում էր. բարձրացրեց գլուխը և անբավական նայեց ինձ: Դժգոհ էր, որ ընդհատեցի զբաղմունքը: Բացատրեցի գալուս պատճառը: Ասեա ինչ-որ հիշելով, խնդրեց մի քանի ըուպե սպասել: Գլուխը նորից թաղեց զրքերի մեջ և շարունակեց գրել: Ըստ երևույթին, ընդհատված միտքն ուզում էր ավարտել: Եվ իսկապես, մի-երկու ըուպե անց տեղից վեր կացավ, լուռ անցավ սենյակով և ապա առաջս կանգնելով, ասաց.

— Մերուկը, հասկանո՞ւմ ես, դժգոհ է...

Չհասկացա, թե ում մասին է խոսքը:

— Շիրվանը, — բացատրեց նա:

Պարզվեց հետևյալը: Պետհրատը լույս էր ընծայել Թումանյանի, Սունդուկյանի և Չարենցի մեծագիր միհատորյակները: Շիրվանզադեն հարց էր բարձրացրել՝ իր երկերի մի հատորյակն էլ հրատարակել, անպայման նույն ձևով: Չարենցը, որ այն ժամանակ Պետհրատի Գեղարվեստական գրականության բաժինն էր գլխավորում, նրա բողոքը իրավացի էր համարել և անհրաժեշտ գտել ամենամոտիկ ապագայում գոհացում տալ՝ հրատարակելով նրա լավագույն երկերը մի հատորով:

Հարցրի, թե իսկ ես ինչ կապ ունեմ դրա հետ: Բանաստեղծը բացատրեց, որ պետք է օգնեմ Շիրվանզադեին՝ կազմելու ժողովածուն:

Երբ ևս հայտնեցի պատրաստակամութիւնս՝ ասաց.

— Ուսանողի համար դրանից էլ լավ բա՞ն. համ փող կստանաս, համ նշանավոր պրողի հետ կշփվես:

Եվ նա առաջարկեց առաջիկա տասը օրվա ընթացքում, ուսանողական պարապմունքներից բացի, ոչինչ չանել, զբաղվել միայն Շիրվանզադեով, վերցնել նրա ութհատորյակը, նորից կարդալ և լավագոյն երկերի ցանկը կազմել: Այդպիս էլ արի, թողի ամեն ինչ, երբեմն նույնիսկ համալսարան դասախոսութեան չէի գնում, տանը փակված՝ Շիրվանզադե էի կարդում, միայն Շիրվանզադե, երբեմն մի անգամ կարդացածը վերակարդում: Այդ աշխատանքը շատ ավելի ժամանակ պահանջեց, քան սահմանել էր Զարենցը:

* * *

Նորից Զարենցի մոտ եմ, տանը: Աչքի անցկացրեց ընտրածս երկերի ցանկը: Մի անուն, հիմա չեմ հիշում, թե ինչ,— ջնջեց, և մի պատմվածք էլ ավելացրեց, որ իմ ցանկում չկար:

— Կով է: Տեսնենք ինքն ինչ կասի:


Ասաց ու վեր կացավ տեղից, մի պահ մտքերի մեջ խորասուզված մնաց, հետո կրկին դարձավ ինձ.

— Անհնար չէ համոզել, բայց նկատի առ, վեճ, առարկութիւն չի սիրում: Ընդհանրապես դժվար ծերուկ է: Կսիր, ինչ որ կասի, բայց արա քո գիտցածի պես, եթե, իհարկե, համոզված ես, որ ճիշտ ես:

Ապա անցավ ուրիշ հարցերի, հետաքրքրվեց, թե ինչ նորութիւններ կան, հետո նորից վերադարձավ Շիրվանզադեին:

— Ուղիղ գնա մոտը: Ծանոթ ես: Զէ՞: Ուրեմն քեզ պետք է ներկայացնել, ինչպես հարկն է:

Ժպտաց, խորամանկ փայլ առան աչքերը: Մի երկտող գրեց և պատվիրեց հանձնել Շիրվանզադեին:



Մի կես ժամ հետո Շիրվանզադեի մոտ էի, այն հյուրանոցում, ուր նա, սովորաբար, ապրում էր Երևանում եղած ժամանակ, այն ժամանակ, «Ինտուրիստ», այժմ՝ «Երևան»: Դուռը բխեցի: Ներսից մի խուլ ձայն լսվեց.

— Մտե՛ք:

Մտա: Նստած էր գրասեղանի մոտ և այդ օրվա թերթն էր աչքի անցկացնում: Երբ ներս մտա՝ դիրքը չփոխեց, միայն գլուխը շրջեց իմ կողմը: Գլուխը հետ գցած, ինչպես այդ անում են ակնոցակիրները, նայում էր ինձ: Այդ վիճակում նրա դեմքը շատ ավելի խրոխտ տեսք ուներ: Շրթունքները սեղմած՝ խստահայաց նայում էր: Եվ քանի որ նրան դեռևս հայտնի չէր, թե ո՛վ եմ և ինչի՞ եմ՝ եկել՝ այնպիսի անհաղորդ լուսթյամբ էր նայում, որ ճնշված զգացի ինձ:

Հանձնեցի Չարենցի երկտողը: Ըստ երևույթին, բանաստեղծը, գործի շահերից ելնելով, չափազանցված գույներով էր ներկայացրել ինձ: Շիրվանզադեն, նամակը կարդալուց հետո, մի լավ զննեց ինձ և, ինչպես նկատեցի, ստացած տպավորությունը և Չարենցի հանձնարարականը, մեղմ ասած, չհամբնկան իրար:

Չարենցի և իմ կատարած ընտրությունից Շիրվանզադեն դժգոհ մնաց:

— Չէ՛, լավ չէ:

Դեմքին մի խուլ արտահայտություն եկավ: Շրջվեց պատուհանի կողմը և երկար ժամանակ ձայն չէր հանում: Ճշմշուղ լուսթյուն սենյակում:

— Չէ՛, լավ չէ: Այն չէ, — նորից փնթփնթաց քթի տակ, առանց իմ կողմը նայելու:

Հետաքրքրվեցի, թե ինչից է դժգոհ և ասացի, որ վերջապես դա առաջարկ է լուկ, որ արված է իրեն օգնելու նպատակով միայն, կարող է բոլորովին էլ չընդունել և ինքը մի նոր ընտրություն կատարել:

Նա ինձ նայեց զարմացած, կարծես նոր էր տեսնում, որ սենյակում, բացի իրենից, մի ուրիշն էլ կա:

— Այո, իհարկե,— ասաց համեմատաբար խաղաղված ձայնով:

Սակայն, երբ երկրորդ օրը մենք հանդիպեցինք և նա իմ առաջդրեց իր ձեռքով կազմած ցանկը ես, թեև ձայն չհանեցի, բայց տարբերություն չգտա մեր առաջարկածի համեմատությամբ: Միակ տարբերությունն այն էր, որ մեր ցուցակում եղած «Քաոսը» փոխարինվել էր «Կյանքի բովիցով»: Ես այդ ճիշտ չգտա և իմ զարմանքը հայտնեցի, որ Շիրվանզադեի ընտիր երկերի միհատորյակը լույս է տեսնելու առանց նրա գլուխ-գործոցի:

Ջղայնացավ:

— Իսկ ո՞վ ասաց, որ իմ լավագույն գործը «Քաոսն» է: Ես այդ կարծիքի չեմ:

Ես կարծում էի, թե նա այդպես է ասում ջղայնացած պահին միայն: Բայց հետո, մի այլ օր, նա ասաց, որ իր ամենասիրած գործը և իր կարծիքով լավագույնը «Վարդան Ահրումյանն» է: Ես գիտեի, որ Տուրգենևին իր ամենագողտրիկ երկը համարում էր «Ասյան», գիտեի նաև այն, որ իր բոլոր գործերից Տոլստոյն ամենից ավելի հավանում էր «Կազակները»: Հիմա էլ Շիրվանզադեն. ոչ թե «Քաոս», այլ «Վարդան Ահրումյան»: Դա, իհարկե, պարզ կամակորույթյուն չէր:

Հիշելով Չարենցի զգուշացումը, որոշեցի չհակաճառել: Եվ դա օգնեց: Նա մի կարճ ժամանակից, հանդարտած և կամացուկ ձայնով, կարծես չուզենալով, որ մի ուրիշն էլ լսի, ասաց թե «Քաոսը» մի քանի անգամ լույս է տեսել, իսկ «Կյանքի բովիցի» մասին մտածող չկա:

Այդ ասելիս նա այնպես էր մեղմացել, որ մի ուրիշը, եթե ներկա լիներ, անպայման այն տպավորությունը կստանար, թե այդ հարցի վճիռը միայն ինձանից է կախված:

Երբ երեկոյան Չարենցին պատմեցի՝ շատ ծիծաղեց:

— «Քաոսը», ինչ խոսք, պետք է լինի: Բայց կարիք չկա վշտացնել: Թող լույս տեսնի իր ուզածի պես: Դու նրան ասա, որ ես համաձայն եմ և ում որ պետք է՝ կհամոզեմ Պետհրատում: Ես հասկանում եմ նրան. նա «Քաոսին» դեմ չէ, այլ ուզում է, որ «Կյանքի բովիցը» անպայման լինի:

Եվ Չարենցն ասաց, թե Շիրվանզադեի այդ պահանջը

արդարացի հիմք ունի: «Կյանքի բովիցը» նրա նախորդ ժողովածուի մեջ մտավ կիսատ, լույս տեսավ առաջին գիրքը, որ զբաղեցրեց յոթերորդ հատորը, իսկ երկրորդ գիրքն այդպես էլ մնաց:

Հաջորդ հանդիպման ժամանակ Շիրվանզադեին հաղորդեցի Չարենցի ասածը: Անշափ ուրախացավ: Եվ ընդհանրապես այդ օրը բարձր տրամադրություն մեջ մնաց մինչև վերջը: Ինձ հետ էլ առանձնապես սիրալիր էր: Կարծում եմ, սխալված չեմ լինի, եթե ասեմ, որ դա վճռական դեր խաղաց մեր հարաբերությունների մեջ, ավելի ճիշտը՝ նկատելիորեն ջերմացավ նրա վերաբերմունքը: Գրասենյանի դարակից հանեց «Քառսի» առանձին հրատարակությունից մի օրինակ և նվիրեց ինձ:

— Այս էլ քո հավանած «Քառսը». թող հիշատակ մնա ինձանից:

Այդ օրվանից նա ինձ հետ սկսեց դուռով խոսել:

Շիրվանզադեի մտածողությունը կոնկրետ էր, թանձրացած, շեղումներ չէր սիրում, սկսում էր հարցի էությունից և ընդհանրապես մտքի ընթացքը կտրուկ էր, շատ որոշ: Չեմ հիշում մի դեպք, որ խոսակիս հարցից շեղվեր: Բայց, ինչի մասին էլ խոսեր, արտահայտվում էր պարզ, հասկանալի, երբեք չէր խոսի ցրված, չէր թողնի միտքն անավարտ: Չեմ հիշում նրան երկար խոսելիս, բայց որքան էլ երկարեր խոսքը, միևնույն է, ամբողջականության զգացումը չէր դավաճանի նրան: Չէր սիրում բարձրագույն բառեր զործածել, նրա խոսքը հյուսվեղ պատկերավորություն ուներ, ասածն անմիջապես պատկերացնում էիր, մի տեսակ խոսքը կարծես աչքիդ առաջ առարկայանում էր, զգում էիր նրա նյութականությունը շոշափելիության աստիճան:

Կիրիկան նրա հոգուն մոտ չէր, ընդհանրապես բանաստեղծության մի առանձին սիրահար չէր, թեև երբեմն երբեմն կարդում էր նույնիսկ անհայտ, նոր միայն ասպարեկ եկած պոետների: Այդ օրերին լույս էր տեսել Հովհաննես Շիրազի առաջին գիրքը՝ «Գարնանամուտը»: Այդ առթիվ «Գրական թերթում» մի հոդված էի տպագրել:

Իրը անցա հյուրանոց, Շիրվանզադեն աչքի էր անցնում «Գրական թերթը»: Նա ինձ ուրախ դիմավորեց:

— Լավ ես արել, որ գրել ես,— ասաց նա,— շնորհքով տղա է: Թե այդպես շարունակի՝ շատ առաջ կգնա:

Ճիշտ ասած՝ ինձ ուրախացրեց Շիրվանզադեի ասածը, մանավանդ, որ բոլորին լավ հայտնի էր նրա դժվար հաճությունը: Բայց ես չգիտեի, որ իմ այդ ոգևորությունը հաջորդելու է հիասթափություն: Նա հոգվածը չէր կարդացել, այլ միայն աչքի էր անցկացրել: Գոհ էր մնացել, որ ընդհանուր գնահատականը դրական է: Նա հոգվածը կարդացել էր իմ գնալուց հետո, և երբ հաջորդ օրն անցա մոտը, մեղմ ասած՝ հանդիմանեց.

— Ավելի լավ կարծիք ունեի քո մասին:

Իմ հոգվածում, հիմա միտս չէ, թե ինչ կապակցությամբ հիշատակվում էր արևմտահայ բանաստեղծներից մեկը:

— Ի՛նչ եք կուռք դարձել ու պաշտում: Պետք է կովել դրա դեմ, իսկ դու հիացմունքով ես խոսում նրա մասին: Ինչի՞ նման է: Ես այդպիսի գրականություն չեմ հասկանում, և չեմ էլ ընդունում: Պատերազմ է, մարդիկ արյուն են թափում, իրար հոշոտում, ժողովուրդների բախտն է որոշվում, իսկ նա կանգնել է թե՛ աղվոր էր, իմ թռչունը թևերը բաց թռավ երկնքով, և այլ այսպիսի անհեթեթություններ:

Անմիջապես հիշեցի Շիրվանզադեի հարձակումը Գարեգին Լևոնյանի «Գեղարվեստ» ամսագրի վրա, նրա վեճը Տերտեքյանի հետ՝ Արամ Չարբգի ու Վարուժանի այնտեղ տպագրված բանաստեղծությունների առթիվ: Այո, դա նրա համոզումն էր, հաստատ ու անդրդվելի, որ ուներ իր հին արմատները, գրականությունը հասարակական կյանքի անմիջական հոգսերին ծառայեցնելու. պահանջից ծնված մի բողոք, կյանքի աննյութական, վերացական պատկերացումների, հասարակայնորեն օգտակար գաղափար չպաշտպանող, չնչին ապրումներ, մանր մտքեր արտահայտող գրականության դեմ. ի՞նչ է ուզում ասել հեղինակը, ի՞նչ օգուտ կարող է տալ դա: Այս էր նրան ղեկավարող գեղագիտական սկզբունքը:

— Գրականությունը, սիրելի՛ս, զվարճության աղբյուր

չէ։ Երբ ինձ ասում են, թե իմ գրվածքը կարդացել են ու մեծ բավականութիւն ստացել, կատաղութիւնս բռնում է։ Ես նրանց օգնում եմ կյանքը իմանալ, մարդուն հասկանալ, իսկ նրանք բավականութիւնից են ճառում։ Գրողը նրա համար է, որ խառնվի կյանքին, օգնի մարդուն ապրել։ Այլ ըմբռնում չունե՛մ և հազար տարի էլ անցնի՝ չե՛մ կարող հաշտվել վերացական, անգաղափար գրականութեան հետ։

Մի փոքր լռելուց հետո.

— Միշտ զարմացել եմ, թե այդ ինչպես է պատահում, որ գրողն իր աչքով տեսած կյանքը թողած, գրում է պատմութիւնից։ Չեմ հասկացել և չեմ էլ հասկանա երևի։

* * *

Սիրում էր կատակել, սրախոսել։ Նրա կատակի մեջ հաճախ խայթ կար, ծակոց, երբեմն նույնիսկ հեգնանք։

Գնունի փողոցի վրա մի սրճարան կար, ուր գրողները, ընդհանրապես արվեստագետները, սիրում էին հավաքվել։ Մի երեկո մի խումբ գրողներ մտան սրճարան։ Ես էլ հետներն էի։ Տեսնենք՝ Շիրվանզադեն մենակ նստած է, իսկ առջևը, սեղանին՝ զարեջրի հինգ-վեց դատարկ շիշ։ Շրջապատեցինք նրան։ Երբ մեկը հարցրեց, թե մեն-մենա՞կ է խմել, պատասխանեց.

— Հապա ինչպե՞ս։

Զարմացած և մի քիչ էլ հեգնական՝ նայեց հարցնողին։ Քթի տակ ծիծաղեց։ Ապա դարձավ բոլորին.

— Ափսոս ուշ եկաք և զրկվեցիք զվարճութիւնից։ Եկան այսինչը և այնինչը, — նա տվեց երկու նշանավոր գրողի անուն։ — Անցան մոտոպս և շտեսան, որ նստած եմ։ Այ՛ն այն անկյունում սեղան գրավեցին։ Երկուսով մի շիշ զարեջուր պահանջեցին։ Երկու ժամ նստեցին, պատկերացնո՞ւմ եք, երկու ժամ, և երկուսով մի շիշ զարեջուր խմեցին, այն էլ կարծեմ ոչ ամբողջովին։ Որքան նկատեցի՝ շիշը դատարկ չէր։

Ասաց ու կուշտ ծիծաղեց։

Խոսք բացվեց Պոռշյանի մասին: Չեմ հիշում առիթն ինչ էր: Կարծեմ ասաց, որ կամենում է հավաքել իր ֆելյետոնները «Մաղբոս» ստորագրությամբ և գրականության ու արվեստի մասին գրված հոդվածներն ու հրատարակել մի առանձին գրքով: Խնդրեց դտնել մեկին, որ արտագրեր այդ ամենը պարբերական մամուլի միջից:

— Ժամանակին ես էլ քննադատ եմ եղել, չէ՞: «Արձադանքում» եղածս ժամանակ, դե՛, ես ամեն ինչ էի: Թերթի իսկական խմբագիրը ես էի. գրում էի առաջնորդող հոդվածներ, կազմում էի լուրեր, բանակոծիվ էի մղում, ֆելիտոն էի գրում, թարգմանություն անում, գրքեր գրախոսում... Մի անգամ էլ Պոռշյանի մասին գրեցի, նեղացավ: Մի կեղտոտ փոր էր նկարագրել, ես էլ գրեցի, թե դա դռնհակություն է, նատուրալիզմ: Երկար ժամանակ նեղացած մնաց, բայց հետո հաշտվեցինք:

Մի փոքր սպասեց, հետո շարունակեց:

— Փնթի մարդ էր, թափթիված, նրա ձեռագրերը, որ ձեռք ընկնեն՝ նայիր, այդտեղ էլ փնթիություն կգտնես: Դե՛, մարդու բնավորությունն ամեն տեղ էլ երևում է, նույնիսկ ձեռագրի մեջ: Վերցրու Պոռշի վեպերը, թափթիված չեն, բա ի՞նչ են: Շատ չէր մտածում, արագ գրում էր, արագ էլ տպում: Կնստեր ու ձեռաց մի վեպ կգրեր: Նյութ շատ ուներ. առողջ էր, հողից ու ժողովրդից, չէի էլ ասի, թե շնորհք չունի, նյութը կենդանացնել գիտեր, բայց Պոռշը արտիստ չէր: Չգիտեմ, հասկանո՞ւմ ես ինձ, թե չէ: Մշակված չէր, բյուրեղացած չէր: Կոմիտասն էլ ժողովրդից էր քաղում իր եղանակները: Ա՛յ՛՛ նա արտիստ էր իսկական: Դա էլ պակասում էր Պոռշին:

Հարցրեց, թե այժմ ինչ եմ գրում: Չեմ կարծում, թե նրան իսկապես զբաղեցնում էր այդ: Նրա հարցը ընկալեցի ավելի որպես ուշադրություն: Ասացի, թե հիմա ոչինչ էլ

չեմ գրում, քանի գնում, այնքան ավելի եմ համոզվում, որ կարդին գրելու համար դեռ շատ գիտելիք է պակասում ինձ: Ամբողջ ժամանակս նվիրում եմ կարդալուն:

Նայեց աչքերիս, կարծես ուզում էր հասկանալ, թե իսկապես այդպես եմ մտածում, թե միայն ձեռի համար եմ ասում:

— Այդ լավ ես անում, որ կարդում ես: Ես էլ եմ կարդալու հափշտակություն ունեցել, բայց դա էլ պետք է իր շահին ունենա: Ես չեմ հարդում այն մարդկանց, որ մի գիրքը հագիվ վերջացրած, անմիջապես նորն են ձեռն առնում: Հիշեցնում են մոլի ծխողներին: Չեմ սիրում: Մի գրքից մյուսը մտածելու, անդրադառնալու ժամանակ է պետք:

Մի փոքր անց շարունակեց.

— Հետո, իմացիր, որ մարդ զարգանում է ոչ միայն կարդալով: Դրիր, շարունակ գրիր, գուրդ չի գալիս՝ տպագրության մի տուր, մի կողմ դիր, քայց զրիր, որովհետև գրելն էլ է մարդուն զարգացնում: Չե՞ս նկատել, որ երկար ժամանակ չգրող մարդը դժվար է գրիչ ձեռն առնում:

★ ★ ★

Երբ ներս մտա՝ Շիրվանզադեն հուզված էր: Ոչ պակաս հուզված էր նաև զրուցակիցը՝ Յուլիկ Խանզադյանը: Վիճում էին: Խոսքի արանքում լսեցի Սունդուկյանի անունը: Լավ հիշում եմ Խանզադյանի վերջին խոսքը.

— Նախ, այդպես չի եղել, իսկ եթե եղել էլ է՝ չպետք է գրեիք:

Ասաց ու գնաց:

Ես գլուխս կախ աշխատում էի, բայց աչքի ծայրով հետևում էի Շիրվանզադեին, որը հոգեկան խռովքի մեջ ընկած, չգիտեր, թե ինչ անի: Մեկ վեր էր կենում, մի քանի քայլ անում, մեկ նստում, մեկ օրվա լրագիրն էր ձեռն առնում, բայց աչքի շանցկացրած վայր դնում, մեկ ակնոցի ասպակիներն էր թաշկինակով մաքրում:

Մի փոքր անց խաղաղվեց.

— Երեւակայում ես, պահանջում է, որ Սունդուկյանին ներկայացնեմ ոչ թե այնպես, ինչպես ես եմ տեսել ու հասկացել նրան, այլ ինչպես ինքն է պատկերացնում: Ծիծաղելին էլ այն է, որ հետը ծանոթ էլ չի եղել: Հիմի ինձ դասեր է տալիս, թե այս այսպես է, այն էլ այնպես: Ասա, դու որ տեղից գիտես:

Լոեց:

— Ձէ, ես կարեւորութիւն չէի տա, եթե այդպես միայն Յուլակը մտածեր: Յավն այն է, որ հիմի հուշ գրողները ղեկավարվում են «մեռածի մասին կամ լավ, կամ ոչինչ» նշանաբանով: Եվ ինչ է ստացվում՝ գունազարդված նկարապրութիւն. ո՛չ թուլութիւններ է ունեցել, ո՛չ էլ որեւէ թերութիւն, այլ եղել է առաքինութիւնների մի կատարյալ մարմնացում:

Նորից լոեց:

— Է՛հ, եղա՞վ, իհարկե՞ ոչ: Մարդուն պետք է ներկայացնել այնպես, ինչպես եղել է, ինչպես դու նրան տեսել ես: Հուշը նրա համար է, որ ճանաչես, ճիշտ ճանաչես: Ես չեմ հասկանում, թե ինչի են մարդիկ այդպես վրդովվում, երբ ասում ես, թե այսինչ մեծ մարդը այսպիսի թուլութիւններ է ունեցել կյանքում. մեկը մանր է եղել, մի ուրիշը գծուծ կամ ժլատ: Անմիջապես վրդովվում են, աղմուկ բարձրացնում, մեղադրում, թե այդ ինչպես համարձակվեցիր ստվեր դրել նվիրական անունների վրա: Նախ վատածողութիւն և եթե ուզում ես՝ մի քիչ էլ գավառականութիւն:

Դռան բախոցն ընդհատեց Շիրվանզադեի խոսքը: Ներս եկավ մի անծանոթ մարդ: Շիրվանզադեն գլխարկը, ձեռնափայտը վերցրեց և շտապեց դուրս, ասելով, թե ինքը մի երկու ժամից կգա:

Եկավ ավելի շուտ, քան ասել էր, բայց, ցավոք սրտի ալլես չվերադարձավ ընհատված զրույցին: Սակայն մի երկու օր հետո, երբ ժողովածուի մեջ տեղադրում էի Շիրվանզադեի արդեն աչքի անցկացրած «Կյանքի բովիցի» առաջին մասը և նայում, թե ինչ է արել, տեսա, որ Սունդուկյանին վերաբերող գլխում մի խիստ արտահայտութիւն ջնջել է:

Մի օր Շիրվանզադեի մոտ եկավ մի երիտասարդ գրող և խնդրեց կարդալ իր վիպակը: Շիրվանզադեն նրան սառն ընդունեց, դեմքի դժգոհ արտահայտությամբ, և մերժեց, ասելով, որ հիմա շատ զբաղված է և չի կարող կարդալ: Երիտասարդն ասաց, թե ինքը հետո կանցնի, երբ Շիրվանզադեն ազատ ժամանակ կունենա:

Ես չգիտեմ, հետո անցա՞վ Շիրվանզադեի մոտ, թե ոչ, բայց որ վերջինս հրաժարվեց նրա երկը կարդալուց ոչ միայն ժամանակ չունենալու պատճառով՝ այդ ինձ համար կաակածից վեր էր:

Երբ երիտասարդը գնաց, Շիրվանզադեն ասաց, թե ինքը միշտ չէ, որ մերժում է, բայց, ճիշտն ասած, ընդհանրապես չի սիրում երիտասարդ գրողների գործեր կարդալ: Հանդիստ չեն տալիս, մեկը պիես է գրում, մյուսը պատմվածք, վեպ, երբեմն էլ պատահում է, տր բանաստեղծներ են գալիս, և բոլորն էլ ուզում են, որ կարդա, լսի իրենց, դիտողություններ անի: Չի կարող այդ անել, ավելի ճիշտ՝ դժվարանում է անել, և ոչ թե նրա համար, որ ժամանակ չունի, կամ ալարում ու զլանում է: Չէ՛, չէ՛, պարզապես դժվարանում է իր վրա պատասխանատվություն վերցնել:

— Դժվար գործ է, և չի կարելի դրան մատների արանքով նայել: Երբ երիտասարդը փոշիծված գրողին ձեռագիր է բերում՝ նրան մի հարց է հետաքրքրում, թե ինքը գրող կդառնա՞, թե չէ: Դե՛, արի ու վճռիր: Կարդում ես, և կարծես թե տվյալներ կան, ոգևորում ես, խրախուսում, նա էլ ամեն ինչ թողած՝ գրում է, գրում, բայց վերջիվերջո գրող չի դառնում: Եվ այդ պատճառով էլ ուրիշ բան էլ չի դառնում: Է՛հ, կարո՞ղ ես հանգիստ լինել: Հակառակն էլ է պատահում. կարդում ես ձեռագիրը, և հեղինակը քեզ ոչ մի հույս չի ներշնչում, բայց տարիներ են անցնում և տեսնում ես, որ կարգին գրող է դարձել: Այո՛, երևակայիր, այդպես էլ է լինում, որ ուշ է բացվում: Ի՞նչպես որոշել. կարդում ես և չես հավանում, և նա էլ քեզ հավատալով՝ թողնում է, այլևս

չի գրում, այնինչ գուցե գրեր, գրեր և մի օր բացվեր: Այո՛, տվազ գրողի մի անզգուշ խորհուրդը կարող է կործանել մի լավ ապագա, և հակառակը: Երևի կարդացած կլինես. իմ մի խոսքը պատճառ դարձավ, որ Ադամյանը վառարան ձգի իր մի ձեռագիրը: Ես ոչ ոքի մոտ չեմ կարդացել իմ երկերը: Եվ ի՞նչ է, գրող չդարձա՞:

Լոեց, հոգոց քաշեց և ապա ավելի հանգիստ շարունակեց.

— Ահա, համեցեք, սեղանիս վրա է:

Եվ նա ցույց տվեց սեղանի վրա դարսված աշակերտական կապտակազմ տետրեր, թվով տաս հատ: Հարցրի, թե ի՞նչ է:

— Վեպ է: Հեղինակը երիտասարդ է, բերել է, որ կարդամ, կարծիք հայտնեմ:

— Հետո, բոլորը պետք է վարդա՞ք:

Ժպտաց:

— Շատ գոհ կլինեի, եթե բավականանար այդքանով: Ասում է սա առաջին հատորն է, բերելու եմ նաև երկրորդը: Կարծեմ երրորդն էլ գրելու մտադրություն ունի:

— Ուղարկեցեք Գրողների միություն:

— Ասել եմ, չի համաձայնում: Ուզում է, որ անպայման ևս կարդամ: Ասում է մյուսներին չեմ վստահում, սա առաջին երկս է: Հետաքրքիր է, չէ՞, գրիչ է վերցրել-չի վերցրել՝ վեպ է գրել, փառքի հետևից է վազում անպիտանը, ուզում է ընթերցողին անպայման վեպով ներկայանալ, հաստ զրքով: Պատմվածքը ի՞նչ է, մի քանի էջ, կարող է և չնկատվել:

Հեգնական մի շեշտ կար նրա ձայնի մեջ:

— Ես էլ այդպես էի. առաջին գրածս վեպ էր: Վեպի փառքը հափշտակել էր ինձ: «Հրդեհ նավթագործարանում» պատմվածքս այդ վեպի մի հատվածն է: Վեպը տպվել է տաճկահայոց ինչ-որ թերթում, անունը չեմ հիշում: Վեպս կոչվում էր «Քառս»: Կիսատ թողի, տեսա, որ չէ, վեպ գրելը իմ բանը չէ:

Երբ ներս մտա՝ Շիրվանզադեն անկողնումն էր, իսկ դիմացը՝ նստած էր անծանոթ մի մարդ, ըստ երևույթին. կապտակազմ տետրերի հեղինակը, որովհետև ազատ աթոռի վրա այդ տետրերն էին դրված: Ես այդ մարդուն առաջին անգամն էի տեսնում, հետո էլ այլևս չտեսա: Նստած էր լուռ, առանց ձայն-ծալտուն հանելու, լսում էր, ինչպես նկատեցի, անբավական: Երևի այլ խոսք էր սպասում, քան ասում էր Շիրվանզադեն:

Թե ինչ էր ասել մինչև իմ գալը՝ չգիտեմ, բայց, երբ սենյակ մտա, նա արդեն ավարտում էր գրույցը: Ես գրավեցի իմ տեղը գրասեղանի մոտ և իբր թե իմ գործն եմ անում, գրի առա Շիրվանզադեի գրույցից հետևյալը.

— Ձեր մեջ մի ծայրահեղ հակում եմ նկատում՝ ինչպես էլ լինի գեղեցիկ գրել: Դուք շարունակ եք լեզուն: Ես դա համարում եմ վնասակար ձգտում: Ում է հարկավոր այդ ոճական բարրություն: Պարզության փոխարեն խճճվածություն և ծանրաբեռնվածություն: Գրեք ճիշտ հակառակ ձևով. ոչ մի ավելորդ բառ: Պետք է այնպես գրել, որ կարդացողը ոչ բառ կրճատելու ոչ էլ ավելացնելու պահանջ չզգա, ոչ էլ հղած բառը ուրիշով փոխարինելու ցանկություն ունենա: Զգտեք մտքի հստակ ձևակերպմանը մաքսիմալ չափով: Դուք պետք է կարողանաք այնպես պատմել, որ ընթերցողի մեջ առաջ բերեք նկարագրվածի ֆիզիկական զգացողություն: Դուք ածականախեղդ եք անում լեզուն. ես ածականին դեմ չեմ, եթե գտնված է ճիշտ, ջերմությանը՝ նույնպես, միայն տեղին լինի: Դեմ եմ պճնասիրության: Կողմնակից եմ թվաբանական հստակության հասնող ճշգրիտ ձևակերպման:

Շիրվանզադեն թեև խոսում էր հանգիստ, բայց երևում էր, որ հազիվ է զսպում իրեն, որ ձայնը չբարձրացնի: Խոսում էր շուր ու խիստ, վիրավորված ու մի փոքր էլ դառնացած: Ու երբ տետրերի հեղինակը, ներողություն խնդրելով պատճառած անհանգստության համար, շնորհակալություն հայտնեց ու գնաց, Շիրվանզադեն ասաց.

— Ամբողջ էությունս տակն ու վրա է լինում, երբ մար-
դու մեջ, թեկուզ տաղանդավոր, նկատում եմ ավելի գեղե-
յուն ու առաքինի երեւալու ցանկություն:

* * *

Չարենցը մի օր հետաքրքրվեց աշխատանքների ընթաց-
քով: Պատմեցի: Ասաց, թե հարցուփորձ արա, տես, թե ինչ
է ասում, ժողովածուին առաջաբան կցե՞նք, թե չէ, և եթե
այո՞ւ՝ ապա ո՞վ է նրա կարծիքով ամենահարմարը մեր
պրականագետներից:

Մյուս օրը հաղորդեցի Շարվանզադեին Չարենցի ասածը
և հարցրի, թե ինքը ինչպես է նայում դրան:

— Ո՞վ գրի, իսկապես:

Հարցական նայեց ինձ: Նկատելի էր, որ դժվարին կա-
րողության մեջ է, չէր կարողանում որոշել: Խոսք բացվեց
բնադատների մասին: Առաջ էլ նկատել էի նրա մեջ
բնադատության հանդեպ ոչ-համակրական վերաբերմունք:

— Ինչի՞ եմ նման մեր քննադատները. ոչ իրենք են
բանի նման, ոչ էլ գրածները: Ճիշտ եմ ասում,— ասաց ու
ծիծաղեց: — Տես՝ այս մեկը,— և նա տվեց այն ժամանակվա
հայտնի քննադատներից մեկի անունը: Բոյ շունի, նայում
ես՝ ոնց որ դատարկ տակառ լինի փողոցով գլորվելիս, իսկ
սպա լավ հիշիր, պատկերացրու այսինչի դեմքը, կարծես
դիտավորյալ այգուկս այլանդակ ծնված լինի, որ իր կեն-
դանի օրինակով հաստատի Դարվիների թեորիան: Բա այս
ինչը, կարծես սովեր լինի, այլված լուցկի:

Ասաց ու ծիծաղեց:

— Գիտես, ո՞վ լավ կգրի, Պողոսը.

Խոսքը Մակինցյանի մասին էր:

Կանգ առավ: Նայեց ինձ, թե ինչ մտածեց՝ չգիտեմ, բայց
հանկարծ պոռթկաց.

— Չէ՛, կարիք չկա, թող առաջաբան չլինի, չեմ ուզում:
Եվ բացատրեց.

— Ընդհանրապես ինչի՞ համար են այդ առաջաբանները.
ինչ կարիք կա, որ հեղինակի և ընթերցողի արանքը մի

ուրիշն էլ խցկվի: Բոլորովին ավելորդ ջանք: Քննադատն ուզում է՝ թող հողված գրի, գիրք, իսկ առաջաբան, չէ՛, պետք չէ: Եթե գրողը գրող է՝ առանց քննադատի էլ ճանապարհ կգտնի դեպի ընթերցողը:

Դեմքին արհամարհական արտահայտություն գծվեց:

— Գիտե՞ս ինչի են նման քննադատները:

Եվ նա մի շատ վիրավորական համեմատություն կատարեց, որից գոհ մնաց: Քահ-քահ ծիծաղեց:

— Հա՛, մոռացա, որ դու էլ քննադատությունամբ ես զբաղվում, ներողություն:

Թեև ասաց մեղավոր ձայնով, բայց չէր կարողանում, այնուամենայնիվ, զսպել ծիծաղը:

Ընդհանրապես չէր կարողանում զսպել իր կիրքը քննադատության վերաբերմամբ, զգացվում էր, որ դադված է, հին վերքերը թույլ չէին տալիս հաշտվել քննադատության հետ: Եվ ամեն անգամ քննադատության մասին խոսելիս՝ որևէ ծանր բան ասում էր:

Մի օր ես անդգուշություն ունեցա խոսք բանալ կեռյի մասին, ջղայնացավ:

— Անունը մի՛ տա:

— Լոեց, երկար լոեց: Թե ինչ էր մտածում՝ չհասկացա: Ըստ երևույթին, ինչ-որ հիշողություններ վերականգնանացան մեջը, դոնե այդպես կարելի էր ենթադրել նրա հետագա խոսքից:

— Վերջը մեղա եկավ: Նամակ գրեց ինձ, թե սխալվել եմ, հիմի եմ հասկանում ու էլ չգիտեմ, թե ինչ: Մեծ նամակ է: Ես նամակներ պահելու սովորություն չունեմ, բայց էդ մեկը պահել եմ: Ինձանից հետո կարող եք հրատարակել: Անկախ ինձանից էլ՝ մեջը հետաքրքրական շատ բան կա:

Մի օր էլ ակնարկեցի իր և Մամբրե Մատենճյանի վեճը: Կարծում էի, թե տարիները մեղմացրած կլինեին նրան, բայց չարաչար սխալվում էի:

— Պարծենկոտի, ինքնահավանի մեկն էր: Չսիրեցի այդ մարդուն: Չկարծես, թե նրա համար, որ քննադատեց սյրեսս, չէ՛, չէ՛, չէ՛, դեռ Փարիզում նրան վռնդեցի իմ սենյակից: Ասում էր, թե որոշել է կործանել հայ գրականու-

թյան բոլոր կուռքերը, նույնիսկ Րաֆֆուն, պատկերացնում
էս՝ Րաֆֆուն:

Մի փոքր լռելուց հետո շարունակեց.

— Ներիր, վրդովվեցի, հանգիստ չեմ կարողանում լսել
այդ մարդու անունը: Ֆանֆարոնի մեկն էր, դերասան՝ ճա-
ռերի մեջ, իսկ ասած խոսքը՝ փուչ, դատարկ:

Ես զղջացի, որ Մատենճյանի մասին խոսք բացի: Շատ
հուզվեց, մի քանի անգամ հազը բռնեց: Ներողություն
խնդրեց ու պառկեց: Մի որոշ ժամանակ հետո Մատենճյա-
նին մոռացած, շարունակեց կարդալ ժողովածուի նյութերը՝
մատիտը ձեռին:

* * *

Երբ մտա՝ նկատեցի, որ տրամադրությունը այնքան էլ
լավ չէ: Մտածեցի, որ գուցե ինձ է այդպես թվում, ոչինչ
չհարցրի և անձայն գործիս անցա:

Մի փոքր հետո ամեն ինչ պարզվեց:

Եկավ Գարեգին Լևոնյանը: Եվ լուռ Շիրվանզադեն բաց-
վեց.

— Քիչ առաջ մի մարդ էր եկել մոտս, չեմ էլ ճանաչում,
թե ով էր: Եկավ, ներողություն խնդրեց ու բացեց սիրտը,
պատմեց, թե հոգեկան ինչպիսի մեծ տրագեդիա է ապրում.
Կինը կապված է իր հիմնարկի պետի հետ: Քայքայվում է
մի լավ ընտանիք, իսկ ինքը ոչինչ չի կարող անել դրա
առաջն առնելու համար: Գրելու համար շատ լավ նյութ է,
մի ամբողջ վեպ կարելի է հյուսել:

Մի պահ լռեց:

— Թեև այդ ամբողջ պատմության մեջ ինքը մի անմեղ
զոհ է, բայց ես տրամադրվեցի նրա դեմ: Մի զարմանա,
սպասիր բացատրեմ միտքս: Ես անկեղծությունը զնահատում
եմ, բայց դա էլ ունի մի սահման, որից այն կողմը չի կարե-
լի անցնել: Հոգեկան կյանքի այնպիսի անկյուններ կան, որ
պետք է առմիշտ փակ մնան ուրիշների համար: Իսկ իմ
այցելուն ոչինչ չթաքցրեց, ամեն ինչ ասաց մինչև վերջ:
Ճիշտն ասեմ՝ աչքիցս ընկավ այդ մարդը, կարեկցության

փոխարեն մի այլ, վիրավորական զգացում առաջացավ մեջս: Վիրավորված էի որպես մարդ: Սա չեմ կամենում մարդուն այդ դրուժյան մեջ տեսնել: Անկեղծ խոստովանության ժամանակ էլ մարդը պետք է իր հոգեկան արժանապատվությունը պահպանի:

Հետևյալի ժպիտը տարակուսանք էր արտահայտում. նա ոչ մի կերպ չէր կարողանում հասկանալ, թե ինչու է Շիրվանզադեն գնահատելու փոխարեն այդպես զրգոված զրուցակցի անկեղծության դեմ:

Շիրվանզադեն շարունակեց:

— Մինչև հիմի էլ չեմ կարողանում Ռուսսոյի գրքի հետ հաշտվել. ով էր ստիպում նրան իր հոգեկան կյանքի զաղտնիքներն այդպիսի անամոթ անկեղծությամբ մարդկությանը խոստովանել: Երբ մարդ անկեղծանում է այն չափ, որ ասում է այն, ինչ դժվարությամբ միայն կարող է ինքն իրեն խոստովանել, նշանակում է դիմացինին չի հարգում, բանի տեղ չի դնում:

* * *

Շիրվանզադեն համարյա թե ձեռագիր չի թողել: Երբեմն կարծում են, թե նրա երկերը գրչի տակից դուրս են եկել հենց այնպես, ինչպես մեզ հայտնի են: Մինչդեռ բնավ էլ այդպես չէ: Թե ինչ էր կատարվում գրողի գլխում, մինչև իր մտքերը կհանձնեք թղթին, չեմ կարող ասել: Ոչ հարցրել եմ, ոչ էլ առիթ է ներկայացել, որ ինքն ասի: Բայց տեսել եմ, թե ինչպես էր գրում, ինչպիսի ահռելի և մանրակրկիտ աշխատանք թափում, պարզապես տանջվում, որ գրած յուրաքանչյուր նախադասությունը լավ ստացվի, իսկ լավ ասելով, նա հասկանում էր:

— Նախ և առաջ՝ ճիշտ, այնքան ճիշտ, որ ոչ մի արարած աշխարհիս երեսին, թեկուզ դա Կանտը կամ անգամ Հեգելը լինի, մեկ է, չհանդգնի երկու կերպ բացատրել գրածդ: Ինձ միշտ էլ ջղայնացրել են այն գրողները, որոնց հասկանալու համար պետք է եղել գլուխ ջարդել, մի քանի անգամ կարդալ:

Միտս չէ հիմա, թե այդ որ գրվածքն էր, բայց լավ հիշում եմ, որ աչքի էր անցկացնում և իր կողմից նայված էջը, որպես արդեն պատրաստ՝ հանձնում էր ինձ: Մի փոքր առաջ տրված էջում, իրար կողք գտնվող նախադասության մեջ, կրկնվում էր միևնույն բառը: Ես գտա, որ ահանջ է ծակում և վիպագրի ուղադրությունը դարձրի դրա վրա: Գրիչը ձեռն առավ, որ ուղղի, բայց երբ նորից կարդաց երկու նախադասությունն էլ, որպեսզի որոշի, թե որը պահպանի, և որը փոխարինի հոմանիշ բառով, նայեց իմ կողմը:

— Զէ՛, թող մնա, թող այդպես մնա:

Եվ բացատրեց.

— Ուրիշ ոչ մի բառ չի բռնի, երկուսն էլ իրենց տեղումն են: Իհարկե, կարելի է մի այլ նույնանիշ խոսք գտնել,— ասաց ու թվեց մի քանիսը,— տեսնում ես, չեն բռնում այստեղ, չէ՛, սա լավ չէ, ինչ անենք որ կրկնվում է: Կրկնվում է, բայց, տե՛ս, թե ինչ ուժ ունի:

* * *

Ինչպե՞ս էր Շիրվանզադեն աշխատում:

Մի առանձին թերթիկի վրա գրում էր նախադասությունը, ապա կարդում և եթե անհրաժեշտ էր գտնում՝ փոփոխում էր գրածը: Մի տեղ բառ ջնջում, մի այլ տեղ՝ ավելացնում: Ուղղածն արտագրում էր մի այլ թերթիկի վրա, իսկ նախորդը գցում զամբյուղ: Եվ այդպես իրար հետևից զամբյուղ էին նետվում բոլոր թերթիկները, մինչև որ նախադասությունը, շարունակ արտագրվելով, ստանում էր նրա ուղած ձևը: Այդ դեպքում միայն նա արդեն վերջնավարիանտը մաքրագրում էր տետրի մեջ և նույն քրտնաջան աշխատանքը կատարում մյուս նախադասությունը գրելիս, նորից առանձին թերթիկների վրա, որոնց տեղն ի վերջո դարձյալ զամբյուղն էր:

Մի օր ասացի, թե ավելի լավ չէր լինի, եթե չոչնչացնեք այդ թերթիկները:

— Իսկ ինչի՞ համար:

— Ապագա ուսումնասիրությունների:

— Այդ ուսումնասիրությունները ոչ ոքի պետք չեն:

Թող գրածի մասին դատեն, ինչպես որ կա, իսկ թե ինչպես եմ գրել, ինչ եմ ջնջել կամ ինչ ավելացրել, ո՞ւմ է հարկավոր: Ոչ ոքի: Մարդիկ իրենց համար զբաղմունք են ստեղծում:

Խոսում էր գրգռված, կարծես ինչ որ մեկին նկատի ունենալով, ու թեև ինձ էր ասում, բայց վիճում էր նրա հետ: Հետո մեղմացավ.

— Տանել չեմ կարող սեագրություն:

Ասում էր ու ունշացնում բոլոր սեագրությունները և այդպիսով համարյա թե ոչ մի հետք չթողնելով իր ստեղծագործական մտքի ընթացքն ուսումնասիրելու համար:

* * *

Եթե Շիրվանզադեով զբաղվող բանաստեղծներից որևէ մեկը մեր պատրաստած միհատորյակի տեքստը փորձի համեմատել գրողի ութհատորյա ժողովածուի տեքստի հետ, ապա այնտեղ կգտնի մանր, բայց ուշագրավ տարբերություններ: Բաղում անգամներ լույս տեսած գրվածքը 75-ամյա վիպասանը կրկին աչքի էր անցկացնում մանրակրկիտ բարեխղճությամբ ու ուղղում: Մի դեպքում լեզուն մաքրում էր հնացած ձևերից, մի այլ դեպքում՝ զրականը փոխարինում ժողովրդական բառով, որպեսզի արտահայտությունը միջավայրը բնորոշող ավելի հարազատ երանվ ընդունի: Երբեմն մի բառը փոխարինում էր մի ուրիշով, գտնելով, որ դա իր ուզած իմաստն ավելի ճիշտ ու դիպուկ կարող է արտահայտել: Նախադասությունը ավելի սեղմ և կուռ դարձնելու նպատակով բեռնաթափում էր ավելորդ և պարաս բառերից, երբեմն երկու ածականից մեկը թողնում, ինչպես և հաճախ դերանունների գործածությունը նվազագույն չափի հասցնում:

* * *

Մի ամիս տեղց մեր միատեղ աշխատանքը: Այդ մի ամսում հաճախ եղա նրա մոտ, երբեմն ամեն օր: Վերջին օրը, երբ նրան հրաժեշտ էի տալիս, բռնեց ձեռքս.

— Քանի՞ տարեկան ես:

Ասացի:

— Երանի՛ քեզ:

Մի պահ կանգ առավ, հետո շարունակեց խոսքը.

— Ինչ ասեմ, ինչ ցանկամ քեզ: Գնահատիր երիտասարդությունդ: Ամեն տարիք իր գեղեցկությունն ունի, բայց հիշիր, ոչի՛նչ, ոչի՛նչ չի հասնի երիտասարդությանը:

Հաջորդ տարի Շիրվանզադեն վախճանվեց:

Այդպես էլ շտեմարմ մեր պատրաստած ժողովածուն, որը տպագրության հանձնվեց նրա մահից հետո: Չարենցն էլ այլևս չկար: Այդ ժողովածուի հետ գործնականապես կապվածներից միայն ես էի մնացել: Ու թեև ամեն կերպ աշխատում էի, որ միհատորյակը լույս տեսնի հեղինակի ցանկության համաձայն, միևնույն է, չհաջողվեց: Պետհրատի ղեկավարները ոչ մի կերպ չհաշտվեցին, որ «Կյանքի բովիցը» կարող է տեղ գրավել այդ միհատորյակում: Առաջարկեցին հանել «Կյանքի բովիցը» և նրա փոխարեն դնել նրա վեպերից «Քառսը»: Այժմ ինձ մոտ է գտնվում «Կյանքի բովիցի» այդ օրինակը՝ Շիրվանզադեի ինքնագիր ուղղումներով: Երբ ամեն անգամ պատահում է առիթ ու ձեռք եմ առնում այդ գիրքը, թերթում էջերը, տեսնում նրա ձեռով կատարած ուղղումները, ինչպես և այն տետրը, ուր ես այն օրերին Շիրվանզադեին նվիրված գրառումներ եմ կատարել, իմ հայացքի առջև է կանգնում պատկառելի ծերունին՝ կոճղի պես պինդ, արծվի պես հպարտ:

Գրառումներ ունեի Բակունցից: Հիշում եմ, նույնիսկ ի մի բերի և պատրաստեցի տպագրության: Եվ հանկարծ... կորան: Հույս ունեի, թե կգտնեմ: Մտածեցի՝ գուցե թղթերի մեջ են ընկել-մնացել, մի օր մեջտեղ կգան: Տարիներ անցան, նույնիսկ մի տասնամյակից ավելի ժամանակ, իսկ գրառումներս այդպես էլ չհայտնվեցին:

Ես ձեռագիր պահելու սովորություն չունեմ: Հենց որ մի բան մեքենագրված պատրաստ է լինում տպագրության, ձեռագիրը ոչնչացնում եմ: Այդպես էլ այս անգամ: Եթե ուրիշների նման ևս էլ ձեռագիր պահեի, կունենայի նշումներս:

Եղածը եղած է, մնում է հիշողությամբ վերականգնել հանդիպումներս մի գրողի հետ, որի պատմվածքները, հատկապես մի քանիսը, պատանեկության տարիներից ի վեր սիրելի են եղել ինձ:

■ ■ ■

Թիֆլիսի հայկական մանկավարժական ուսումնարանի ուսանող էի, երևի տասնհինգ-տասնվեց տարեկան մի պատանի, որն իր երեկոները թատրոններում էր անցկացնում, իսկ գիշերները լուսացնում գրքերի վրա: Ուսումնարանի ուսուցիչներիցս մեկը՝ Նիկոլ Սարգսյանը, իմանալով իմ գրական փորձերը, — ես այն ժամանակ պատմվածքներ էի գրում, — մեծ դասամիջոցին մի անկյուն քաշեց և գաղտնիք հայտնողի խորհրդավորությամբ ասաց, որ կարդամ ինչ-որ



Կհանդիպի ինձ «Մարտակոչում»՝ Ակսել ստորագրությամբ:

Զեմ հիշում, թե առաջինն ինչ էր, որ կարդացի: Բայց հիշում եմ, որ կարդալս ու հափշտակվելս մեկ եղավ: Զեմ հասկանում՝ իսկապե՞ս զգացի տաղանդի ուժը, թե՞ հափշտակութունս թելադրված էր ուսուցչիս ներշնչումից: Իսկ այդ ուսուցչին հավատում էին ամենքը: Հավատում էին անխտիր և աշակերտները, և մանկավարժները: Վեճերի ժամանակ նրա միջամտութունը վերջնական էր երկու կողմի համար էլ: Գիտելիքներն ու ճաշակը ոչ մեկի մեջ կասկած չէին հարուցում, մանավանդ որ դժվարահաճ էր և ամեն ինչ չէ, որ հավանում էր:

Բարեգործական գրադարանի ընթերցողներից առաջինն էի Երեանից ստացվող լրագրերն ու հանդեսները աչքի անցկացնում: Որոնաժա Ակսելն էր: Մի կարճ ժամանակից գրադարանը ստացավ նրա առաջին ժողովածուն՝ «Մթնածոր»:

Սիրահարվածի պես էի, որտեղ նստում էի, այնտեղ Բակունցից էի խոսում: «Մերհավը», «Ալպիական մանուշակը», «Խոնարհ աղջիկը», «Սպիտակ ձին» անգիր գիտեի:

Հավանում էի մի աղջկա, նա էլ ինձ: Հանդիպումների ժամանակ ամենից շատ Բակունցից էի խոսում: Հատվածներ էի կարդում նրան: Սկզբում հաճույքով էր լսում, հետո ձանձրացավ և, զանազան պատրվակների տակ, սկսեց խուսափել ժամադրութուններից: Բավական ժամանակ անց ընկերուհուն գանգատվել էր:

— Զարմանալի տղա է, փոխանակ իր զգացումներից խոսելու, անվերջ Բակունցի շուրջը խորհրդածություններ է անում: Մի օր էլ ինձ ասաց-թե գիտես, դու նման ես Բակունցի հերոսուհուն՝ Սոնային: Մի օր էլ ինձ Խոնարհ անվանեց: Սկզբում ուրախացա, բայց հետո նույնիսկ վիրավորվեցի: Մտածեցի, որ սա ոչ թե ինձ է սիրում, այլ Բակունցի հերոսուհիների հետ ունեցած նմանությունս, իմ մեջ նրանց է որոնում: Շատ պետքս է:

Ոչ ոք չէր կարող իմ ներկայությամբ Բակունցի մասին քննադատական խոսք ասել: Ինչ գիտեի-չգիտեի, մի խոսքով իմ ամբողջ «տեսական» զինանոցը մեջտեղ էի բերում

և պաշտպանում սիրելի գրողին ընկերներին բոլոր հարձակումներին:

Ես չէի տեսել Բակունցին: Չէի տեսել անգամ նկարը: Բայց իմ հրեակայությունը կազմել էր մի հմայիչ պատկեր:

Անցնող տարիների միջով ես տարա ինձ հետ Բակունցի հանդեպ ունեցած իմ սերը: Շատ բան փոխվեց իմ կյանքում հասակ առնելու հետ, բայց Բակունցը, մանավանդ նրա մի քանի պատմվածքներն ինձ համար մնացին որպես թանկագին հիշողություն:

Երբ Ստեֆան Յվայզը անձնասպան եղավ՝ Ֆեդինը մի հոգված գրեց, որտեղ ասված էր, թե ինքը նախանձում է այն ընթերցողին, որ դեռ նոր կարդալու է նրա նովելները: Ես նույնը կարող եմ ասել Բակունցի «Ալպիական մանուշակի» և «Միրհավի» մասին:

Ես շտապում էի տեսնել նրան: Ինչպես էլ լիներ՝ պետք է տեսնեի: Եվ տեսա:

* * *

Ես այն տարիներին երազում էի գրողի ապագա: Ինչպես ասացի՝ պատմվածքներ էի գրում: Երևի կոչված չէի, այլապես չէի հրաժարվի:

Եվ մի օր որոշեցի պատմվածքներիցս մեկը նորից աչքի անցկացնել, խմբագրել, լավ թղթի վրա տպագրել և հանձնել Բակունցի դատին, մանավանդ որ լսել էի, թե «Նոր ուղի» հանդեսի պատասխանատու քարտուղարն է:

Պատմվածքը չեմ պահել, ուստի և նորից կարդալու հնարավորություն չունեմ, բայց մոտավոր կերպով միտս է մնացել բովանդակությունը:

Մի աղջիկ սիրում է մի տղայի: Տղան էլ աղջկան: Համենայն դեպս այդպես է հավատացնում տղան աղջկան: Երկուսն էլ ուսանողներ են: Տղան քաղաքից է: Աղջիկը գավառից է, եկել է մայրաքաղաք ուսում ստանալու և իր հետ բերել իրենց դաշտերի ու երկնքի մաքրությունը:

Հերուսուհու համար աշխարհը մի կողմ, սիրած տղան մի կողմ: Դրանք նրա համար հավասար հասկացողություններ են: Գիրք է առնում ձեռքը՝ չի կարողանում կարդալ, սողերի արանքից իրեն է նայում տղան: Ինչ էլ անում է, ուր էլ գնում է՝ միտքը տղայի հետ է: Սիրում է: Դա իսկական ու մեծ զգացում է:

Մի օր տղայի հետ ժամադրություն չունենալով՝ գնում է հանրակացարան նրան տեսնելու և սենյակի կիսաբաց դռնից վկա է դառնում մի սարսափելի տեսարանի. տղան գրկել է իր ուսանող ընկերուհիներից մեկին և համբուրում է: Նա էլ իբր դիմադրում է՝ ծղրտում, քրքշում, բայց թույլ է տալիս:

Աղջկա գլխին սառը ջուր է մաղվում: Աչքերը մթնում են: Հազիվ է ոտքերի վրա մնում: Դուրս է վազում, ինչպես ցնորված: Փղոցում արդեն մութ էր և անձրև: Աշխարհից, մարդկանցից հիասթափված՝ չափչփում է փողոցները: Բավական թափառելուց հետո, ուշադրություն չդարձնելով՝ գնում հասնում է և ուժասպառ հենվում մի սյան այն փողոցում, որտեղ, սովորաբար, իրենց մարմինը վաճառող փողոցային աղջիկներն էին լինում: Մոտենում է նրան մի տղամարդ և առաջարկում հետը դնալ: Եվ նա, լուռ, հետևում է նրան: Անտարբերությունը աշխարհի, կյանքի ու իր անձի նկատմամբ հասնում է այնպիսի չափերի, որ երբ տեղ են հասնում, թույլ է տալիս անձանոթին իր հետ վարվելու ուղածի պես. նրա համար արդեն մեկ էր: Նա կորցրել էր ամենաթանկագինը, դրանից հետո աչքին ոչինչ չէր երևում:

Հիմա չեմ հիշում, թե պատմվածքն ավարտելու համար ինչ վերջվածք էի դրել, բայց միտքս այն էր, թե մի ոռոմանտիկ էակի համար որքան ճակատագրական կարող է լինել առաջին և խոր հիասթափությունը:

Խոստովանություն լինի, չեմ կարողանում հիշել՝ պատմվածքս ինքս տարա Երևան, թե ուղարկեցի ու որոշ ժամանակ անց ներկայացա Բակունցին, համոզված, որ արդեն կարդացել է: Վերջապես, դա բոլորովին էլ կարևոր չէ: Կարևորը իմ հանդիպումն է Բակունցի հետ: Անկեղծ ասած, ինձ չէր հետաքրքրում պատմվածքի ճակատագիրը՝ կուպա-

դրվի՞, թե ոչ: Ինձ համար այս դեպքում պատմվածքը, Բակունցին հանդիպելու առիթ էր միայն:

Այս էլ ասեմ, որ այդ պատմվածքն արդեն երկու մարդ կարդացել էին՝ Մաթևոս Դարբինյանը և Արշավիր Մելիքյանը: «Կիկոսի» հեղինակը հայտնի էր երիտասարդների հանդեպ ունեցած բարյացակամությամբ, երկրորդը, որ բացարձակ հեղինակություն էր, «Լուսաբաց» հանդեսի խմբագիրն էր: Այդ պատճառով էլ եթե առաջինին ինքս էի խնդրել, որ կարդա, երկրորդին, իմ խնդրանքով, պատմվածքն տարել էր ընկերս՝ Սարգիս Պայազատը: Դարբինյանը խորհուրդ չտվեց տպագրության հանձնել, իսկ Մելիքյանը որոշել էր՝ չի կարելի տպագրել: Պայազատի պատմածով՝ ասել էր նաև քաջալերիչ խոսքեր: Ասե՛լ էր իսկապես, թե բարի ընկերս սիրտս չկոտրեբու համար խմբագրի մերժումը հաղորդեց ինձ իր կողմից հավելած քաջալերիչ մասով:

Մի խոսքով՝ այժմ սպասում էի Բակունցի խոսքին: Ավելի ճիշտ՝ հանդիպմանը նրա հետ:

Ներկայացա Բակունցին:

Նա խնդրեց հանդիպել երկու օր հետո, ցերեկով, ժամը 12-ին, Գրողների տանը: Իսկ ես զնացքի տոմս էի վերցրել Նույն օրը վերադառնալու համար: Մնացի:

* * *

Պայմանավորված ժամին Բակունցի մոտ էի: Առաջարկեց նստել: Զբաղեցրի պատահած առաջին աթոռը: Խնդրեց ավելի մոտ նստել:

Գրասեղանի դղրոցից հանեց պատմվածքիս ձեռագիրը և դրեց առջևը: Նվ մինչ այդ, որ ինձ թվում էր, թե անտարբեր եմ, հանկարծ զգացի, որ սիրտս խփում է անհանգիստ:

Մի-երկու հարց տվեց՝ ո՞վ եմ, որտեղի՞ց եմ, ծնողներս կա՞ն, ի՞նչ մարդիկ են: Լավ հիշում եմ, մեկ էլ հարցրեց, թե ո՞վ է եղել հայոց լեզվի ուսուցիչս:

Հիմա երբ անդրադառնում եմ անցած-գնացած այդ օրվան, ինձ թվում է, որ նրան այնքան այդ հարցերի պատասխանը չէր զբաղեցնում, որքան հասկանալ էր ուզում,

Թե իր դիմաց նստած և իրեն անծանոթ երիտասարդի նկատմամբ ինչպիսի մոտեցում պետք է ունենալ:

— Կարդացի:

Հայտարարեց նա: Եվ Բակունցի հայացքը կանգ առավ ինձ վրա:

— Այս ի՞նչ եք գրել, երիտասա՛րդ:

Ասաց նա խիստ, բայց հայացքում այնքան բարոյթյուն կար, որ ես անհամբեր էի լսելու, թե ի՞նչ եմ գրել, ո՞րն է իմ մեղքը, նման այն մեղադրյալին, որ սպասում է գնդակահարության և հանկարծ իմանում է, որ իր կյանքը խնայված է:

— Այս ի՞նչ հոռետեսություն է: Եվ այն էլ այդ հասակում: Հա՛, ի դեպ, քանի՞ տարեկան եք:

Ասացի:

— Ձեմ հասկանում, ոչինչ չեմ հասկանում: Բոլորովին երիտասարդ և հանկարծ խոր հիասթափություն կյանքից: Ո՞ւմ է հարկավոր այդ մռայլությունը:

Դուռը բացվեց և ներս մտավ մի տարեց մարդ՝ ճաղատ գլխով, շափաղանց նիհար, ձեռնափայտով:

— Ձե՛մ խանգարի:

— Ոչ:

Եղավ պատասխանը: Ես, իհարկե, կկամենայի մեն-մենակ լսել բոլոր կշտամբանքները, առանց երրորդ անձի ներկայության: Ես այդ մասին էի մտածում, իսկ նա իր խոսքը առաջ տարավ. խոսեց այն մասին, որ երիտասարդ հասակում և ընդհանրապես հիանալ է պետք աշխարհով, մարդկանցով:

— Մի լավ նայեք ձեր շուրջը՝ շինարարություն է, կառուցումներ: Գավառը մայրաքաղաք է դառնում: Վերածնություն է: Իսկ դուք... ի՞նչ ասեմ:

Մի փոքր հետո.

— Ծիպոտահար պետք է անել ձեզ, երիտասարդ, վաղաժամ ծերության առաջն առնելու համար:

Թեև խիստ էր խոսում, բայց ինձ թվում էր, որ հայրն է կշտամբում մեղանշած որդուն: Ու ասաց, որ եթե ինքը, այնուամենայնիվ, ներողամիտ է, պատճառն այն համոզումն

է, որ կարդացած պատմվածքը ավելի գրքային մղումից է, քան կյանքից քաղած տպավորութիւնն:

Հետո ավելացրեց.

— Այս պատմվածքը չենք տպագրի:

Ասաց, որ իրենց կարգի համաձայն՝ ձեռագրերը չեն վերադարձվում: Բայց ինքը բացառութիւնն է անում և տալիս է ինձ:

— Տարեք և ոչնչացրեք: Այրեք ձեռագիրը և վանեք ձեր հոգոսմ ծվարած հոռետեսին:

Խոսեց նա և ապա նրան թվաց, թե շատ է խիստ, պետք է մթնոլորտը մեղմել:

— Բայց դա չի նշանակում, որ հրաժարվում ենք ընդհանրապես տպագրելուց: Նորը գրեք՝ պայծառ, լուսավոր մի պատմվածք, և կտպագրենք:

Ու ավելացրեց.

— Դուք շնորհքից զուրկ չեք: Եթե աշխատեք՝ գրող կդառնաք:

Թերթեց իր առջև դրված ձեռագիրը, դտավ մի էջ, որի լուսանցքին մատիտով նշան էր արել:

— Կավ է նկարագրված անձրեք, մանավանդ նրա կաթիլները ճեղքող էլեկտրական լույսի խուրձը:

Հետո ավելացրեց.

— Պատմել գիտեք:

Ըստ երևութին, ավարտել էր ասելիքը: Ես չգիտեի ինչ ասել, ինչ անել:

Կավեց մի այլ ձայն:

Հայացքս դարձրի դեպի ձայնը:

— Համբերութիւն, երիտասարդ, համբերութիւն,— միջամտեց նա:— Հեշտ չէ գրող դառնալը: Ֆլորերը մոտ տասը տարի տարավ-բերեց Մոպասանին, մինչև որ իրավունք տվեց հրապարակ գալու:

— Ոչ քի տասը տարի, Դերենիկ, ժամանակի ուրիշ միտիւմ է:

Ուրեմն դա Դերենիկ Դեմիրճյանն է: Հա, նման էր իր լուսանկարին:

Բակունցը դարձավ ինձ.

— Կարծում եմ, որ մեր հաջորդ հանդիպումը շատ չի ուշանա և ավելի հաջող կլինի: Այդ երկուսն էլ միայն ձեզնից է կախված:

Ես այդ գիշեր չքնեցի: Հակասական ապրումների մեջ էի: Մեկ՝ ինձանից ավելի երջանիկ մարդ չկար: Տեսել էի սիրելի գրողին, լսել նրա ձայնը: Մեկ էլ ինձ թվում էր, որ զարկված եմ:

Բակունցը երրորդ մարդն էր, որ մերժում էր պատմվածքը: Արդյոք պետք չէ՞ ճակատագրական որոշում կայացնել՝ հրաժարվել գրելուց:

Ես այլևս Բակունցին պատմվածք չտարա: Բայց տարիներ անց ոչ թե հանդիպում, այլ հանդիպումներ եղան և այդ մեծ մարդու հետ ունեցած իմ սրտագրավ ծանոթությունը մնաց որպես մի գեղեցիկ հիշողություն:

* * *

Փոխադրվեցի Երևան: Բակունցին հանդիպեցի Գրողների տանը: Մոտեցա: Չճանաչեց: Երեք տարի էր անցել: Հիշեցրի:

— Հա, ինչպես չէ: Դե, կհանդիպենք և հուռով եմ, որ անցյալ հիասթափություններից բան չի մնացել:

Հաճախ էի տեսնում Բակունցին Գրողների տանը, երբեմն Չարենցի մոտ, մի երկու անգամ էլ իր տանն եմ եղել:

Միշտ կմոտենար, կբարեկեր, հարց ու փորձ կաներ:

Բակունցից ավելի հմայիչ մարդ ես չեմ հիշում այն ժամանակվա գրական շրջանակում: Եվ, չնայած դրան, ես նրա հետ չշփվեցի մոտիկից այնպես, ինչպես Չարենցի, Դեմիրճյանի, Զորյանի և ուրիշների հետ:

Մի ձգողական ուժ կար Բակունցի մեջ, որ քաշում էր դեպի իրեն: Բայց ինքը, հակառակ իր սիրալիր պահվածքին, մի խորհրդավոր անհաղորդություն էր կրում իր մեջ: Որքան էլ անկեղծանում էր, — իսկ նա երբեք սառը խոսակցություն չէր վարում, — զգում էիր, որ, այնուամենայնիվ, հոգու շատ դռներ քո առջև փակ են մնում:

Ես կարծում էի, թե ինձ հետ է այդպես, բայց հետո նկատեցի, որ նույն տպավորության են իմ բոլոր հասակա-

կիցները. ավելին, զրական ավագանին, գրողներից նրանք, որ նույն մտածելակերպն ունեին, ինչ նա, համախոհներ լինելով՝ հաճախ էին հանդիպում միմյանց: Նույնիսկ Չարենցը... գրական թևը, որին պատկանում էր Բակունցը, գլխավորում էր Չարենցը: Վերջինս գիտեր այդ: Բակունցն էլ գիտեր, ընդունում էր, որ այդպես պետք է լինի և խոսում էր նրա մասին, որպես գրական շարժման պարագլխի նույնիսկ այն ժամանակ, երբ պետված էր բանաստեղծի հետ: Բայց նկատել էի նաև մի բան. Չարենցը ծայրահեղորեն տրամադրության տեղ մարդ, բոլորքուն ու անհավասարակշիռ, որ հաճախ հաշիվ չէր տալիս, թե իր հետ խոսողը կի՞ն է, տղամա՞րդ, բոլորովին այլ էր Բակունցի ներկայությամբ, քաշվում էր, զսպվում, նեղվում նույնիսկ: Եթե կարելի է ասել՝ Բակունցը դյուրամատչելի չէր անգամ Չարենցի համար, ո՛ւր մնաց իմ ու ինձ նման Երիտասարդների, որոնց աչքին Չարենցը և Բակունցը գրական կուռքեր էին:

Որքան հիշում եմ և միտս է, քիչ էր պատահում, որ գար գրական հավաքույթներին: Հազվադեպ ցերեկները երևում էր Գրողների տանը, գրեթե չէր խառնվում վեճերին, պահում էր իրեն այնպես, որ հետը չէին վիճում: Եթե մեկնումեկն առարկելի էր համարում նրա հայտնած միտքը, հարցի ձևով էր արտահայտում իր տարակուսանքը կամ անհամաձայնությունը: Բակունցը հազարից մեկ էր միջամտում այդ վեճ-գրույցներին, իսկ միջամտելիս էլ մեծ մասամբ նրա ասածը զրչակից ընկերներն ընդունում էին իբրև վերջնական խոսք: «Կաֆե-տոլրիստում», որտեղ գրողները միշտ լինում էին, նրան չեմ տեսել: Ընդհանրապես գրական միջավայրին հայտնի էր իր խոստաբարո կենցաղով: Հեռու էր գրական բոհեմայից, կերուխումի մոլուկությունից, որին առատորեն տուրք էին տալիս Չարենցը, Մահարին և ուրիշներ:

* * *

Մի երեկո իր տանն էի: Զրուցում էինք, ավելի ճիշտ՝ նա հարցնում էր, ես պատասխանում էի: Հետաքրքրվում էր Երիտասարդությամբ: Շատ էր ուզում իմանալ, թե ժամա-

նակակից երիտասարդությունը, հատկապես ուսանողությունը, ինչ կյանքով է ապրում: Չեմ հիշում մի հանդիպում, որ նա այդ հարցին շանդրադառնար: Նրա հետաքրքրության մեջ անհանգիստ մի բան կար:

Եվ նա ասաց.

— Երիտասարդությունը մեր ապագան է: Մենք լավ պիտի իմանանք, թե նա ինչպիսին է: Երիտասարդության նկատմամբ անտարբեր մնալ՝ նշանակում է անտարբեր լինել քո իսկ վաղվա օրվա հանդեպ:

* * *

Մի օր հարցրի մեր գրողներից մի-երկուսի մասին՝ Զորյանի, հետո Դեմիրճյանի:

Մի պահ նայեց ինձ: Ու ես կարդացի հայացքը. անկեղծ լինե՞մ: Եվ տատանումն ավարտվեց անկեղծ լինելու օգտին:

— Զորյանը, խոսք չկա, լավ գրող է, բայց իմ սրտովը չէ, թեև հիմա նրան ավելի եմ արժեք տալիս, քան առաջ-ները:

Մի պահ լուռ մնալուց հետո.

— Շատ է հանգիստ: Վերջապես՝ թո՛ւշք չունի: Գուցե սխալվում եմ, չգիտեմ: Դա է իմ տպավորությունը:

Կարճ դադար:

— Ա՛յ, Դեմիրճյանը այլ է և ավելի է ինձ սիրելի, զլխավորը՝ ներվ ունի, ինչի մասին էլ գրի, կգրի ներքին այրումով:

Եվ հետո այն միտքը զարգացրեց, թե Դեմիրճյանը դեռ չի գտել իրեն: Բայց որ գտնի՝ կպոռթկա ժայթքող հրաբուխի պես:

Հարցրի՝ ինչո՞ւ է այդպես կարծում:

— Գիտեք ինչ, մեջը կուտակում շատ կա, չարտահայտված, տարիներով ամբարված:

Մի պահ լուռ մնաց և ապա վերջացրեց խոսքը:

— Ով ավելի է, քան կարողանում է անել, չարանում է մարդկանց ու աշխարհի դեմ և որովհետև ներքուստ համոզված է, թե ինքը արդար է, իսկ ճակատագիրն իր նկատ-

մամբ անարդար ու եթե չի հաշտվում բախտի հետ պայ-
թում է:

Շատ տարիներ անց Դեմիրճյանը «Վարդանանքը» գրեց՝
Բակունցը մարգարեացավ:

Ինձ հետաքրքրում էր Բակունցի կարծիքը երկու երի-
տասարդ գրողի մասին:

— Դիտեք ինչ, երկուսն էլ շնորհալի են, զրական կուլ-
տուրա էլ ունեն կարծես, բայց տառապում են մեծ պակա-
սությամբ: Բացի այդ՝ նրանց տպավորությունները կյանքից
չեն քաղված: Կարդում ես և տեսնում, որ կյանքից, ժողո-
վրդից չեն գալիս, գրքերի վրա են աճել, իսկ դա լուրջ
վտանգ է, եթե կուղես՝ այնպիսի վտանգ, որ նրանց ապա-
գան դնում է վտանգի տակ:

* * *

Զեմ հիշում հիմա, թե ինչ առիթով, բայց մի օր
Դեմիրճյանն ասաց.

— Ես այն կարծիքի եմ, թե գրելիս և դրանից առաջ
չպետք է գիրք կարդալ. կարող է խանգարել:

Ակսեղն առարկեց.

— Ես ճիշտ հակառակն եմ անում, միշտ էլ գրելուց
առաջ՝ կարդում եմ, բայց միայն կլասիկներին, այն էլ ընտ-
րովի: Մի քանիսը կան, միշտ ձեռս եմ առնում, երբեմն
շատ եմ կարդում, երբեմն քիչ, ընդամենը մի քանի էջ,
բայց անպայման կարդում եմ: Կարդում եմ արդեն ծանոթ
գործեր, որ միտքս բովանդակությամբ չբաղվի, ամբողջ
ուշադրությունս լեզվի և ոճի կողմը լինի: Առնում եմ համը,
ընկալում այնպիսի ճաշակ, որին հասնելը դառնում է ներքին
անդիմադրելի պահանջ:

* * *

Աշխատասենյակում նստած զրուցում էինք զրականու-
թյունից, արվեստից, մեկ էլ Բակունցի կինը՝ տիկին Վար-
վառան, ամուսնուն մի երկու ընկերակցով դուրս խնդրեց: Բա-
կունցի դուրս գնալն ու վերադառնալը մեկ եղավ: Նա

ասաց, թե մարդ է եկել, հիմա կճանապարհի ու կգա: Ասաց նաև, որ իր սեղանին գրքեր կան, զբաղվեմ մինչև գա:

Մոտեցա գրասեղանին, գրքերից մեկը վերցրի: Ժամանակակից մի հայ բանաստեղծի հատորյակ էր դա: Ավելի մեքենայորեն վերցրի, քան հետաքրքրությունից, մանավանդ որ գիրքն ինձ ծանոթ էր:

Թերթեցի և ինչ տեսնեմ. Բակունցի ձեռքով լցված էին գրքի բոլոր էջերը: «Եղբայրության ընկուզենիները» նա արտագրել էր այդ գրքի մեջ*:

Պատմեմ, որ հասկանալի լինի: Թումանյանի և Չարենցի մեծադիր միհատորյակներն էին լույս տեսել և մեր բանաստեղծներից մեկը պահանջ էր դրել, որ իրեն նույնպես այդպես հրատարակեն: Բայց նա մեծադի՜ր հատորի համար անհրաժեշտ չափով գրվածք չունեիր: Թումանյանի և Չարենցի հատորներում շարվածքը երկու սյունով էր տրված ու էջեր կային, որ ընդգրկում էին հինգից ավելի ոտանավոր: Որպեսզի մի կերպ ստացվի իր ուզած հատորը՝ այս բանաստեղծը խնդրել էր, որ ամեն մի բանաստեղծություն սկսվի նոր էջից: Ոտանավորներ կային, որ մի քանի տող էին ընդամենը: Եվ ստացվում էր մաքուր էջ՝ ճերմակ բաց տարածություն: Եվ բակունցն էլ այդ գիրքն օգտագործել էր որպես ընդհանուր տետր ու իր վիպակն արտագրել նրա մեջ: Դա էլ հեզնելու մի ձև էր:

* * *

Հայպետհրատը լույս էր ընծայել Վարդան Այգեկցու առակների աշխարհաբար թարգմանությունը: Փոքրիկ գրքույկ էր դա, «Աղվեսագիրք» անունով: Ճաշակով մի հրատարակություն էր, որ ձևավորել էր Հակոբ Կոջայանը իրեն հատուկ արվեստով: Մի քանի օրում սպառվեց: Գրքին բաժին ընկած հաջողությունը մեծ էր: Եվ հանկարծ... ջախ-

* Ուսուցիչ Ա. Ավագյանը 1940-ին ասաց ինձ, թե այդ գիրքն իր մոտ է, իսկ վերջերս նամակ ստացա որտեղ գրում է թե «մնաց Տարոնցու մոտ»:

ջախիչ հողվածներ հրապարակվեցին «Խորհրդային արվեստում»։ Հողվածներից մեկի վերնագիրը հիշում եմ՝ «Աղվեսագրքի և լիբերալիզմի թակարդն ընկած աղվեսների մասին»։ Բակունցը և նրան հովանավորողները հայտարարվում էին միջնադարով տարված ազգայնամոլություն մտապողներ։ Ազգային արժեքների բացասման ոգով գրված այդ հողվածը մեծ հուզում առաջ բերեց։

Բակունցը, որ ներկա էր, ոչ մի խոսք չասաց։ Լուս լսում էր, մեկ-մեկ ժպտում միայն։

Դեմիրճյանն ու Բակունցը փողոց դուրս եկան։ Ես միացա նրանց։ Դեմիրճյանը հարցրեց, թե ինչու է լուս, վերջապես ինչպե՞ս կարելի է հանգիստ մնալ։

— Իմ գործն արդար է, պաշտպանություն կարիք չունի։ Հետո ասաց։

— Կարևորը գիրքն է և ոչ նրա շուրջն ստեղծված աղմուկը։ Աղմուկը կմոռացվի, գիրքը կմնա։ Կդա ժամանակ և «Աղվեսագրքի» շուրջ եղած այս ամոթալի պատմությունը կստանա իր գնահատականը։ Ոչինչ չի մոռացվում։

— Այսպիսի համոզման տեր մարդը, — ասաց Դեմիրճյանը Բակունցից բաժանվելուց հետո, — իհարկե, պետք է հանգիստ լինի, թեև խոսելիս, նկատեցի՞ր, ձայնի մեջ վրդովված շեշտ կար։

* * *

Յերեկով մի իսկում գրողներ ղրուցում էին։ Այդպիսի դեպքերում ես մոտենում էի, մի անկյունում տեղ գրավում և լսում։

Չեմ հիշում հիմա, թե ում, բայց մի գրողի հարցրին, թե ինչու վերջերս չի երևում։ Ոչ գիրք է հրատարակում, ոչ մամուլում է տպագրվում։ Սա էլ թե՛

— Մուսայիս եմ սպասում, նա էլ չի գալիս։

Իհարկե, կատակով էր ասված։ Բայց դա պատճառ դարձավ, որ խոսակցությունը դառնա ստեղծագործական ներշնչանքի շուրջ։

— Ներշնչանքը ծնվում է աշխատելու ժամանակ:
Ասաց Բակունցը և շարունակեց.

— Ես հավատում եմ, որ մարդ կարող է տրամադրված չլինել ու չկարողանա գրել: Կարող է պատահել, բայց ներշնչանք ասվածը գալիս է աշխատանքի հետ, ինչպես ռուսն է ասում՝ аппетит приходит во время еды.

Մի փոքր հետո.

— Ես չեմ ասում, թե նստեցիր, գրիչը ձեռք առար, թերթ-թերթի հետևից կլցնես: Երբեմն պատահում է՝ գրում ես, գրում ու չի ստացվում: Նշանակում է նյութի հասունացում դեռ չկա:

— Ճիշտ է:

Հաստատեց Նորենցը:

— Յավալին այն է, որ աշխատելու կուտուրա չունենք, Հայ գրողը ծուլ է, չի սիրում տքնել:

Եվ հիշեց Տոլստոյին:

Մեկը, կարծեմ Թոթովենցն էր, ասաց, թե Տոլստոյն իր վեպերը մի քանի անգամ արտագրում էր:

— Պրոֆեսիոնալիզմի նշան է:

Նկատեց Բակունցը:

— Իսկ Դոստոևսկին չէր սիրում մշակել մի անգամ գրածը:

Միջամտեց Տարոնցին:

— Ուրեմն մշակումը տեղի էր ունենում ղլխում, նրեակայության մեջ:

Վերջակետ դրեց Բակունցը:

* * *

Գրողների տանն էր: Մի քանի գրողներ խմբված գրուցում էին, լավ հիշում եմ՝ Դեմիրճյանն էր, Թոթովենցը, եթե չեմ սխալվում՝ նաև Նորենցը: Երբ մոտեցա՝ գրույցը վաղուց էր սկսված և չհասկացա, թե խոսակցության բուն նյութն ինչ է: Միտս է, սակայն, Բակունցի խոսքը:

— Ուշագրություն դարձրե՞լ եք, որ մանկության մասին ամենքն էլ լավ են գրում, նույնիսկ ոչ գրողները, եթե միայն մի քիչ գրիչ բռնել գիտեն:

— Պարզ է,— ասաց Դեմիրճյանը:

Բակունցը հարցական նայեց նրան: Դեմիրճյանի փոխարենն պատասխանեց Թոթովենցը.

— Ապրված նյութ է:

Բակունցը շարունակեց.

— Հիշողությունը պահպանում է տեսածից ու ապրածից ամենաթանկագինը, ինչ որ պետք չէ՝ մոռացվում է, առաջնակարգը երկրորդականից ջոկում է ժամանակը, զտում, թողնում ամենաէականը:

* * *

Ճարտարապետների հավաքույթն էր: Հրավիրված էին նաև գրողներ: Դահլիճը լեփ-լեցուն էր: Ասեղ գցելու տեղ չկար: Չեմ հիշում հավաքույթի օրակարգը, բայց խոսքը վերաբերում էր ժամանակակից ճարտարապետության հարցերին: Շատերը խոսեցին: Հիշողությանս մեջ մնացել է Բակունցի ելույթը, ավելի ճիշտ՝ նրա մի խոսքը: Սկզբում նա իր տրտունջը հայտնեց, թե քաղաքը լցվել է մեկը-մյուսից գորշ, անարտահայտիչ շենքերով: Մեկն էլ հենց այն շենքը, որտեղ մենք հավաքվել ենք: Իսկ հավաքույթը տեղի էր ունենում Կառուցողների ակումբում: Դահլիճը ծիծաղեց:

Հետո ասաց.

— Կառուցեք այնպես, որ շենքը ժպտա, փողոցով անցնողի հետ խոսի, մի բան ասի:

Դահլիճում բուռն ծափահարություն բարձրացավ: Եվ մի քանի օր մարդիկ միմյանց հանդիպելիս ելույթից էին խոսում:

* * *

Լավ հիշում եմ, որ Գրողների տանն էր, բայց միտս չէ, թե ով, հարցրեց.

— Աբովյանին նվիրված վեպը ավարտե՞լ եք:

— Այո, վերջացրել եմ:

Իսկ ինչո՞ւ լույս չի ընծայում: Ասաց, թե մտադիր է պարբերական մամուլում մաս-մաս հրապարակել, դրա հիման վրա մշակել և նոր միայն առանձին գրքով լույս ընծայել:

— Տպվածի մեջ սխալը, թերությունը մարդ լավ է տեսնում: Այդպես չէ՞: Ուզում եմ մի լավ մշակել, իսկ հրատարակել՝ միշտ կհասցնեմ:

Հարցրի, թե ինչպե՞ս է կոչել վեպը.

— Երեակայեք, դեռ վերնագիրը չեմ գտել: Մի քանի բան անցնում է մտքովս, բայց սրտովս չեն, էն չեն: Տեսնենք, դեռ ժամանակ ունեմ:

Մի տարի էր անցել կամ գուցե ավելի պակաս: Բակունցը Դեմիրձյանին ասաց, թե երեկ գիշեր վեպի վերջակետը գրեց:

* * *

Մի օր հարցրեց.

— Պատմվածքը, որ բերել էիք ինձ, ի՞նչ արիք, տպագրեցի՞ք:

— Ոչ:

— Բա ինչո՞ւ:

— Ասացիք՝ ոչնչացրեք, ես էլ բռնեցի ու այրեցի:

— Ե՞ս եմ ասել ոչնչացրեք:

— Այո:

— Մի՞թե այդքան դաժան եմ վարվել ձեզ հետ:

Ես ձայն չհանեցի, ինքն էլ լռեց:

— Մի շաբաթ առաջ հիշել եմ ձեզ, ձեր պատմվածքը:

Ու պատմեց, որ իր մոտ եկել է մի ծանոթ գյուղատնտես և արել իմ նկարագրած դեպքին շափազանց նման մի պատմություն: Ինքը մնացել է զարմացած. ա՛յ քեզ զուգադիպություն:

— Ծանոթիս հարցրի՝ պատմածը ե՞րբ է տեղի ունեցել:

Ասաց՝ մի տարի էլ վրայից չի անցել:

Մի պահ լռելուց հետո.

— Իսկ ես չհավատացի ձեր պատմվածքի կենսական հիմքերին, արի ու տես, որ կյանքը հաստատեց:

Եվ հետո ավելացրեց.

— Ուրեմն կյանքում ամեն ինչ էլ կարող է լինել:

Ես անմիջապես վրա բերի.

— Բայց գրողը պիտի կարողանա հավատացնել:

Ժպտաց:

— Իրավացի եք:

Նրան դուր եկավ իմ ինքնաքննադատական պահվածքը:

— Ուրեմն ասում եք, այրել եք: Իզուր: Իհարկե, լավ եք արել, որ չեք տպագրել, բայց պետք չէր լսել ինձ ու ոչնչացնել: Ես չէի այրի, եթե անգամ այդ խորհուրդը Ձեխովը տված լիներ:

Մի պահ կանգ առավ, հետո շարունակեց.

— Երեւի հետաքրքիր կլինեն հիմա կարդալ, տեսնել, թե ինչ եք գրել: Երեւակայեք, ես էլ կկարդայի նորից, գյուղատնտեսի պատմությունը լսելուց հետո:

* * *

Մի օր հարցրեց.

— Եղիշեի մոտ լինո՞ւմ եք:

Պատասխանեցի:

— Ինչպե՞ս է ղգում իրեն, վաղուց է չեմ տեսել և ոչ մի լուր չունեմ նրանից:

* * *

Լույս էր տեսել «Սև ցեղերի սերմնացանը»: Ընթերցողը հիացած էր, գրողներն ու քննադատները խոսում էին այն մասին, որ ստեղծվել է բալունցյան ոճ, իսկ մամուլում հազվագեպ, բայց լավում էին ձայներ, թե Բալունցը իդեալականացնում է գյուղի նահապետական հետամնացությունը: Այս ոգով հոգւլած էր լույս տեսել, եթե չեմ սխալվում՝ «Գրական թերթում»: Հարցրի՝ կարդացել է:

— Ինչպես չէ:

Ու դառը ժպտաց:

Ես չէի գտնում, թե հարմար է, որ իմ կարծիքն ասեմ իր գրքի մասին, բայց չէի կարող նաև վերաբերմունք չարտահայտել, մանավանդ դա ներքին պահանջ էր, ուստի ասացի, թե ուսանող ընկերներս հիացմունքով են կարդում, գրքի իմ օրինակը ձեռքից-ձեռք է անցնում:

Ժպտաց:

— Այդ գրքով, — ասաց, — ես ամփոփեցի իմ գրական երիտասարդութիւնը: Ընտրեցի հաջողվածները, մշակեցի, իհարկե, ու հրատարակեցի: Եվ վերջ, այլևս չեմ անդրադառնա ոչ այդ նյութին, ոչ էլ կգրեմ նույն ոճով:

Լռեց:

— Համեստութիւն չի ասածս, թանկագին բարեկամ, բայց ես մի քանի տարի է, որ հասկացել եմ, թե ինչ պիտի գրել և ինչպէս:

Մի պահ կանգ առավ: Հետաքրքրվեց՝ կարդում եմ Աբովյանի հատվածները: Դա է իսկականը: Եվ ապա զգուշացրեց, որ սխալ չհասկանամ՝ ոչ թե իր գրածը, այլ ոճը, մոտեցումը, որ հիմա նախընտրում է: Իր նոր ճանապարհը դա է: Ուր կհասնի, չգիտեմ, չգիտեմ նաև, թե երբ կհասնի, բայց եթե մի բան կարողանալու է անել մեր գրականութեան համար, ապա երևի այդ ճանապարհին:

★ ★ ★

Մի օր ասաց.

— Ես թախիծին դեմ չեմ: Իմ մեջ, հավատացեք, տխրութիւն չատ կա: Բայց թախիծը մտնում է ընթերցողի հոգու խորքերը և իր գործը տեսնում, երբ ներքուստ, անհայտ, անհասկանալի մի անկյունից լուսավորված է, պայծառացած:

★ ★ ★

Ես հիմա չեմ հիշում, թե ինչու խոսք բացվեց Գրիգոր Զոհրապի մասին: Ասացի, որ եթե թարգմանվի ռուսերեն, լավ կընդունվի, գուցե մեծ համբավի էլ հասնի: Գտավ, որ ճիշտ եմ. արժե, իհարկե, Զոհրապի նման վարպետին թարգմանել ռուսերեն:

— Իսկ դուք կարդացե՞լ եք Երուխանի նովելները: Ո՞չ: Կարդացեք, անպայման կարդացեք: Մեծ բավականութիւն կստանաք: Հողի բույրը կզգաք, ջրի սառնութիւնը: Ափսոս, շատ ափսոս, որ քիչ է գրել:

Կանգ առաւ, մոտեցաւ պատուհանին, նայեց դուրս: Փողոցի վրա իջնում էր իրիկնային մութը: Եւ հետո, կարծես չէր էլ ընդհատվել խոսքը, շարունակեց.

— Մեր ընթերցողին ծանոթ չէ Երուխանը: Շատերը չգիտեն, նույնիսկ զրոգները: Մարդ կա, որ անունն էլ չի լսել: Ձեռքիս գործ կա, հենց որ վերջացնեմ՝ Երուխանի նովելների ժողովածուն պատրաստելու եմ տպագրության: Եղիշեի համաձայնությունն ունեմ: Ինչ սիրով եմ անելու, մի լավ էլ առաջարան կգրեմ:

Կոություն:

— Ա՛յ թե կարողանայի այդպես գրել:

Տարիներ անց երբ ձեռնամուխ եղանք Երուխանի նովելների հրատարակությանը՝ մտածեցի, որ իրականանում է Բակունցի անկատար մնացած երազներից մեկը:

* * *

Ահա բոլորը, ինչ որ հիշում եմ:

Ես չեմ հանդիպել մի ուրիշ ավելի ներդաշնակ մարդու, բան Ակսել Բակունցն էր: Ամեն ինչ գեղեցիկ էր նրա մեջ: Նրա մեջ ամեն ինչ գեղեցիկ էին՝ և մտքերը, և գործերը, և անգամ հագուստը: Գուցե ոչ պատահամամբ գրչիս տակ միտքս ձևակերպվեց չեխովյան սահմանման համաձայն: Բակունցը նման էր Չեխովի մի հերոսին՝ Աստրովին: Սա, իհարկե, երազող էր:

Այ քեզ ամբողջական անձնավորություն: Հիմա, երբ անդրադառնում եմ նրան, չեմ կարող ասել, թե մի ուրիշ զրոգ նրա հմայքն ունեւ: Եւ զարմանալի կերպով կարողանում էր հույզը ենթարկել մտքին, միտքը՝ հագեցնել զգացմունքով: Բռնկումների գոնե ես վկա չեմ եղել, տեսել եմ հանգիստ, խաղաղ, հավասարակշռված, բայց հասկացել եմ, որ հոգում միշտ մի բան անհանգիստ է, այրվում է ներսից, և զարմանում էի, ու հիմա էլ զարմանում եմ, թե ինչպես էր կարողանում տիրապետել իրեն: Կարողանո՞ւմ էր: Ճիշտ է գտնված այս բառն, արդյոք: Որ նա մտավորական էր բառի իսկական առումով՝ ճիշտ է: Որ տարիները մշակել

և հղկել էին նրան, այդ էլ ճիշտ է: Բայց ինձ թվում էր, որ նա ծնվել էր ներդաշնակ: Մնվել էր ամբողջական: Հակասություն չկար գրողի և մարդու միջև, ինչպես նաև կարողություն և նրա առջև կանգնած խնդիրների ստեղծագործական լուծման, կոշման և գործունեության: Ու ես ի վիճակի չեմ հիմա մտաբերելու մի այլ գրողի, որն ունենար ներքին և արտաքին այդպիսի ներդաշնակություն:

Շատ վաղ և դաժանորեն ակամա նա հրաժեշտ տվեց աշխարհին, մարդկանց, զբաղմունքին, երազներին... Մթնածորի երգիչը, ինչպես անվանում էին նրան, նոր էր ոտքը դուրս դրել հայրենի անտառներից, նոր էր հայացքը դարձրել դեպի հեռուները...

Կայծակը կաղնու անտառներ է այրում, ուր մնաց, որ խնայեր այդ մեկին: Կայծակից զարկված Բակունցը մնաց կես-ճանապարհին:

Եվ նա մշտական մի վիշտ է մեր գրականության համար:

Զարենցի հետ ծանոթացա 1933-ին: Այն ժամանակ համալսարանի երկրորդ կուրսի ուսանող էի: Մի-երկու հոգոված էի գրել: Դրանցից մեկն այդ շրջանի պոեզիայի վիճակին էր նվիրված, որտեղ ես, նորեկուկ մի քննադատ, երիտասարդական հոխորտանքով Զարենցին մեղադրում էի մի շարք իզմերի մեջ՝ պսիխոլոգիզմ, ինդիվիդուալիզմ և այլն: Ես, իհարկե, այժմ շատ բան կտայի, որ այդ հոգովածը գրված չլիներ, բայց դա եղավ Զարենցի հետ ծանոթանալուս պատճառը. կարդացել էր, հետաքրքրվել ինձնով և ասել, որ անցնեմ իր մոտ: Գնացի: Շատ շանցած՝ դարձա բանաստեղծի տան հաճախակի այցելուն: Տուն գալիս գրի էի առնում նրա ասածները: Դժբախտաբար, ամեն ինչ ժամանակին դրի չեմ առել: Երբ ուշ եմ տուն եկել, թողել եմ վաղվան, մյուս օրվան, և այդպես էլ մնացել է առանց թղթին հանձնվելու: Մեկ-մեկ էլ նշել եմ օրը, խոսակցությունը միայն, բայց ոչ խոսակցությունը: Ցավոք՝ բոլոր գրանցումները չեն պահպանվել: Շատ կարևոր գրույցներ եմ մտաբերում, որոնց գրանցումները չկան ձեռքիս տակ և ստիպված՝ վերապատմում եմ իմաստը լոկ:

* * *

Ես կարծում էի, թե առաջին հանդիպման ժամանակ Զարենցը կխոսի հոգովածիս մասին, մանավանդ որ իր դեմ այնտեղ սուր էր ճոճված: Ծանապարհին, մինչև բանաստեղծի տունը հասնելը, մտածում էի, թե ինչ կարող է ասել, ինչ կարգի դիտողություն կամ ինչպիսի առարկություն անել և ըստ այնմ էլ պատասխան էի որոնում, պատրաստվում վեճի

բռնվել: Բայց, հակառակ սպասածիս, այդ մասին ոչ մի խոսք չեղավ, միայն սկզբում, երբ հարցուփորձ էլ անում, թե ինչո՞ւ եմ զբաղված, ի՞նչ եմ գրում, ի՞նչ եմ կարդում, ասաց:

— Ուրեմն, դու Պաստերնակ ես կարդացել: Հետաքրքրի՞ր է:

Իմ հոգվածում բավական երկար կանւ, քի առել այդ բանաստեղծի վրա:

Զրույցի երկրորդ մասը գործնական էր: Չարենցն այդ ժամանակ վարում էր Պետհրատի ղեղավիստական գրականության բաժինը: Ասաց, որ երկու առաջարկ ունի:

Տպագրվում են և շուտով իրար հետեից լույս կտեսնեն Նար-Դոսի երկերի ժողովածուի առաջին երեք հատորը:

Դրանք կազմել է հեղինակը: Դե՛, հիմի ինքը չկա: Զորրորդը կլինի «Մահը»: Հարկավոր է մի օրինակ գտնել՝ տպարան ուղարկելու համար: Իսկ հինգերորդը պետք է կազմել, այսինքն՝ ժողովել պիեսները, հեքիաթները, նամակները, մի խոսքով՝ ինչ որ դուրս է մնացել:

— Կես տարի ժամանակ. համաձա՞յն ես:

Ոչ մի ձայն չհանեցի: Նա շարունակեց, ասաց, որ «էժանագին զրադարանի» սերիայով լույս է տեսնելու Նար-Դոսի «Աննա Սարույանը»: Դրա համար առաջաբան է պետք:

Մի փոքր լռելուց հետո առաջ տարավ խոսքը:

— Առաջինը հեշտ գործ չկարծես: Սկզբում ծանոթացիր, տես, թե ուրիշներն ինչպես են արել, սկզբունքները պարզիր, մեթոդը, և հետո ինքդ արա: Ընդօրինակելու կարիք չկա, բայց եղած փորձը նկատի առ ամեն ինչ նորից շսկսելու համար: Իսկ երկրորդը, սիրելի՛ս, արդեն պատիվ է. ամեն մեկին չեն առաջարկում առաջաբան գրել: Պետք է լավ գրել: Եվ միայն լավ: Չերկարացնես. որքան կարճ՝ այնքան լավ: Դե՛, պայմանավորվեցի՞նք:

Քիչ հետո՝

— Այս առիթով ասելիք ունեմ:

Լռեց: Ելավ տեղից: Ես էլ բարձրացա:

— Նստի՛ր, նստի՛ր, ինձ այսպես ավելի հարմար է:

Ու ասաց, որ հիմա մեր գրական կյանքում կուլտուրա-



կան ժառանգութեան հարցի շուրջ գոյացել է երկու թև, «ձախերի» և այսպես կոչված՝ «աջերի»: Վերջինները թեև աջ են անվանվում, բայց կանգնած են ճիշտ ճանապարհի վրա: Նրանք հիմք են ընդունել լենինյան մոտեցումը: Առանց հնի՝ նորը չի ծնվի: Այսպես մտածողներին աջ են անվանում նրանց հակառակորդները՝ ձախերը՝ որ ճիշտ ասած՝ ձախչիկներ են: Ու ավելացրեց.

— Քեզ էլ կարող են մեղադրել: Աջ էլ կասեն, նացիոնալիստ էլ կասեն: Ուշք մի դարձրու և քո գործն արա: Միշտ հիշիր. առանց անցյալի՝ չկա ժողովուրդ:

* * *

Իզաբելլային հարցրի, թե ով կա իր մոտ, ասաց՝ մենակ է: Ներս մտա, տեսնեմ, թախտին քնել է, կողքին մի գիրք, բաց ընկած: Կարդացել է ու քնել: Մի գիրք վերցրի սեղանից և նստեցի աթոռին: Մի-երկու էջ հագիվ էի կարդացել՝ արթնացավ: Նայեց իմ կողմը, ժպտաց, ծխախոտ վերցրեց, լուցկի խնդրեց: Գիրքը ձեռքն առավ, բայց, երևում էր, ոչ թե կարդալու մտադրությամբ, այլ պարզապես միտքը վերադարձավ կարդացածին:

— Մարդ հնարավորություն ունենար՝ միշտ կարդար: Պառկեր ու կարդար: Ամեն մի գիրք մի աշխարհ է: Ո՞վ է ասել, չեմ հիշում: Կավ, կարևոր չէ: Ինչքան էլ կարդում ես՝ էլի կա ու կա: Ամենից շատ կարդացել է Տոլստոյը: Է՛հ, նրան ինչ: Մարդը գրաֆ էր, բա որ նա չկարդար, ե՞ս պիտի կարդայի, скажи пожалуйста! Համ հնարավորություն ուներ, համ էլ երկար ապրեց: Մենք ոչ այդ հնարավորությունն ունենք, ոչ էլ այդքան կապրենք:

* * *

Մի օր էլ չէր անցել՝ անդրադարձավ նույն մտքին:

— Գիրքը խմիչքից ոչնչով պակաս չէ, իհարկե լավ գիրքը: Խմողը դարձը խեղդում է հեղուկի մեջ, կարդացողը՝ գրքի: Կարդում ես ու գնում մի այլ աշխարհ:

Մի փոքր հետո ավելացրեց.

— Գիտես, ամենաներշահնիկ մարդն էլ կարիք ունի իր շրջապատից վերանալու, իրականությունից հեռանալու, կտրվելու, թեկուզ մի քանի ժամով:

* * *

Մի օր նորից խոսեց կարդալու մասին:

— Մեր գրողները չեն կարդում: Գրող կա, որ եթե հարցընես, թե ով է Պոն՝ չի ասի: Կգտնվեն այնպիսիները, որ անուսն էլ չեն լսել:

* * *

Չարենցի գրասենյանին Պուշկինից միշտ մի որևէ գիրք էր լինում:

— Ոչ մի բանաստեղծ, ոչ մի պոետ ինձ այնպես չի խաղաղեցնում, ինչպես Պուշկինը. հոգեկան ներդաշնակության բարձրագույն ձևը նրա մեջ եմ տեսնում միայն:

Գնում էի տուն:

— Ի՞նչ գիրք է:

Ցույց տվի:

— Հա՛, «Կյուիլան» է, «Վազիր Մուխտարի մահը» կարդացե՞լ ես:

Ասացի, որ կարդացել եմ:

— Իսկ «Подпоручик Киже!»-ն: Ամենալավը դա է: «Կյուիլան» «Վազիրից» լավ է: Բայց սպասիր, թող մի Ակսելն «Աբովյանը» մեջ բերի, տես քո Տինյանովը մկան ծակը քանիսով կառնի:

Լուռ քայլում էինք:

— Տինյանովը էրուդիտ է, գրել էլ գիտի: Բայց գրող չէ: Այսինքն՝ կոչված չէ: Ակսելն իսկական գրող է: Եվ ոչ էլ պակաս էրուդիտ: Սպասիր, սպասիր, մի քիչ էլ սպասիր և այն ժամանակ կտեսնես ինչեր կանի մեր բարեկամը:

* * *

Ասել էր, որ անցնեմ իր մոտ: Նստած գրում էր: Խնդրեց զբաղվել որևէ գրքով, մինչև ինքը վերջացնի: Մոտեցա գրապահարանին: Ինքն էլ մոտեցավ:

— Էկերմանը կարդացե՞լ ես:

Ասացի, որ լսել եմ, բայց չեմ կարդացել: Ոչինչ չասաց, բայց գլուխն օրորեց, հայացքն էլ հանդիմանական էր: Հանեց էկերմանի գիրքը, մի հին հրատարակություն, եթե չեմ սխալվում՝ 1905-ին լույս տեսած (երկու պրակով), իսկ ինքը վերադարձավ շարունակելու զբաղմունքը:

Հասկացա, որ դա պատահական առաջարկ չէր: Նախորդ օրը, մեմուարային գրականության մասին բավական երկար խոսք եղավ, և նրան ասացի, թե շատ եմ սիրում գրականության այդ ճյուղը, լավ հուշագրությունից ավելի մեծ բավականություն եմ ստանում, քան վեպերից: Ես, իսկապես, քիչ չէի կարդացել մեմուարաներ, բայց, ըստ երևույթին, նրա համար տարօրինակ էր, որ խոսելիս երբեք չէի հիշել էկերմանի անունը: Եվ այսպես, ուրեմն, որոշեց ստուգել:

Գրելը վերջացնելով, այլևս չհարցրեց էլ ուզո՞ւմ եմ, թե չէ և «Գյոթեի զրույցների» երկու պրակն էլ փաթաթեց լրագրի մեջ, որ տանեմ կարդալու:

Մի քանի օր անց հետաքրքրվեց՝ կարդո՞ւմ եմ: Ես սխալ հասկացա նրան, կարծեցի, թե շտապեցնում է, ասացի, որ քիչ է մնացել և շուտով կբերեմ:

— Կարող ես շտապել:

Եվ իմ առաջ դրեց էկերմանի նոր հրատարակությունը՝ մի հատորով: Այդ ինձ շատ ուրախացրեց: Ես անզղուշություն ունեցա կարծելու, թե մոտս եղածը կարող է մնալ ինձ: Երբ ասացի՝ զարմացավ, ոչ իհարկե՝ նրա վրա, որ դիրք եմ ուզում, մանավանդ որ երբեմն ինքն էր առաջարկում: Զար-

մացաւ, որ ես կարող էի մի գրքի նոր հրատարակութիւնն ունենալու պատճառով հինն ավելորդ համարել:

— Իհարկե, լավ կլինի, որ էկերման ունենաս: Միշտ պետք կգա: Մի բան կանենք:

Այդ օրը մենք երկու գրախանութ մտանք: Չարենցը խնդրում էր իրեն համար: Ափսոսում էին, որ չեն կարող նրա ցանկութիւնը կատարել, վերջին օրինակը երկու օր առաջ էր վաճառվել: Ներողութիւն էին խնդրում, անհարմար զգում:

— Գնանք Տիգրանի մոտ: Անկարելի է, որ չունենա:

Այդ այն գրավաճառն էր, որը Չարենցի համար սովորաբար զիրք էր պահում: Էկերմանի նոր հրատարակութիւնն էլ նա էր պահել Չարենցի համար:

Ճանապարհին գովում էր Տիգրանին, ասում, թե շատ լավ է ճանաչում զիրքը և գիտե, թե ում է հարկավոր տալ:

Գրախանութը, ուր աշխատում էր Տիգրանը, գտնվում էր Աբովյան և Ռուբենի (այժմ Սվերդլովի) փողոցների անկյունում, ուր այժմ ջրավաճառանոց է:

— Տիգրան, էկերման եմ ուզում:

— Երեկ չէ՞ր որ տվի, ընկեր Չարենց:

— Այս երիտասարդի համար եմ ուզում:

Տիգրանի հայացքը չափեց ինձ ոտից-գլուխ:

— Չունեմ:

Ըստ երևույթին ոչ մի տպավորութիւն չթողեցի:

— Եթե ճար չանես՝ իմ օրինակն եմ տալու:

Տիգրանը նորից նայեց ինձ, և այս անգամ նրա հայացքի մեջ մեղմ հանդիմանութիւն կար: Չարենցը հասկացաւ, որ ունի, բայց տատանվում է:

— Տո՛ւր, Տիգրան, չի կարող պատահել, որ հոգեպահուստ չունենաս:

— Հա՛, մի օրինակ պահել եմ,— ասաց Տիգրանը և տվեց մի ազգանուն, որ լավ չլսեցի:

Չարենցը ծիծաղեց:

— Նրա ինչի՞ն է պետք: Տանելու է, չի էլ կարգալու: Գիրքն էլ հակառակի նման, մի փառահեղ տեսք չունի,— հեգնանքով նկատեց նա:

Տիգրանի դեմքին ժպիտ խաղաց:

Եվ ես այդ օրը տուն վերադարձա իմ սեփական էկերմա-
նը թևիս տակ:

* * *

Իր հանձնարարութեամբ պատրաստած Նար-Դոսի երկերի լիակատար ժողովածուի այն հատորը, որի մեջ մտնում էին պիեսները, տարա ցույց տալու: Սկսեց թերթել: Գլուխը թաղել էր ձեռագրերի մեջ և մեկ-մեկ միայն բարձրացնում էր, երբ ուզում էր որևէ հարց տալ կամ դիտողություն անել: Թերթեց, հասավ Լեոնիդ Անդրեևի «Ձին սենատում» պիեսի թարգմանութեանը: Դրամատուրգը, փնչպես հայտնի է, որպես բնաբան, պիեսին կցել է Դերժավինից մի-երկու տող: Կարդաց, առանց գլուխը բարձրացնելու ասաց.

— Կարծեմ սխալ է թարգմանել:

Հայտնի է, որ Չարենցը լավ դիտեր ուսական գրակա-
նությունը, մանավանդ բանաստեղծներին: Եվ, այնուամենայ-
նիվ, չէի կարծում, թե նա կարող է այդ պահին հիշել Դեր-
ժավինի այն ներբողը, որտեղից քաղված էր բնաբանը: Նար-Դոսի բարեխղճությունը ամենքին հայտնի էր: Չէի
ուզենա, ասենք, չէի էլ կարծում, թե նրա թարգմանութեան
մեջ կարող է սխալ լինել և, ինչ թաքցնեմ, այդ պահին
մտածում էի, որ Չարենցը պարզապես մեծամտում է: Նա
կարծես կռահեց մտքինս և ի պատասխան դրա, արտասանեց
Դերժավինի հսկայական ներբողը՝ սկզբից մինչև վերջ:

Ես մնացի ապշած:

* * *

Մի այլ առիթով ես կրկին համոզվեցի, թե ինչ լավ հի-
շողութեան տեր է Չարենցը:

Գրողների տանը գրական լեզվի հարցերին նվիրված
ասուլիսներ կազմակերպեցին: Առաջին զեկուցումը, որքան
հիշում եմ, տվեց Բակունցը: Երկրորդ զեկուցումը, պոեզիայի
լեզվի մասին, կարդաց Թերզիբաշյանը: Հետո հանդես

եկավ Դեմիրճյանը: Չորրորդ զեկուցումը Չարենցինն էր: Սրանք իրարից անջատ զեկուցումներ էին, բայց հաջորդեցին միմյանց և, այդ բոլոր հավաքույթները միասին առած՝ շուրջ տասը օր լարված հետաքրքրության մեջ պահեցին գրական հասարակայնությունը: Չարենցի զեկուցման կապակցությամբ բացված մտքերի փոխանակությանը մասնակցեցին շատերը: Ելույթ ունեցա նաև ես: Իմ միտքը հաստատելու համար հանկարծ կարիք զգացի մեջբերել Տերյանի մի ոտանավորը՝ ուռեերեն թարգմանությամբ: Մի քանի տող ասացի ու կանգ առա, շարունակությունը չէի հիշում, կանգ առածս տեղից մինչև վերջ շարունակեց Չարենցը:

* * *

Լեզվի ասուլիսին լեզվաբաններից մասնակցում էր Գուրգեն Սեվակը: Նա համաձայն չէր Չարենցի հիմնական դրույթին և առարկում էր բավական համոզիչ ու տրամաբանված: Իր վերջին խոսքն ասելիս, Սևակին ըստ էության պատասխանելուց առաջ, Չարենցը վճռեց նաև զվարթ մթնոլորտ ստեղծել հակառակորդի շուրջը, այսպիսով խախտել նրա թողած տպավորությունը և նոր միայն անցնել վեճի բուն նյութին: Մի-երկու անգամ Սևակի անունը տալուց հետո, իբր թե սխալվելով, ընկեր Սևակ ասելու փոխարեն, ասաց՝ ընկեր Լեզվակ: Դա՛հիճում հրհռոց ընկավ: Չարենցը նպատկին հասավ: Եվ իր դիտավորության հետքերը ծածկելու համար սկզբում ձևացրեց, որ իբր չի հասկանում, թե ինչու են ծիծաղում, հետո ինքն էլ սկսեց ծիծաղել: Տեսնելով, որ հարմար պահ է, անցավ առարկություն՝ արդեն ըստ էության և ըստ համոզման:

* * *

Մի անգամ էլ, եթե չեմ սխալվում, դարձյալ լեզվի ասուլիսի ժամանակ, տեղի ունեցավ հետևյալը.

Չարենցը խոսում էր. հակաչարենցականները, որ դրավել էին առաջին բոլոր նստարանները, մի ռեպլիկ մյուսի

հետևից բաց թողնելով, խանգարում էին, չէին թողնում Չարենցին խոսել: Դրանց մեջ առանձին աշխուժություն էր ցույց տալիս Վահան Մարտյան անունով մի փիլիսոփա: Հավաքույթին ներկա էր նաև Քաղկոմի քարտուղար Գ. Հանեսօղլյանը: Վերջինս տեսնելով, որ հակաչարենյականները չափն անցնում են, չեն թողնում, որ բանաստեղծը ձայն հանի, մի անգամ էլ, երբ Մարտյանը կրկին ոտքի ցատկեց և մի երկար ռեպլիկ տվեց՝ այլևս չհամբերեց և, տեղից բարձրանալով, բավական խիստ կերպով սաստեց.

— Վերջ տվեք խուլիզանությունը:

Չարենցը, որ կարծես հենց այդ խոսքին էր սպասում, անմիջապես վրա բերեց.

— Սա էլ քեզ Ցեկայի կարծիքը քո մասին:

Մարտյանն ապուշ կտրեց: Սառեց նաև Հանեսօղլյանը: Իսկ դահլիճը սրտանց ծիծաղում էր:

* * *

Մի օր, թեև շատ ժամանակ էր անցել, Չարենցն անդրադարձավ պոեզիայի մասին գրածս հոդվածին: Այդտեղ էր նաև Բակունցը, որ ինչ-որ գրքով զբաղված՝ չհասկացա, լսում էր մեր զրույցը, թե ոչ:

— Մահարուն պետք է պաշտպանել հարձակումներից: Դու ճիշտ ես վարվել: Բայց գիտե՞ս ինչ, նա ավելի արձակագիր է, քան բանաստեղծ: Եվ լավ արձակագիր է, ընտիր, է՛, առաջնակա՛րդ: Իհարկե, Ակսելից հետո:

Ասաց ու նայեց նրա կողմը: Բակունցը ձայն չհանեց, խորասուզված մտքի մեջ՝ նստել էր թախտի ծայրին:

Ասացի, թե «Մանկությամբ» հիացած եմ:

— «Պատանեկությունն» էլ պակաս չէ: Լավ էջեր շատ կան:

* * *

Դրքի երկու պահարան ուներ, որ դրված էին գրասեղանի հանդիպակած պատի տակ: Բացի այդ, պատի մի պահարանն էլ գրասեղանի հարևանությամբ: Այս պահարանի

վերևի երկու շարքը Տոլստոյի բազմահատոր հրատարակությունն էր զբաղեցնում:

Մի օր, տանից դուրս գալուց առաջ, ասաց, թե դուռը ձեռքով պահեմ, որ մարդ չգա, իսկ ինքը, աթոռին կանգնելով, Տոլստոյի ամենավերին շարքի հետևից դրամի մի ահագին կապոց հանեց: Առանձնացրեց այդտեղից երեք հարյուր ռուբլի, մնացածը տեղը դրեց:

Ճանապարհին թե՛

— Մի բան եմ խնդրելու՝ պիտի անես:

Գրպանից հանեց երեք հարյուր ռուբլին, փաթաթեց լրագրի մեջ և բացատրեց, թե ուր և ում պետք է տանեմ:

— Տես՝ չասես, որ ես եմ տվել:

Եվ ինքը գնաց Գլուխների տուն:

Դրանից հետո, մի-երկու օր անընդհատ հարցնում էր, հո իր անունը չե՞մ տվել, իսկ հետո մոռացություն տվեց, կարծես այդպիսի բան չէր էլ եղել:

* * *

Մի օր թե՛

— Գիտես, շատերը խոսում են գեղեցկից, բայց ոչ հասկանում են, ոչ էլ զգում: Գիտեն, որ պետք է խոսել՝ խոսում են: Մարտիրոսի նկարները շատերը չեն հավանում, բայց գովում են, հիացմունքով խոսում, վախենում են, որ իրենց անհասկացողի տեղ կդնեն, ու կեղծում են:

Լռեց:

— Գեղեցկի զգացողությունը գրողի տաղանդի մի մասն է: Առանց դրան իսկական գրող չկա:

Այս ասելիս բերեց Հայնեի օրինակը, թե ինչպես Փարիզում եղած ժամանակը ամեն օր Լուվր էր գնում և ժամերով կանգնում Վենետիկի արձանի առաջ:

Ասում են՝ նրան տեսել են լաց լինելիս:

* * *

Շատ էր խոսում Թումանյանից: Հիշում եմ, թե ինչպիսի ոգևորությամբ էր արտահայտվում նրա մասին: Զէր հաշտվում լեզվի հետ: Այդ կողմից գերադասում էր Տերյանին,

բայց այն կարծիքին էր, թե Թումանյանը մեր ոչ միայն ամենամեծ բանաստեղծն է, այլև ամենամեծ գրողն ընդհանրապես:

Ես լսում էի նրան ու մտածում, թե ինչպես է՝ Տերյանը, է՝ Չարենցը, իրենց կյանքի վերջին տարիներին, հանգեցին Թումանյանի մեծության բացարձակ ճանաչմանը:

Ասում էր՝ Թումանյանը գնահատված չէ, ինչպես հարկն է և որ նրա մասին դեռևս իսկական խոսք չի ասված:

* * *

Մի երեկո Չարենցի մոտ էի: Երբ ներս մտա՝ ասաց.

— Կարդացի:

Տարոնցու նոր գրքի մասին գրածս հոդվածը նկատի ուներ:

— Գիտե՞ս ինչ, սիրելի՛ս, — ասաց Չարենցը, — քո լեզվի մասին ասելիք ունեմ: Նախադասություններդ շատ երկար են, երբեմն խճճված, տեղ-տեղ էլ մանվածապատ: Մարդ կարդում է ու չի հասկանում, թե ինչ էս ուզում ասել: Լսիր խորհուրդս. գրիր պարզ, միտքդ հստակ ձևակերպիր: Սեղմ, կարճ նախադասությունը գերադասիր: Ինչքան պարզ՝ այնքան լավ: Եվրոպական բառեր շատ էս գործածում: Ինչի՞ համար:

Քննող հայացքով նայեց ինձ:

— Մի բան էլ ասեմ: Ինձ թվում է, որ քո խառնվածքը, ինչքան հասկացել եմ քեզ, այլ է, հոդվածներիդ ոճը՝ ուրիշ: Հարադատ մնա քեզ, Ինչի՞ էս այդպես չոր գրում: Կարծում էս միայն գրողը պետք է ոճ ունենա, քննադատը ո՞չ: Սխալվում ես: Քննադատն էլ պետք է ստիլիստ լինի, նրա խոսքն էլ պետք է փայլ ունենա, պատկերի ուժ:

* * *

Գրողների միության անդրանիկ համագումարի նախօրյակին էր: Չարենցը պատրաստվում էր Մոսկվա մեկնել: Բերեցին Մաքսիմ Գորկու «Բանաստեղծություններ ու լեզնեդներ» (Չարենցի թարգմանությամբ) գրքի առաջին

օրինակը, այսպես ասած՝ ազդանմուշը՝ որ իր ստորագրու-
թյամբ թույլ տա բազմացնելու:

— Հավանո՞ւմ ես:

Իսկապես դա մի գողարիկ գիրք էր:

Զարենցը թերթում էր, նայում Կոջոյանի նկարներին,
հիանում, կարծես առաջին անգամն էր տեսնում: Կանգ առավ
մի բալլադի ձևավորման վրա:

— Մեկը մյուսից լավ է, բայց էս մեկն ինչ ասես արժե:
Ա՛յ մակարդակ, ա՛յ ճաշակ: Ուր ուզում ես տար՝ չես ամաչի:
Ուզում ես տար Ֆավորսկու կողքը դիր: Կդիմանա՛:

Սա ասացի, որ «Գիրք ճանապարհին» էլ շատ լավ է
ձևավորվել:

Վերցրեց «Գիրք ճանապարհին»:

— Սա՞: Սա ուրիշ բան է:

— Ոսկերչական արվեստի նրբությամբ է արված: Ի՞նչ
զարմանալու բան կա, հայրն ու պապը տոհմիկ ոսկերիչներ
էին: Ինքն էլ վարպետ է, իսկական արտիստ: Ոչ մի նկարչի
մեջ նյութի և ոճի այդպիսի զգացողության չեմ հանդիպել:
Խոսում ես հետը, թվում է չի հասկանում, գնում է տուն,
բերում ձևավորումը՝ մնում ես ապշած: Գործը բկից բռնել
գիտե: Հայ է իր արվեստով, գալիս է հին, շատ հին ժամա-
նակներից:

* * *

Իմացա, որ Զարենցը Մոսկվայից վերադարձել է: Անմի-
ջապես շտապեցի մոտը: Բարձր տրամադրություն մեջ էր.
բաց ճամպրուկի առաջ չոքած՝ բաժանում էր բերած նվեր-
ները, կնոջը՝ Իզաբելլային ինչ-որ թանկարժեք կտոր, մեծ
աղջկան՝ շրջազգեստ, փոքրին՝ խաղալիք: Հանկարծ նայեց
ինձ:

— Ա՛յ տղա, բա քեզ բան չեմ բերել: Մոռացել էմ,
տես, է՛:

Մի փոքր հետո:

— Բա ի՞նչ անենք,— դարձավ կնոջը:

Ձեռքը տարավ ճամպրուկի խորքը և մի գիրք հանեց:

Հիմա չեմ հիշում, թե ինչ գիրք էր, ըստ երևույթին, Մոսկվայում առած, բայց չտվեց:

— Էս հեշ, մի բան չի:

Տակնովրա արեց ճամպրուկը, անկյունից, զրքերի տակից հանեց մի բլոկնոտ:

— Իմ նշումներն են: Ուրիշ հետաքրքիր բաներ էլ կգտնես մեջը: Պահիր, միշտ կհիշես ինձ:

Շատ ուրախ էի ստացածիս համար: Ի՞նչ նվեր կհասներ դրան, իսկ Իզաբելլան, անկեղծորեն վշտացած, որ մի «կարգին նվեր» չստացա՝ անհարմար էր զգում ամուսնու փոխարեն:

* * *

Արտասահմանից Չարենցը երկու նկար էր բերել. մեկը Քրիստոսն էր, փշե պսակը գլխին, մյուսը՝ կիսամերկ մի կին: Այս երկու նկարը Չարենցը կախել էր միևնույն պատին. վերևը Քրիստոսն էր, ներքևը՝ կինը: Քրիստոսի հայացքը հեզ ու տխուր՝ հակված էր ցած:

Ես չգիտեմ, չեմ հարցրել, թե Չարենցը դիտավորյալ էր այդպես դասավորել նկարները, բայց հաճախ էր անդրադառնում այդ նկարներին, նայում ու ծիծաղում:

— Տեսնո՞ւմ ես Քրիստոսին, ոնց է աչքը մնացել գեղեցիկ կնոջ...

Ասում էր ու բարձր ծիծաղում:

— Չէ, մարդկայինը հատուկ է նաև աստվածներին:

* * *

Չարենցի մոտ էր Արուս Ոսկանյանը: Երբ սենյակ մտա՝ նա արդեն դուրս պիտի գար: Ծանոթացրեց: Դերասանուհին շտապում էր, ներողություն խնդրեց ու գնաց:

— Շատ եմ սիրում Արուսին: Ամեն անգամ նրան հանդիպելիս ինձ թվում է, թե կյանքս երկարում է:

Մի օր էլ հարցրեց.

— Ա՛յ տղա, նոր օթելլոներ են լույս աշխարհ ընկել: Տեսե՞լ ես: Չէ՞: Դրանք ի՞նչ օթելլոներ են: Ես Փափաղյանի մի շարժումը չեմ փոխի նրանց ամբողջ խաղի հետ:

* * *

Ձարենցին շատ էր մտահոգում մեր գրական երիտասարդության կուտուրայի հարցը: Եվ հաճախ դիմացինի համար աննկատելի ձեռք ստուգում էր, թե ինչ է կարդացել, գիտե՞լիքների ինչ պաշար ունի: Եվ աշխատում էր օգտակար լինել:

Մի օր խոսք բացվեց մի դաժան արարքի մասին: Ես ասացի.

— Սադիզմ է:

Նա թե՛

— Հակառակն ի՞նչպես կլինի:

— Մազոխիզմ:

— Ո՞րտեղից է առաջացել:

Չգիտեի:

— Ջախեր Մազոխ. լսե՞լ ես:

— Դրող է, բայց չեմ կարդացել:

— Է՛հ, դու էլ պիտի ասես ֆիլոսոֆիականի երկրորդ կուրսի ուսանող ես:

Եվ պահարանից հանեց Ջախեր Մազոխի մի փոքրիկ հատորյակը՝ «Անզույթ կանայք», դրեց առջևս, որ տանեմ կարդալու:

* * *

Մի օր էլ խոսք բացվեց Մորոզովից: Հարցրեց, թե ի՞նչ գիտեմ նրա մասին: Ասացի ինչ գիտեի:

— Լա՛վ, լա՛վ. իսկ գե՞րբը, գիրբը կարդացե՞լ ես:

Ասացի, որ չեմ կարդացել:

— Ոչինչ:

Եվ նա իմ առջև դրեց Մորոզովի «Քրիստոսը»:

— Ահա, տար հետդ: Եթե ուզում ես՝ կարդա, կարող ես

և չկարդալ, բայց թերթիւր, աչքի անցկացրու, առանձին էջերու հատվածներ անպայման կարդա:

Հետո ավելացրեց.

— Տես՝ գրքին բան չպատահի, իմը չի:

* * *

Անդրադարձավ Ջոյսին:

— Գրողների տանն էի քիչ առաջ: Ում հարցրի, թե ինչ գիտեն Ջոյսի մասին, ոչ մեկը բան չկարողացավ ասել: Կարդացե՞լ ես:

Ձայն չհանեցի: Հասկացավ, որ ես էլ չեմ կարդացել: Գրապահարանից հանեց մի գիրք, հիմա չեմ հիշում, թե ինչպես էր կոչվում, բայց լավ միտս է, որ Արեմտա-եվրոպական գրականության նորույթներին նվիրված ժողովածու էր:

— Տար, աչքի անցկացրու, այդտեղ Ջոյս էլ կա, ուրիշ գրողներն էլ: «Ուիլսոն» մի քանի հատված է տպագրված: Կարդա, տես, թե ինչպես է գրում:

* * *

Ձարենցը Մոսկվայում ներկա էր գտնվել Յուլիկ Խան-զադյանի դիակիզման արարողությանը: Խնդրել էր, որ իրեն թույլ տան իջնել ցած, որտեղ հնոցն է:

Պատմում էր, թե ինչպես երկու մարդ կանգնած սպասում են դագաղն իջեցնելուն: Եվ երբ հնոցի երկու փեղկն էլ դանդաղ բացվում է՝ նրանք դագաղը մղում են դեպի ներս:

— Ես տեսա, թե ինչպես կրակն իր բոցերի մեջ առաւ Յուլիկին: Քիչ հետո նույն դանդաղությամբ փեղկերը փակվեցին:

Պատմում էր սարսափահար աչքերով:

— Եվ գիտես ի՞նչն է զարհուրելի: Այն երկուսի պաշտոնը: Ինչպես են համաձայնել: Միլիոն ռուբլի տալին՝ չէի համաձայնի: Սրտի ինչ դաժանություն է պետք: Իսկ նրանք...

կըր հնոցի փեղկերը փափկեցին՝ ես պատին էի կպել անշար-
ժացած, տեսածիս ահալոր տպավորութեան տակ: Իսկ
ներանք, կատակին տալով, կարծես ոչինչ չէր եղել, բարձ-
րացան աստիճաններով վեր, երևի հանգիստ առնելու,
մինչև մի ուրիշ դագաղ կբերեին:

* * *

Չարենցի սիրած հեղինակներից էր Շոուն: Իռլանդացի
ժերուկը, ինչպես երբեմն նրան անվանում էր մեր բանաս-
տեղծը, եկել էր Սովետական Միութիւն, շրջագայել, տեսել
էր, հիացել ու գնացել: Մոսկվայում Չարենցի ականջովն էր
ընկել նրա մի խոսքը, որ հաճույքով պատմում էր: Շոունի
մեկնելու օրը, հենց կայարանում հրաժեշտի պահին մեր
գրողներից մեկը, դառնալով Շոունին, ասում է. «Հուսով եմ,
որ դուք հեռանում եք որպես մեր երկրի բարեկամ»: Նա
պատասխանում է. «Ես այդպիսին կմնամ մինչև մահ»,
մի պահ լռում է և ավելացնում. «Իսկ թե դրանից հետո
ինչ կլինի, ճիշտն ասած, չեմ կարող երաշխավորել»:

* * *

Երեկոյան դեմ անցա Չարենցի մոտ:

— Տխուր ես երևում, ի՞նչ է պատահել:

Ասացի, որ ընկերոջս եղբայրն է մահացել: Հետո ասացի,
թե երբ մի ծանոթ մարդ է մեռնում՝ ինձ պաշարում է մի
տարօրինակ զգացում, ինձ մեղավոր եմ զգում, որ ես կեն-
դանի եմ մնացել, իսկ նա՝ ոչ:

— Սանտիմենտալութիւն. ես հակառակ զգացումն եմ
ունենում: Մեղավորը ոչ թե կենդանի մնացողն է, այլ կյան-
քից հեռացողը:

* * *

Չարենցի ավագ դստեր անունը Արփենիկ է: Այն ժա-
մանակ երևի հագիւլ չորս տարեկան լիներ: Աղջկա մի հատ-
կութիւնը հորը խելքից հանում էր: Արփիկը վրդովված դի-
տողութիւն էր անում ամենքին, ով զարկում էր կատվին,

կոպիտ խոսք ասում տիկնիկին կամ էլ բույսից տերև պոկում: Ասում էր՝ «չի՛ կարելի» և խիստ սաստում բոլորին, անկախ նրանից, թե ով է դիմացինը, մեծ թե փոքր, տնի՞ց թե դրսից: Չարենցը հիանում էր և ասում, որ իր մեծ աղջկան է անցել խղճի այն զգացումը, որ մշտապես կրել է կրծքի տակ և, ավա՛ղ, չի կարողացել արտահայտել այնպե՛ս և այնքա՛ն, ինչքան և ինչպես կուզենար:

* * *

Սեղանի վրա մի տետր կար, որից Չարենցը Պետհրատի փոքրիկ բլանկների վրա ոտնավորներ էր արտագրում: Հարցրի, թե ինչ է անում և շե՛մ կարող օգնել իրեն:

— Չէ՛:

Քիչ հետո գլուխը բարձրացրեց:

— Տերյան սիրո՞ւմ ես:

Չսպասեց պատասխանիս.

— Ինչպե՛ս կարելի է չսիրել,— Ապա մատնանշեց իր արտագրությունը:— Տերյան է, սիրելի՛ս, Տերյան: Ուզում եմ մի լավ հատոր պատրաստել: Սրանք նրա անտիպ ստիխներից են, շմշակված, մեծ մասամբ սևագրություն: Բայց տես ինչպե՛ս է գրել:

Կարգաց հորը նվիրված ոտանավորը:

Վեր կացավ, պահարանից հանեց Մակինցյանի հրատարակած Տերյանը:

— Այս է իսկական Տերյանը:

Ձեռքին երրորդ հատորն էր:

— Տերյանը սա է, որ չգիտեն, դժբախտաբար: Այստեղ է նրա իսկական հմայքը:

Ու թեև հատորը ձեռքին, անգիր ասաց «Տեսա երազ մի վառ...» բանաստեղծությունը:

— Սա գիտե՞ս ինչ է, մինիատյուր, իսկական մինիատյուր: Հազվագյուտ խտացում: Մտքի, երևակայության այն աներևակայելի թռիչքը միշտ էլ ինձ հիացրել է:

Մի փոքրիկ լռությունից հետո երկու ոտանավոր էլ

կարդաց, սկզբում «Դու հպարտ չես, իմ հայրենիք», իսկ հետո՝ «Մշուշի միջից տեսիլ դյուրեական»:

— Ո՞վ է իր երկրի մասին այսպես գրել: Ոչ ոք: Հա՛, գուցե մեկ էլ Թումանյանը: Մնացածը պրիմիտիվ է, հասարակ, ամեն ինչ ուղղակի է ասված, «ЛОБОВОЙ» ասես քարոզ լինի, միտինգում ասված ճառ: Սեր՝ զգում ես, որ կա, բայց արտահայտություն չկա, վառված տիրտ, այո՛, կա, բայց պատկերը գտնված չի: Ա՛յ, Տերյանն ուրիշ է: Լսի՛ր:

Չլացա խնդուն փառքիդ
Անցյալ ու հին փառքով երբեք.—
Սիրեցի հեզ, անքեն հոգիդ,
Եվ երգերդ մեղմ ու բեկ-բեկ,
Խեղճությունդ՝ խավար ու լուռ,
Աղոթքներդ դառն ու ցավոտ,
Ջանգալներիդ զանգը տխուր՝
Եվ խուզերիդ լույսերն աղոտ...

Լռեց ու ինձ նայեց: Ես ասացի.

Սիրում եմ մեր երկինքը մուգ, ջրերը ջինջ, լիճը լուսե,
Արևն ամռան ու ձմեռվա վիշապաձայն բուրբ վսեմ,
Մթնում կորած խրճիթների անհյուրընկալ պատերը սև
Ու հնամյա քաղաքների հազարամյա քարն եմ սիրում:

Ծիծաղեց:

— Այո՛, այո՛, այդպես է: Արմատներս այստեղ են, Տերյանի մեջ: Եվ միայն ի՞մը, արդյոք: Շատերն են նրանից գալիս: Եվ ուրիշ ի՞նչպես: Տերյանը բարձր տեսակ է, իսկական փղոսկր: Կրկնել չի կարելի: Ելակետ է, բայց ճանապարհն ինքդ պիտի անցնես...

* * *

Մի օր հարցրի՝ տեսե՞լ է Տերյանին:

— Մի անգամ: Պատահմամբ: Ինչպես Լեւոնտոսովը Պուշ-կինին:

Լույս էր տեսել մի բանաստեղծի ժողովածու: Դա նրա առաջին գիրքն էր: Ես մի հոգովածով ողջունեցի նրա մուտքը գրականություն:

Երեկոյան զնացի Չարենցի մոտ: Ընդունեց անտրամադիր, մի քիչ խոժոռ: Չէի հասկանում պատճառը, մինչև որ խոսեց.

— Էդ ի՞նչ հոգոված էիր գրել:

Տարակուսած նայեցի նրան:

— Ես էլ կարծում էի, թե պոեզիայից բան ես հասկանում:

Փորձեցի արդարանալ:

— Օժտված տղա է:

— Է՛հ, ի՞նչ անենք:

— Կավ ապագա ունի:

— Քեզ ինչ:

Ես արդեն ոչինչ չէի հասկանում:

Երբ ճանապարհվում էի բանաստեղծի տուն՝ կարծում էի, նույնիսկ համոզված էի, թե գովական խոսքեր եմ լսելու, բայց նա կշտամբեց ինձ:

— Մարդ պիտի ուղղությանը նայի. ի՞նչ է բերում գրականությանը, հո ետ չի՞ քաշում, նորից չի՞ տանում մեզ դեպի գավառայնություն:

Մի փոքր հետո մեղմացավ:

— Ես չեմ հասկանում, թե ինչպես դու կարող ես հիանալ մի պոեզիայով...

Եվ մի անվայել խոսք գործածեց:

Երբ մտա՝ Չարենցի ձեռքին մի գիրք կար: Թերթում էր ու նայում:

— Մոտ արի, տես թե ինչ է:

Մոտեցա: Դեմքին հիացմունքի արտահայտություն կար:

Ֆիրդուսու «Շահնամեից» մի հատված էր, որ լույս էր տեսել հայերեն թարգմանությունը և իր խմբագրությունը:

— Թարգմանությունը հեշ, մի բան չի: Գուցե հարազատ է, չգիտեմ, բայց բանաստեղծական չէ: Դու ձևավորումը նայիր, թե ինչ է: Մարտիրոսինն է: Այս եղնիկներին նայիր, տես, թե ինչպես են խրտնած փախչում. մեկը գլուխն առաջ, սլացքի մեջ, մյուսը գլուխը ետ դարձրած, ասես ստուգելիս լինի, թե հո չե՞ն հասնում հետևից:

Մի-երկու էջ շրջեց:

— Բա ձիե՛րը, սրանց ոտներին նայիր, ինչ բարակ են, դեղեցիկ. այսպես միայն արաբական ձիերն են լինում: Լավ նայիր: Չէ՛, չէ՛, լավ նայիր: Դու հասկանո՞ւմ ես, թե ինչ ճաշակ է: Բա ժայռերը, մի-մի ծառ վրան: Մի էս ձիու գլխին նայիր, ինչ հպարտություն կա, ինչ ո՛ւժ: Տես՝ առաջին ոտքերը բարձրացրել է, հիմա ծառս կլինի ու կմղվի առաջ: Սա միայն կարողանալ չի, այլև խմանալ, ժամանակի զգացողություն միաժամանակ, մի հատկություն, որ քչերին է տրված: Այնպես է նկարել, ասես պարսկական մինիատյուր լինի: Ժամանակի ոճը սլահպանված է, բայց միաժամանակ հասկանում ես, որ հիմա է նկարված: Սա ամենադժվարինն է: Թե չէ ի՞նչ է, դիր առաջդ հին մինիատյուրները և ոճավորիր, դրանից էլ հե՛շտ գո՞րծ:

* * *

Ալազանը մի օր ասաց, թե Չարենցը կանչել է: Գնացի, Ալազանից բացի, այնտեղ էին Գուրգեն Վանանդեցին և Խորեն Սարգսյանը: Ինքը սենյակում չէր: Մի փոքր հետո եկավ:

— Տղանե՛ր,— առաջին խոսքը եղավ նրա,— ես ձեզ հավաքել եմ մի շատ կարևոր գործով:

Լռեց: Անցավ սենյակով մեկ և ապա շարունակեց խոսքը.

— Մեր դասագրքերը լավ չեն կազմված: Կազմում են պատահական մարդիկ, մեծ մասամբ դրամ վաստակելու համար: Ես խոսել եմ Արսո Եղիազարյանի հետ, որ մենք զբաղվենք այդ գործով: Է՛հ, ի՞նչ կասեք:

Ոչ ոք ձայն չհանեց:

— Ուրեմն՝ համաձայն եք: Ես ուզում եմ մի-երկու խոսք ասել սկզբունքների մասին:

Մենք նստած էինք սենյակի տարբեր մասերում: Իսկ ինքը խոսում էր՝ անցուդարձ անելով սենյակով մեկ: Երբեմն մեկնումեկին առաջ կանգ էր առնում և խոսում, կարծես միայն մեկի հետ էր խոսում: Շատ երկար խոսեց: Երևի մի ժամ: Խիստ քննադատեց եղած դասագրքերը, ասելով, որ կազմողները, ղեկավարվելով միայն թեմատիկ սկզբունքով, մոռացություն են տվել էսթետիկականը: Դասագրքում տեղ գտնող հատվածը գեղեցիկ մղումներ տալու հետ միասին պետք է գտնվի արվեստի բարձր աստիճանի վրա: Սա է հիմնականը: Դասագիրքը մշակում է աշակերտի ճաշակը, զարգացնում է սեր դեպի լեզուն, ոճը, գեղեցիկի ըմբռնումը: Աշակերտը պետք է կլանվի բովանդակությամբ, համակվի գաղափարով, բայց և պետք է հասկանա պատկերը, հիանա անսպասելի, դիպուկ գտնված համեմատություններ:

Հետո կանգ առավ մի այլ, շատ ավելի կարևոր հարցի վրա: Միտքն այն էր, որ գոհճիկ սոցիոլոգիզմը հարվածի տակ է պահում գրականության զարգացումը, ոչ միայն գրականագիտությունը, այլև գեղարվեստական խոսքը: Եվ, հիշում եմ, բերեց գործարանատիրոջ պատկերման մի օրինակ: Գեղարվեստական գրականության մեջ մարդու պատկերումը չի կարող բավարարվել միայն սոցիալական էություն բնութագրությամբ: Այդ ճանապարհը միշտ էլ տանում է դեպի սոցիոլոգիական սխեման: Հենց որ գեղարվեստական գրականությունը սահմանափակվի երևույթի պատկերման միայն սոցիալական մթնոլորտով, աչքաթող անի հոգեբանականը, բարոյականը, անմիջապես կյանքի զարկերակը կանգ կառնի գրվածքում:

* * *

Երեկոյան դեմ էր: Իզաբելլան մի փոքրիկ սեղան պատրաստեց: Մի-երկու կում կոնյակը Զարենցի տրամադրու-

թյունը բարձրացրեց: Սկսեց կատակներ անել, ինչ-որ բան ասաց խորհն Սարգսյանին, սա էլ թե՛

— Չեմ հասկանում:

— Բա ես քեզ հասկանում եմ,— ասաց Չարենցը,— էսպիսի մարդ չեմ տեսել,— դարձավ նա մյուսներին,— ինչ-քան բարդ բան ասեմ՝ կուբիզմ, էքսպրեսիոնիզմ, կհասկանա, իսկ պարզ բաները՝ չէ, տեղ չեն հասնում:

* * *

Քիչ հետո էլ կպավ Վանանդեցուն, թե՛ խնձոր կեր: Նա էլ թե՛ չեմ ուզում: Չարենցը համառում էր, Վանանդեցին չէր զիջում:

— Գիտեք ի՞նչ, տղերք: Գուրգեն, բացե՛մ գաղտնիքդ: էս մարդը ռեալական դպրոցում սովորելիս մի քննությունից առաջ երդվում է, որ եթե հաջող տա՝ էլ կյանքում ինչ-որ կլոր է, չի ուտելու: Թարսի նման՝ քննությունը հաջող է տալիս: Հիմի, էդ օրից, ինչը կլոր ձև ունի՝ չի ուտում:

Ասում էր ու սրտանց ծիծաղում:

* * *

Չարենցին այցելեց նրա հովանավորությունը վայելող մի երիտասարդ գրող: Սափրված չէր: Չարենցը, որ զրքով էր զբաղված, գլուխը բարձրացրեց, մի շտապ հայացք նետեց եկողի վրա և ապա շարունակեց թերթել գիրքը, որոնած էջը գտնելու համար: Առանց պուխը բարձրացնելու, նա դիտողություն արեց, թե ինչու՞ չի սավորվել: Երիտասարդն ասաց, թե գործերը լավ չեն, դրա համար էլ այնպիսի տրամադրության մեջ չի, որ հետևի արտաքինին, մտածի սափրվելու մասին:

Չարենցը ցատկեց տեղից: Մի-երկու անգամ անցավ սենյակի երկայնքով և ապա արձանացավ երիտասարդ գրողի առաջ: Վերջինս տաճնապած աչքերով նայում էր նրան, իսկ բանաստեղծի դեմքը անթափանց խստություն էր արտահայտում:

— Լսի՛ր,— ասաց նա,— չլինեմ-չլիմանամ, որ մեկ էլ

կրկնես ասածդ: Հենց որ գործերդ վատանում են, ճիշտ հակառակն արա, սափրվիր, մաքուր և լավ հագնվիր, գլուխդ բարձր անցիր փողոցով: Չունես փող՝ ծախիր ունեցածդ, նույնիսկ գրքերդ, բայց վրադ ու գլուխդ կարգի բեր: Մի թողնիր, որ թշնամիդ իմանա, թե ինչ է կատարվում հոգուդ մեջ և շարախնդա:

* * *

Չարենցի համար կայուն հեղինակություններ գոյություն չունեին: Մի օր կարող էր մեծարել, մյուս օրը նույն կրքով փնովել: Սակայն կար մի մարդ, որի նկատմամբ նրա ունեցած ականածանքը մնաց մինչև վերջը անփոփոխ: Դա Արշավիր Մելիքյանն էր: Վերջինիս կարծիքը նրա համար օրենք էր:

Գրողների տանը ժողով էր Մոսկվայից եկած ռուս գրողների մասնակցությամբ: Եկել էին Կավերինը, Կիրպոտինը, Գատովը և Կոլոսովը: Ժողովին ներկա էր և Արշավիր Մելիքյանը, որ ինչ-որ գործով Թիֆլիսից Նրևան էր ժամանել այդ օրերին: Գյուլիքեվիչյանի հետ նստած էր վերջին շարքերում:

Չարենցը երկար խոսեց, հուզված, վրդովված: Խոսում էր ռուսերեն, որ Մոսկվայից եկածներն իրեն հասկանան առանց մեկ ուրիշի միջամտության:

Միտս է, որ խոսում էր ազգային ձևի մասին, և որպես օրինակ բերեց սեղանին դրված ջրամանը: Լավ հիշում եմ, բարձրացրել էր ջրամանը, բայց մտքից թռել էր, թե ինչպես է նա ռուսերեն կոչվում: Առաջին շարքում նստածները հուշում էին.

— Գրաֆին, գրաֆին:

Բայց նա չէր լսում, դարձել էր դեպի հետին շարքերը.

— Товарищ Меликян, как это будет по-русски?

Մինչև Մելիքյանը շատաց՝ չհանգստացավ:

* * *

Չարենցը հանձն էր առել Մասեհյանի թարգմանած «Լիր աբբայի» խմբագրությունը: Խնդրեց, որ գտնեմ Մասեհյանի թարգմանությունը: Ասացի, որ համալսարանի գրադարանում

կա: Մի երկտող տվեց Տիգրան Մուշեղյանի անունով, որ այն ժամանակ համալսարանի ռեկտորն էր: Տարա գիրքը: Ասաց, որ մի-երկու օրից կսկսի: Եվ, իսկապես, սկսեց:

Չարենցը պառկած էր թախտին, ծիռում էր, իսկ ես, կողքին նստած, կարդում էի «Լիրի» տեսարաններից մեկը՝ Մասեհյանի թարգմանությունը: Սենյակ մտավ իմ համալսարանական մի ընկերը, որ լուսանկարչությամբ էր զբաղվում՝ ընտանիքի նյութականը հոգալու համար: Չարենցն էր կանչել, որ իրեն ու երեխաներին լուսանկարի: Չարենցը ձայն տվեց Իզաբելային ու երեխաներին, որ պատրաստվեն, իսկ ինձ խնդրեց շարունակել: Ընկերս լուսանկարչական ապարատը սկսեց պատրաստել: Նա արդեն կազմ ու պատրաստ էր գործի անցնելու, մեկ էլ տեսանք, որ Չարենցը քնել է՝ ծխախոտը բերանին: Ես տեղիցս վեր կացա և խնդրեցի ընկերոջս՝ լուսանկարել: Սկզբում չեմ ու չում արեց և, այնուամենայնիվ, լուսանկարեց: Դրանով էլ ընկերոջս այցելությունն իսկապես ավարտվեց: Արթնացնել չհամարձակվեցինք: Կինն էլ հետաձգեց լուսանկարումը և մենք էլ, երկու ընկեր, գնացինք: Տարիներ հետո ընկերս, որն արդեն վերջ էր տվել լուսանկարչական զբաղմունքին, նվիրեց ինձ այդ լուսանկարը, որպես հիշատակ այն օրվա, և ասաց, որ այդ նկարից այլևս ոչ մի օրինակ չի պահպանվել:

* * *

Տողած թուղթը դրեց առաջը, Մասեհյանի թարգմանությունը մյուս կողքը և սկսեց արտագրել՝ տեղն ու տեղը խմբագրական փոփոխությունն ենթարկելով: Սկզբում բավական հարազատ մնաց թարգմանությանը, փոխում էր քիչ, իսկ հետո փոփոխությունները շատացան: Թարգմանությունը մաքրում էր հնաբանություններից, պահպանելով ոճի վեհությունը, լեզուն այժմեացնում էր, մի բառի տեղ դնում էր մի ուրիշը, աշխատում մտքին հաղորդել շեշտակի և դիպուկ արտահայտություն: Մի օր խնդրեց, որ պահարանից հանեմ Կուզմինի թարգմանությունը: Նայեց: Դուխն օրորեց: Ինչ-որ

կասկածներ էին ծագել, որ հանգիստ չէին տալիս իրեն: Խնդրեց, որ ռուսական մի այլ թարգմանություն էլ գտնեմ իր համար: Մի գեղեցիկ օր էլ սեղանի վրա երևաց «Լիր արքան»՝ գերմաներեն թարգմանություն: Թե որքան գիտեր գերմաներեն և ինչքան էր կարողանում օգտվել՝ չեմ կարող ասել: Ամբողջապես համակված էր Շեքսպիրի ողբերգություն:

Պատահում էին օրեր, երբ ինքը թելադրում էր, իսկ ես գրում էի:

— Լսի՛ր, տես, թե ինչպես է թարգմանել Մասեհյանը: Հիմա գրիր, ինչ որ կասես:

Երբ դու ինձանից օգնություն խնդրես՝
Ձրքած քո առջև ինքս քեզանից
Ներում կհայցեմ,— այսպես մենք կապրենք,
Կաղոթենք, կերգենք և հին հեքիաթներ
Կպատմենք իրար և կծիծաղենք
Այն թիթեռների վրա ոսկեթև,
Որ որպես խղճուկ թշվառականներ
Խոսում են ճղճիմ գործերի մասին,
Լուրերի մասին այն պալատական.
Մենք էլ կիմանանք նրանցից, թե ով
Բարձրանում է վեր և ով է ընկնում.
Ում գործերն ան վատ և ումն՝ աշողակ:
Եվ այդ գործերի էությունը լոկ
Դիտելով՝ մենք մեղ կըբացատրենք
Իրերի զաղտնիքն ինչպես աստծո
Երկու ընտրյալներ, կամ առաքյալներ...
Եվ այսպես՝ բանտի պարիսպների մեջ
Կմաշենք բազում մեծամեծների
Խմբեր ու դասեր, որոնք լուսնի հետ
Կհլնեն ու կիջնեն, կհլնեն ու կիջնեն...

Ես ասացի, որ լավ է, բայց տողերի քանակով շատ ավելի է ստացվել:

— Ի՞նչ,— զարմացած նայեց ինձ, ապա կռացավ թղթի վրա և հաշվեց:— Ճիշտ ես ասում, վեց տող ավելի է: Բայց դա ի՞նչ կարևոր է, հաշվապահություն հո չէ: Հակա՛նը ոգին է: Եթե դա կա՝ լավ է: Ա՛յ, էս երկու տողը սրտովս չի.

Մենք էլ կիմանանք նորից, թե ով
Բարձրանում է վեր և ով ընկնում:

— Արի այսպես դարձնենք.

Մենք էլ նորից կիմանանք այդ սին
Գործերի մասին՝ թե ով է ընկել,
Ով բարձրացել կամ հարստացել:

— Ես սա կհանձնեմ, կարող են տալել: Սա առաջին էտապն է, հետո ինքս կթարգմանեմ: Անպայման կթարգմանեմ: Ոչինչ, որ անգլերեն չգիտեմ: Զգու՛մ եմ, կիրք հոգուս մեջ է, կարծես մի հարազատ անձ լինի, այնպես եմ զգում նրան:

Խմբագրված ձեռագիրը տարա Պետհրատ և հանձնեցի էդուարդ Չոփուրյանին: Հիշում եմ, առաջին էջի վրա գրել էր խնդրանք-չկորցնել ձեռագիրը և օգտագործելուց հետո անպայման վերադարձնել իրեն:

* * *

Զեմ հիշում, թե որքան էր անցել, որ սկսեց թարգմանել «Լիրը»:

— Զեմ ուզում միջնորդարից դուրս գալ: Լավ կլինի հիմի անեմ, թե չէ վախենում եմ հետո սառչեմ:

Ես հաճախ էի ներկա լինում թարգմանությանը: Աշխատում էր արագ թափով, բայց երբեմն կանգ էր առնում, մի ձեռով փորձում, այլ կերպ գրում, և երբ չէր ստացվում՝ ջղայնանում էր, վրդովվում:

— Է՛հ, այսպես ավելի լավ է, չէ՞: Ինչ ես ասում, այսպես շանե՞նք:

Լիրի կերպարը դարձել էր նրա հարազատը: Շատ էր խոսում նրանից, հազար ու մի դիտողություն անում:

— «Լիրը» Շեքսպիրի ամենալավ գործն է, ամենախոր, ամենաընդգրկուն:

Իսկ մի օր էլ ասաց.

— Գիտե՞ս, թեև սքանչելի գործ է՝ անհնար է խաղալ:

Ամբողջը միտք է, փիլիսոփայություն, ինչպե՞ս խաղաս: Ուզես-չուզես՝ գործողությունն առաջ կընկնի և կդառնա մի սովորական սրտառուչ պատմություն: Չեմ պատկերացնում բեմում: Կարգալ, միայն կարգալով կարելի է սրա ողջ խորությունը հասնել:

Մի օր էլ թե՛

— Գիտե՞ս, առաջ ես «Լիրը» հասկանում էի: Եվ միայն: Հիմա և՛ հասկանում եմ, և՛ զգում: Զգում եմ հոգուս բոլոր մասերով: Պատահե՞լ է, որ քեզ մենակ զգաս. ամբողջ շրջապատը մի կողմ, դու մի կողմ: Որ կողմը դառնաս՝ սուր ու դանակ, ռիսակալ դեմք, արնակալած աչքեր: Մենակ ես, մեն-մենակ բոլորի դեմ: Դառնանում ես, պղտորվում, բայց զգում ես, որ նրանք չնչին են, մարդուկներ, իսկ դու բարձր... Եվ ոչ ոք քեզ չի հասկանում:

Մի օր մտա՝ տեսնեմ պառկած լայն թախտի վրա, Լիրի մենախոսությունն է կարդում: Երբ վերջացրեց՝ նայեց իմ կողմը, երկար ու անորոշ, ապա շշուկով, կարծես գաղտնիք էր ասում.

— Դու գիտե՞ս, որ Լիրը ես եմ:

Ասաց ու աչքերը փակեց:

* * *

Բաժբեռուկ-Մելիքյանը նկարում էր Չարենցին: Երբ բանաստեղծն անցավ մյուս սենյակը, նկարիչն ասաց.

— Ես մեր նկարչական աշխարհում քիչ մարդու եմ հանդիպել, որ կարողանա այդպես թափանցել արվեստի նրբությունները, ինչպես Չարենցը: Մնացել եմ զարմացած:

Մի օր Չարենցը խնդրեց նկարել իրեն հնդկական ձևով, ծալապատիկ նստած:

Այս շրջանում բանաստեղծը Հնդկաստանի մասին շատ էր կարդում, խոսում էր Գանդիի մասին, անդադադանում էր բուդդիզմին, յոգերին, խոսում նրանց ուսմունքից: Հաճախ էր նայում: Բուդդայի արձանիկին, որ դրված էր պահարանի գլխին, և կարծես մոռացած, թե մարդ կա շուրջը՝ խոսում էր վերացած, հոգով և մտքով տեղափոխված Գանգեսի ափերը:

Մյուս օրը եկա՝ նկարն ավարտված էր և արդեն պատից կախված, տակն էլ խոշոր տառերով գրված՝ Մահաթմա Չարենց:

* * *

Մի օր Աբովյանի անհետանալու մասին խոսք բացվեց:
— Ի՞նչ են ուզում էս մարդիկ, չեմ հասկանում: Ի՞նչ են քնկել, թե պիտի պարզենք՝ որտե՞ղ է թաղված: Այսպես ավելի լավ չէ՞, խորհրդավորութունը ծածկում, անհայտության մեջ է թողնում ամեն ինչ: Ասենք՝ հանկարծ պարզվեց, թե խանդի հողի վրա սպանել են ու մի ծառի տակ էլ թաղել: Հետո՞ ի՞նչ օգուտ: Չէ՛, ես անհայտութունը գերադասում եմ: Դրա մեջ ռոմանտիկա կա: Տրտնջում են, թե չգիտենք որտեղ է թաղված: Աբովյանն այնքան մեծ է, որ գուցե ավելի լավ է, որ գերեզման չունի. նա ամեն տեղ է, ամեն հայի սրտում: Չկարծես, թե զեղումներ եմ անում: Ես էլ չէի ուզե՞նա գերեզման ունենալ: Չգիտեմ երբեք կհասնե՞մ այդպիսի մեծության, որ դրան արժանի լինեմ, բայց կուզենայի, որ մարդիկ չիմանային, թե ուր եմ թաղված:

* * *

Բարձրանում էի Չարենցի տան աստիճաններով: Նրա մոտից իջնում էին Կիրպոտինը, Կավերինը և Գատովը: Եթե չեմ սխալվում՝ նրանց հետ էր նաև Սուրեն Վահունին: Երկրորդ հարկի հարթակի վրա նրանք խմբվեցին՝ ինչ-որ կնոջ ճանապարհ տալու համար: Չեմ հիշում թե ով՝ ասաց.

— Մոսկվայում հիմա դժվար է գտնել մի բանաստեղծ, որ այդքան լավ իմանա ռուսական պոեզիայի անցյալն ու ներկան, ինչպես Չարենցը:

Մյուսները համաձայնեցին:

* * *

Խոսք կար, որ նշվելու է Չարենցի գրական գործունեության 20-ամյակը: Գրողների միության վարչութունը միահամուռ որոշում էր կայացրել: Չարենցն աշխատում էր իրեն

այնպես պահել, թե իբր իր համար միևնույն է, բայց իրապես անտարբեր չէր: Երբեմն նույնիսկ անհանգստության նշաններ էր ցույց տալիս: Ականջին հասել էր, որ խանգարողներ կան և, կրքոտ մարդ լինելով, քանի գնում այնքան ավելի էր համակվում հոբելյանի գաղափարով:

Նայելով գործի ընթացքին՝ կարելի էր լրջորեն կասկածել, թե հոբելյանը տեղի՞ է ունենալու, մանավանդ որ բավական ժամանակ էր անցել և այդ մասին Գրողների տանը արդեն խոսք անգամ չէր լինում:

Այդ օրերին ուսանողներս որոշեցինք համալսարանում կազմակերպել Չարենցի «Գիրք ճանապարհի» ժողովածուի քննարկումը՝ հեղինակի և այլ գրողների մասնակցությամբ:

1934-ին էր այդ, դեկտեմբեր ամսին: Օրը չեմ հիշում, բայց լավ միտս է, որ ձմեռային ցուրտ երեկո էր: Գնացի Չարենցի հետևից: Նրա մոտ էին Ալադանը, Նորենցը, Տարոնցին, Արուս Ոսկանյանը, Ս. Հարությունյանը: Խոսք ու զորույց անելով մեր խումբը ճանապարհվեց դեպի համալսարան:

Ես չէի կասկածում, որ դահլիճը լիքն է լինելու, բայց այն, ինչ տեսա՝ վեր էր երևակայությունից: Այն ժամանակ մեծ սրահը դեռ կառուցված չէր և հավաքություններ տեղի էին ունենում այժմյան փոքր դահլիճում: Ես իմ կյանքում, ոչ առաջ, ոչ էլ հետո, այդպիսի լեփ-լեցուն դահլիճ չեմ տեսել: Պատճառը պարզ էր: Պատին փակցված հայտարարության մեջ գրված էր, թե քննարկմանը ներկա է լինելու ինքը՝ բանաստեղծը: Լսել էին Չարենցի անունը և բոլորը շտապել էին դալ: Դահլիճում ոչ միայն նստելու բոլոր տեղերն էին գրավված, այլև ամեն մի փոքր տարածություն, ուր մարդ կարող էր կանգնել: Ահագին բազմություն էր խոնված դուրսը, դռան մոտ, աստիճանների վրա: Դրսեցիների պահանջով դահլիճի երկու փեղկն էլ բացել էին, որ մի բան տեսնեն կամ գոնե կարողանան լսել: Իսկ ինչքա՞ն մարդ կար ներքևի միջանցքում, որ ստիպված էր ետ դառնալ: Ո՛վ ասես չկար. ուսանողներից բացի, եկել էին գրեթե բոլոր դասախոսները, ոմանք նույնիսկ կանանց հետ: Ահագին մարդ էր եկել դրսից. ոչ միայն հարևան ինստիտուտներից,

այլև գրականության սիրահարներ: Ժողովրդական ասաց-վածքը, թե «ասեղ պցելու տեղ չկար», այդ օրվա համար էր ասված:

Թե ինչ կատարվեց, երբ Չարենցն իր գրչակիցների հետ դահլիճ մտավ՝ նկարագրել անկարելի է: Մի այնպիսի խեղահեղ ծափահարություն բարձրացավ, որ թվում էր շենքն ուր որ է փուլ կգա: Բոլորը ոտքի կանգնեցին: Խանդավառված ժողովուրդը սրտագին ողջունում էր բանաստեղծին: Մասերին վերջ չկար, վերջ չկար և կանչերին:

Դա էլ պայմանավորեց երեկոյի բնույթը: Պարզ է, որ այլևս խոսք չէր կարող լինել քննարկման մասին: Մթնոլորտն այլ էր, ժողովրդի պահանջն ուրիշ: Անկարելի էր նկատի չառնել: Անմիջապես որոշվեց, թե ով ինչ է անելու: Իմ դրությունը բոլորից ծանր էր. պետք է մի կողմ դնեի «Գիրք ճանապարհի» քննարկման համար պատրաստած զեկուցումը և խոսքի Չարենցի նշանակության մասին ընդհանրապես: Այդպես էլ արի. չեմ կարող ասել, թե ինչպես զեկուցեցի, լավ, թե վատ, չեմ էլ հիշում ինչ էի ասում, բայց միտս է, որ խոսում էի ոգևորված:

Ողջույնի խոսք ասաց պրոֆեսոր Սիմոն Հակոբյանը, որը մի-երկու ցայտուն գծով բնութագրեց բանաստեղծին՝ համարելով նրան ժամանակակից բոլոր բանաստեղծների ուսուցիչը: Ապա ամբիոն բարձրացավ այդ օրերին Սովետական Հայաստան հյուր եկած Պատրիկ Սելյանը, որը Ամերիկայում լույս տեսնող «Նրևան» թերթի խմբագիրն էր: Լավ հիշում եմ նրա մի խոսքը. «Ոչ թե դահլիճն է փոքր, ասաց նա, այլ. Չարենցն է մեծ»:

Ուսանողների անունից ողջունողներ եղան, մի-երկուսը Չարենցին նվիրված ոտանավորներ կարդացին: Բեմ բարձրացավ և Արուս Ոսկանյանը, կարդաց Չարենցի բանաստեղծություններից: Հիշում եմ առանձնապես այն մեծ ոգևորությունը, որ առաջացրեց «Դանգրահեր տղայի» արտասանությունը:

Վերջում խոսքը տրվեց Չարենցին: Ժողովուրդը նրան հոտորնակյա դիմավորեց: Հիշում եմ, որ նա իր զգացված շնորհակալությունը հայտնեց.

— Ես գիտեմ, որ մեր ժողովուրդը բանաստեղծութիւն սիրում է: Ինձ էլ, ինչ մեղքս թաքցնեմ, վատ բանաստեղծ չեմ համարում: Բայց այստեղ գտածս ջերմութիւնը, ճիշտ ասած, չէի սպասում:

Կանգ առավ: Հուզված էր, երեւում էր, որ դժվարանում էր խոսել: Ծխախոտ խնդրեց, վառեց, մի-երկու քայլ անցավ: Դահլիճն անձայն էր: Չարենցը նորից կենտրոն եկավ:

— Իհարկե ինքնասիրութիւնս շոյված է: Բայց հարցը դա չէ: Սա ավելին է, քան մի բանաստեղծի շոյված ինքնասիրութիւն: Մտածել է պետք, խորհել դրա շուրջը: Լուրջ հարց է: Իմ բարեկամների թիվը փոքր չէ, բայց քիչ չեն և չարակամներս: Նրանք պղտորում են իմ կյանքը, հաճախ դառնացնում իմ ամբողջ օրը: Ասենք այդ ո՞ր կարգին գրողն է, որ ախոյան չի ունենում: Պուշկինը, այն էլ ինչքան, մեր Թումանյանը, նա մինչև օրս էլ թշնամիներ ունի: Այսօրվա օրը երբեք չեմ մոռանա, ես հասկացա, որ, իմ գրական բարեկամներից բացի, կա մի ամբողջ ժողովուրդ, որ կանգնած է բանաստեղծի մեջքին: Ես պետք եմ նրան: Երբ քեզ է նայում քո ժողովուրդը, ինչ ուզում են թող անեն, ինչ դավ էլ ուզում են, թող լարեն: Երկյուղալի չէ, ի՞նչ կարող են անել մարդիկ՝ ոչինչ: Ինչ որ անում է՝ անում է ժողովուրդը, անհունորեն բարի և նույնքան անողորմ: Գործ արի՛ր՝ կստեղծի քեզ համար հռչակ, կփառավորի, հակառակ գնացիր՝ կկործանի, կոչնչացնի, փռչի կդարձնի: Ինչքան շատ ու բարձր են գնահատում քեզ, այնքան ավելի է մեծանում քո պարտքը: Ես գնում եմ այստեղից ջերմացած հոգով, պայծառացած մտքով, գնում եմ պարտավորված: Տվեք ժամանակ և ես ինչպես էլ լինի, կմարեմ պարտքս:

Երեկոյից հետո, երբ ճանապարհ ընկանք, բոլորի տրամադրութիւնը բարձր էր, կատակում էինք, սրախոսում: Չարենցն հանկարծ ընդհատեց խոսողին.

— Տղե՛րք, սա հո իսկական հոբելյան եղավ...

Չարենցի հոբելյանը այդպես էլ չկայացավ: Դրա մասին այլևս ոչ մի խոսք չեղավ: Եվ չէր էլ կարող լինել, որովհետև դեպքերը հակառակ ուղղությամբ զարգացան:

Չարակամ մթնոլորտը Չարենցի շուրջը խտացավ. որքան բարձրանում էր բանաստեղծի հեղինակությունը ժողովրդի աչքում, այնքան շատանում էր հալածանքը: Ի՞նչ սխալ ու սայթաքում ասես, որ չէին վերագրում նրան, ի՞նչ մեղքի տակ ասես, որ չէին գցում: Չարենցի մի սխալը ահռելի մեղք էին հայտարարում, մի մեղքը տասը դարձնում: Խոսում էր հայրենասիրությունից, ասում էին, թե ազգայնամոլ է: Խոսում էր պոեզիայի ձևերի մասին, ասում էին, թե ձևապաշտ է: Եվ այսպես, նրա գրական հակառակորդները խոսում էին գաղափարների ու սկզբունքի դիրքերից, խոսում էին կուսակցության ու ժողովրդի անունից, առանց ունենալու մեկի և մյուսի լիազորությունը: Նկատելի էր, որ հակաչարենցականներն ավելի միաձուլվ էին, քան Չարենցին ու իր համախոհները: Բարեկամներից շատերը դադարեցին այցելել նրան, գերադասեցին վեճերի ժամանակ լռություն պահպանել, քան միջամտել ու պաշտպանել Չարենցին, որին իրենց գրական պարագլուխն էին հռչակել: Պարագլուխը մնաց մենակ, հրամանատարը՝ անզինվոր: Չարենցը հաճախ անգրագառնում էր դրան, մեկին կոչում էր դավաճան, մյուսին անողնաշար, երրորդին՝ վախկոտ: Անշուշտ իրավացի էր, բայց չէր հասկանում, որ մենակ մնալու պատճառը ինչ-որ չափով նաև ինքն էր, իր բնավորությունը: Ծայրահեղությունների մարդ էր, շատ էր ենթարկվում պահի տրամադրությանը, մի օր կարող էր կոշտ լինել, կոպիտ, նույնիսկ վիրավորել, վաղը, ընդհակառակը, դառնալ զարմանալի հոգատար: Այս շրջանում Չարենցը դարձել էր նյարդային, կասկածամիտ: Թեև կասկածամիտ՝ անկեղծ էր ծայր աստիճան: Խիստ անմիջական լինելով՝ չէր կարողանում զգացածը չասել, մտածել ու շարտահայտվել: Պետք է խոսեր, որ հանգստանար: Նա չգիտեր ինչ բան է գաղտնիքը: Քեզ կարող էր զգուշացնել, թե այսինչ հարցի մասին չպետք

է ոչ ոքի բան ասել, մանավանդ այս ինչին, բայց քիչ անց՝ ինքն էր ասում, ըստ որում հենց նրան, ումից հենց ինքն էր զգուշացնում:

Այս շրջանում ծայրահեղ քայլերի էր դիմում: Կենտկոմի քարտուղարի անունով մի հայտարարութիւն գրեց, թէ դուրս է գալիս, ինչպես ինքն էր ասում, գրողների կորպորացիայից: Չարենցի դիմումն ուղարկվել էր Գրողների միութեան վարչութեանը՝ քննելու համար: Թեև բոլորն էլ շատ լավ գիտեին, թե հոգեկան ինչ ծանր դրամա է ապրում, որ գրածը հուզումի մի պահին կատարած քայլ է, ընդոստ մի պոռթկում, սակայն ոչինչ հաշվի չառան: Չարակամներն ուրախ էին, որ ինքը՝ Չարենցն է առիթ տալիս իր վրա հարձակվելու, իսկ բարեկամները վիրավորական գտան նրա քայլը և, միացած առաջիններին, որոշեցին Գրողների միութիւնից վտարել... Ժամանակի հայ մեծագույն բանաստեղծին: Այս լուրը Չարենցին հանեց հավասարակշռութիւնից: Ամեն ինչ սպասում էր, բայց ոչ այդ: Մեկ-մեկ թվում էր իր բարեկամների անունները և ասում՝ մի՞թե սա էլ, մի՞թե այս մշտն էլ... Մի պահ գրգռվում էր, հայհոյում, բայց հետո, երբ փոքր-ինչ խաղաղվում էր, չէր հավատում, թե այդ բոլորն իրականութիւն է, մտածում էր, թե այստեղ անշուշտ մի թյուրիմացութիւն կա, շուտով ամեն բան կպարզվի: Օրերն անցնում էին, և ամեն ինչ առաջվանն էր մնում:

Դրանից հետո տանը փակվեց. փողոց դուրս չէր գալիս, շատ քշերը մուտք ունեին նրա մոտ: Խռովել էր աշխարհից: ապրում էր մենակ, բզկտված հոգով:

Այս օրերին հաճախ էր անդրադառնում իր գնահատութեանը, ասում էր, թե ինքը մեր ժողովրդի մեծագույն պոետն է, ամենաժողովրդական բանաստեղծը, և միաժամանակ զգուշացնում, որ ինքնամեծարանքի մի խեղճ փորձ չէ այդ:

— Երբ ժողովուրդն իր անսխալական նժարով չափում է քո արժեքը և արժանացնում քեզ իր բանաստեղծը հռչակելու բարձր պատվին, այլևս համեստութիւն չպետք է խաղաս:

Պետք է գիտակցես քո տեղն ու դերը և գերագույն պատաս-
խանատվություն կրես դրա համար:

Նա առաջ էլ սակավ չէր անդրադառնում այս հարցին,
բայց այլ կերպ, երբեմն կատակով, երբեմն այնպես, ի
միջի այլոց: Այժմ ուրիշ էր: Դա ռեակցիա էր, հակադրու-
թյան մի ձև: Նրան թվում էր, թե այդպիսով ինքը պաշտ-
պանում է այն, ինչ ուզում են խելի իրենից:

* * *

Հիշում եմ Գրողների տան մի հավաքույթը: Մոսկվայից
ռուս գրողներ էին եկել: Չարենցը տանից դուրս չէր գալիս,
այդ օրը եկավ և ելույթ ունեցավ: Ես Չարենցի ելույթները
հաճախ եմ լսել, բայց այս մեկը շատ է տպավորվել:

Չարենցը մեկ դատողություն էր անում, հիմնավորում
իր ըմբռնումները, մեկ հարձակվում էր, մեկ պաշտպան-
մում, մեկ ինչ որ պատմություն էր մեջբերում, ասես կա-
մենալով հյուրերին ծանոթացնել մեր զրական մթնոլորտին:
Նա վրդովված խոսեց այն մասին, թե ինչպես մոսկովյան
գրողներին խեղաթյուրված են ներկայացրել իր ստեղծագոր-
ծությունը, ըստ որում այն աստիճան, որ նրանք զարմա-
ցած իրար երես են նայել, երբ իմացել են, որ ինքր Հոկ-
տեմբերյան հեղափոխություն է եղել և կենիսին նվիրված
գրվածքների մի ամբողջ շարք ունի: Չարենցը ստիպված էր
ասել, որ ինքը մի պատահական բախտախնդիր չէ, որ իբր
մի խղճով թմբկահար՝ միացել է հեղափոխությանը, որ
ինքն իր ժողովրդի հետ է եղել նրա պատմական գոյության
ամենանեղ պահին և նրա հետ միասին էլ եկել հանգել է
հեղափոխության գաղափարին, որի համար կռվել է զենքը
ձեռքին:

Դահլիճում խանգարողներ կային, անվերջ ռեպլիկաներ էին
տալիս: Աշխատում էին շեղել նրան: Նա դրանից գրգռվում
էր, բայց չէր կորցնում իրեն: Ընդհակառակը, երբեմն սպա-
նիլ պատասխաններ էր տալիս և նորից շարունակում առաջ
տանել իր միտքը, որ ոչ այնքան սառն հետեողականու-
թյամբ, որքան թռիչքներով էր գործում, երբեմն հասնելով

անօրինակ փայլատակումներէ։ Այս դեպքում, սակայն, միտքը չէ կարեւորը, այլ ինքը։ Նա նման էր ճակատամարտում մաքառող այն զինվորին, որի մի ձեռքին հրացան էր, մյուսին՝ դրոշ, աչքերը բորբոքուն, կրակով լի, թեև արնաքամ՝ նա շարունակում է դիրքում կանգնած մնալ, շարունակում է դրոշը բարձր պահել։

Զարենցին շատ ուրախացրեց Կիրպոտինի ելույթը, որի մեջ նախազգուշացում կար, բայց կար և վաստակի գնահատություն։ Սակայն դա էլ երկար չտևեց, և նա նորից մուսլովեց. կրկին ընկավ հուսահատության մեջ։ Հակառակ ուրիշներին տված խորհրդի՝ իր վրա բոլորովին ուշադրություն չէր դարձնում։ Օրերով չէր սափրվում։ Դրանից ավելի նիհար և գունատ էր երևում։ Մխրում էր անընդհատ։ Վանդակն ընկած վագրի նման՝ սենյակի մի անկյունից մյուսն էր շափում։ Երբ հոգնում էր, գալիս նստում էր թախտին, ծալապատիկ, Բուդայի ձևով, և երկար մնում էր լուռ։

* * *

Տխուր և հուսահատ պահերին Զարենցը սիրում էր կրկնել վարուժանի խոսքերը.

— Ես Հիսուսն եմ խոցված, Հիսուսը հազար տեղից խոցված...

* * *

Կոմիտասի թաղումն էր։ Դազաղը դրված էր Կուրտուրայի տան դահլիճում։ Ահագին բազմություն էր հավաքվել հրաժեշտ տալու։ Ներսեկողը չէր հեռանում։ Լավ հիշում եմ, այնտեղ էին Կոմիտասի ընկերները, հայ գեղարվեստական մտավորականության այն ներկայացուցիչները, որոնք Կոմիտասի հետ բարեկամություն էին արել, հետը գործել. կանգնած էր Մանուկ Աբեղյանը, ինչպես մի խոփոռ ժայռաբեկոր, դեմքը խիստ էր, ոնց որ միշտ, և դժվար էր հասկանալ, թե այդ պահին ինչ էր մտքինը։ Այստեղ էր Փանոս Թերլեմեզյանը, որը, հակառակ Աբեղյանին, չէր կարողա-

նում լուռ ու անխոս մնալ, և այդ օրը նրա ձեռքն ավելի էր դողում: Շատերը կային: Հանկարծ դռան մոտ եղած հասարակությունը ճեղքվեց՝ մեկին ճանապարհ տալու համար: Չարենցն էր: Տխուր էր, մորուսած, դեմքը գունատ: Բարձրացավ պատվանդանին, գլուխը կախ կանգնեց, տրտում հայացքը դադաղի ապակյա դիմաշրջանակին, որի տակից երևում էր Կոմիտասը:

Չարենցը մի պահ քարացած կանգնեց, ապա կռացավ, համբուրեց ապակին և լուռ քայլեց դեպի դուրս: Անմիջապես ճանապարհ տվին: Գնում էր գլուխը կախ, ձեռքերի մեջ ճմրթելով գլխարկը:

Երեկոյան մոտն էի: Հետաքրքրվեց հուղարկավորության մանրամասնություններով: Ասացի, որ Հայկանուշ Դանիելյանը երգեց. պատմեցի, թե ինչպես, վերջում, Կոմիտասի հողաթումբը շրջապատելով՝ կոնսերվատորիայի երգչախումբը երգեց «Անձրևն եկավ շաղալեն», իսկ այդ պահին մաղող անձրևի միջից մայր մտնող արևն փր վերջին շողերն էր արձակել: Այնպիսի տպավորություն էր, որ կարծես երկինքը լալիս էր, արցունք թափում:

Չարենցը հուզվեց: Փորձեց իրեն տիրապետել, չկարողացավ: Տեղիցը վեր կացավ: Անցավ սենյակի մյուս ծայրը և մեջք արած՝ բավական երկար մնաց գրապահարանի առաջ, իբր ինչ-որ գիրք է նայում, բայց... լալիս էր:

Քիչ հետո մոտեցավ գրասենյանին, վերցրեց մի թիրթիկ, ուզեց կարդալ, բայց, հագիվ շնչաց միայն վերնագիրը, հիշում եմ՝ «Վերադարձի երգ», և այլևս չշարունակեց: Ես ոչ մի ձայն չհանեցի: Եվ կարիք կա՞ր, արդյոք, որ մի բան ասեի:

Մի փոքր հետո խոսեց.

— Կանցնեն տարիներ, շատ տարիներ, ես չեմ լինի. գուցե դու էլ չլինես: Կոմիտասի երգը դուրս կգա մեր երկրից, կլսեն ու կզարմանան: Կոմիտասը հայ է, բայց աշխարհինն է, բոլորինը, մարդկությանը: Ու այն ժամանակ հայը, ավելի բախտավոր, քան մենք, կտեսնի անմահացած Կոմիտասին՝ Մոցարտի և Շուբերտի կողքին:

Քիչ անց ասաց.

— Լսիր ինձ ու հավատա: Կգա ժամանակ, երբ Կոմիտասին հոգի տակից կհանեն: Դամբան կկառուցեն նրա համար: Թող պառկի այնտեղ և բոլորը գան ի տես: Նա արժանի է դրան: Սա այլևս աճյուն չէ, այլ սրբազան մասունք, ուրեմն և մեղք է նրան հոգի տակ պահել:

* * *

Ես գրում եմ այս տողերը, իսկ դրսում անձրև է գալիս: Ուշ գիշեր է, բոլորը տանը քնած են: Այլևս չեմ կարող շարունակել, կարծես մի հին վերք կա սրտիս մեջ, որ չի անցել, տնքում է ու տնքում: Ցավը սաստիկ է, վիշտը խոր և զգում եմ, որ արցունքը սեղմում է կոկորդս: Հագիվ եմ զսպում ինձ: Գրիչը վայր եմ դնում: Մոտենում եմ լուսամուտին, նայում դուրս, ոչինչ չի երևում: Հորդ անձրևն է աղմկում միայն: Ու թվում է ինձ, թե դա անձրևն չէ, այլ հեկեկանք. լալիս եմ ես, լալիս են ամենքը, լալիս է երկինքը, լալիս է բնությունը:

Վերադառնում եմ գրասենյանիս մոտ: Ուզում եմ շարունակել, բայց տեսնում եմ, որ իսկապես չեմ կարող: Այժմ մի դարմանալի ապրում է համակել ինձ, որ չէի զգում մինչ այդ, գրելիս. ասես ինձնից խլել փախցրել են մի թանկագին հիշողություն, որ մի ժամանակ իմն էր, միայն իմը, իսկ հիմա արդեն բոլորինն է: Ավելի լավ՝ մտածում եմ ես: Բայց դա գիտակցություն է, դատողություն միայն: Սիրտս հաշտ չէ դրա հետ: Կարծես երեկ հարուստ էի, այսօր՝ աղքատ: Ասում են ամեն ինչ ասողից աղքատ մարդ չկա: Որ այդպես է, ուրեմն թող ամեն ինչ թղթին չհանձնվի, մի քանի դրվագ էլ, որ հիշելիս միշտ հպարտություն եմ ապրել, թող անհայտ մնան, մնան որպես նվիրական հիշատակներ՝ միայն ինձ համար:


Չեմ կարողանում մտաբերել, թե առաջին անգամ երբ եմ Դեմիրճյանին տեսել: Անունը լսել էի վաղուց, երբ բոլորովին փոքր էի: Նա ախալքալաքցի, էր, մայրս՝ նույնպես: Ինչ-որ հեռավոր կապ կար մեր ընտանիքների միջև: Երկու ընտանիքներին իրար հետ կապողը տիկին Վարսենիկն էր, Դեմիրճյանի ավագ քույրը: Մեր տանը Դեմիրճյանը հազվադեպ էր լինում: Հետո իմացա, որ գրող է, ու մի օր էլ, բեմում տեսա «Քաջ Նազարը», և տանն ասացին, թե դա գրել է Դեմիրճօղլյանը (այդպես էր նրա իսկական ազգանունը): Ավելի ուշ ծանոթացա նրա մյուս երկերին էլ: Երբ Երևան տեղափոխվեցի՝ համալսարանում սովորելու, ապրում էի նույն բակում ,ուր և Դեմիրճյանը: Տիկին Վարսենիկը հաճախ էր կանչում իրենց տուն: Գնալով ընտելանում էի Դեմիրճյանի անժպիտ դեմքին, և նրա խոսքն ու գրույցն ավելի էր հետաքրքրում ու գրավում ինձ: Սկսեցի հաճախ այցելել: Ու հիմա, երբ գրիչը ձեռս առած մտաբերում եմ նրան, հառնում է նրա մտահոգ կերպարանքը՝ թախտի ծայրին նստած, գրուցելիս:

* * *

Դեմիրճյանի պրոֆիլն ինձ վրա միշտ թողնում էր հնադարյան մարդու՝ բյուզանդացու տպավորություն, որին ծանոթ ենք մանկուց, հին աշխարհի պատմության դասագրքերից: Իսկ երբ նայում էր դեմից, անփաս, մեծ մասամբ խոժոռ ու մտածկոտ, այն տպավորությունն էի ստանում, թե այդ մագաղաթյա դեմքը հայտնվել է հայկական ձեռագրերի միջից:

Դալուկ դեմք: Բարակ, շատ բարակ դիմագծեր: Շրթունքներն էլ չափազանց բարակ էին, և անկյուններում՝ սեղմված: Երբ նայում էի դեմքին, մանավանդ շրթանկյուններին, ինձ թվում էր, թե այդտեղ է ամբողջ Դեմիրճյանը: Նրա շրթունքները մշտապես պրկված էին ու գաղտնապահ: Այդպես էր տպավորությունը: Նա, իհարկե, կարող էր գաղտնիք պահել, մանավանդ ուրիշինը, բայց խառնվածքով գաղտնապահ չէր: Ամենևին: Դյուրագրգիռ ու անմիջական՝ չէր կարողանում դիմացինից թաքցնել ո՛չ իր ապրումները, ո՛չ էլ մտքերը: Այնպես էր թվում, թե մինչև շատեր՝ չէր հանդատանա: Նրա համար գոյություն չունեին արտաքին սիրալիրություն՝ անկախ իր ներքին զգացողությունից: Հակառակորդի համար հակառակորդ էր, բարեկամի համար բարեկամ: Շեշտված համակրությունների և հակակրությունների մարդ էր: Եվ ամենքի համար պարզ էին նրա և՛ համակրությունները, և՛ հակակրությունները, լինեի այդ որևէ անձի, թե հարցի վերաբերյալ, միևնույն է: Դա շատ շեշտակի էր դարձնում նրա քաղաքացիական նկարագիրը: Այս նկարագրի ամենացատուն հատկանիշը հայրենասիրությունն էր: Եվ ինչ հակառակ էր հայրենասիրության, կամ թվում էր շեղումն դրանից՝ նա ընդունում էր ուղղված իր անձի դեմ: Պատահում էր և այնպես, որ գրական խճճված հանգուցյաներն ստիպում էին նրան դիվանագիտանալ: Եվ անհաջող: Բարձրանում էր ամբիոն իր դիվանագիտական խորհրդով, մի բարկ ժպիտ դեմքին: Նրան լավ ճանաչողների համար պարզ էր, որ դա այն նահանջներից է, որ նա անում է հարկադրաբար, բայց ինքն այնպես էր կարծում, թե փայլուն կերպով դիտն դիվանագիտել:

Ընդհանրապես օբյեկտիվություն չէր խաղում և չեզոք դիրքեր զրավելու սաստիկ հակառակորդ էր: Երբեք ասպարեզից մի կողմ չէր քաշվում, իրադարձություններին ու դեպքերին հեռվից չէր նայում: Բնավորությամբ՝ գործուն, մտքով՝ անհանգիստ, ներքնապես՝ այրվող, նա նետվում էր գրական կյանքի հորձանուտը, միջամտում դեպքերի ընթացքին, զարկում էր, զարկվում, միշտ բախումների մեջ, միշտ կրքոտ, միշտ բուռն, միշտ եռանդով:



Գրական կյանքում ամենից ավելի նրան շահագրգռում էին նոր մարդիկ: Ահա նրան զբաղեցնող առաջին հարցը՝ ասպարեզ իջնող նորեկը շնորհալի՞ է: Եթե այո, ապա ծագում էր երկրորդ գերագույն խնդիրը՝ ի՞նչ գաղափարի է. ծառայում այդ շնորհքը, ի՞նչ է բերում իր հետ. գավառականություն, թե կյանքի նկատմամբ նոր ուլայն հայացք: Եթե շնորհքն առողջ է, ապա կարող է վստահ լինել իր բարեկամության վրա, նա կրտսեր, ինքը ավագ՝ միևնույն բանակումն են իրենք: Իսկ եթե նորեկը հետամնաց ըմբռնումներ ունի, ապա ինչքան էլ շնորհալի լինի, ծանոթ են, թե ոչ, նշանակություն չունի, պետք է իմանա, որ ի դեմս Դեմիրճյանի՝ ունի պոտենցիալ հակառակորդ:

* * *

Դեմիրճյանի հետ զրուցելը և խորապես հաճելի էր, և դժվար: Այս տպավորությունը կարող է հակասական, գուցե և տարօրինակ թվալ: Հաճելի, որովհետև մտքի ընթացքը անակնկալներով լի էր: Մտքերի մեջ ինքն էր, ուրիշը չկար: Ոչ մի զրույց նրա հետ պարապ չէր անցնի: Դժվար էր, որովհետև նրա զրույցը շատ խտացած էր և անընդհատ խելոք: Նրա մտքի խորութունն ընդհատումներ չուներ, և դա լարում էր լսողին: Դժվար է երկար զրուցել, երբ դիմացինիդ ամեն մի նախադասությունը կշռում է մի ծանր միտք: Լսել Դեմիրճյանին, նշանակում էր ականատես ու վկա լինել մտքի տենդագին աշխատանքի: Ամենախելոք և ամենալավ զրույցի ժամանակ էլ ընդհատումը ոչ միայն բնական է, այլև անհրաժեշտ: Լավ գրքի խելոք և թարմ մտքերն ընդգծելիս ամեն մի էջի վրա ամենաշատը մի կամ երկու, ասենք երեք տեղ են ընդգծում, իսկ մնացածը՝ ընդհատում է, սովորականը, որ ապահովում է հանգիստը երկու ծանր և խելոք մտքերի արանքում: Իսկ ի՞նչ կլինի, եթե գրքում խելոք մտքերն այնքան շատ և այնպես իրար հաջորդեն, որ ստիպված լինես բոլոր էջերը և էջերի բոլոր տողերն ընդգծել: Դժվար է աղալիսի գրքից բավականություն ստանալ, այդ-

պիսի գիրքը պետք է ոչ թե կարդալ, այլ ուսումնասիրել, մի բան, որ զրույցի ժամանակ, իհարկե, հնարավոր չէ: Իսկ Դեմիրճյանն այդպես էր զրույցի պահին:

* * *

Ուսանող ժամանակս ապրում էի քրոջս մոտ, ինչպես ասացի, նույն այն բակում, ուր Դեմիրճյանը: Նույն շենքի նկուղային հարկում ապրում էր մի ընտանիք, որը շուտով ցավագին քայքայման ենթարկվեց: Կինը թողեց ամուսնուն, թողեց երեխաներին, գնաց... Նրան բաժին ընկած սենյակը զբաղեցրի ես, դառնալով հարեան՝ երեխաների հետ մոլոր մնացած ամուսնուն: Մի որոշ ժամանակ անց, գնացողին փոխարինեց մի ուրիշ կին՝ բարի ու նվիրված անձնավորություն: Անբախտ կին էր դա, որ իր սփոփանքը երեխաներին ոտքի կանգնեցնելու և նրանց մարդ դարձնելու մեջ գտավ:

Դրամատիկ ցնցումներով լի ընտանեկան այս ամբողջ պատմությունը, ինչպես լինում է միշտ և ամենուրեք, հարեանների խոսքի առարկան դարձավ: Բոլորն էլ խոսում էին, ամեն մեկն իր կարծիքն էր արտահայտում, մեկը պաշտպանում էր, մյուսը դատապարտում, մի ուրիշը՝ երեխաների ճակատագրով մտահոգ՝ ելք էր որոնում:

Լուրը հասավ Դեմիրճյանին: Մի օր հարց ու փորձ արեց: Սկզբում կարծես անտարբեր մնաց, հետո դա նրան զբաղեցրեց: Սկսեց հետաքրքրվել մանրամասնություններով, և աստիճանաբար գրողի երեակայության մեջ հյուսվեց այն պատմեվածքը, որ նրա գրչի տակից դուրս եկավ «Ցաված սերը» վերնագրով:

Մղումն ստանալով իրականությունից, նա նույնությամբ չի վերարտադրել դեպքերը, ոչ էլ դեմքերը: Հիմնականը պահպանել է, բայց փոխել է հերոսի ոչ միայն անունը (Գրիգորի տեղ՝ Ռուբեն), այլև զբաղմունքը (գյուղատնտեսի տեղ՝ որմնադիր): Հարեանս, որ իրականում երկու երեխա ուներ. մի աղջիկ և մի տղա, պատմվածքում դարձրել էր երեք երեխայի տեր: Երեխաներից տղայի անունը՝ Պետիկ,

պահպանել է: Շատ բան նույնությամբ թողնելով և բավական հարազատ՝ Դեմիրճյանն իր պատմվածքի համար գտել էր իրականում եղածից միանգամայն տարբեր վերջ. այն ժամանակ, երբ ուս հարեանուհիս մինչև հիմա էլ ապրում է իր արածով երջանիկ, երեխաներից, ավելի ստույգ՝ որդուց արդեն իսկական մայր ճանաչված, հարեաններից խորապես հարգված, պատմվածքում Սոֆյա Պետրովնան (իրական անունը՝ Մարուսյա) Ռուբենի մի կոշտ արտահայտությունից վերավորված՝ ջուրն է նետվում և խեղդվում:

* * *

Մի զրույցի ժամանակ անդրադարձա «Ցաված սեր» պատմվածքին և հարցրի, թե ինչո՞ւ է Սոֆյա Պետրովնային այդպիսի վախճանի հասցրել:

— Ես չէի կարող դեպքերի զարգացումը նկատի ունենալ կյանքում պատահածի պես. ցանկալի՝ կյանքում, անհետաքրքիր՝ գրականության համար: Պատմվածքը գրել եմ այդ կերպարի համար: Նա է իմ հերոսուհին: Զգնահատված մարդկայնություն: Կորցնելուց հետո ենք հաճախ հասու լինում, թե ինչից զրկվեցինք: Մարդուն հեշտություն մերավորելը, երբ մանավանդ մեղք չունի, ներքին ազնվության բացակայություն է: Վերավորում ենք ու չենք մտածում հետևանքի մասին, չենք կշռադատում, թե մի ժանր խոսքը ինչ ավերոամներ է տալիս, երբեմն անդառնալի ու ճակատագրական:

* * *

Դեմիրճյանը հաճախ էր գնագատվում, որ ինքը, որպես գրող ճիշտ չէ գնահատված: Հարմար չդատելով խոսել այդ մասին հրապարակավ, նա ամբիոն բարձրանալիս ընդհանրացնում էր, այն միտքն էր հայտնում, թե քննադատները ժամանակակից հեղինակների երկերին ըստ էության չեն մոտենում. եթե գրողը կենդանի է, իրենց աչքի առաջ՝ հարձակվում են, քննադատում անխնա, իսկ բավական է,

որ անցյալի գրողների մասին խոսք բացվի, որ այդ աննախապաշար վերաբերմունքն անմիջապես չքանա, սկսեն մեծարել, խնկարկել նրանց:

Սիրում էր ասել.

— Կլասիկ դառնալու համար մարդ նախ պետք է մեռնի: Կամ.

— Գնահատվելու համար մարդ պետք է մի քիչ էլ մեռած լինի:

* * *

Ես չէի հավանում «Երկիր հայրենին»: Հասկանալի է, որ Դեմիրճյանի սրտովը չէր: Ասում էր, թե սխալվում եմ: Ես էլ երիտասարդական հանդգնությունմբ դիմագրում էի: Ցավում էր, որ այդքան բան չեմ հասկանում: Եվ նա իր միտքն այնպես էր զարգացնում, որ լսողն այն տպավորությունը կստանար, թե նրա մտահոգության առարկան ոչ այնքան պիեսն է, որքան ես, ոչ թե իր պիեսի պաշտպանությունը, այլ իր կրտսեր բարեկամը, որ գրական երևույթների գնահատության մեջ կարող է այդպես չարաչար մոլորվել:

Մի օր հարցրեց, թե ներկայացումը ե՞րբ եմ նայել: Ասացի, թե վաղուց, հենց որ առաջին ներկայացումները եղան:

— Դե որ այդպես է, գնանք միասին նայենք:

Դնացինք: Նստած էինք նույն օթյակում: Նայում էինք, ընդմիջումներին խոսում, բայց ոչ պիեսի, ոչ էլ ներկայացման մասին: Ես ձայն չէի հանում, նա էլ ոչինչ չէր հարցնում:

Երբ ներկայացումը վերջացավ, դարձավ ինձ.

— Հիմա ի՞նչ կասես:

— Նույնը:

Միառժամանակ շխոսեց: Երբ մի քանի քայլ առաջ գնացինք, զայրացած ասաց.

— Ամեն մարդ իր սեփական կենսագրությունն է գրում: Ես չհասկացա, թե ինչ է ուզում ասել և զարմացած նա-

յեցի իրեն: Բացատրեց, առաց, թե երբ իր մասին գրվի, անշուշտ կշտամբանքով կանդրադառնան և նրանց, որ ժամանակին չեն կարողացել իր պիեսը գնահատել ինչպես պետք է:

Նայեց ինձ.

— Բա ինչ ես կարծում: Այդպես է կյանքը: Մարդու արածը, ամեն մի քայլը նրա կենսագրության մի կեսն է: Լռեց ու հետո եզրակացրեց.

— Ամեն մարդ իր կենսագրությունն է գրում: Ինձ դրվատելու են այդ պիեսը գրելու համար, իսկ քեզ փնտվելու՝ պիեսս չհասկանալու համար:

* * *

Դեմիրճյանը պատմում էր, թե 20-ական թվականներին ինչ միայն չի եկել «Քաջ Նազարի» գլխին: Պատմում էր, թե ինչպես մի օր երիտասարդությունը «Քաջ Նազարին» նվիրված գրական ասուլիս է կազմակերպում: Խիստ կարևորություն տալով իրենց ձեռնարկած գործին՝ ասուլիսի ղեկավարները հեղինակին էլ են հրավիրում, որ լսի իրենց: Դեմիրճյանը, թեև գիտեր, թե ինչ է լինելու, բայց և այնպես գնում է և գրավում մի տեղ հենց առաջին կարգում:

Մի երիտասարդ զեկուցում է, մյուսները ելույթ են ունենում: Ով բարձրանում է ամբիոն, մի ծանր խոսք է ասում հեղինակին: Գլխավոր մեղադրանքն այն է լինում, թե Դեմիրճյանը չի վերակառուցվել, թե նա դեռևս կառչած է հինի, անցյալ ըմբռնումների: Եվ դրա ապացույցը նրա «Քաջ Նազար» պիեսն է: Եթե այդպես չէ, ինչի՞ համար ժամանակակից հետաքրքրական թեմատիկան թողած՝ ընկել է հեքիաթների ետևից: Մեզ հեքիաթ պետք չէ, եթե պետք էլ է՝ ապա կարմիր հեքիաթ, միայն կարմիր:

Վերջում ձայնը տալիս են Դեմիրճյանին: Բարձրանում է ամբիոն, խաղաղ հանդարտությամբ նայում շուրջը, և ապա դառնալով նախագահության սեղանին, որտեղ նստած էր զեկուցողը, որը և հանդիսանում էր այդ հավաքույթի ոգեշնչողը, ասում է.

— Երիտասարդ, ես հույս ունեմ, որ մի տաս-տասնհինգ տարի հետո հանդիպելու առիթ կունենանք. թե դուք այն ժամանակ որտեղ կլինե՞ք՝ ես չգիտեմ, բայց որ ես գրական-նության մեջ կլինեմ, ինչպես այժմ, չեմ կասկածում:

Ասում է ու ժողովականների տարակուսած հայացք-ների տակ նստում իր տեղը:

Անցնում են տարիներ, և Դեմիրճյանը հանդիպում է իր պիեսը դատապարտող երիտասարդ ընկերոջը: Անցել էր ոչ միայն ժամանակ, այլև ժամանակի հետ շատ ձախլիկ ըմբռնումներ արդեն պատմությանն էին պատկանում: «Փաջ նազարը» բոլորի կողմից ճանաչվել էր, գնահատվել որպես դասական գործ, որով հիանում էին բոլորը, այդ թվում և նրանք, որ մի ժամանակ փնտվում, ինչ ասես ասում էին:

Դեմիրճյանը հարցրել է.

— Հիմա ո՞րտեղ եք, երիտասարդ:

Երիտասարդը անհարմարության մի զգացումով բացատ-րել է, թե ինքն այժմ գլխավորում է իրենց քաղաքի միջնա-կարգ դպրոցներից մեկը:

— Այդպես էլ կարծում էի,— ասում է Դեմիրճյանը,— իսկ ես, սիրելի՛ս, առաջվա պես շարունակում եմ գրակա-նության մեջ մնալ:

* * *

1941-ին խմբագրում էի «Սովետական գրականություն» ամսագիրը: Ուզում էի, որ իմ խմբագրած առաջին համար-ներում Դեմիրճյանն անպայման նյութ ունենա: Խնդրեցի՝ շմերժեց: Պայմանավորվեցինք այսպես. առաջին և չորրորդ համարների համար գեղարվեստական, երկրորդի և երրորդի համար՝ հողված: Մի քանի օր հետո բերեց արձակ բանաս-տեղծությունների մի ամբողջ շարք, որը տպագրեցի «Ման-րապատումներ» խորագրով: Դրա հետ միասին երկու հոդ-ված: Խոստացավ մի երկու օրից էլ բերել պատմվածք չորրորդ համարի համար: Եվ բերեց:

Դեմիրճյանը բերել էր թվով տաս-տասներկու մանրա-պատում, որոնցից ես ընտրեցի լավագույնները, իսկ մնա-

ցածր վերադարձրի: Զարմացած նայեց ինձ, բայց ձայն չհանեց, խոսակցության նյութը փոխեց, մի փոքր հետո գնաց: Մի քանի օր անց հայտնի դարձավ, որ վերավերվել է: Այլևս բավական ժամանակ խմբագրություն չէր գալիս և եթե երևում էլ էր, ապա միայն կարևոր գործի դեպքում, գալիս էր կարճ ժամանակով և գործը վերջացնելուն պես գնում: Իմ սենյակը չէր մտնում: Հարցերը պարզում էր մյուսների հետ և հեռանում: Երբեմն հանդիպում էինք Գրողների տանը կամ փողոցում, բարևում էր անհաղորդ սառնությամբ, ինչպես սառն ու անհաղորդ կարող էր լինել Դեմիրճյանը:

Իմ մերժած մանրապատումները տարավ «Գրական թերթ», որտեղ անմիջապես տպագրեցին:

Անցան ամիսներ, իմ դեմ եղած բողոքները շատացան: Մեղադրում էին ամսագրին նեղակազմիական բնույթ տալու մեջ: Չեմ կարող ասել, թե մեղադրանքն անհիմն էր, ինձ կանչեցին և ասացին, թե խմբագրի պաշտոնից ազատվում եմ: Հետո պարզվեց, որ դա կարճատև ազատում էր, ժամանակավոր միջոցառում. մի քանի ամսից կրկին անցա խմբագրական պարտականություններին կատարման: Դրան Դեմիրճյանը տեղյակ չէր:

Բավական ժամանակ չէինք տեսել միմյանց: Մի օր հանդիպեցինք տրամվայում: Տեսնելուս պես՝ մոտեցա, բարևեցի ու հարցրի, թե ինչպես է: Պատասխանեց և ապա, մի փոքր անց, իրեն հատուկ բարակ, ներողամիտ մի ժպիտ բարակ շրթունքներին, հարցրեց.

— Հիմա որտեղ ես:

Անմիջապես հիշեցի իր պատմածը «Քաջ Նազարի» մասին և պատասխանեցի.

— Գրականության մեջ:

Դուր եկավ: Ծիծաղեց: Մի քանի անգամ անդրադարձավ պատասխանիս: Դրանից հետո այլևս բարեկամներ մնացին:

Թումանյանին մեծ զրոզ էր համարում, բայց նյարդայնանում էր, տեսնելով նրա անվան շուրջ ստեղծվող պաշտամունքը: Չէր ընդունում հատկապես նրա լեզուն, առարկում էր բոլորին, ով ասում էր, թե մեր գրականությունը Թումանյանի ճանապարհով է ընթանալու: Այն համոզման էր, որ գրական լեզվի սկզբունքը տվել են Հովհաննիսյանը, Տերյանը, Զարենցը: Աղայանին էլ համարում էր սրանց նախահայրը:

— Հեռու բարբառից, մաքուր գրական լեզու:

Սա էր նրա պահանջը:

Դրա շուրջը հաճախ վիճում էին Դեմիրճյանն ու Իսահակյանը: Վերջինս, որ շուտ էր անկեղծանում, նրան վերագրում էր միտում Թումանյանի նկատմամբ: Դեմիրճյանը բարկանում էր, պնդում, որ իրեն սկզբունքն է հետաքրքրում, բայց երբեմն չէր համբերում և ասում էր.

— Դե՛, իհարկե, դու էլ Թումանյանի կողմը կբռնես. նա գյուղացի, դու գյուղացի, իրար լավ կհասկանաք:

Մեկ-մեկ էլ ասում էր.

— Ամբողջ Եվրոպան ման եկար ու էլի նույն գյումրեցին մնացիր:

Իսահակյանը ժպտում էր...

Մի անգամ, երբ պայմանավորվում էի Դեմիրճյանի հետ. թե ամսագրի համար ինչ հարցերի շուրջն է հոդված գրելու, ասաց.

— Մեկը՝ Աղայանի մասին: Բայց ոչ ընդհանրապես: Անգլի հարցն եմ դնելու:

Ձայն չհանցի:

— Նկատի առ, որ հոդվածը արծարծելու է ընդհանուր, սկզբունքային խնդիրներ՝ գրական լեզվի հետ կապված: Խմբագրական կազմից ոմանց կարող է դուր չգալ:

Ակնարկը բավական թափանցիկ էր:

Խնդրեցի դրա մասին հոգ չտանել և հոգվածը գրել այնպես, ինչպես որ մտածում է:

Հոգվածը ժամանակին հանձնեց: Ինչպես սպասում էի՝ պոլեմիկական շունչ ունեք: Մտածեցի, որ ավելի լավ, մտքեր կարող է բորբոքել, վեճ առաջ բերել: Երբ հոգվածը լույս տեսավ, գրականագետ ընկերներիցս մեկը, որ հայտնի էր Թումանյանի բուռն սիրով, դիմեց ինձ, թե կամենում է Դեմիրճյանի դեմ հանդես գալ: Համաձայնեցի: Երբ Դեմիրճյանին ասացի, ժպտաց, բայց ձայն չհանեց: Գրականագետ ընկերս բերեց հոգվածը, ես ուղարկեցի շարելու, իսկ երկրորդ օրինակն ուղարկեցի Դեմիրճյանին՝ ծանոթանալու: Մյուս օրը եկավ մոտս.

— Է՛, տպելո՞ւ ես:

Ասացի որ տպարան եմ ուղարկել:

— Պատասխանելու եմ, ի՞նչ կասես:

— Խնդրեմ:

— Քո գործն է, տպիր, բայց տես, տղան մեղք է: Կոչընչացնեմ: Այնպիսի պատասխան եմ գրելու, որ իրանից բան չի մնալու, ու թե ապագայում հիշվելու է՝ ապա հոգվածիս շնորհիվ միայն:

Հոգվածը լույս տեսավ թե չէ՝ Դեմիրճյանը հարցրեց.

— Պատասխան գրե՞մ:

Խնդրեցի, որ մի-փոքր սպասի: Գուցե ուրիշներն էլ կարտահայտվեն, այն ժամանակ, խնդրեմ, թող ինքը բոլորին միանգամից պատասխանի:

— Ավելի լավ:

Չարախինդ ժպիտ երևաց աչքերում:

Այս խոսակցությունը մայիսին էր, 1941-ի մայիսին: Մյուս ամսին պայթեց պատերազմը և բոլոր ծրագրերը խառնեց իրար: Այլևս ինչ գրական վեճ ու ասուրիս:

— Լավ պրծավ տղան, — ասաց մի օր:

Ճիշտն ասած՝ այն ժամանակ լավ չէի ըմբռնում Դեմիրճյանի սպառնալիքը: Բայց հետո, տարիներ անց, երբ Դեմիրճյանը վեճի բռնվելով մի լեզվաբանի հետ՝ պատասխանեց նրան, նոր միայն հասկացա, թե ինչ էր ակնարկում:

1942-ին էր: Ամիսը չեմ հիշում, բայց միտս է, որ տաք եղանակներ էին: Մեր զորքերը նահանջում էին: Գերմանացիները քաղաք-քաղաքի հետևից գրավելով, հասել էին մինչև Կովկասի դռները:

Երկու, թե երեք օր էր, Դեմիրճյանին չէի տեսել:

Բարձրանում էի Աթուլյան փողոցով: Մեկը անունս տվեց: Ձայնը Դեմիրճյանինն էր: Կանգ առա, շուրջս նայեցի: Դեմիրճյանը չկար: Այն է, ուզում էի շարունակել ճանապարհս, որ նորից լսեցի անունս: Շուտ եկա ձայնի կողմը և ինչ տեսնեմ՝ Դեմիրճյանը շարքային զինվորի համազգեստով, կոշտ սապոգներ ոտին, զլխին սրիլոտկա, խակե բլուզի կրծքին՝ լենինի շքանշան:

— Գնում եմ ռազմաճակատ: Ես ու Նաիրին:

Այն ժամանակ Դեմիրճյանը 67 տարեկան էր: Որոշել էր իր քաղաքացիական պարտքը կատարել՝ մեկնել ռազմաճակատ, կովոդների մեջ լինել, մարտիկների հետ կողք կողքի և ոգևորել, բարձրացնել նրանց հայրենասիրական ոգին:

Դեմիրճյանին Կենտկոմում ասացին, թե կարիք չկա, որ նա այս հասակում գնա հասնի կրակի գիծը ու իր կյանքը վտանգի տակ դնի: Իր հոգևածներով և պատմվածքներով նա թիկունքում նույն գործն է կատարում, ինչ ռազմիկը ճակատում:

Դեմիրճյանը մի կողմից ընկճված, կոտրված էր, որ իր ռազմաճակատ մեկնելու ուսմանտիկական ծրագիրը խափանվեց, մյուս կողմից ուրախ էր, համոզվելով, որ Հայրենիքի համար այս ծանր օրերին ղեկավարութունը այդքան բարձր և ալթմեական է համարում իր գրական գործունեությունը:

Դեմիրճյանի այդ որոշումից որպես հիշատակ մնաց մի լուսանկար՝ ինքը և Նաիրին, երկուսն էլ զինվորական համազգեստով:

1943-ի սկզբներին էր: Գեղարվեստական գրականության բաժինն էի վարում Պետհրատում և միաժամանակ խմբագրում էի «Սովետական գրականություն» ամսագիրը: Դեմիրճյանը հաճախ էր գալիս հրատարակչություն: Գալիս էր, նստում գահավորակին և մնում բավական երկար: Սիրում էր խոսել, խորհուրդներ տալ, երբեմն միջամտել գործիս, խրատել, ինչպես այդ վայել է կրտսերի ճակատագրով մտահոգված տարեց բարեկամին: Այդ անում էր անկեղծ ու սրտանց, երբեմն մեղմ ու հանգիստ, երբեմն հայրական խստությամբ:

Մի օր եկավ, թե գործ ունի հետս: Եվ գահավորակին բազմելու փոխարեն, ինչպես անում էր սովորաբար, մի աթոռ քաշեց գրասեղանիս մոտ ու նստեց:

— Զե՞ս կարող ինձ հետ պայմանագիր կապել, փողի կարիք ունեմ:

Առաջի, որ եթե ուզում է, հենց հիմա էլ այդ կարելի է անել: Ժպտաց: Անցա դիրեկտորի՝ Եվգենյա Մելիքովայի մոտ, նրա համաձայնությունը ստանալու: Սպասածիս պես եղավ՝ ոչ մի առարկություն: Վերադարձա սենյակս: Հարցրի թե ի՞նչ կարող է ներկայացնել տպագրության, որ ըստ այնմ էլ պայմանագիր կազմվի:

— Երեք առաջարկ ունեմ. պատմվածքների շարք, մի տասնհինգ հատ, բոլորն էլ պատերազմի կյանքից: Հետո՝ «Քաջ Նազար» վեպը: Վերջապես՝ պատմական վեպ Վարդան Մամիկոնյանի ժամանակներին:

Հարցրի, թե այդ երեքից որի՞ն է ավելի նախապատրաստված և կարող է անմիջապես գործի անցնել:

— Առաջինի համար թերթերն ամեն օր, մեկը-մյուսից լավ ու պատրաստ սյուժեներ են տալիս: Գրող է պետք, որ նստի ու գրի: Մի-երկուսը դու տպագրել ես ժուռնալում, եթե հիշում ես: Վերջինը, դե՛, ինքդ լավ գիտես, վաղուց պիես եմ գրել: Ուսումնասիրություն էլ: Վեպի կմախքն էլ կա մտքիս մեջ: Մնաց «Քաջ Նազարը», դա ավելի վեպի նյութ է:

Շատ էի ուզում, որ այս վերջինը գրի: Պատկերացնում էի, թե ինչ հոյակապ վեպ կլինի, բայց միաժամանակ մտածում էի՝ գուցե ավելի ճիշտ կլինի կանգ առնել պատմվածքների վրա, որոնք անմիջականորեն հարակցվում են մեր ապրած ժամանակների հետ: Բայց լավ, թե վատ, այդ թեմայով ուրիշներն էլ են գրում, իսկ պատմական վեպ, այն էլ հայրենասիրական ոգով, այն էլ Վարդան Սպարապետի մասին, այն էլ Դեմիրճյանի գրչով, կհնչի որպես ժամանակակից ստեղծագործություն:

Դեմիրճյանը գտավ, որ իրավացի էմ: Կանգ առանք պատմավեպի վրա:

— Ես էլ այդպես եմ կարծում: Ինչ թաքցնեմ, վախենում էի, որ հրատարակչությունը չուզենա այս օրերին պատմական գործ հրատարակել: Շատ ուրախ եմ, որ միատեսակ ենք մտածում:

Պայմանավորվեցինք այսպես, որ մինչև առանձին գրքով լույս ընծայվելը, վեպը մաս-մաս տպագրենք ամսագրում: Ամսագրի երրորդ համարում խոստացա տպագրել նրա ուսումնասիրությունը Վարդանանց պատերազմի մասին, որ վաղուց ուներ գրած, և այդտեղ էլ ազդարարել, որ ամսագրի հաջորդ համարից տպագրվելու է հեղինակի վեպը նույն ժամանակաշրջանի մասին: Ըստ մեր պայմանի՝ մի ամիս անց պետք է ներկայացնեի վեպի առաջին էջերը՝ ամսագրի համար: Եվ ինչպես միշտ, տված խոսքի տերը եղավ. պայմանավորված ժամանակին հանձնեց վեպի առաջին էջերը:

* * *

Պայմանագիր կապելիս հարցրի, թե վեպն ինչպես է կոչվելու:

«Հոսանքի հակառակ»:

Ես թեև այդպես էլ գրեցի պայմանագրի մեջ, բայց նկատեցի, որ հաջող չէ: Ասաց, թե պայմանական վերնագիր է, իր սրտովն էլ չէ, հետո մի ուրիշ, ավելի հարմարը կգտնի: Երկու օր անց եկավ թե՛ ուզում է «Վարդան Մամիկոնյան» վերնագրել: Ասացի, որ դա էլ առանձնապես հաջող չէ:

— Ինչի՞ «Գևորգ Մարգարետունի» կարող է լինել, իսկ «Վարդան Մամիկոնյան» չէ:

Բացատրեցի, թե ինչու եմ այդպես կարծում: Կարծես համոզվեց: Մի փոքր անց, խաղաղված ձայնով վրա բերեց.

— Դե որ այդպես է՝ ինքդ դիր վերնագիրը: Մի անգամ գտար: Եվ վատ չէր: Մի հարմար բան կգտնես:

Խոսքը «Մանրապատումների» մասին էր, որ իմ դրած վերնագիրն էր (ինքը ներկայացրել էր «Շտրիխներ» խորագրով):

* * *

Մի ամիս հազիվ էր անցել, որ Դեմիրճյանը ուղարկեց ինձ վեպի առաջին էջերը՝ ամսագրում տպագրելու համար: Անմիջապես կարդացի: Եվ այդ պահին էլ իմ մեջ ծագեց վերնագիրը՝ «Վարդանանք»: Ասացի Դեմիրճյանին, անշափ ուրախացավ:

— Դրանից ավելի լավ չի գտնվի: Ապրես:

Այնուհետև գրողների շրջանում առիթը ներկայանալիս ասում էր.

— Վեպիս կնքահայրը:

* * *

Ըստ պայմանի՝ վեպը լույս էր տեսնելու մի գրքով. Պայմանագրում նշված ծավալը՝ քսանհինգ մամուլ, հեղինակի ցանկությունն էր: Սկսեց գրել թե չէ՝ հասկացավ, որ դժվար է լինելու այդ սահմաններում մնալ:

Մի օր թե՛

— Եթե ավելի մեծ ստացվի, ոչի՞նչ:

Խնդրեցի դրա մասին շմտածել, կաշկանդված չզգալ, որովհետև նշված ծավալը պարտագրող նշանակութուն չունի:

Ես, ինչպես և ինքն այն ժամանակ, կարծում էինք, թե խոսքը մի հինգ կամ վեց մամուլի հավելյալ մասին է: Երբ գործն արդեն բավական առաջ էր գնացել և ինքն էլ պարզ

տեսնում էր, թե դեպքերի զարգացումն ինչպիսի ընդլայնումներ է պահանջում, մի օր ասաց.

— Գիտես, որ մի գրքի մեջ տեղավորվել շեմ կարողանում: Ինչ էլ անում եմ՝ նյութս տարածվում է: Երկրորդ հատորն անխուսափելի է:

Ասաց ու նայեց դեմքիս, ուղիղ աչքերիս մեջ: Նրա հայացքը լարվածություն էր արտահայտում: Երևի մտածում էր, թե հրատարակչությունը կարող է առարկել: Երբ փարատեցի կասկածները, ժպտաց բարի ու բավական:

* * *

«Վարդանանքը» դրելու տարին Դեմիրճյանի մոտ հաճախ էի լինում: Պատերազմական ահեղ օրեր էին: Դեմիրճյանը տանից դուրս էր գալիս հազվադեպ: Նստած գրում էր օրն ի բուն: Սեղանի մոտ նստելու սովորություն չունեի: Մի մեծ գիրք էր դնում ծնկանը, վրան թուղթ ու գրում տենդորեն: Գրում էր մատիտով: Պետք էր տեսնել, թե ինչ աներևակայելի արագությամբ: Էջեր էր, որ լցում էր: Ամեն ինչ գլխի մեջ պատրաստ՝ հանձնում էր թղթին՝ դեմքեր, դեպքեր, բախումներ, հերոսական դրվագներ, բնության տեսարաններ...

Մի օր հարցրի, թե ապա ե՞րբ է մտածում, ե՞րբ է խորհում գրելիքը: Ասաց գիշերը, երբ ամենքը քնած են, երբ շուրջը խաղաղ է, մտքի մեջ կառուցում է ամեն ինչ՝ դեպքերի հաջորդականություն, հերոսի վարքագիծ, հոգեբանություն, զարգացում, և առավոտյան դեմ, կանուխ ժամերից մեկին, նստում է գրելու: Իրեն թվում է, թե մեկը կողքին կանգնած թելադրում է, ինքը շարադրում: Թելադրում է այնպես փութաջան, որ ինքը հազիվ է հասցնում գրի առնել:

Պետք էր տեսնել Դեմիրճյանին ներշնչանքի ժամին: Նյարդային խառնվածքն այդ օրերին դարձել էր ավելի նյարդային, դյուրագրգիռ, անմիջապես բռնկվող: Ու երբեմն այնքան էր տարվում գործով, այնքան էր ենթարկվում սեփական երևակայությամբ ստեղծված իրականությանը, որ

մոռանում էր, թե կողքին մարդ կա, ձայներ էր հանում-
տնքում, կամ, մեկ էլ տեսար մի բարակ ժպիտ ողողում էր
նրա ոսկրացած, այդ օրերին դալկացած, սրված դեմքը:
Ասես հիվանդ լինեիր, տենդի մեջ:

Ասացի, որ այդ օրերին տանից գրեթե դուրս չէր գալիս:
Այնպես եղավ, որ եթե ուզեիր էլ՝ չէր կարող դուրս գալ:
Հիվանդացավ: Բայց դա էլ չկասեցրեց նրան: Շարունակում
էր գրել: Երբեմն թուլանում էր այն աստիճան, որ ձեռքն
այլևս չէր կարողանում շարժել: Այդ պահերին ընդհատում
էր, մեջքը դեմ տալիս պատին, մի ցավագին ժպիտ դեմքին,
որ նշանակում էր՝ «տե՛ս, թե ինչ օրն եմ ընկել», շունչ
էր առնում և հետո կրկին շարունակում գրել առաջվա թա-
փով, մինչև ուժասպառություն: Զերմաստիճանը բարձրանում
էր, բայց գրելու տենդը չէր նվազում: Երբեմն էլ հազն էր
բռնում, խեղդող ու երկարատև, դարձյալ մատիտը վալը
չէր դնում: Սպասում էր մինչև հազը կտրվի, որ հարձակվելու
հերթը իրեն գա, նորից վրա պրծնի ձեռագրին:

Նայում էիր ու մտածում, թե այդ նիհար, այդ սմբած
մարդու մեջ որտեղի՞ց այդքան ուժ, այդքան կորով: Բա-
վարարված էր, երբ գրում էր, երջանիկ, և, ընդհակառակը,
տառապանքը ծայր էր առնում, երբ ստիպված էր ընդհատել,
դադար տալ: Գրում էր ինչպես ասացի, շտապ, չափազանց
արագ: Երբ խոսք էի բացում, թե ինչո՞ւ է այդպես հեիհև
աշխատում, ասում էր, թե դա իր մարտական պարտքն է,
և ինչքան շուտ ավարտի՝ այնքան լավ: Գրում էր համոզված,
որ այդ վեպը սովորական գիրք չի լինելու ժողովրդի կյան-
քում, և երբեմն այնպես էր թվում, թե ինքն էլ հավատա-
ցած է, որ ինչքան շուտ գրի և ինչքան լավ, այնքան ավելի
կմոտենա հաղթանակի օրը, այնքան մեծ ու վերջնական
կլինի այդ հաղթանակը:

Հաճախ ասում էր:

— Ես ժամանակակից վեպ եմ գրում, եթե ճիշտը կու-
զես՝ պատմական վեպ, որը ժամանակակից հարցեր է դնում,
թե չէ՝ հիմի ինչ ժամանակն է պատմությունամբ զբաղվելու,
թե ինչը ինչպես է եղել շատ ժամանակներ առաջ: Ես թան-
գարան չեմ, և պատմության հիշատակներ, ինչքան էլ

սրբազան, պահպանողի դեր չեմ կամենում վերցնել վրաս: Այսօրվա հարցերն են ինձ հուզողը, իսկ երբեմն լավ է դրանց լուծումը պատմության մեջ գտնենք, պատմական անցուդարձերի օգնությամբ: Եթե ժողովրդի հոգեբանությանը նայենք, այն էլ մեր՝ ավելի ազդեցիկ:

Սկսեց գրել 1943-ի փետրվարին և նույն թվականի ամառն աւարտեց: Այդքան մեծ կտավը՝ մի քանի ամսում, աներևակայելի կարճ ժամանակում: Զարմանալի է, անշուշտ: Բայց ինքը չէր զարմանում: Բնական էր համարում: Եվ չուներ էլ այն համոզումը, թե մի օր, եթե նստի մի այլ վեպ գրելու, կգրի նույն արագությամբ: Դա կուտակում էր, երկար տարիների կուտակում: Տարիներ շարունակ մտածել էր, խորհել և այդ ամենը այժմ իր արտացոլումն էր գրում վեպի մեջ, ձևի կողմից մի այնպիսի գրական ընդարձակության մեջ, որ ոչ մի տեսակետից չէր կաշկանդում, ճիշտ հակառակը՝ ծավալվելու ազատ ու լայն ասպարեզ էր բացել նրա համար: Եվ նա պոռթկաց, հիացավ, հուզվեց, սիրեց, տխրեց, ատեց, գայրացավ, հերոսացավ: Տարիներով ամբարված պատրանքի ու երազի թաքնված գանձեր, տարիներով լուռ մնացած վսեմ մտքեր, նվիրական ձրգտումներ, անհանգիստ ապրումներ՝ հանկարծ ժայթքեցին, և ինչպես ժայռի գլխից գահավիժող մի ջրվեժ՝ թափ առած մի ճամփա ընկան դեպի ընթերցողը, նրա միտքը գրավելու, իրեն ենթարկելու համար: Դա պոռթկում էր, նման գարնանային գետին, որ մեկ գալիս է հորձանքով, տարածվելով, երբեմն հունից դուրս գալով, ընդգրկելով ասիերն էլ, բայց մեկ էլ, հանկարծ, մի ինչ-որ տեղ անձկանալով, նվազում է, բայց հետևից անպայման խոր հետքեր է թողնում: Հարթ շատացվեց: Եվ չէր էլ կարող ստացվել: Ինքն էլ գիտեր ու կարևորություն էր տալիս դրան:

— Բնության մեջ ոչինչ հարթ չէ. հարթավայրի վրա մեկ էլ տեսար ահագին մի լեռ է բարձրանում, ժայռի կողքին՝ կիրճ է բացվում: Նույնը և մարդը: Ուզում ես արտաքինը վերցրու, ուզում ես՝ հոգին: Գլխավորը հոգին է, շունչը, ներքին ներդաշնակությունը: Մնացածը՝ ոչինչ, միշտ կարելի է անել: Միշտ կգտնվի դրա համար ժամանակ: Գլխավորը՝ գլխավորն է: Եթե կա, ուրեմն վեպը փրկված է:

«Վարդանանքը» հնչեց, գտավ շոնգալից արձագանք:

Ամիսներ անց խնդրեցի բացատրել ինձ, թե ներքին ինչ մղումներ պատճառ դարձան՝ գրելու այդ վեպը:

— Դրդապատճառները շատ էին. մեր պատմական անցյալով շատ եմ ապրել, հետո՝ ունեցել եմ մտահոգություն, որ մեր ժողովուրդն իր պատմությամբ պետք է անդրադառնա, ապրի նրանով, իմանա իր ծագումը, իմանա իր պատմական ճակատագիրը, առանց դրան՝ ինչ ժողովուրդ, անապաստան զավակ անհայտ ծնողների: Առանց անցյալով ապրելու, առանց անցյալն իմանալու, ժողովուրդը ներկան, իր քաղաքական-կուլտուրական կյանքը կառուցել չի կարողանա: Ամեն մի ժողովուրդ գալիս է իր պատմությունից: Պատմությունը՝ նրան հետապնդում է շարունակ:

Համեմատենք առաջին և երկրորդ համաշխարհային պատերազմները. առաջին պատերազմում հայ ժողովուրդը սլասսիվ եղավ, կովոդ ուժերը կովում էին իրենց նպատակների համար, որի մեջ հայ ժողովուրդը համարյա թե բաժին չունեցավ: Նրան բաժին ընկան միայն աղետները: Այս պատերազմում հայ ժողովուրդը հանդես եկավ որպես ակտիվ ուժ՝ պատմական դեր կատարելու համար: Երբ վեպը սկսել էի, հայ ժողովուրդն արդեն մասնակից էր պատերազմին և դեռ հեռու էր վախճանը: Բայց ես գիտեի, թե նա ինչպես դուրս կգա պատերազմից, որովհետև գիտեի նրա պատմությունը: Մխրագործությունները, որ հանդես բերեց հայ ժողովուրդն այս պատերազմում, ինձ համար անսպասելի չէին: Դրանք ունեին պատմական հիմքեր:

Կանգ առավ և ապա եզրակացրեց.

— Ուրեմն՝ իմ հաշվով գրում էի մի այժմեական վեպ: Վեպի ոգին համընկնում է մեր ժամանակներին: Ընդհանրություն անպայման կա: Դա ազգային ինքնուրույնությունն ամրապնդելու խնդիրն է, լեզուն ու կուլտուրան պաշտպանելու խնդիրն է, ժողովրդական շարժումը, համաժողովրդական բնավորություն ունեցող սխրագործություններն են: Անցյալի գրողները չէին կարող տեսնել այդ: Սովետական

շրջանը տվեց մեր գրողներին այդ ըմբռնումը: Այս ընդհանուր է: Այս այն է, որ երկու տարբեր էպոխաները մոտեցնում է իրար:

Եվ ժողովուրդը Դեմիրճյանի վեպն այդպես էլ ընկալեց: Նրա արագ տարածումը, ձեռքից-ձեռք անցնելը, քննադատություն տված բարձր գնահատությունը, ընթերցողներին անմակաները, գինվորների նամակաները ռազմաճակատից: Եղան մարտիկներ, որ իրենց բարեկամներին գրեցին, թե այսօր երկու հաջողություն ունեցանք. Սևաստոպոլը գրավեցինք և ստացանք «Վարդանանքը»:

Ես հարցրի, թե ինչպես է գնահատում նա իր վեպի հաջողության փաստը:

— Վեպի գտած հաջողությունն ապացուցեց այն միտքը, թե ժողովուրդն իսկապես չի ուզում իր պատմությունը մոռանալ: Որ ժողովուրդը ձգտում է ունի պատմության, կամենում է իմանալ, ստուգել և այլն:

Զրույցն ընդհատվեց: Կինը՝ Մարիա Միխայլովնան սուրճ բերեց: Դեմիրճյանի դեմքին դժկամ արտահայտություն կար: Կինը գնաց, նա շարունակեց խոսքը:

— Ես վերջացրի «Վարդանանքը»: Վեպի լավն ու վատը, ծուռն ու շիտակն այս րոպեին կատարված փաստ է: Հանձնված է արդեն ընթերցողի՝ այսինքն ժողովրդի դատաստանին: Ոչինչ այլևս չպիտի կարողանամ ավելացնել: Ռեբեն ժամանակն է, որ ես լռեմ: Բայց մեկ-երկու խնդիր կա, որ թե վեպի հետ են կապված և թե վեպից դուրս էլ գոյություն ունեն: Զգիտեմ, թե որքան տեղին կլինեին վեպից դուրս իմ լուսաբանությունները և փաստարկումները, բայց ինձ թույլ եմ տալիս մի-երկու խոսք ասել Վարդանի և Վասակի մասին: Գիտեմ, որ Վարդանի մասին ավելի քիչ պետք է վեճ լինի, քան Վասակի: Եվ գիտեմ. թե ինչ վեճեր պետք է առաջանան: Ես այդ վեճին իմ վեպով չեմ ուզել մասնակցել: Եվ ահա թե ինչու: Մեր հասարակայնությունը տարբեր շրջաններում հասարակական-պատմական խնդիրներ է առաջադրել և ջանացել է «պատմականորեն» լուծել: Այսպես, օրինակ, մեր ազատամիտները և մասամբ էլ պահպանողականները 60—70—80-ական թվականներին,

կամենալով իրենց արդիական-պատմական-հասարակական խնդիրները լուծել զանազան օրինակապիսիների փաստարկումներով Վարդանի և Վասակի պատմական դերը հարմարեցրել են իրենց ժամանակի հասկացողություններին: Իսկ ես ոչ մի ժամանակակից հարց չեմ լուծել Վասակով և Վարդանով, այլ ջանացել եմ նրանց պատկերը տալ այնպես, ինչպես կարող էին լինել պատմության մեջ:

* * *

Ոչ մի կերպ չէի հաշտվում «Վարդանանքի» ոճական քնդհանուր հյուսվածքի մեջ տեղ գտած մի քանի անհարիր բառերի հետ՝ տեմպ, կոմիկ, որոնք թեև շատ չեն, բայց խախտում են պատմականության պատրանքը:

Ասացի տարակուսանքս:

Զհամաձայնեց, նույնիսկ բարկացավ: Հետո խորամանկ ժպիտ խաղաց դեմքին:

— Ինչի՞ Ֆեյխտվանգերը կարող է պատմական իր վեպում գործածել «սառը պատերազմ» արդիական ձևակերպումը, եթե ճիշտը կուզես՝ խտորեն ժամանակակից մի հասկացողություն, և ոչինչ չեք ասում, կուզեք տալիս, իսկ իմ մի-երկու բառը չեք ուզում հանդուրժել:

Ֆեյխտվանգերի օրինակը ինձ համար անակնկալ էր: Չէի հիշում: Չէի հասկանում՝ Ֆեյխտվանգերի մոտ իսկապե՞ս այդպիսի բան կա, թե՞ հնարում է՝ հակառակորդին խեղճացնելու դիտավորությամբ:

Դեմիրճյանի ժպտուն հայացքը կարդում էր իմ մտքերը:

— Կարդացե՞լ ես:

Եվ նա իմ առջև դրեց «Իսպանական բալլադը»: Ասացի, որ կարդացել եմ: Բացեց մի էջ, ուր իսկապես կար այն արտահայտությունը, որի տակ Դեմիրճյանը մատիտով մի կոշտ գիծ էր քաշել, ասես մի այդպիսի վեճի համար վաղորոք զինվելով:

Սա լուռ նստած էի: Իմ լուսնությունը նա համարեց պարտության պերճախոս վկայություն. և չկամենալով այլևս շարունակել հարձակումը, խաղաղված ձայնով հարցրեց.

— Ինչո՞ւ Յեկիտովանդերին կարգալիս չես նկատել, իսկ իմ վեպի մեջ իսկույն նկատել ես:

Ձայն չհանեցի: Գիտեի, որ նրա հարցը միշտ չէ, որ հարց է, այլ հաճախ խոսեցու ձև: Հարց է տալիս, որ հետո ինքն էլ պատասխանի: Եվ իսկապես, մի կարճ դադարից հետո շարունակեց.

— Բոլոր դեպքերում, երբ պատմական նյութի մասին գրում են ժամանակակից լեզվով, առանց ոճաբանության, ամենաժամանակակից արտահայտություններն անդամ հեշտությամբ մերվում են: Ինչո՞ւ. որովհետև ոճական միասնություն իմաստով օտար չեն կամ գոնե՝ չեն թվում: Իսկ ստիլիզացիայի դեպքում նրանք օրգանական չեն երևում, դուրս են ընկնում ընդհանուր մթնոլորտից, աչքի են զարկում:

* * *

Դեմիրճյանին այցելողը իսկույն կնկատեր, որ նա կատու պահելու մի առանձին սեր ունի: Մեկի տեղ մի քանիսը՝ Սրանք մեծ մասամբ գրքի պահապանի դիտին էին, հավաքված միմյանց շուրջ, խաղում, գլխուտվում էին՝ մեծ բավականություն պատճառելով թախտի ծայրին նստած տիրոջը: Սա այնպես էր խոսում կատուների մասին, ասես մարդիկ լինեին. սրտաքավ հոգածությամբ: Պատմում էր, թե այս մեկը քանի օր է իրեն վատ է զգում, անսրամադիր է, մյուսը՝ չգիտես թե ինչու չի ուտում:

— Մի տես է, ի՞նչ սիրուն են անիրավները:

Գալիս խնդրում էին, որ կատուներից մեկը պիտի իրենց: Ձէր մերժում, բայց անմիջապես չէր տալիս: Մի քանի օր հարցումիորձ էր անում, և երբ համոզվում էր, որ ուղղը խնամքով կվերաբերվի կենդանուն՝ տալիս էր:

Մի անգամ սխալվել էր հաշիվների մեջ: Պարզվել էր, որ խնդրատուն դաստիարակչական նկատառումներով կատվի նկատմամբ խստութուններ է դրոժ դնում, նույնիսկ ծեծի է դիմում: Եվ անձամբ դնում է կատվի քսակից, ընդհարվում, որ կատվի հետ վարվելու ձևը չգիտեն, բերում տուն ու, որպես տուժածի, մի քանի օր. առանձնահատուկ խնամք և հոգատարություն ցույց տալիս նրան:

Մի օր հարցրի, թե ինչո՞ւ թվարկումները ստորակետերով տրոհելու փոխարեն, ինչպես ընդունված է, տրոհում է վերջակետերով:

Ժպտաց:

— Բոլոր թվարկումները չէ, որ տրոհում եմ վերջակետերով: Նայած տեղին: Հետո՞ ոչ թե քերականության քարացած կանոն, այլ մարդու կենդանի մտածողություն: Ահա սկզբունքը:

Նորից բացատրեց.

— Երբ դու կոռզդ հետ խորհուրդ ես անում, թե վաղվա ճաշկերույթին ովքեր են կանչվելու, մի՞թե բոլորին հիշում ես նույն հաջորդականությամբ: Բերան արած մարդու արագությամբ՝ Վարդանը, Պարույրը, Գուրգենը, Սարգիսը, Լևոնը, ասես մտքիդ մեջ իրար կողք շարված լինեն՝ մեկ, երկու, երեք, չորս, հինգ, որ ավելի հիշողության մեխանիկա է: Սա քերականական սխեմա է: Իրականում այլ կերպ է լինում: Հիշում ես մեկին, հետո մյուսին, ապա միտքդ լարում ես՝ չլինի, թե մեկնումեկին հանկարծ մոռանաս, և հիշում ես մեկին էլ: Ուրեմն՝ դադար, որը ստորակետերով չես արտահայտի: Դրա համար էլ ստացվում է հետևյալ պատկերը՝ Վարդանը, Պարույրը, Գուրգենը: Սարգիսը, Լևոնը:

Լռեց: Տեսնելով, որ ձայն չեմ հանում, ընդհանրացրեց.

— Միտքս այն է, որ տրոհության նշաններն ավելի ճիշտ արտահայտեն մարդու մտքի ընթացքը: Ռեալ ընթացքը:

Շեշտեց ռեալ բառը:

* * *

Մեր ընկերներից մեկը, իր ասպարեզում բավականաչափ փորձված մասնագետ, գիրք էր հրապարակել, ծավալուն մի մենագրութուն: Մամուլն այդ աշխատության մասին գովեստով արտահայտվեց: Մեր գրական ամսագրի խմբագրությունից խնդրել էին, որ Դեմիրճյանը գրի: Խոստացել էր:

Նվ, շնայած իր զարմանալի ճշտապահությանը, ձգձգեց և չգրեց: Հիշեցրին՝ նորից ձգձգեց: Ձգձգեց այնքան, որ այլևս այդ գրքին անդրադառնալը մի ուշացած արձագանք կլիներ: Այդպես էլ չիմացվեց՝ Դեմիրճյանը չուղեց գրե՞լ, թե ուզում էր, բայց ժամանակ չգտավ: Դա խիստ զարմանալի էր, որովհետև հեղինակին տիրում էր, գնահատում և հաճախ, գոնե զրույցների ժամանակ, իր պաշտպանության տակ էր առնում, երբ որևէ մեկը նրա մասին աննպաստ խոսք էր ասում:

Մի օր որոշեցի հարցուփորձ անել և իմանալ, թե ինչո՞ւ չգրեց:

— Գիրքը սրտովս չէր:

Զարմացա. ինչո՞ւ էր հապա խոսք տվել: Ասաց, թե խոստացել էր առանց կարդալու, չկասկածելով գրքի արժեքի վրա:

— Բայց որ կարդացի՝ հուսահատություն իշավ վրաս: Նյութ կա գրքում՝ հարուստ, ահագին: Այդքանով էլ արժեքավոր է անպայման: Զեմ ժխտում: Բայց կոնցեպցիա չկա: Կարդում ես և չես ըմբռնում, թե գրքի միտքը ո՞րն է, ինչի՞ համար է գրել, ի՞նչ է ուզում ասել հեղինակը: Սա մի սև աշխատանք է առայժմ, հավաքչական, մի-փոքր ավելի՝ կարգ ու կանոնի մեջ դրած: Այսքանն անելուց հետո նոր միայն պետք է գրեր: Պետք է ընդհանրացներ ձեռքի տակ եղած նյութը: Չի արել, մնացել է նյութի տակը ճկոնած:

Լռեց մի պահ, հետո շարունակեց.

— Ինչի մասին էլ ուզում ես գրիր, մեկ է, պետք է ասելիք ունենաս: Հավաքածո՞ւ նյութը դրան է ծառայելու, որ ասես այն, ինչ անհանգստացնում, զբաղեցնում է քեզ և դու պահանջ ես զգում դրա մասին խոսելու: Այդ ասելիքը չգտա գրքում, դրա համար էլ չգրեցի:

Չի կարելի ասել, թե Դեմիրճյանը շուտ էր հիանում, բայց երբ հիանում էր՝ անգուսպ իր ուրախության մեջ, ոչ միայն չափ շփտեր, այլև մանկական դյուրաբեկությամբ առաջին հերթին ինքն էր ենթարկվում իրեն պաշարած հույզին: Մարո Մարգարյանը, նուրբ, հոգեթու՛մ ու մտերմիկ բանաստեղծուհի, իր նոր լույս տեսած գիրքը տարել էր Դեմիրճյանին և նվիրել նրան: Մի քանի օր հետո, երբ վերջինիս մոտ էի, պարզվեց, որ կարգացել է և այնքան ազդվել, որ նստել ու գրքի լուսանցքներում բանաստեղծություններ է գրել:

* * *

Մի օր, գրույցի ժամանակ, առաջ թե նազարի կերպարը, թեև հայտնի հեքիաթից վերցրած, ունեցել է իր համար նախատիպ, որին նկատի է ունեցել պիեսը գրելիս:

— Սարիզամիշում, իմ մանկության օրերին, մի մարդ կար: Ահա դրան հմ աչքի առաջ ունեցել: Հակասական մի բան կար մեջը. արտաքուստ՝ խոշոր էր, հաղթանդամ, բայց ծայրաստիճան վախլուկ: Քաջլու՛մ էր քաջարի հսկայի պես, իսկ ամենաշնչին վտանգի ժամանակ՝ մեկան ծակին ունեցած չունեցածը կտար:

* * *

Լույս էր տեսել «Քաջ նազարը» իմ առաջաբանով: Անցա մոտը: Խոսք բացվեց նկարագրողումների, ինչպես և առաջաբանի մասին: Մի դիտողություն արեց:

Առաջաբանում ասված է, թե հեղինակը հեքիաթը նոր և ինքնատիպ կերպով է վերջացրել, բոլորովին տարբեր թումանյանից, ժողովրդականից ընդհանրապես:

— Այդ՝ իհարկե, ճիշտ է, բայց պետք է վերապահությամբ խոսեիր այդ մասին: Անկեղծ ասած՝ այդ լուծումը ինձ էլ չի համոզում: Համաձայն հմ, որ սովելի լավ է, քան

նախորդ արածներս: Բայց արհեստական է թվում ինձ, նույնիսկ, եթե ճիշտն ուզում ես իմանալ, հակառակ հեքիաթի ոգուն: Բնավ կարիք էլ չկա, որ ես նոր լուծում գտնեի, քանի որ ժողովուրդը ինքը արել է այդ և չի սխալվել: Քաջ Նազարը մնում է գահի վրա և քեֆ է քաշում մինչև օրս: Սա է միակ լուծումը:

* * *

Մի օր, դա «Վարդանանքի» երկրորդ հատորը գրելուց և լույս տեսնելուց հետո էր, հարցրի, ստեղծագործական ինչ ծրագրեր ունի:

— Ուզում եմ շարունակել մանրապատումները: Ունեմ նովելների ծրագրեր: Մի վիպակ արդիական կյանքից: Այս րոտորը արդիական կյանքից, այժմեական նյութ, խորացրած, գերազանցապես խոհերի բնույթ պետք է ունենա, խոհական: Դա մի տեսակ հանգիստ է լինելու մեծ վեպից հետո, մինչև նորից կձեռնարկեմ մի նոր վեպի: Դա է լինելու իմ առաջիկա ստեղծագործական կյանքի գլխավոր առարկան:

Խոսքը վերաբերում է «Քաջ Նազարին»:

— Ուզում եմ դուրս գալ Ֆուկլտրային նյութի սահմաններից և որոշ սատիրական էլեմենտներ մտցնել մեջը: Խստորեն չեմ հետևելու կոմեդիայի ֆարսուլային: Եթե այդպես անեմ, դա կդառնա կոմեդիայի արձակ շարադրանքը: Ինչ որ ուզում եմ անել՝ անհնարին էր կոմեդիայի 60—80 էջի սահմաններում: Մինչդեռ նյութը շատ է առատ: Եվ հետո՝ կոմեդիան իբրև դրամատիկական երկ՝ շատ հարմարություններ չունի նյութը բանալու, խորացնելու, դեպքերը լցնելու այն կենսամիլիտոփայտությամբ, որ «Քաջ Նազարի» նյութը վերցնում է:

Մի փոքր անց:

— Ինձ համար «Քաջ Նազարը» լինելու է ամենատխուր հասկացողությունը: Դա լինելու է մարդկային սատիրա: «Քաջ Նազարը» պետք է հիշեցնի աշխարհի բոլոր բախտախնդիր տիրողներին: Վեպն իր լայն ու մեծ կտավով հնարավորություն կտա ավելի մեծ չափով դուրս բերելու հերոս-

ներ, ինչպես և գլխավոր հերոսի հետ շրջել գյուղեր, քաղաքներ, զանազան միջավայրեր ընկնել: Այսինքն՝ ֆարուսան ընդարձակել, ծավալել:

* * *

Չեմ հիշում առիթը, բայց լավ միտս է, որ ասաց.

— Քաջ Նազարը հավիտենական նյութ է, բոլոր մարդկանց մատչելի, ինչ ազգի էլ լինեն, ինչ ժամանակի էլ պատկանեն: Տարբեր ձևերով, տարբեր չափերով նույն հոգեբանությանը ամեն մարդ էլ անդրադառնում է: Ինչքան ազգային գրեմ, համամարդկային կատարյալի, ինչքան էլ համամարդկային՝ մեկ է, ազգայինը կա ու կա:

Քիչ հետո.

— Հեքիաթի սահմանները նեղ են, նյութը բացվելու տեղեր շատ ունի:

Լուեց.

— Թե իմանաս՝ ինչ բավականություններ եմ գրելու վեպը. շրջելու է Նազարս, Սաքոն էլ հետը: Ո՛ր ասես, որ չի գնալու, ի՛նչ ասես, որ չի տեսնելու, ի՛նչ ասես, որ չի լսելու:

Նորից լուեց:

— Մեծամտություն չհաշվես. եթե ես չգրեմ, էլ ոչ ոք դրան ձեռք չի տա: Ես լավ եմ տեսնում դրա շորս բոլորը: Հանդարտ ժամանակ է պետք: Երկու, ամենաշատը երեք տարի, ու վեպը սեղանի վրա կլինի:

* * *

Գնացել էինք Դեմիրճյանի մոտ. Մարո Մարգարյանն էր, Բայանդուրը և ես: Գիտեինք, որ հիվանդ է, ուզում էինք տեսնել: Բացի այդ, միտք ունեինք խնդրելու, որ մի փոքրիկ հոդված գրի Արուսյանի մասին՝ հորեկյանի կապակցությամբ:

Պառկած էր, թեև տրամադրությունը վատ էր, նույնիսկ հուսահատ, բայց միտքն անդուլ աշխատում էր, կատակոծ, երբեմն նույնիսկ խայթում: Երբ խոսք բացվեց հոդված գրելու մասին՝ հրաժարվեց.

— Նազարն էլ կոխիլ գնացողը չի...։

Շատ ծիծաղեցինք, ինքն էլ մեզ հետ։

Հետո խոսեցինք հիվանդության մասին։ Ասաց, թե բուրոր հիվանդությունները մի աղբյուր ունեն՝ նյարդերը։ Տարիներ առաջ իրեն մի բժիշկ խորհուրդ է տվել՝ խնայել ջղերը, ապա թե ոչ՝ կզղչա։ Ինքը բանի տեղ չի դրել, իսկ այժմ ուշ է։ Եվ ասաց, խելքի է եկել, երբ արդեն ուշ է։

Ես հետս տարել էի Դրամբյանի դիսերտացիայի ավտոռեֆերատը, որը նվիրված էր Եղիշե Թադևոսյանի ստեղծագործության գնահատության հարցին։ Շատ ուրախացավ, թերթեց, աչքերը փայլեցին, դեմքը պայծառացավ։

— Կա՛մ նկարիչ էր, մե՛ծ, իսկակա՛ն։ Ափսո՛ս, Շա՛տ մեծ էր։ Ո՛վ կարող էր հետը ոտք գցել։ Ես չգիտեմ։ Գուցե Սուրենյա՛նցը։ Բայց Թադևոսյանն ուրիշ էր։ Բնության ի՛նչ զգացում ուներ, գույների ճաշակ։ Բայց արի տես, որ շատ անտաղանդ էր կյանքում, չգիտեր իր կյանքը կազմակերպել։ Զգույշ էր, մի քիչ էլ վախլուկ։ Հայաստան չտեղափոխվեց, մնաց Թիֆլիսում և այն պատճառով միայն, որ նրան թվում էր, թե դա մի մեծ հոգս է, և չէր պատկերացնում, թե ինչպես պետք է հրաժարվի իր արվեստանոցից, որ նրան պատկերանում էր իբրև իրենից անբաժանելի մի էություն։

Ծիծաղեց քթի տակ և պատմեց հետևյալ դեպքը.

— Մի անգամ գնացել էի մոտը։ Տանը մենակ էր։ Կինը գնացել էր շուկա։ Շատ ուրախացավ։ Ասաց, թե պետք է ինձ բան ցույց տա։ Տարավ իր սենյակը, և գրասեղանի դարակից, երկար որոնումներից հետո, հանեց մի ծալմաշ թուղթ։ Խնդրեց, որ կարդամ։ Ուտանավոր էր, նյութը՝ բնության վեհությունը։ Տխուր, ծախողակ մի գործ։ Հասկացա, որ ինքն է գրել։ Ինչպե՞ս է, հարցրեց։ Ասացի՝ վատ չէ, կարծեմ նույնիսկ ասացի, թե լավ է։ Դեմքը հրճվանքից փայլեց։ Հարցրեց, թե ուղղելու կարիք չունի՞։ Ասացի, թե ունի։ Խնդրեց, որ անեմ։ Զգիտեմ ուվ էր ինձանից առաջ ձեռք խաղացրել թղթի վրա. հասկացա, որ նույնը խնդրել է և ուրիշներին։ Ես էլ իմ հերթին մի-երկու ուղղում արի, որ, իհարկե, չէր կարող փրկել ոտանավորը։ Ասաց. գրել է

նաև դրա երաժշտությունը: Հանեց նոսաաները, դրեց ֆիս-
հարմոնի վրա ու նվագեց: Ճնշող մի գործ էլ դա էր,
սակայն պետք էր տեսնել նրա դեմքի արտահայտությունը
նվագելիս: Հուզված էր, ծայրաստիճան զգացված: Ի՞նչ
ասել, ի՞նչ խորհուրդ տալ, հո չէի կարող ասել թե նկար-
չությունը թող ու դրանով զբաղվիր, բայց նա ոգևորված,
կարծես դրան էր սպասում: Ես նայեցի շուրջս, պատերից
կախված նրա նկարներին ու հիացա, հիացա և դուրս եկա...

* * *

Դեմիրճյանը սիրում էր լեզվից խոսել: Սովորականի
մեջ անսովորը տեսնող նրա միտքը ինչ ասես, որ չէր հնարի:
Մի օր բողոքեց:

— Ինչպիսի՞ անարդարություն. տրոհության նշաններից
բռնի է լեզվի ամենանուրբ փոխանցումներն արտահայ-
տում, իսկ անունը հանիրավի դրել են այդքան կոպիտ:

* * *

Դեմիրճյանի հանդիպումն էր թատերական աշխատող-
ների հետ: Շատ խոսք եղավ այն մասին, որ հեռացել է
թատրոնից:

Ի՞նչ պատասխան-խոսքի մեջ ասաց.

— Թատրոնն ուղտ է: Մի ծիծաղեք, այդպես է: Ուղտից
ձին տարբերվում է նրանով, որ եթե տերը վրայից ընկնի՝
ձին կանգ կառնի, իսկ ուղտը՝ կանգնել չունի: Գնում է:
Այդպես է, չէ՞: Վրայից բեռ ընկնի՝ կշարունակի գնալ,
տերն ընկնի՝ դարձյալ կշարունակի: Թատրոնն էլ այդպես
է: Գիրքը լույս է տեսնում և տարածվում, մենք անմիջապես
աականատես չենք նրա հաջողությանը կամ անհաջողությանը:
Քննադատության միջոցով պետք է իմանանք այդ, բայց
նրան էլ, ինչպես գիտենք, առանձնապես չենք հավատում:

Դրամատուրգիայի, մանավանդ խաղացվող պիեսի արձագանքն անմիջական է: Պիեսը ստուգվում է մինչև ներկայացումն էլ: Եթե դեսարանը չսիրեց պիեսը՝ կորած ես, նշանակում է չի համակրում, չի հավատում, բայց ամենամեծ ստուգարքը ներկայացումն է: Մի անգամ խաղացին, երկրորդ անգամ, և եթե երրորդ ներկայացմանը դաճիճում մարդ չկա, մի՞թե պարզ չի պիեսի բախտը: Էհ, դա գիրք չէ, որ գրողարանի դարակում մնա: Պարզապես չեն խաղա: Թատրոնն էլ անողորմ անմիջականություններ հարցը լուծում է տեղն ու տեղը:

Դեմիրճյանը կանգ առավ, մի ստուգող հայացք գցեց դաճիճի կողմը և ապա, մի խորամանկ ժպիտ խաղացնելով շուրթերին՝ ասաց.

— Ինչ վերաբերում է ինձ՝ ապա ես ուղտի մեջքից ժամանակին իջա, ավելի շուտ՝ քան ինքը կգցեր իր վրայից:

* * *

Հորեկյանների շատ եմ եղել, բայց քիչ եմ հիշում դեպքեր, որ հորեկյարի խոսքն ուժեղ տպավորություն գործի: Որքան էլ դա տարօրինակ է, բայց փաստ է, որ երբ ձայնը տրվում է հորեկյարին, դաճիճը նրան շատ ավելի ջերմ ու բուռն է ընդունում, քան հետո ճանապարհում: Եվ պարզ է, թե ինչու. հորեկյարը մի տեսակ չի արդարացնում սպասելիքը: Եվ դա էլ հասկանալի է: Մինչև հորեկյարի ամբիոն բարձրանալը՝ դաճիճն այնպիսի գովեստներ ու մեծարանք է լսում և դրա համեմատ էլ տրամադրվում հորեկյարի նկատմամբ, որ երբ վերջինս նախապես, տանը պատրաստած շնորհակալական խոսքը կարդում է, մի խոսք, որ այդ երեկոյի անմիջական ծնունդը չլինելով՝ չի համակված այն կենսաթրթիռ հույզով, որ թելադրում էր հորեկյարին հենց այդ երեկոյի մթնոլորտը, պարզ չէ՞, որ դաճիճը հեշտությամբ պետք է կորցնի ջերմանալու իր հատկությունը: Բացառություն է կազմում Դեմիրճյանի հորեկյանը, որ տեղի ունեցավ 1945-ի դեկտեմբերի 26-ին:

Դեմիրճյանը հիվանդ էր, և անկողնուց եկավ հորեկ-

յանական երեկոյին: Այնքան թույլ էր, որ հոբելյարի վերջին խոսքը նրա փոխարեն կարդացի ես: Դահլիճը լուռ էր: Ոչ մի ձայն, ոչ մի ծպտուն: Դեմիրճյանը կանգնած էր: Սև կոստյում էր հագին, որ ավելի էր շեշտում նրա նիհարած, առանց այն էլ գունատ դեմքը, իսկ ամթիոնից, ուրիշի ձայնով, լսվում էին նրա խոսքերը:

Դա սովորական խոսք չէր, այլ կարծես հրաժեշտ խոսք: Հրաժեշտի խոսք էր ասում ընթերցողներին, գրչակից ընկերներին, հասարակությանը: Կարոտով հիշում էր երիտասարդական տարիները, ճեմարանի երազկոտ պատանուն, որ հույսերով լի նայում էր կապույտ հեռուններին: Սրտագին խոստովանության շեշտով պատմում էր, որ տարիների ջանք է պահանջել իրենից՝ սեփական ժողովրդի ճանաչումը, թե ինչպես այդ ջանքերը տվել են իրենց պատուները, և հայ ժողովրդի մեջ նա գտել է համամարդկայինը, մի համամարդկայնութուն, ասում էր նա, որ սկիզբ է առել իր արմատից և ճյուղեր արձակել հավիտենական երկնքի մեջ:

Եվ գուցե ոչ ոքից, մինչև այդ, ես չէի լսել այնպիսի ոգևորված խոսք հայ ժողովրդի ուժի, նրա հոգեկան անսպառ կարելիութունների մասին, ինչպես այդ օրը Դեմիրճյանից:

Ասում էր, թե ինքը սիրել է փր հայրենիքը, ծառայել իր ժողովրդին և եթե ուրախ է այս հոբելյանի համար, ապա այն պատճառով, որ սա ցույց է տալիս, թե իր սերը նկատվել է ու զգացվել:

Ասում էր, թե շատ կուզեր, որ այս հիսուն տարիները անցած չլինեին: Բայց այդպես է բնության օրենքը. գալիքը պիտի գա և անցնելիքը պիտի անցնի: Ասում էր, որ ինքը ժողովրդին տվել է ոչ մեծ բան, այլ ցանկացել է մի բան տալ, և դրանով է իր հոգին հանգիստ:

— Ես ևս եղա այն հացահատիկը, որ ընկնելով հողին՝ մեռնում է, որպեսզի գա հացը կենդանի: Եվ մի ձգտում ունեմ. հեռանալ աշխարհից այնպես, որ նա լինձ մնա պարտ, և ոչ՝ ես նրան:

Այսօր ամբողջ ժամանակ միտքս Իսահակյանի հետ է: Ինչու է այդպես՝ չգիտեմ: Հաճախ եմ հիշում, բայց այսօր առանձնապես. չկա այնպիսի ժամ, նույնիսկ պահ, որ շանդրադառնամ, շատածեմ նրա մասին: Մոտենում եմ գրապահարանին, հանում նրա երկհատորյակը, բացում, ինչ-որ էջ ու կարդում, երկար դիտում եմ Սարյանի մատիտանկարը՝ ուղտերի քարավան և դրա ֆոնին՝ բանաստեղծի գլուխը:

Իրիկուն է արդեն: Լուսամուտի մոտ եմ: Միայն հատ ու կենտ մարդիկ են երևում փողոցում: Շուրջս լռություն է ու դրաի մութը կարծես ամփոփում է օրը, իրար բերում առավոտվա, ցերեկվա ու երեկոյան անցուղարձի տարբեր ծայրերը և փակում այդ օրն ապրած, հետևապես՝ վաստակած, իսկ այժմ երեկոյան թեյասեղանի շուրջ բոլորած մարդկանց հաշիվներն օրվա հետ:

Մոտենում եմ օրացույցի թերթիկը պոկելու: Այսօր հոկտեմբերի 30-ն է: Այն օրը և այն ժամը, երբ մոտ քսան տարի շարունակ ես և, իհարկե, շատ ուրիշներ, եղել ենք բանաստեղծի տանը, նրա սեղանի շուրջը, բաժակները ձեռներին: Եվ անկախ նրանից, թե ով ինչ է ասել բարձրաձայն, բայց բոլորս մեր մտքում օրհնել ենք նրա աշխարհ գալու օրը:

Տիկնոջս՝ Նելլիի հետ շտապում եմ Իսահակյանի տուն: Ահագին բազմություն է հավաքվել: Մի տարի է, որ չկա բանաստեղծը: Բոլորը հավաքվել են բարի խոսքով հիշելու իրենց նահապետին:

Մարտիրոս Սարյանը մի կարճ խոսք ասաց: Հուզված նկարչի ընդհատած խոսքը շարունակեց Աշոտ Հովհաննիս-

յանը: Արամ Ինճիկյանը խոսքն ավարտեց վարպետի բանաստեղծությամբ: Եվ այլևս ոչ մի ճառ չատվեց: Մեկը սկսում էր, մյուսը շարունակում: Սկզբում ռուսերեն, ապա անգլերեն (իր թարգմանությամբ) Իսահակյան կարդաց Վլադիմիր Ռոգովը, մի ռուս երիտասարդ, որը հետո շատ սիրվեց Երևանում:

Ամենքի շրթներին իսահակյանական տողեր էին:

Իսահակյանը բոլորի հետ էր, բոլորի մեջ:

Ուշ գիշեր էր, որ տուն դարձանք: Տանը բոլորը քնած էին, անցնում եմ իմ սենյակը և ինձ հետ՝ բանաստեղծի անմահացած ոգին:

Մտնենում եմ գրապահարանին և հանում այն թղթասլանակը, որի վրա գրված է «Ավետիք Իսահակյան»: Բացում եմ և մեկ-մեկ աչքի անցկացնում նրա մեջ եղած թերթիկները՝ նամակներ բանաստեղծից, նրա ձեռագրերն ու լուսանկարները և տարբեր ժամանակ արված բազմաթիվ գրառումներս:


Ուզում եմ հիշել, թե երբ և ինչպես առաջին անգամ տեսա նրան:

* * *

1926 թվական: Թիֆլիսում լուր տարածվեց, թե արտասահմանից եկել է Ավետիք Իսահակյանը: Աշակերտ էի, 16-ամյա պատանի: Շատ էի ուզում տեսնել, բայց որտեղ և ինչպես՝ չգիտեի: Եվ մի օր տեսա պատահամբ: Դպրոցից վերադառնում էինք տուն: Ընկերս, որ նույնպես գրականության սիրահար էր, ասաց.

— Շիրվանզադե՛ն, Իսահակյա՛նը:

Փողոցում կանգնած խոսում էին: Շիրվանզադեին տեսել էի, այն էլ մի քանի անգամ, իսկ Իսահակյանին՝ ոչ: Ես այդպես չէի պատկերացնում նրան: Ուսանավորների, մասամբ էլ նրա մասին լսածիս ազդեցության տակ իմ երևակայությանը նա ներկայանում էր ճամբորդական ցուպը ձեռին, քաղաքից քաղաք անցնելիս, ճանապարհների փոշին վրան: Եվ չնայած նրա կոկ հագուստ-կապուստին,



դեմքի առույգ արտահայտությանը՝ տարիքով թվաց, թեև այն ժամանակ պետք է որ հիսունից ավելի չլիներ:

Հիմա անդրադառնում եմ իմ այդ տպավորությանը և մտածում, որ այնքան մեծ է եղել նրա ստեղծագործության ներգործությունը իմ ու շատերի հոգեկան կյանքում, որ մի պատանու համար դժվար էր նրա մեծ համբավը ամփոփել մի հիսնամյակ ապրած մարդու մեջ:

* * *

Իսահականի հետ ժանթացա նկարագրածս դեպքից բավական ուշ, մոտ 12 տարի անց, երբ նա թողեց արտասահմանը և, վերջնականապես, հաստատվեց Երևանում:

1938-ին էր: Այն ժամանակ վարում էի Պետհրատի գեղարվեստական գրականության բաժինը: Բոլոր գրողների հետ գործ ունեի: Եվ մի օր հարկավոր եղավ ջտապ հանդիպել Իսահակյանին: Զանգահարեցի և նրա նշանակած ժամին մոտին էի: Մենակ չէր: Այնտեղ էր գյուղատնտես Աշոտ Աթանասյանը, որը մի ժամանակ Սալ-Ման օտարազրույթամբ ֆելիետոններ է տպագրել «Մշակ»-ում:

Ասացի, թե ինչ հարցով եմ եկել:

— Գործը հետո, նախ ժանթանանք: Ի՞նչ եք անում Պետհրատում:

Ասաց ու հետաքրքրասեր հայացքը հռեց վրաս:

Պատասխանեցի: Նրա հայացքի մեջ շատ արագ միմյանց հաջորդեցին զարմանքը և անվստահությունը. նայում էր ինձ և երեի տարակուսում, որ Չարենցի վարած գործը վստահվել է մի անփորձ երիտասարդի: Բայց դա մի պահ էր միայն, իսկ հետո նրա հայացքը առաջվա պես խաղաղ էր, բարյացակամ ու հետաքրքրասեր:

Հետո ասացի, թե ինչի համար եմ եկել, ու երբ ստացա համաձայնությունը՝ ոտքի ելա, որ զնամ:

— Նստեք, ինչի՞ եք շտապում:

Թեև մնալը սրտովս էր, բայց, չգիտեմ, ինչու, ասացի, թե շտապ գործ ունեմ:

— Գործը չի փախչի: Նստեք, մի քիչ զրուցենք:

Ու ես մնացի: Սկսվեց հարց ու փորձ. որտեղի՞ց եմ, ովքե՞ր են ծնողներս, որտե՞ղ եմ սովորել:

— Ավետի՛ք, — բացականչեց Աթանասյանը, — Վարոսի տղան է:

Իսահակյանը չէր հիշում:

— Միտդ չէ՞:

Աթանասյանը երկու դեպք հիշեց կապված Ղարսի և Ալեքսանդրապոլի հետ և Վարպետն ասաց, թե մտաբերում է:

Դա իմ առաջին այցելությունն էր:

Հասկանալի է, որ փափագում էի նորից լինել մոտը: Մի երկու անգամ ներկայացավ առե՞թ, բայց թավականացա հեռախոսային դանդով: Մի օր փողոցում հանդիպեցի Վարպետին: Հարցրեց, թե ինչու չեմ երևում, չեմ լինում իր մոտ: Երբ բաժանվում էինք՝ ասաց.

— Ժամանակ կունենաք՝ անցեք, մի սպասեք, որ անպայման գործ լինի: Կխոսենք:

Ու սկսեցի գնալ: Սկզբում ամսվա ընթացքում մեկ, ամենաշատը երկու անգամ: Հետո շաբաթը մեկ: Իսկ մի այնպիսի շրջան եղավ, որ շաբաթվա ընթացքում մի քանի օր մոտն էի լինում: Տանուտղա էի դարձել, — ինչպես ասում էին տիկին Սոֆիկն ու Վարպետի հարուր՝ Բելլան: Եվ այսպես սկիզբ դրվեց իմ բարեկամությունը Վարպետի հետ, որ ամրացավ այն օրերից, երբ սկսեցինք տպագրություն պատրաստել նրա երկերի երկհատորյակը:

• • •

Իսահակյանի տանը միշտ էլ տվորականից ավելի մարդ էր լինում: Շատերն էին գնում: Մի քանի տարի անց, երբ թանաստեղծի համար կառուցվեց առանձնատուն և 1947-ին, որքան հիշում եմ, խոր աշնանը, ընտանիքը Ղուկասյան փողոցից փոխադրվեց իրենց նոր բնակարանը, Իսահակյանի սուռնը ձգողական ավելի մեծ ուժ ձեռք բերեց: Զկար երեկո, որ մի 5—6 մարդ չլինեին նվազագույնը: Ցերեկով էլ գալիս էին: Նախաճաշի ժամին հազարից մեկ է պատա-

հել, որ սեղանի շուրջը գոնե մի-երկու հյուր չլինեին: Իսկ վերջին տարիները, պարզապես, ուխտատենդի դարձավ:

Ո՛վ չէր լինում, ո՛վ չէր գալիս:

Գալիս էին գործով, գալիս էին առանց գործի, գալիս էին Իսահակյանին տեսնելու, այո՛, այո՛, մի պարզ հայացք ձգելու աշխարհի շատ ճամփաներով անցած ու ամեն տեղ իր հետքը թողած այդ իմաստուն մարդու վրա: Եվ նա ոչ ոքի չէր մերժում: Հրավիրում էր նստել և՛ մեծին, և՛ փոքրին ու նկատմ' մի քաղցր զրույց:

Զրույցը նրա տարերքն էր:

Զկար մեր երկիրը՝ հայոց աշխարհը եկած մի հյուր Մոսկվայից կամ Լենինգրադից, Կիևից կամ Թիֆլիսից, իսկ հաճախ էլ արտասահմանից՝ Գերմանիայից, Ֆրանսիայից, Հնդկաստանից և ուրիշ երկրներից՝ Ֆինլանդիա, Ճապոնիա, որ, Երևան հասնելով, ցանկություն չհայտնեին տեսնելու, ինչպես իրենք էին ասում, Վարպետին: Գալիս էին, գալիս և ամեն մԱլի համար խոսք ունեւ Իսահակյանը: Զկար խնդիր ու հարց, որի շուրջը չխոսեր, լինեւ դա աշխարհագրական «քաղաքացիությունը» կորցրած երկիր՝ Բաբելոն, Ասորեստան, լինեւ Պարթենոնի նման ճարտարապետական մի կոթող, լինեւ Նիցշեի կամ Ֆրեյդի փիլիսոփայությունը, լինեւ գրականություն՝ Հոմերոսից մինչև մերօրյա գրողները: Դատում էր, խորհրդածում:

Եվ ո՛վ չէր ունկնդրում նրան գերված: Նրա ահռելի հիշողությունը տասնամյակների ընթացքում կուտակել էր փաստերի աներևակայելի քանակություն՝ դեպք, թվական, քաղաք, անուն, իսկ միտքը կարողանում էր բարձրանալ փաստերից, իմաստավորել, ընդհանրացնել:

Ինչպես պոեզիայում, այնպես էլ մարդկանց հետ ունեցած հարաբերությունների մեջ զարմանալի մարդկային էր: Մեծի հետ մեծ էր, փոքրի հետ փոքր, գյուղացու կամ արհեստավորի հետ՝ նրանց պես, գիտնականի հետ՝ գիտնական:

Վարպետը ոչ ոքի չէր փաթաթում իր միտքը: Իր եզրահանգումները երբեք տրպես կտրուկ և անբեկանելի համոզմունքներ չէր ներկայացնում: Մտածում ու դատում էր հան-

գիտաւ: Երբ վիճում էիր հետը, կամ չէիր համաձայնում՝ լսում էր ուշագիր, միշտ պատրաստակամ հասկանալու, թե որն է այն առողջ հատիկը, որ մի ուրիշ միտք շարժել է մի այլ ուղղութեամբ:

Հետաքրքրվում էր ամեն ինչով, անծանոթ գրքի անուն տալի՜ր՝ կնշեր, որ ձեռք բերի ու կարդա անպաշտան, իսկ եթե վեճի ընթացքը նրա մասնակիցներին հանկարծ տանում էր այնպիսի կողմ, որ ոչ ինքն էր հիշում թվականը կամ անունը, ոչ էլ նրանք, չէր ծուլանա, կգնար աշխատասենյակ, կբերեր հանրագիտարան, գրքեր ու թերթեր: Մինչև չգտներ՝ չէր հանգստանա: Եվ այդպես՝ եթե մի երեք-չորս ժամ մարդ մնում էր մոտը, ապա գիրք գրքի ետեւից փոխադրվում էին մի սենյակից մյուսը և ծանրաբեռնում սեղանը:

Վարպետն ընդունում էր մարդկանց հավասար անկեղծութեամբ: Լինեին ծանոթ թե անծանոթ, մոտ թե հեռավոր բարեկամներ: Առաջին հայացքից ոչ մի տարբերութիւն չէր դնում, եկել են՝ լավ են՝ արել, ուրեմն, իր պարտքն է սիրալիք լինել հշուրընկալի դերում, իր պարտքն է ուշադրութեան բաժին հանել ամենքին: Ուժեղ ինքնատիրապետում ուներ: Ու եթե հանկարծ դռներից ներս մտնողների մեջ հայտնվեր մի չսիրված դեմք, երբեք հոնքերը չէր կիտի, չէր մռայլվի, թեկուզ և մյուսների տրամադրութիւնը չզգնելու համար, պահպանի սեղանի զվարթ ու տաքուկ մթնոլորտը: Նա այն համոզման էր, որ ներկա եղող 10—12 հոգին ոչ մի պատասխանատվութիւն չեն կրում իր և այդ չսիրված մարդու փոխհարաբերութեան համար: Իսկ երբեմն էլ այն միտքն էր պաշտպանում, որ եթե մարդը, շատ լավ իմանալով, որ սիրված չէ և, այնուամենայնիվ, եկել հասել է դուռդ՝ նշանակում է շարութիւնից մի բան կորցրել է, նշանակում է ունի քո կարիքը:

Ընդհանրապես և ըստ էութեան նա, իհարկե, մարդկանց միատեսակ չէր վերաբերում և չէր էլ կարող: Բացառիկ սեր էր տածում իր հասակակիցներից դեպի Դերենիկ Դեմիրճյանը, իսկ երիտասարդներից՝ Արամ Ինճիկյանը: Շատերին էր սիրում, շատերի հետ էր մտերմութեամբ կապված, ամեն մեկի թե՛ գրական, թե՛ հասարակական, թե՛ մարդկային

գնահատութիւնն ունեւ իր մտքում, ամեն մեկն էլ իր տեղը՝ նրա կյանքում: Եւ մեծ մասամբ ճիշտ, հազարից մի դեպք է եղել, որ սխալվել է, հիասթափության հագիւլ մի երկու օրինակ կարելի է հիշել:

Նրա դուռը բաց էր ամենքի առաջ, ամեն ոք, ուլ կամ անար, մուտք ունեւ իր տուն, որ, դարձել էր հոգևոր կենտրոն: Երեւի տխաւ չի լինի, եթէ ասվի, որ ամենա-ժողովրդական տունը Երևանում Վարպետինն էր: Ինչպես, երեւի, եղել է Քիֆլիսում Թումանյանինը:

Որքան մոտիկից ճանաչեցի նրան և ավելի լավ հասկացա բանաստեղծին, մարդուն, քաղաքացուն, այնքան ավելի էի զարմանում, երբ լսում էի, թէ բոլորել է Իսահակյանի վաթսուն, յոթանասունհինգ կամ ութսուն տարին: Մի՞թէ այդքան է: Կամ ավելի ստույգ՝ մի՞թէ ընդամենը այդքան է: Ես չկայի՝ նա կար և կար որպէս հռչակված բանաստեղծ: Երեխա էի՝ Իսահակյանի անունը զրնգում էր: Աշակերտ էի և նրա անունը տրվում էր այն բանաստեղծների հետ, որոնց իմ սերունդը շտեմավ: Նույնը՝ ուսանողական տարիներս: Իսկ հետո, երբ կյանք մտա՝ միահեծան տիրութիւն էր անում գրական աշխարհին, ու եթէ կար մի անուն, որ բոլորի շուրթերին հնչում էր անխառն սիրով՝ Իսահակյանի անունն էր: Մեր գրականութեան նահապետն էր: Որտեղ էլ լինեի՝ նստում էր սեղանի գլխին, ավելի ճիշտ՝ որտեղ էլ նստեի, դառնում էր սեղանի գլուխը: Բոլորում էինք շուրջը՝ իրեն, միայն իրեն լսելու կարոտով: Ու նրա զրույցները մեզ տանում էին տարբեր երկրներ, տարբեր դարեր: Ե՛վ այդ պահերին, և՛ հետո, առանձնութեան ժամերին, մտովին Իսահակյանին անդրադառնալիս՝ ինձ նա թվում էր մի մարդ, որ անհիշելի ժամանակներից եկել հասել է մեզ՝ իբրև բախտ, խիղճ, իմաստութիւն: Դրանից հետո դժվար էր, անհնար էր նրան, ավելի ճիշտ՝ այն երևույթին, որ մենք Իսահակյան էինք կոչում, մի թվաբանական հասկացողութեան մեջ դնել:

Թղթապանակի միջից հանում եմ առաջին թերթիկը՝
 ժամանակին հերմա՛կ, իսկ հիմա՝ դեղնած թղթի մի կտոր:
 Կարճ գրառում է դա. ընդամենը վեց տող, աբեղյանական
 աղղագրությամբ: Մատիտագիր է, մանրատառ և այսօր
 արդեն հազիվ ընթեռնելի:

Թվականը՝ 1938:

Ահա՛

Վարպետի տանն ենք:

Շրջապատված երիտասարդներով՝ իրեն լավ է զգում,
 Հարցրինք, թե ուսւ բանաստեղծներից ո՞ւմ է ամենից
 ավելի սիրում:

— Լեւոնտոսովին:

Մի փոքր հետո.

— Այդքան ջահել և աղքատ մարգարեական:

Մի օր նորից անդրադարձավ Լեւոնտոսովին: Ձեռքն առավ
 բանաստեղծի միհատորյակը, թերթեց, գտավ իր սիրած ոտա-
 նավորը և խնդրեց, որ կարդանք բարձրաձայն:

Արամ ինճիկյանը, բացեց մի այլ էջ ու կարդաց.

Վարպետի դեմքին ափսոսանքի արտահայտություն
 իջավ.

— Ձեմ իմացել ջահել ժամանակս, թե չէ սիրային նա-
 մականերից մեկը դրանով կվերջացնեի:

Մի օր հարցրի, թե Թումանյանը փիլիսոփայական պատ-
 րաստություն ո՞ւնեիր, օրինակ՝ Կանտ կարդացե՞լ էր:

— Ձէ՛, եվրոպական լեզուներ չգիտեիր, ուսեերենի մեջ
 էլ շատ հմուտ չէր, բայց հազվագյուտ ինտուիցիա ունեիր,
 դրա համար կարդացած մի էջի հիման վրա ավելի շատ
 բան էր ասում, ավելի խորն էր զգում ու հասկանում, քան

հաստափոր հատորներ կարդացածը, մի քանի լեզու իմացողը:

Մի փոքր հետո ավելացրեց.

— Այդպես էր նաև Զոհրապը: Միշտ կասեր՝ «Ձեզավ քիչ մը Կանտամանտ կարդայինք»:

■ * ■

Ջրույցը Շեվչենկոյի շուրջն էր: Բոլորն էլ համարյա նույնն էին ասում:

Վարպետն ամփոփեց.

— Ճորտություն, կոխվ, ցասում, երգ ու աղատություն. այս է Շեվչենկոն, այս է նաև Ուկրաինայի պատմությունը: Իսկական բանաստեղծը ծնվում է ժողովրդի պատմությունից:

■ ■ ■

Մի օր նորից խոսեց Շեվչենկոյից.

— Մեծ մարդիկ երկու գերեզման ունեն, մեկն այն է, որ բոլորն են ունենում, հողաթումբ, մի քար էլ վրան, մյուսը՝ ժողովրդի սիրտը...

* * *

Սեանի հանգստյան տանն էինք: Այնտեղ էր նաև Վարպետը: Նստած ծովահայաց պատշգամբում՝ երազում էր հեռուն: Գրողներից մեկի երեխան, հիմա չեմ հիշում, թե որի, անկարգ պահեց իրեն: Հայրը վրա հասավ և մի լավ թակեց չարաճճիին: Վարպետը դեմքը խոթոռել էր, բայց ձայն չէր հանում: Երբ մայրը ամուսնու ձեռքից ազատելով երեխային տուն տարավ, վերջինիս կարգի կոչող հայրը, դեռևս չհանգստացած, ետ ու առաջ էր քայլում: Իսահակյանը տեղից վեր կացավ, մոտեցավ նրան.

— Երեխայի վրա էլ ձեռք չբարձրացնես: Համոզիր, բարկացիր, բայց մի ծեծիր: Հայրս մի անգամ է ինձ ծեծել և

այդ օրվանից հոգիս անհաշտ մնաց նրա հետ: Մեծից օգուտ չկա, իսկ վնաս՝ գուցե աննկատելի, բայց շատ կա: Մեծը երեխային կոտորում է և ոչ թե կարգի հրավիրում:

Երբ Տյուտչևի մասին խոսք եղավ, ելավ տեղից, գնաց բերեց նրա հատորյակը և խնդրեց կարդալ իր սիրած ոտանավորը՝ «Վերջին սեր»:

Բացեցի թղթապանակը և աչքովս չընկալ Վարպետի մի նամակը՝ որ ստացել էի Մադկաձորից:

Ուղարկել էի նրան Վրթանես Փափազյանի երկհատորյակը՝ իմ խմբագրությունը և առաջաբանով:

Շնորհակալության նամակ էր դա, որտեղ արված էր մի էական դիտողություն:

Իմ առաջին հոդվածը, տպագրված «Գրական թերթում», հեղեղված է օտար բառերով, նեղ-մասնագիտական տերմիններով, նախադասությունները երկար են, ծանրաբեռնված, երբեմն էլ խճճված:

Ժամանակին սրա համար ինձ կշտամբել են Չարենցը և, որքան էլ տարօրինակ թվա, Գյուլիքեվիչյանը: Բայց ամենամեծ հարվածը հասավ ինձ Հովհ. Թումանյանից, որի «Հորիզոնում» լույս տեսած հոդվածներին առաջին անգամ ծանոթանալով, տեսա, թե ինչպես է բանաստեղծը ամենախոր մտքերի համար արտահայտության ամենապարզ ձևեր գտնում:

Դա 1937-ին էր:

Ես, գուցե առաջին անգամ, ճաշակեցի պարզության հմայքը: Ընկնելով Թումանյանի ազդեցության տակ, սկսեցի թոթափել արտահայտչաձևի մուլթ, բարդացված ձևերը: Բայց, իհարկե, հասկանալը կարենալ չէ և ոչ էլ կամենալը բավական՝ նպատակին հասնելու համար:

Թումանյանի ազդեցությունն այնքան ուժեղ էր, որ ես

ու միայն վերջնականապես համոզվեցի, թե պետք է պարզ, ամենքին մատչելի լեզվով գրելու ձգտել, այլև սկսեցի նրա ոճական մի քանի ձևերը գործածել, որոնք միանգամայն բնական իր հոգվածներում, անբնական էր ինձ համար։ Բայց այդ արվեստականութունը այն ժամանակ չէի գգում։ Փափազյանի գրքի առաջաբանում, օրինակ, մեկի փոխարեն գրում էի մին, աշխարհի փոխարեն՝ աշխարք, բացահայտի տեղ՝ ափաշքարա և այլն։

Իսահակյանն իր նամակում իմ ուշադրութունը հրավիրում էր ժողովրդական այդ ձևերի անտեղի գործածության վրա, նկատելով, որ դրանք իմ լեզվում կարկատանների տպավորութուն են թողնում։

• • •

«Վերք Հայաստանի» վեպի մասին գրած առաջաբանս Վարպետը հավանել էր։ Ու դրա տպավորության տակ ասաց, թե ինքն ուզում է, որ իր երկհատորյակի առաջաբանը ես գրեմ։

Մեծ պատիվ էր ինձ համար։ Տրամադրութունս բարձր էր ու անշափ հպարտ էի գգում ինձ։ Նստեցի գրելու։ Ուզում էի, որ լավ լինի, շատ լավ լինի, որ Վարպետը գոհ մնա։ Գրեցի մի անգամ՝ շտապվեց։ Երկրորդ փորձն արի, երրորդ և միշտ անհաջողութուն։ Իրեն ասել, թե չի ստացվում՝ չէի կարող։ Ի՞նչ անել, ինչպե՞ս դուրս գալ այս ծանր վիճակից։ Խորեն Սարգսյանին հարցրի, թե չի կամենա՞, արդյոք, Իսահակյանի երկհատորյակին առաջաբան գրել։ Սիրով հանձն առավ։ Եվ մի շաբաթից հետո հինգ-վեց էջանոց մի առաջաբան սեղանիս վրա էր, գրված սիրով և խմացությամբ։ Առաջաբանը իսկապես լավ էր գրված, կարելի էր ու հարկավոր արդեն գաղտնիքը բանալ։ Պայմանավորվեցի Խորեն Սարգսյանի հետ, որ երեկոյան գնանք Իսահակյանենց տուն։ Ճանապարհին ավագ ընկերոջս պատմեցի ամեն ինչ։ Մնում էր դժվարը՝ Վարպետը։

— Վարպետ, — ասացի ես, — առաջաբանը բերել եմ։ Կարդա՞մ։

Կարդում էի ու աչքի մի ծայրով հետևում Վարպետին, Դեմքը քանի գնում պայծառանում էր:

— Լա՛վ է, շատ լա՛վ, ապրե՛ս:

Բացականչեց Վարպետը հուզված:

Կարևորն այն էր, որ առաջաբանը կար, ավելի կարևորն այն էր, որ առաջաբանը ստացվել է և Վարպետի սրտովն է ու ես պատմեցի ամբողջ պատմությունը:

Վարպետը զարմացած, մի փոքր շփոթված հայացքով նայեց ինձ, ապա ռաբի ելավ ու պինդ սեղմեց Սարգսյանի ձեռքը, ի նշան սրտագին շնորհակալության:

* * *

Վարպետին պատմեցի մի դեպք:

Երեք ընկեր գնում են թատրոն: Ներկայացվում է կոմեդիա, զվարթ մի պիես: Առաջին ընդմիջմանը ձեմասրահում մի ծանոթից իմանում են, որ թոքախտով տառապող իրենց ընկերը վախճանվել է: Նրանց վրա շատ է ազդում, և թեև երրորդ զանգից հետո անցնում են օթյակ ներկայացման շարունակությունը դիտելու, բայց կեսից հեռանում են. նրանց տարօրինակ ու վիրավորական է թվում բեմում կատարվող զավեշտախաղը, դահլիճի պոթթկուն ծիծաղը:

Թատրոնից դուրս գալով՝ երկար թափառում են, վերհիշում իրենց ընկերոջ կյանքից դեպքեր: Բաժանվելիս պայմանավորվում են մյուս օրը հանդիպել ու նամակ գրել հանգուցյալի րոջը, վշտակցել նրան ու կսկիծն ամոքող մխիթարանքի խոսքեր գտնել:

Մյուս օրը պայմանավորված ժամին հավաքվում են: Սկզբում մտածում են, թե ինչ գրեն, հետո, թե ինչպես պետք է գրեն, մեկը գրելու է, իսկ մյուսները ստորագրելու են: Թե գուցե մեկը նստիլու է և գրելու է սկիզբը, հետո երկրորդն է նստիլու և գրելու շարունակությունը, երրորդը՝ վերջացնելու է նամակը: Երկար չեն կարողանում համաձայնություն գալ, և վեճը ծիծաղելի ձևեր է ընդունում: Ի վերջո մոռանում են, թե ինչ նպատակով են հավաքվել և, առանց նամակը գրելու, ցրվում են:

Երբ վերջացրի, Վարպետն ասաց.

— Չեմ կարդացել. այդ ո՞ւմ նովելն է:

Պատահել էր դեպք, որ ես վարպետի հետ չէի համաձայնել գրական այս կամ այն հարցում, երբեմն էլ վիճել էի, ու թեև երես տված տղայի նման էի իր մոտ, բայց չեմ հիշում, որ ես նրա հետ կատակած լինեի: Ու չեմ հասկանում թե ինչպես պատահեց, ինչ տատանա մտալ մեջս, որ ես, այնպես անխուրջ, ասացի:

— Անատոլ Ֆրանսի:

Վարպետի հայացքը լարվեց:

— Չեմ հիշում: Ես ամբողջ Ֆրանսը կարդացել եմ, բայց այդպիսի նովելի չեմ հանդիպել:

Եվ նա շարշարում էր հիշողությունը, որ գուցե նրա մի ինչ-որ ծալքում հանկարծ հայտնաբերի իմ պատմած նովելը: Ոչ մի արդյունք: Եվ ի՞նչ արդյունք կարող էր լինել, երբ պատմել էի կյանքում պատահած մի դեպք:

Ես ձայն չեմ հանում:

— Պատմելով դժվար է արվեստի մասին դատել, բայց իմաստով, թե վիշտն ու ծիծաղը միմյանցից բաժանված են ընդամենը մի կոցաչափ տարածությամբ, մոտ է Ֆրանսին:

Ես դարձյալ ոչինչ չասացի:

Տանեցիները շրջապատեցին թեյասեղանը: Ձրույցի նյութը փոխվեց, շատ ուրիշ հարցեր մեջտեղ եկան: Բայց նա մեկ-մեկ նորից հիշում էր պատմածս և զարմանում, թե այդ ինչպես է պատահել, որ այդ նովելն իր աչքից վրիպել է: Եթե կարդար՝ անպայման կհիշեր:

Ոչինչ չասացի ու գնացի տուն:

Մյուս օրը, որ եկա, նա նորից նույն խնդրին անդրադարձավ, ասաց, որ իր մոտ եղած ամբողջ գրականությունն աչքի է անցկացրել, տակն ու վրա է արել գրադարանում եղած Ֆրանսի ժողովածուները՝ ռուսերեն, ֆրանսերեն, և այդպիսի նովելի չի հանդիպել:

Ես վատ էի զգում ինձ: Հասկացա, որ արածս անելու բան չէր: Երեկվանից այդ մեծ մարդուն դրել եմ այդպիսի դրուժյան մեջ: Տատանվեցի՝ ասե՞լ, թե չասել, ու վերջն ասացի:

Ես երբեք չեմ մոռանա նրա հայացքը. մի պահ աչքերն

ուրախ փայլեցին, հայացքի մեջ թեթևություն նկատեցի։
Դեմքի լարվածությունն անցավ, ընդունեց իրեն հատուկ
հանգիստ արտահայտությունը։

— Ախր, գիտեի, չէ՞ որ Ֆրանսն այդպիսի նովել չունի։

Մի փոքր անց կշտամբող ձայնով ասաց.

— Ա՛յ, դու չարաճճի, ի՞նչ օջին բերիր գլխիս։

Երկու օր անց մի անուն հանած գրողի մոտ առաջարկեց
ինձ պատմել վերոհիշյալ նովելը։

— Անատոլ Ֆրանսի նոր հայտնաբերած պատմվածքներից է,— դարձավ նա դեպի գրողը։— Պատմիր, Ռուբեն։

Պատմեցի։ Գրողը ուշադիր լսում էր, իսկ Վարպետը
խորամանկ մի ժպիտով հետևում էր նրան։

Երբ գրողն ասաց, թե ինքը վերջերս կարդացել է այդ
պատմվածքը, Վարպետը ձայն չհանեց և լրջացավ, իսկ նրա
գնալուց հետո կուշտ ծիծաղեց։ Եվ որովհետև դա նրան
իսկապես զվարթություն պատճառեց՝ իմ մեղքը քաված
համարեցի։

* * *

Դրա հաջորդ օրը Վարպետը հիշեց երեկ իրեն այցելած
գրողին ու ժպտաց.

— Միշտ պետք է մարդը ճիշտն ասի. կարդացել է՝ լավ,
չէ՛ չէ։ Ի՞նչ կա-որ։

Ու այդ կապակցությամբ մի դեպք պատմեց իր աշա-
կերտական կյանքից։

Բարձր դասարանի աշակերտները սովորություն ունեն
իրենց նոր ուսուցիչների իմացության չափը ստուգել. որևէ,
իհարկե, իրենց ծանոթ, բայց բարդ մի հարց են տալիս և
նայած ուսուցչի պատասխանին, սահմանվում է նրանց հե-
ղինակության աստիճանը աշակերտների աչքում։

Դեպքը պատահել է Գևորգյան ճեմարանում։ Ուսումնա-
կան տարվա սկիզբն է՝ առաջին, թե երկրորդ օրը։ Մի ուսու-
ցիչ, որի անունը բաց եմ թողնում, մտնում է դասարան։

Աշակերտները վերահիշյալ ուսուցչին ստուգելու նպատա-
կով մի բառ են հորինում և հարցնում, թե ինչ է նշանակում։
Ուսուցիչը, որ չգիտեր և չէր էլ կարող իմանալ, թե ինչ է

նշանակում, ասում է, թե այդ բառը սանսկրիտ ծագում ունի
և դրա շուրջը երկար-բարակ, մոտ կես ժամ խոսում է:
Աշակերտները հազիվ են զսպում իրենց ծիծաղը: Մյուս ժա-
մին դասարան է մտնում մի այլ նոր ուսուցիչ՝ Մանուկ
Աբեղյանը: Նրան էլ են հարցնում թե ինչ է նշանակում: Սա
կարճ է կտրում:

— Այդպիսի բառ չկա:

Բայց հետո, երեւի մտածելով, թե ինքը բոլոր բառերը
չգիտե, ասում է.

— Եթե կա էլ՝ չգիտեմ:

Ու չկամենալով այլևս ժամանակ կորցնել, անցնում է
դասի:

Այս պատմութիւնը լսել էի վաղուց, ոստանողական տա-
րիներին գերմանարենի դասատու Սարգիս Մանուկյանից:

* * *

Վարպետը եկավ Պետհրատ: Սեղանիս վրա ձեռագիր էր
դրված:

— Ի՞նչ ես անում,— եղավ նրա հարցը:

— Մի ոտանավոր կարդա՞մ: Գլխով հավանության նշան
արեց: Ու ես կարդացի:

Ա՛խ, ես ա՛նց անեմ, որ շնեղանան
Ոչ Նյուտոնը խիստ, ոչ Հայնե՛ն հպարտ,
Անթիվ թվերի թակարդը ընկած,
Ա՛խ, ես ա՛նց անեմ, որ շնեղանան.

Երգեր եմ գրում՝ Նյուտոնն է պատժում,
Սեփային՝ Հայնեն է իմ մեջ նստած,
Ա՛խ, ես ա՛նց անեմ, որ շնեղանան,
Ոչ Նյուտոնը խիստ, ոչ Հայնե՛ն հպարտ...

— Լավ է, երեւակայիր, լավ է: Հեղինակն ո՞վ է:

— Պոլիտեխնիկ ինստիտուտի ուսանող:

Վարպետը կարծում էր կատակ եմ անում:

— Մասնագիտութիւնը:

— Հիդրամվիկ:

— Ազգանունը:

— Կարլեն Մուրադյան:

— Մի ոտանավոր էլ կարդա:

Կարդացի ևս երեք բանաստեղծություն: Վարպետը լսում էր ուշադրությամբ:

— Չէ՛ բանաստեղծ է տղան: Մկրտիր մի ուրիշ անունով ու ասպարեզ դուրս բեր:

— Օրհնո՞ւմ եք:

— Անպայման:

Մի քանի ամիս անց Կարլեն Մուրադյանի գիրքը լույս տեսավ «Նախաշավիղ» վերնագրով: Գրականություն ուր դրեց մի նոր բանաստեղծ՝ Գևորգ Հմին:

* * *

Մեր գրողներից մեկի հետ, որի ազգանունը հարմար չեմ գտնում տալ, կանգնած զրուցում էինք, որ փողոցով անցնող Իսահակյանը մոտեցավ մեզ:

— Որտե՞ղ էիր, Վարպետ,— հարցրեց գրողը:

— Թալինում:

— Է՛, լա՞վ էր:

— Շա՛տ:

— Իսկի չգիտեմ էլ, թե Թալինը որտեղ է. — ասաց գրողն ու հարցրեց, — ի՞նչ ճանապարհով, ո՞ր կողմով պետք է գնալ:

— Հիմիկվա գրողներդ,— ասաց Վարպետը,— Հայաստանը չեք ճանաչում, չգիտեք երկիրը, չեք լինում գյուղերում:

— Ես գյուղը չեմ սիրում,— արդարացավ գրողը:

— Մեր ժողովրդի արմատը գյուղացին է. պետք է տեսնել, թե ինչպես է ապրում, կենցաղը, լսել նրա ոճերը, դարձվածքները:

— Չէ՛, չեմ սիրում,— վրա էր բերում գրողը նույն կատակ տոնով, չնկատելով Իսահակյանի դեմքի մռայլը:

— Դե՛, դուք ինչ գրողներ եք, գրում եք առանց ժողո-

վրդի մեջ լինելու: Մի հինգ գիրք կարդում եք և դրանց հիման վրա գրում մի նորը՝ վեցերորդը:

— Ես գերադասում եմ քաղաքի ժխորը:

Տեսնելով, որ դրովթյունը լրջանում է, մթնոլորտը մեղմելու նպատակով, ասացի կատակով.

— Ուրբանիստ է:

— Սա ուրբանիստ չէ, այլ թումբանիստ, — վրա բերեց Վարպետն ու շարունակեց ճանապարհը:

* * *

Հավաքվել էինք Վարպետի տանը: Մեկը հարցրեց, թե поддержка բառը ինչպես կարելի է թարգմանել հայերեն:

Ոչ ոք պատասխանել չկարողացավ:

Վարպետը, իհարկե, ոչ առանց հումորի, ասաց, թե հայերը իրար поддержка չեն անում, դրա համար էլ կարիք չի զգացվել հայերենում այդ հասկացողությունը որևէ բառով ձևակերպելու:

Խորեն Սարգսյանն ասաց, թե հենում ասում էին սատարել:

Վարպետն ասաց, թե, այո, հենում ասում էին սատարել, որովհետև իրար поддержка անում էին: Հիմա էլ մեկմեկ, շատ հազվադեպ սատարել բառը գործածվում է, որովհետև կարծես թե իրար поддержка անելու անհրաժեշտություն գիտակցությունը մոռաք է գործում նաև մեր մեջ:

* * *

Մի օր խոսք բացվեց գերմանացիների մասին: Խոսեց հիացմունքով: Ասաց, թե ճշտապահ ու ազնիվ մարդիկ են: Բերեց օրինակներ, պատմեց զանազան դեպքեր: Հիշողությանս մեջ մնաց հետևյալը.

— Սրճարանումն էի. դիմացս նստեց մի մարդ, կարծես թե հրեա էր: Խոսեց հետո և շատ ուրախացավ, որ Ռուսաս-

տանից եմ: Ասաց, որ ռուսներին շատ է սիրում, որ Ռուսաստանից վաղուց հեռացել է, շատ կարոտել է և այլն: Կպշուն մարդ էր, ավելի շատ խոսում էր, քան լսում: Ծիշտն ասած՝ դուրս չեկավ, ոչ էլ մտածում էի հետը ծանոթությունս շարունակել, թեև ինքը մտերմության նշաններ էր ցույց տալիս: Այդ պահին երեք գերմանուհիներ անցան, երիտասարդ, մեկը մյուսից գեղեցիկ: Հրեա հարեանս առաջարկեց հրավիրել նրանց: Ես չհասկացա միտքը, ասացի՝ չէ, բայց եռանդով չհրաժարվեցի և քիչ հետո աղջիկները մեր սեղանի մոտ էին նստած: Ես հյուրասիրեցի նրանց կակաո, թխվածքներ և որոշ ժամանակից հետո, վճարելով բոլորի ծախսը, ասացի, թե պետք է գնամ, որովհետև շտապում եմ: Հրեան առաջարկեց երեկոյան հավաքվել և ամրապնդել սկսված ուրախ մտերմությունը: Ոստի և ուզեց հասցես խմանալ: Ես մի պատահական հասցե տվի:

Հաջորդ օրը փողոցում հանդիպեցի աղջիկներից մեկին՝ Ծանաչեց, մոտեցավ ինձ:

— Պարո՛ն,— ասաց նա,— Դուք ի՛նչ խելոք մարդ եք:

— Ինչ իմացաք, որ խելոք եմ:

— Խելոք եք, որովհետև Ձեր խկական հասցեն չէիք տվել: Այդ մարդն ասում էր, թե դուք հարուստ ռուս եք և առաջարկում էր երեկոյան հանդիպել, խմել ձեզ հետ, հարբեցնել ու կողոպտել ձեզ:

— Իսկ դուք հիմա ինչ շահ ունիք, որ այդ բոլորն ասում եք ինձ:

— Ես պոռնիկ եմ, բայց գերմանուհի:

* * *

Խոսում էինք այն մասին, թե մեր բանաստեղծներից ով է, ամենից ավելի ձայնագրված: Պարզվեց, որ հայ բանաստեղծներից ոչ մեկը Իսահակյանի չափ չի ձայնագրվել: Թախմանինով, Կյուլի, Իսկուլիտով-Իվանով և ուրիշ ռուս ու եվրոպական կոմպոզիտորներ, ինչպես և հայ հին ու նոր երգահաններ: Երբ ասաց, թե իր երգերից մոտ 160-ը ձայնագրված է՝ մնացինք՝ զարմացած:

Կոմպոզիտոր Ալվադյանը, որ նույնպես ներկա էր՝ տա-
րակուսած նայեց Վարպետին:

— Մի՞թե...

Ծիծաղեց ու ասաց.

— Մարդ պետք է մի քիչ սուտ խոսի, որ հավատան:
Զհասկացանք նրա ասածը:

— Հարյուր վաթսունը շատ մեծ թիվ է, դրա համար էլ
զարմացաք. իսկ եթե ասեի՝ մի հարյուր հատ, որ էլի շատ
շատ է՝ գուցե հավատայիք: Պատմեմ մի օրինակ. 1941-ին
վրացիները Թիֆլիսում տոնեցին իմ հոբելյանը: Գեղարվես-
տական բաժնից առաջ հարցրին, թե երգերիցս քանիսն են
ձայնագրված: Ասի՝ շատ: Թե մի 15-ը կլինի, հարցրեց մի
վրացի բանաստեղծ: Ասի՝ չէ, ավելի շատ: Թե՝ քսա՞ն հատ:
Ասի՝ ավելի շատ: Հետո մեկն ասաց, թե իրենց բանաստեղծ-
ներից ամենից ավելի երգվում է Մերեթելին: Նրա ձայնա-
գրված ոտանավորների թիվը քառասուհինգն է: «Մի՞թե
Ձերն ավելի է», — հարցով վերջացրեց իր խոսքը: Ի՞նչ
ասեի. ճիշտ թիվը, մեկ է չէին հավատա, փշոցի տեղ
կընդունեին: Մտածեցի պակաս ասեմ՝ գուցե հավատան:
«Առնվազն հարյուր հատ», — ասացի: Դրա համար եմ
ասում՝ թե մարդ պետք է մի քիչ էլ սուտ խոսի, որ հավա-
տան ասածին: Բայց էլի զարմացած մնացին, կարծես թե
չհավատացին:

Ասաց Իսահակյանը ու հիշեց գյումրեցիների խոսքը.
«ղորդ կես» չեն հավտա, սուտ կես» էլի չեն հավտա»
ու ծիծաղեց:

Հետո հիշեց Ռավեննայում իր տեսած Թեոդորոս կայսեր
դամբարանի կափարիչը, որը մի ամբողջական քարից է և
շատ ծանր:

— Ինչքան լինի դրա քաշը՝ որ լավ լինի, — հարցրեց նա:
Մեկը թե՝ «մի հարյուր փութ»:

Իսահակյանը ծիծաղեց.

— Տասներեք հազար փութ: Որ ասում եմ՝ չեն հավա-
տում: Դրա համար էլ մի քանի հարյուր եմ ասում. երկու-
երեք, բայց էլի չեն հավատում:

Իսահակյանի հետ ուղևորվեցինք Դեմիրճյանի մոտ։
Ջանապարհին հիշեցինք անցած գիշերը։

— Հա՛, — ասաց Իսահակյանը, — որ տուն գնացի, գրքերիս մեջ նայեցի Թեոդորոս կայսեր դամբարանի մասին. քաշը ճիշտ չէի ասել. ոչ թե տասներեք հազար, այլ տասնուլթ։

Դեմիրճյանի դուռն մոտ ենք.

Այն միտքը հայտնեցի, որ եթե Դեմիրճյանին մի բան պատահի՝ ողջ տունը փուլ կգա։

Ասածս հաստատեց, մի փոքր հետո ասաց.

— Կյանքի ամբողջ փիլիսոփայությունը հիմնված է մի փոքրիկ հույսի վրա. երեկ նա, այսօր դու, վաղը ես. ոչ որ չի ասում՝ այսօր ես, վաղը դու։ Մարդ միշտ իրեն հտ է գցում։ Դա նրան և մխիթարում է, և պահում։

* * *

Վարպետը վերադարձել էր Վրաստանից և բավական երջկար ժամանակ իր կատարած շրջագայության տպավորություն տակ էր։ Երբ էլ գնայիր՝ կիսոսեր վրացական գյուղերի բարեկարգությունից, պաշտամունքի հասնող այն սիրուց, որ ամեն մի վրացի ունի դեպի իր երկրի անցյալը, այն ոգևորությունից, որով նրանք խոսում և արտահայտվում են իրենց երկրի, բնության և մարդկանց մասին։ Ու մի օր պատմեց հետևյալ դեպքը.

— Գնում էինք Մցխեթ։ Մի վրացի բանաստեղծ, ինչպե՞ս էր ազգանունը... չեմ կարողանում հիշել, մոտոս կա գրված։

Կանգ առավ մի պահ ու հետո շարունակեց.

— Մի խոսքով՝ ինձ նա էր ուղեկցում։ Ահա այդ բանաստեղծը մի ինչ-որ միտք հաստատելու համար հիշեց Ռուսթավելուց մի քառատող։ Վերջին տողը շտապեցի։ Ձեր հասկանում, թե ինչու չի ստացվում։ Ես լուռ ու մունջ լսում էի, ձայն չէի հանում, որովհետև, լեզու չիմանալով,

չէի ըմբռնում, թե ինչն է շատացվելու պատճառը: Երբ բանաստեղծը մի քանի անգամ անհաջող կրկնեց նույն քառատողը, շոֆերը շրջվեց դեպի բանաստեղծը և ինչ որ բան ասաց վրացիներն ու հետո արտաւանեց վերոհիշյալ քառատողը: Բանաստեղծը մի թեթև շիկնեց, հետո հաղորդեց նրա ասածը. «Զի ստացվում, որովհետև բաց եք թողնում մի բառ»:

Պատմեց Վարպետը և ժպիտն ավելի աչքերի մեջ, քան, դեմքին, ասաց.

— Տեսնո՞ւմ եք:

Մյուս օրը անցա Վարպետի մոտ: Մտնելուս պես ասաց.

— Իրակլի Աբաշիձե:

Զհասկացա:

— Վրացի բանաստեղծն է, որի մասին երեկ պատմում էի:

Ասաց և ուրիշ հարցերի անցավ:

* * *

1940-ի հոկտեմբերին էր, թե նոյեմբերին, լավ չեմ հիշում, նշանակվեցի «Սովետական գրականության» ամսագրի խմբագիր: Գործի անցա երիտասարդական եռանդով, մտքումս դրի խստապահանջ լինել, աշխատեցի ամսագրի շուրջը համախմբել գրականության և բանասիրության ազանավոր դեմքերին: Երիտասարդը միշտ էլ վստահ է լինում իր ուժերին, ավելի ճիշտ՝ պարզապես գերազնահատում է իր հնարավորությունները և իրավունքները, մանավանդ, երբ պաշտոն ունի:

Մի օր խնդրեցի Ավետիք Իսահակյանին, որ ամսագրի հերթական համարին անպայման մի պատմվածք տա: Խոստացավ ու բերեց: Պատմվածքը կոչվում էր «Ղևոնդ աղան»: Զգուշացրեց, որ սա նոր չի գրված, գրել է Փարիզում, 1931-ին:

— Նայիր, տես, եթե հավանեն՝ տպիր:

Իսահակյանի գնալուց հետո անմիջապես կարդացի: Զեմ կարող ասել, թե հիացած էի: Որոշեցի չտպել: Հետո մտա-

ծեցի, թե ինչ էլ լինի՝ Իսահակյան է, արդեն դասական հեղինակ և մի թե երկու, տող կրճատելով, ուղարկեցի տպարան: Միառժամանակ անց, սրբագրաթերթերը աչքի անցկացնելիս, նորից կարդացի և որոշեցի «Հավատարիմ» մնալ ինձ և խստապահանջ լինելու մտադրությունս տարածել նաև... Իսահակյանի վրա:

Մյուս օրը Իսահակյանին հայտնեցի որոշումս: Մտքով ինչ անցավ՝ չգիտեմ: Ասածս ընդունեց անտրտունջ: Ընդհանրապես պահեց իրեն այնպես, կարծես ոչինչ չէր եղել:

— Քո գործն է, խմբագիրը դու ես, իրավունքը քոնն է:

Ու ժպտաց, ժպտաց այնպես, ինչպես միշտ՝ բարի ու, ինչպես հիմա է թվում ինձ, ներողամիտ:

Ապա ավելացրեց.

— Ձեռագիրը վերադարձրու: Կամ՝ ուզում ես պահիր, միայն թե չկորչի, ուրիշ օրինակ չունեմ: Եթե պետք լինի՝ կվերցնեմ:

Այդ ժամանակը չեկավ ու պատմվածքի՝ ձեռագիրը մնաց ինձ մոտ:

Ես հավատացի Իսահակյանի ասածին, միամտաբար հավատացի, թե իսկապես իմ իրավունքն է, կարող եմ մերժել ում ասես, այդ թվում և իրեն՝ Վարպետին: Քառորդ դարը բավական ժամանակ է, որ մարդ կարողանա հասկանալ իր արած քայլերի լավն ու վատը: Ու հիմա, երբ մտաբերում եմ անցածը՝ մեղավոր եմ զգում ինձ: Թեև շատ ժամանակ էր անցել՝ ուզեցի մեղքս քաված լինել: Որոշեցի նույն ամսագրում, որի խմբագիրն եմ եղել մի ժամանակ, հրապարակել Իսահակյանի պատմվածքը, որի մատիտագիր օրինակը պահվում է իմ թղթերի մեջ:

* * *

Մի օր խոսք բացվեց «Ուստա Կարոյի» շուրջը: Կշտամբում էին Վարպետին, թե մի կես տարի, մի տարի, ինչքան որ պետք է, ժամանակ չի գտնում, որ վեպը մշակի և մեջտեղ բերի:

Վարպետն ասաց.

— Ինձ պետք է մի տարի ժամանակ, այնպիսի ազատ տարի, որ ոչ մի օրս ոչնչով զբաղված չլինի: Որտեղի՞ց այդպիսի ազատ ժամանակ:

Եվ հետո ավելացրեց.

— Շատ մտքեր ու ասացվածքներ եմ լսել, դրանց մի մասը գրի եմ առել, մի մասը մտքիս մեջ է, պետք է հերոսներիս խոսքը դրանցով համեմվի: Խոր զգացողություն է պահանջվում՝ ով ասի կամ այնպես չպատահի, որ մեկն ասի չասելիքը: Ու եթե այս նորերով պիտի եղածը փոխարինեմ, որի՞ց հրաժարվեմ, ո՞րը թողնեմ: Հեշտ խնդիր չկարծեք:

Մի պահ լուռ մնաց ու հետո ասաց.

— Մորիցս լսած մի խոսք՝ զրկողը չի ապրի, զրկվողը կապրի: Կամ մի ուրիշը, միտս էլ չէ, թե երբ եմ լսել. վայելած մարդը աշխարհից ավելի հեշտ կգնա, քան կյանք չտեսածն ու չվայելածը:

Մի պահ լուռ մնալուց հետո.

— Ժողովրդական մտածողություն է:

Հետո ծայր առավ վեճը՝ վայելածը հանգիստ կբաժանվի կյանքի՞ց, թե՞ կյանքի համը չիմացողը:

Վարպետը ժպտը դեմքին լսում էր:

* * *

Մի օր ասաց, թե ժնկում շատ է զբաղվել «Ուստա Կարոյով»: Այն կարծիքին էր, թե դա իր գլուխ-գործոցն է, «Դոն Բիշոթի» պես մի բան: Ուստա Կարոն, ինչպես ասում էր նա, ժողովրդի ծոցից դուրս եկած, ինքնուս, խորամանկ, զվարճախոս, գյուղական շրջանների մեջ ամենագետ, մի խոսքով հայ ժողովրդական փիլիսոփայության մարմնացումն է:

* * *

Գարեգին Պեղեոթուրյանի «Սրինգը» շատ էր սիրում:

— Ես սիրով մի հատոր փմ բանաստեղծութուններից կտայի «Սրինգի» տակ ստորագրելու համար:

Վարպետին զբաղեցնում էր իր վեպի ֆինալը. չգիտեր, ինչպես վերջացնել, որտեղ և ինչպես դնել ավարտակետը: Երեք վարիանտ նրան մտատանջության էին մատնել և իբր հոգս տարիներով գալիս էին հետը:

Վեպի երեք հերոսները՝ Կարոն, Չառլը և Օրթե Հարութը, դալիս հասնում են այն լեռնաշղթան, որ բաժանում է մի Հայաստանը մյուսից: Սկսվում է զրույց: Օրթե Հարութը իր սովորության համաձայն ամեն ինչ ժխտում է կյանքում: Ժխտում, և միակ արդար տեղը համարում է հողը: Իսկ մնացածը՝ հայտարարում «հե՛շ»: Հե՛շ է հայտարարում նաև երկինքը: Կարոն սաստում է: Նա վախենում է, որ ամենակարողը հիմա կպատժի Օրթե Հարութին, նրա հետ և իրենց: Բայց Օրթե Հարութը անվախ ու անզրոգվելի, շարունակում է բացասել և ամեն ինչ, բացի հողից, հայտարարել:

— Հե՛շ, հե՛շ, հե՛շ...

Այդպես էլ ավարտվում է վեպը ըստ մի վարիանտի:

Մեկը գանգատվեց, որ իրեն այսինչ գրողը անտեղի վիրավորել է: Վարպետը, որ չէր սիրում գծադրությունների խառնվել, անախորժ մի զգացում ունեցավ, բայց և հուզվեց, ըմբռնեց զրուցակցին համակած վիրավորանքը և խոստացավ պախարակել վերոհիշյալ գրողին՝ անտեղի հարձակումների համար: Նա ասաց, թե երեկոյան այդ գրողն իր մոտ է լինելու և ինքը կխոսի հետը, կասի ինչ որ պետք է:

— Խոսեք հետը, Վարպետ, թե չէ ինչի նման է, բավական չէ ինձ վիրավորել է, հիմա էլ ուր նստում է, պատմում է մեր ընդհարումը, ստորացնում ինձ ուրիշների աչքին:

Վարպետի դեմքը խոստացավ, հայացքը սառեց ու թեև նայում էր ընկերոջը, բայց այլևս չէր լսում նրան:

Երբ նա գնաց և մնացինք մենակ, ասաց.

— Ոչ էլ կխոսեմ: Այդ մարդը, պարզվում է, պատվի հասկացողություն չունի: Նա վիրավորված է ոչ թե այն պատճառով, որ իրեն անարդարացի վիրավորել են, այլ որովհետև դրան տեղյակ են դարձել ուրիշները: Արժանապատվության ինչպիսի՞ անկում:

* * *

Միտս չէ, թե ինչո՞ւ խոսք բացվեց Սերգեյ Գորոդեցկու մասին:

Սողոմոն Տարոնցին հարցրեց, թե Վարպետն առաջներում ճանաչե՞լ է նրան:

Ասաց, թե հանդիպել է Թիֆլիսում, երբ նոր էր եկել Վանից ու հիացած էր Վանա գեղեցկությամբ, ասում էր, թե ինչ անպատմելի գեղեցկություն է Աղթամարի վանքը, ճարտարապետությունը, քանդակները...

* * *

Խնջույքի էինք: Նստած էի Վարպետի կողքին: Ինչ որ կենաց առաջարկվեց և մեկը «Ջախորդ օրերը» երգեց:

Ասաց.

— Գլուխ գործոց է: Այստեղ Ջիվանին Սայաթ-Նովայի կողքին է: Ոգին ժողովրդական է, միտքը՝ առույգ, հայացքը՝ լայն:

Լռեց:

— Բանաստեղծություն կա, որի առաջին տողը մի ամբողջ ոտանավոր արժե: Սա էլ դրանցից է. մի խոր ու մեծ իմաստի խտացում: Հավիտենական կյանք ունի:

* * *

Խոսք բացվեց ուսական արձակի մասին: Ամեն մեկն ասում էր, թե որն է իր սիրած գրողը: Ներկա գտնվողների մի մասի աչքում Տոլստոյից մեծ հեղինակ չկար, մյուսի պաշտամունքը Դոստոևսկին էր: Մեկն ասաց, թե ինքն ընդունում է Տոլստոյի և Դոստոևսկու մեծությունները, բայց ամենից շատ սիրում է Չեխովին:

Վարպետն ասաց.

— Ձեխովը նուրբ հեղինակ է և չի կարելի չսիրել: Բայց Տոլստոյը և Դոստոևսկին անհավասարելի մեծություններ են, ասես հսկա լեռներ լինեն, մեկը մյուսից բարձր: Նրանք համաշխարհային գրականության մեջ էլ մրցակիցներ չունեն:

Մեկը տվեց Բալզակի անունը:

— Բալզակն էլ հսկա է, բայց ոչ Տոլստոյ է, ոչ էլ Դոստոևսկի:

Մենք որոշեցինք, այնուամենայնիվ, պարզել, թե այդ երկուսից նրա համար որն է նախընտրելի:

— Առաջ և երկար ժամանակ Դոստոևսկին, իսկ հետո և հիմա, իհարկե՝ Տոլստոյը:

Շունչ քաշեց:

— Մի անգամ գնացի Պոռշյանի մոտ: Երիտասարդ ժամանակս էր, նոր էի Գերմանիայից վերադարձել, ուր Դոստոևսկու պաշտամունքը ոչ մի չափի տակ չի ընկնում: Տեսնեմ Տոլստոյ է թարգմանում: Ի՞նչ էր թարգմանում: Հա՛, կարծեմ «Մանկություն» էր: Ոգևորված խոսում էր Տոլստոյի մասին, ասում էր, որ երկրագունդը ավելի մեծ գրող չի տվել: Ես ասացի, թե ինձ համար Դոստոևսկին ավելի մեծ է: Գրիչը վայր դրեց, առջևի թուղթը մի կողմ հրեց ու ինձ այնպես նայեց, կարծես թե էս է պիտի կոչի հետո. «Գլխիցդ հանիր, մի կողմ զցիր գրան»: Ես ոչինչ չասացի, բայց մտքումս ծիծաղեցի, մտածեցի, որ պարզապես չի հասկանում: Բայց հետո, ավելի հասուն տարիներին նորից ու նորից կարդացի Տոլստոյին, հասկացա Պոռշյանին:

* * *

Մի օր ասաց.

— Զարմանալի է աշխարհը. մարդը ծնվում է մաքուր, հասարակությունը նրան փչացնում է, հետո էլ նույն հասարակությունը զբաղվում է նրա դաստիարակությամբ: է՛հ, ավելի լավ չէ, որ ո՛չ փչացնի, ո՛չ էլ հետո չարչարվի, թե ինչպես փրկի և ուղղի:

խոսք բացվեց ստեղծագործական հոգեբանության շուրջը, այն մասին, որ ամեն մի գրող իր անհատականության, խառնվածքի համեմատ ուրույն դրսևորումներ ունի:

Դեմիրճյանը, որ եկավ զրույցի կեսից, անմիջապես ներգրավվեց խոսակցության մեջ: Նրա սուր մտքից դատողությունները, մեկը մյուսից խնքնատիպ, հորդում էին: Խառնվածքը, թեև քննադատաբար էր վերաբերվում Դեմիրճյանի խոսքի ոչ այնքան հստակ ընթացքին, բայց սիրով էր լսում, ուշադիր հետևում նրա մտքի խաղերին:

Երբ բոլորն արտահայտվեցին՝ առանց, իհարկե, հարցը լուծելու, Վարպետը, ժպիտը քթի տակ, դարձավ Դեմիրճյանին.

— Հիշո՞ւմ ես «Վերնատան» վեճը:

— Ո՞րը, — հարցրեց Դեմիրճյանը. — էնքա՛ն ենք վիճել որ, — բացատրեց նա մեզ:

— Օհանեսի ու քո վեճը: Պատմե՞մ:

Դեմիրճյանը լրջացավ:

— Ուզում ես պատմիր. անցած, անցած բան է:

Վարպետը դարձավ մեզ.

— Մի օր «Վերնատանը» խոսք բացվեց այն մասին, թե գրողը, երբ գրում է, պե՞տք է ուրիշներին ասի, թե ինչ է գրում: Ամեն մեկն ասում էր, թե ինքն ինչպես է վարվում: Ես մի բան ասի, Շանթը մի ուրիշ: Հիմի չեմ հիշում, թե ինչ: Հերթը հասավ Դերենիկին: Սա թե՛ «ես ոչ ոքի ոչինչ չեմ ասում. նախ՝ դա կարող է ցրել, զրկել կենտրոնացումից. երկրորդ՝ կարող են կանխել, ինձնից լսել, գրել ու ինձնից էլ առաջ հրատարակել»: Թումանյանը, որ չէր խոսել, Դերենիկին առարկեց. «Ես քո էդ գաղտնապահությունը չեմ հասկանում: Մարդ էդքան էլ վախկոտ չպիտի լինի. գողանալս ո՞րն է. իմ պատմածը ուրիշը ուզում է՝ թող գրի. սյուժեն կարող է վերցնել, բայց էն հոգին, էն շունչը, որ ես պիտի դնեմ մեջը, հո չի՞ կարող վերցնել. պիտի դնի իր հոգին, իրա շունչը. ուրեմն՝ դարձավ ուրիշ գործ»: Այսպես առարկեց Դերենիկին, հետո դարձավ մեզ ու բացատրեց,

թիւ իր կարծիքով ինչի է լավ, որ գրողը ասում ու պատմում է. «Երբ ես մի պոեմ եմ գրում, ավանդութուն կամ հեքիաթ եմ մշակում, Դերենիկին հակառակ, պատահած առիթը չեմ փախցնում ու պատմում եմ: Պատմելիս էլ հետեւում եմ, թիւ լսողը ինչպես է լսում, որտեղ՝ լարված ու հետաքրքրությամբ, որտեղ՝ ձանձրուցթով, որտեղ՝ չհավատալով, տարակուսած կամ կասկածելով: Ու հետո, աշխատելիս, աչքի առաջ եմ ունենում: Դա ինձ շատ է օգնում»:

Դեմիրճյանը լսում էր Վարպետի պատմածը չէի ասի խաղաղ, բայց մի այնպիսի ժպիտով, որը առաջին հայացքից թույլ չէր տա հասկանալու այն անբավականութունը, որ ապրում էր նա անցած-գնացած այդ պատմութունը վերհիշելիս:

* * *

Ես հարմար չեմ դատում տալ այն գրողի անունը, որ, վիճելով Վարպետի հետ մի հարցի շուրջ, որից ինքը բոլորովին անտեղյակ էր, գնաց:

— Մարդ լավ է խելոք մեռածի հետ խոսի,— ասաց Վարպետը և մի հեգնական ժպիտ խաղաց դեմքին,— քան հիմար ողջի:

* * *

Վարպետն ասաց.

— Շատ տարիներ առաջ էր: Այն ժամանակ Փարիզ էի: Փայլուն մրցանակ խոստացան նրան, ով մի բառով կարտահայտի ամենանվիրական հասկացողությունը:

Մի պահ լուռ մնաց և ապա շարունակեց խոսքը.

— Շատերը մասնակցեցին. մեկն ասաց՝ սեր, մի ուրիշը՝ հայրենիք, երրորդը՝ կյանք, մեկն էլ թե՛ ազատութուն, ուրիշները՝ կարոտ, ձգտում, հմայք և այսպես շարունակ:

Լռեց:

— Եվ ինչ եք կարծում, ո՞վ շահեց մրցանակը:

Նայեց շուրջը նստածներին: Ոչ ոք ձայն չհանեց:

— Շահեց նա, ով որ ամենանվիրական հասկացողությունը հայտարարեց ծերությունը:

Բոլորս էլ անականկալի եկանք: Վարպետը ժպտաց և ապա, հայացքը կենտրոնացնելով մեկի վրա, որը նայում էր փրեն տարակուսանքով, բացատրեց.

— Հապա, սիրելի՛ս, այդպես է. ծերությունը իր մեջ ամփոփում է մնացած բոլոր հասկացողությունները:

* * *

Իսահակյանի հետ փողոցի մի մայթից անցնում էինք մյուսը: Տեսնելով, որ տրամվայ է գալիս, Վարպետը կանգ առավ, ինձ էլ ձեռքով նշան արավ, որ շտապեմ: Վազոնավարը, տեսնելով բանաստեղծին կանգնած, տրամվայն անմիջապես կանգնեցրեց ու դռնակը բացեց.

— Խնդրեմ, Վարպե՛տ:

Իսահակյանը, որ թեև տրամվայ նստելու միտք չուներ, և մեր ճանապարհն էլ բոլորովին այլ կողմ էր, անհարմար գպաց շրնդունել առաջարկը: Դարձավ ինձ:

— Բարձրանա՛նք:

Վազոնը լի էր մարդկանցով: Անմիջապես տեղ ազատեցին նրա համար: Ես, որ կանգնած էի մնացել, նայում էի Վարպետի դեմքին: Իրեն լավ էր զգում: Մի փոքր ժամանակ անց կողքի տեղն ազատվեց: Նստեցի:

— Երբ քեզ բարի են ուզում՝ առ, մի մերժիր, թեկուզ և այդ բոլորին դրա կարիքը չունենաս էլ:

Մի որոշ տարածություն անցնելուց հետո իջանք: Վարպետը շնորհակալություն հայտնեց վազոնավարին: Ես երբեք չեմ մոռանա նրա աչքերի արտահայտությունը. այդ հաղթանդամ մարդը մի հեղ հայացքով ուղեկցում էր Վարպետին, երջանիկ այն գիտակցություն, որ գեթ մի անգամ իրեն բախտ վիճակվեց «պատվել» իր մեծ ժամանակակցին:

* * *

Խոսք բացվեց Շիրվանզադեի մասին:

— Իրան երբեք չեմ սիրել: Մենք հակապատկերներ էինք: Ուշադրություն դարձրե՞լ ես, որ կյանքում մտերմա-

նում են ոչ այնքան իրար նման, որքան բնավորությամբ միմյանցից տարբեր մարդիկ: Օրինակ՝ Գյոթեն ու Շիլլերը: Գրականության մեջ էլ դեպքեր կան. քեզ օրինակ՝ Պեպոն ու Կակուլին: Ես ու Շիրվանը ոչ թե տարբեր էինք, այլ իրար հակառակ: Տարբեր բնավորությունների մերձեցումը հնարավոր է, իսկ հետո նաև անհրաժեշտություն է դառնում միմյանց լրացնելու բնագործից: Իսկ հակասական գծերը միմյանց ժխտելու, բացասելուն են հանգում վերջապես:

Կանգ առավ:

— Երբ իրանից հեռու եմ եղել, միշտ մտածել եմ, թե, իհարկե, հնարավոր է հետք բարեկամություն անել, բայց հանդիպման ամեն մի առիթ հակառակն է ապացուցել. ինքնավստահություն ունեւ. բոլորին վերևից էր նայում: Դա էլ մարդկանց վանում էր նրանից: Չսիրեցի այդ:

Նորից կանգ առավ:

— Որպես գրող բարձր է աչքիս: Լեզվից աղքատ է, մի քիչ էլ թափափած, նրբությունների մեջ թափանցելու գլուխ չունի, բայց ստույգ է ու ճիշտ: Պատկերացումները կոնկրետ են, նյութականության ուժեղ զգացողությամբ հագեցած. ինչ որ ասում է՝ անմիջապես տեսնում եմ, աչքիս առաջ պատկերանում. է, ասես ձեռքով շոշափում էր: Լիրիկ չէ, թեև ներքին ջերմությունից զուրկ չէ: Սիրում է դատողություններ անել, մտքեր հայտնել, բայց մտածող չէ: Գուցե այն պատճառով, որ փիլիսոփայական հոսանքներին ծանոթ չէր: Ծանոթ էլ լինե՞ր՝ էլի այդպիսին կլինե՞ր: Փիլիսոփայորեն մտածելու հակում չունե՞ր: Չէ՛, չէ՛, շատ լավ հեղինակ է. իսկական եվրոպական տիպի գրող: «Քառսի» մեջ անզուգական էջեր կան, բայց ես ամենից շատ սիրեցի «Արտիստը»: Ո՞վ չէր ուզե՞նա այդպիսի գրվածքի հեղինակ լինել: Ա՛յ քեզ բյուրեղացում:

* * *

Մի երեկո զանգ տվեց, թե գնում է Դեմիրճյանի մոտ:
— Եթե ազատ ես՝ արի:

Դնացի:

Խոսք բացվեց Չարենցի մասին: Իսահակյանը պատմեց հետևյալը.

— Մի օր մոտոն էի: Ասաց, թե ուզում է ինձ կարդալ «Նավգիկեն»: Երկար ու կրկնություններով լի գործ էր, տեղ-տեղ էլ մթամած: Կարդում էր ոգևորված, իրեն դուր եկած քառատողը երբեմն կարդում էր երկրորդ անգամ, ասելով «մի լսիր, է՛, Ավո՛»: Երբ վերջացրեց հարցրեց. «Ինչպե՞ս է»: Չգիտեի՝ ինչ ասել: «Լա՛վ, լա՛վ, կարող ես ոչինչ չասել, տեսնում եմ չես հավանել»:

* * *

Պատերազմը նոր էր սկսվել: Մի օր խոսք եղավ այն մասին, որ հայ բանաստեղծները շատ են անդրադարձել հայրենիքին: Գտանք և դրա պատմական հիմքերը: Ես ասացի, թե, ճիշտ է, շատ շատ է գրվել, բայց բացարձակ արժեքները սակավաթիվ են, երևի մի քանի հատ: Անմիջապես ուզեց իմանալ, թե որոնք են: Ասացի, որ չափածո գրականությունից չորս գործ միայն բացարձակ իմաստով լավն են:

— Խիստ չե՞ս:

Նկատեցի, որ լավ գործերի թիվը այնքան էլ փոքր չէ, բայց եթե բացարձակ չափանիշը աչքի առաջ առնվի, միայն իմ ասած չորսը կմնան թեկուզ դարեր էլ անցնեն, որովհետև բոլորն էլ խտացած ձևով արտահայտում են հայ ժողովրդի պատմության փիլիսոփայությունը:

Հետաքրքրվեց, թե որոնք են:

Ես թվեցի. Թումանյանի «Հայոց լեռներում», Իսահակյանի «Ռավեննայում», Տերյանի «Տեսա երկիրն իմ հայրենի» և Չարենցի «Ես իմ անուշ Հայաստանի»:

Մտածեց: Սկսեց բանաստեղծություններ հիշել և ինքն էլ տեղն ու տեղը առարկում էր, ասում, թե ինչի այս կամ այն գործը չի կարող այդ չորսի շարքը դասվել:

— Ինձ դու դրանց շարքը դասեցիր համոզվա՞ծ, թե ինձ չվշտացնելու համար:

Ասում է ու կասկածոտ նայում աչքերիս մեջ: Ես բռնում եմ նրա թևը:

— Լա՛վ, Լա՛վ, մի նեղանա:

Հանգստացնում է ինձ, բայց ինքը դեռ հանգիստ չէ:

— Բայց չէ՞ որ այդ ոտանավորը մարդու անցողիկ ճակատագրի փրկիստփայլությունն է նվիրված:

Հասկանում եմ, որ շարունակում է ստուգել ինձ: Մինչև չհամոզվի՞ չի հանգստանա:

Ես տալիս եմ իմ հիմնավորումը. այդ բանաստեղծությունն արտահայտում է Հայրենիքի հավիտենականության հասկացողությունը և դրա համեմատ մարդու անցողիկ լինելը:

Ժպտաց: Նշանակում է հավատաց: Մի փոքր հետո.

— Ես չգիտեմ, թե դու ինչ կարծիքի ես, բայց բոլորից լավը, իհարկե, Չարենցինն է: Այդ մի հատիկ ոտանավորը բավական էր, որ նա անմահների շարքն անցներ: Այստեղ նա մրցում է ամենքի հետ, ոչ ոքից հետ չի մնում, երբեմն կանգնում է հավասար, երբեմն էլ գերազանցում է:

* * *

Իսահակյանն ու Լևոնյանը ընկերներ էին: Երկար տարիների փոխադարձ սերը մոտեցրել էր, ստեղծել այնպիսի հարաբերություն նրանց միջև, որ միմյանց հաճախակի հանդիպելը, զրուցելը և ընդհանրապես միասին ժամանակ անցկացնելը երկուսի համար էլ դարձել էր բնական անհրաժեշտություն:

Լևոնյանը ապրում էր այն փողոցում, որտեղ և ես: Այդ փողոցը հիմա էլ առանձնապես կարգավորված չէ, իսկ այն ժամանակ, խոսքը վերաբերում է պատերազմի տարիներին, քար ու քանդ վիճակի մեջ էր: Մի օր, երեկոյան ժամին, Վարպետը ճանապարհվում է Լևոնյանի տուն: Խուսաբողարկման հետևանքով քաղաքը կորել էր մթություն մեջ: Փողոցը, որտեղ ապրում էի ես, անթափանց մութ էր և սարսափելի ցեխոտ: Մեր տան մոտով անցնելիս՝ Վարպետի ոտը կաշում է մի քարի, ընկնում է ցած, այտոսկրը դիպչում է քարին

ու քերծվում, մի ոտից էլ կրկնակոշիկը թռչում կորչում է ցեխերի մեջ: Փողոցով անցնողները անմիջապես օգնության են հասնում: Վարպետը նայում է շուրջը, ճանաչում մեր մուտքը: Խնդրում է բարձրացնել իրեն մեր տուն: Մեզ մոտ հյուրեր կային, երբ Վարպետին ներս բերին՝ շատ վախեցանք, բայց ինքը շտապեց հանգստացնել, ո՞ր մի առանձին բան չի պատահել: Մեր տանը մի երիտասարդ սիրունադեմ բժշկուհի կար: Երբ Խաչակյանի վրան ու զուխը կարգի բերին՝ բժշկուհին բամբակը ձեռն առած փորձեց նրա այտից հոսող արյունը կանգնեցնել: Եվ դա բավական երկար տևեց, որովհետև ոչ տանը, ոչ էլ հարևանների մոտ, յոգ չգտնվեց:

Վարպետը պատմում էր իր ուղևորության նպատակը, պատահարի մանրամասնությունները: Ու թեև կարծես ասածը մեզ էր ուղղված, բայց աչքը չէր կտրում բժշկուհուց: Հայացքի մեջ երանություն կար: Տպավորությունն այնպես էր, ասես, գոհ էր եղածից և դժգոհ, որ վնասվածքը չնչին է, այլպես գեղեցկադեմ բժշկուհու խնամքն այդպես շուտ չէր վերջանա:

Երբ բժշկուհին հայտնեց, թե արյունն արդեն կանգնեցված է, Վարպետը շնորհակալության փոխարեն ասաց.

— Ափսո՛ւս.. .

Բժշկուհին շհասկանալով կամ շհասկանալու տալով՝ զարմացած նայեց բանաստեղծին:

— Զկա չարիք առանց բարիքի, — ասաց Վարպետը:

Բժշկուհին հարցական նայեց նրան:

— Զիններ այս գեպը, չէր լինի և ձեզ հետ ծանոթանալուս առիթը:

* * *

Երկու շաբաթից ավելի էր, որ չէի եղել Վարպետի մոտ, ոչ էլ ինքն էր Պետհրատում երևացել:

Զանգահարեցի ու գնացի:

— Ի՞նչ կա-չկա:

— Մի նոր բանաստեղծ է հայտնվել:

— Ո՞վ է:

— Պարույր Ղազարյան:

— Չեմ հանդիպել:

— Դեռ չի տպագրվել:

— Շնորհքով է:

— Տաղանդավոր:

— Ձե՞ս ոգևորվում, արդյոք:

— Թվում է, որ ո՛չ:

— Քանի տարեկա՞ն է:

— Տասնութ:

— Իսկական ժամանակն է:

— Որտեղի՞ց է:

— Չանախի գյուղից է:

— Լավ է, որ գյուղից է: Սար, ձոր, դաշտ, ծաղիկ կզգա:

— Գուցե տարօրինակ է, բայց գյուղից ոչինչ չկա մեջը:

— Ինչպե՞ս թե:

— Նյութը քաղաքն է, զգացողությունը քաղաքային է:

Տպավորությունն այնպես է, որ քաղաքում է աչք բացել:

— Տարօրինակ է:

Մի պահ լռելուց հետո.

— Կարո՞ղ ես ինձ բերել մի երկու բան այդ տղայից:

Մյուս օրը մի տաս-տասնհինգ ոտանավոր տարա:

Կարգում էի, Վարպետը լսում էր, ոչ մի ձայն չէր հանում: Նայում էի դեմքին հասկանալու համար նրա տպավորությունը, բայց արտահայտությունն անթափանց էր: Երբ վերջացրի, զլուխը բարձրացրեց.

— Շատ հետաքրքիր մի բան է այդ տղան: Ազգանունն ինչպե՞ս ասացիր, Պարույր Ղազարյա՞ն, լավ չէ, մի ուրիշ ազգանուն թող ընտրի: Մի զլանա, օգնիր այդ տղային, բանաստեղծական խորք ունի: Միտքը թռիչքներով է գործում, երևակայությունն էլ զորավոր է: Մտածողության մեջ անսպասելի բաներ կան և ինքն է, ինքը և ուրիշ ոչ ոք: Արժե օգնել: Այնքան էլ հստակ չի մտածում, մեկ էլ միտքը զգացմունքից առաջ է ընկնում:

Լռեց:

— Սա կարող է հաճելի անակնկալ լինել բոլորի համար: Աչքդ վրան պահիր: Ինչ-որ ձեռքիցդ գա՛լ արա:

Մի առ ժամանակ հետո «Սովետական գրականություն» ամսագրում տպագրեցի Պարույր Ղազարյանի մի բանաստեղծությունը՝ «Անխորագիր», հաջորդ համարում էլ՝ երեք գործ։ Ասպարեզ բերի Պարույր Սևակ ստորագրությամբ։ Հարձակումներ եղան վրաս և քննադատեցին ինձ որպես անխոհմ քայլեր անող խմբագրի։

Այդ օրերին Վարպետի մոտ հաճախ էի լինում և նա տեղյակ էր պատմածիս։

— Տրամադրությունդ մի գցիր։ Այդ տղան իսկական բանաստեղծ է, հարձակումներ էլի կարող են լինել։ Դու պիտի այնպես անես, որ այս աղմուկի մեջ տղան հուսախաբ չլինի ու չկորչի։

* * ~

Դեմիրճյանի «Բժիշկը» աղմուկ հանեց և նրանք, որ իրենց ուղղափառ գաղափարականներ էին համարում, հարձակվեցին նախ հեղինակի վրա, որ գրել է և ապա իմ՝ որ տպագրել էի։ Ես այն ժամանակ «Սովետական գրականություն» ամսագրի խմբագիրն էի։ Այդ պատմության օրերին Վարպետը անդրադարձավ այդ աղմուկին և ասաց, որ ինքը հիացած չէ Դեմիրճյանի պատմվածքով, բայց չի հասկանում, թե ինչի համար է այս ամբողջ աղմուկ աղաղակը։ Եվ հետո պատմեց հետևյալ դեպքը.

— Հորն ու մորը կորցրած մի պատանի մեծանում է պապի մոտ։ Պապը շատ սիրում է նրան։ Երիտասարդը ոտանավորներ է գրում։ Ուր տանում է գրածները՝ մերժում են։ Համոզված, որ իրեն չեն գնահատում, նախանձում են՝ զանգատվում է պապին, լաց է լինում։ Տանջվում է, ծանր ապրումներ է ունենում, վերջապես՝ հիվանդանում է թոքախտով։ Պապը, որ, ունեոր մարդ էր, որոշում է թոռանը, փրկել։ Մի մարդ է վարձում, որը հրատարակիչ ձեռնալուծ՝ ներկայանում է հիվանդ պատանուն և առաջարկում իր ծառայությունները։ Պատանին կյանք է առնում, այնքան ուժ ու ոգևորություն ստանում, որ ոտքի է կանգնում, ընտրում իր լավագույն էջերը և տալիս հրատարակչին։ Մի ամիս

անց գրքույկը լույս է տեսնում: Պատանի բանաստեղծը անցնում է գրախանութները և իմանում, որ իր գիրքը սպառվել է և նմուշի համար մի հատ էլ չի մնացել: Միաժամանակ հետո հրատարակիչը նորից է գալիս բանաստեղծի մոտ և առաջարկում նոր գիրք պատրաստել հրատարակության համար: Նոր գիրքը կարճ ժամանակից լույս է տեսնում և սպառվում ավելի արագ, քան առաջինը: Նույն պատմությունը կրկնվում է երրորդ և չորրորդ գրքույկների հետ:

Եվ այն պահին, երբ պատանին իրեն հռչակված բանաստեղծ էր կարծում, նույնը և բոլոր ազգականներն ու հարևանները, հիվանդությունը սրվում է և կարճ ժամանակից վրա է հասնում մահը: Հուղարկավորներն ասում են, թե դազաղում պառկած պատանու դեմքը իր կոշմանը ծառայած մարդու երանելի արտահայտություն ուներ: Մի քանի ամիս հետո վախճանվում է պապը: Ազգականներն ու հարևանները նրա տան ներքնահարկում գտնում են թոռան բոլոր գրքերի լրիվ տպաքանակը:

* * *

Քաղաքում լուր տարածվեց, որ Մահարին, Ալազանը, Նորենցը և Մկրտիչ Արմենը վերադարձել են, գտնվում են Մոսկվայում և շուտով կլինեն Երևանում: Այդ լուրը Վարպետին շատ էր ուրախացրել: Ենթադրելով, թե չգիտեմ՝ հայտնեց: Երկար խոսեց նրանց մասին, մի առ մի հիշեց բոլորին: Մի փոքր անց ասաց, թե ինքը շատ կուզե՛ր նորից աչքի անցկացնել նրանց գրքերը: Իսկ սեղանի վրա դրված էր Մահարու գիրքը: Կարծում էի, թե նոր է սկսել, բայց հետո պարզվեց: Որ կարդացել է «Մանկությունը», այնքան է հավանել, որ որոշել է մի անգամ էլ թերթել, բացել է իրեն շատ դուր եկած մի էջ՝ նորից մի հատված կարդալու համար և այնպես է տարվել, որ ինքն էլ չի նկատել, թե ինչպես շարունակել է ընթերցել:

Վարպետը հիացմունքով էր խոսում «Մանկության» մասին: Եվ ինչպես միշտ՝ անկեղծ ոգևորությունից կակազում

էր, բայց որոշ ու հաստատ ասում, թե դա մի այնպիսի չքնաղ ստեղծագործութիւնն է, այնպիսի փայլատակում, որ ամեն հեռավորութիւնից էլ լույս կտա:

Շատ էր հավանել գրվածքի այն էջը, որտեղ նկարագրված է մուրացիկ Քինոն, հատկապես այն հատվածը, ուր պատմվում է, թե ինչպես նա մի օր զալիս է իրենց տուն, ինչպես միշտ կերակրվում է և դուրս գալիս լսում դռան բախոց:

«— Վո՛ւվ ի...— ճշաց Քինոն:

— Աղքատ ի,— լսվեց դրսից:

— Գնա՛, գնա՛,— ճլղրթաց Քինոն,— աստված տա»:

Կարդաց մի քանի անգամ:

— Աղքատը աղքատին ասում է՝ աստված տա... Ինչպե՛ս է գտնված: Ի՛նչ լավ է դիտված:

Լոկեց և մի պահ հետո.

— Ի՛նչ չէի տա, որ այս մի հատվածը իմը լիներ, իմ գրածը:

* * *

Հանգստի գնալուց առաջ անցա Վարպետին հրաժեշտ տալու:

Տիկին Սոֆիկն ասաց.

— Ավետիք, գիտե՞ս, սիրով կգնայի Սեանա կղզիէ, գոնե մի շաբաթով:

Վարպետը զարմացավ:

— Դու կարող ես նայել Սեանի նվագած ջրերին և հանգիստ քնե՞լ այնտեղ:

Քիչ հետո.

— Զարմանո՞ւմ եմ քեզ վրա:

* * *

Այդ այն օրերին էր, երբ Դերենիկ Դեմիրճյանը գրում էր «Վարդանանքը»: Մի հանդիպման ժամանակ Վարպետը տրտնջաց.

— Ինչի՞ է գրում, չեմ հասկանում:

— Ես զարմացա: Ճիշտն ասած՝ բոլորովին այլ վերաբերմունք էի սպասում:

— Գիտեմ, որ նյութը նրան հուզում է: Ի՛նչ անենք: Երկու անգամ արտահայտվելու, այդ մասին ասելու, խոսելու առիթ ունեցավ: Տարիներ առաջ պիես գրեց, վերջերս էլ՝ հետազոտություն: Էլ ի՛նչ է ուզում:

Ես չէի կարող հաշտվել նրա ասածի հետ և հարցրի, թե մի՞թե այդ բոլորը երաշխիք չեն, որ լավ կգրի:

— Ընդհանրապես, իհարկե, այդպես է: Բայց, տես թե ինչից եմ վախենում: Դեմիրճյանի ոճը անհանգիստ է, նյարդային, կցկտուր, իսկ պատմական վեպը պահանջում է էպիկական հանգստություն:

Ես ասացի, թե ծանոթ եմ վեպի առաջին երկու գլխին, որ Դեմիրճյանը տվել է ինձ ամսագրում տպագրելու համար և այնքան լավ է, որ մտավախություն համար հիմք չկա:

— Հավատում եմ. լավ, նույնիսկ փայլուն էջեր էլ կարող են լինել, բայց մի մոռանա, որ դա հատված է: Դերենիկը վեպ գրելու փորձ չունի: Եվ հարց է, կկարողանա՞ ամբողջացնել, ծայրը ծայրին բերել:

Երբ վեպը լույս տեսավ՝ հիվանդ պառկած էի: Ամսագրում տպագրված հատվածներին ծանոթ էի, ամբողջին ոչ: Դեռ ոչ մի արձագանք չէի լսել: Մի երեկո Վարպետը տիկին Սոֆիկի հետ, մի աման յուղով (այն ժամանակ մթերք դժվար էր ճարվում) հիվանդատես եկավ: Հարց ու փորձ արեց, թե ինչպես է առողջությունս, ինչ են ասում բժիշկները: Մի փոքր անց ասաց.

— Կարդացի:

— Ի՞նչը:

— «Վարդանանքը»:

— Հետո՞:

— Ցնցված եմ: Վախս բոլորովին իզուր էր: Գերազանցեց մե՛ր բոլոր պատմական վեպերին: Մի խոսքով լավն է, սքանչելի: Դա կուտակում է, երկար ժամանակ լուռ մնացած մարդու խոսք: Ժայթքում է. տեղ-տեղ գուցե անհարթ, բայց

ամբողջութեան մեջ ազդու և գեղեցիկ: Գյուտեր շատ կան, նուրբ էջեր ինչքան ասես, համարձակ հղացումներ՝ նույնպես, երևակայութեան շտեմնված թուիչք, խոր փիլիսոփայութեան: Եվ գլխավորը՝ հայրենաշունչ գործ է:

Կարճ դադար:

— Դերենիկի համար շատ ուրախ եմ: Անմահացա՛վ:

Ես հարցրի, թե լավ չի լինի, եթե մի հոգվածով հանդես գա: Շահագրգռված լինելով, որ վեպը լավ գնահատվի և այն էլ մի այնպիսի բացարձակ հեղինակութեան կողմից, ինչպիսին Իսահակյանն է, ես միաժամանակ ուզում էի, որ նրանց մտերմութեան մեջ վերջերս նկատվող սառնութիւնը վերանա:

— Տեսնեմ,— ասաց Վարպետը:

Նույն օրը զանգ տվի Հրաչյա Քոչարին, որ այն ժամանակ «Սովետական Հայաստան» թերթումն էր աշխատում, վարում էր գրականութեան և կուլտուրայի բաժինը, պատմեցի ու խորհուրդ տվի խնդրել Իսահակյանին «Վարդանանքի» մասին հոգված գրել:

Մի քանի օր հետո «Սովետական Հայաստանում» լույս տեսավ վարպետի հոգվածը «Վարդանանքի» մասին:

Հիվանդութիւնն խորանում էր: Իսահակյանն ինձ մոտ բերեց մի բժիշկ՝ Ռաֆայել Մանվելյան: Բժիշկը քննեց ինձ, ասաց ինչ որ պետք էր և գնաց, իսկ Իսահակյանը մնաց: Բժիշկը նոր էր գնացել, որ Դեմիրճյանը եկավ: Եվ տարօրինակ բան. ասում, խոսում է և ոչ մի խոսք հոգվածի մասին: Ես ու Իսահակյանը իրար ենք նայում և չենք հասկանում: Ես այլևս չհամբերեցի և դարձա Դեմիրճյանին.

— Զե՞ք կարդացել:

— Ի՞նչը:

— Վարպետի հոգվածը:

— Ինչի՞ մասին:

— «Վարդանանքի»:

Դեմիրճյանը նայեց Իսահակյանին. շրթունքներին ժպիտ կար և ժպտի մեջ ուրախ զարմանք:

Ես թերթը տվի նրան: Առանձնացավ, նստեց լուսամտի մոտ և սկսեց կարդալ: Երբ վերադարձավ, աչքերը վառվում

էին երիտասարդական կրակով: Շրթունքները շարժվեցին, որ մի բան ասեն, բայց չկարողացան: Իսահակյանը ոտքի կանգնեց: Երկու ընկեր՝ հին ու վաղեմի բարեկամներ՝ փարվեցին ու երկար այդպես ողջագուրված մնացին:

* * *

Վարպետը հիացած էր «Վարդանանքով» և համոզված, որ ինքն իրավացի է, բայց չգիտեր, թե վեպը միջին ընթերցողին մատչելի կլինի՞ր և ընդհանրապես ժողովրդականություն կգտնի՞ր թե չէ: Երբ վեպը ժողովրդական ճանաչում գտավ՝ մի այսպիսի խոստովանություն արեց.

— Մի հետաքրքիր բան եմ ուզում ասել. լսիր ու մտածիր ասածիս վրա:

Լռեց և հետո շարունակեց.

— «Քաջ Նազարը» միշտ էլ հավանել եմ: «Ավետիգը»՝ նույնպես: Գուցե մի երկու քառյակ էլ: Էլ ի՞նչ չգիտեմ: Շատ որ անկեղծ լինեմ՝ էլ ոչինչ: Բայց «Վարդանանքից» հետո մի իրիկուն որոշեցի նորից կարդալ Դերենիկի գործերը: Մի քանի գործ կարդացի, մի երկուսը աչքի անցկացրի, մի խոսքով՝ բավական բան կարդացի: Եվ երեւակայում ես՝ «Վարդանանքի» ազդեցութեան տակ մի ուրիշ աշքով էի տեսնում այդ բոլորը, այլ կերպ զնահատում, քան առաջ և գտնում այնպիսի արժեքներ, որոնց վրա առաջ ուշադրութեան չէի դարձրել: Ավելին, զարմանում էի, թե Դերենիկը, խելոք ու ճաշակով մարդ, ինչի՞ է այդ բոլորը մեջտեղ բերել ու տպել:

Լռեց մի պահ, ինչ էր մտածում, չգիտեմ, բայց բավական ժամանակ լուռ մնալուց հետո ասաց.

— Այդպես է, այո՛, զարմանալի է, բայց այդպես է: Այսինքն՝ բոլորովին էլ զարմանալի չէ:

Կանգ առավ, ուզեց միտքը ձևակերպել:

— Արժեքը կա, բայց այնքան չէ, որ կարողանա ինքնուրույնարար աչքի ընկնել: Դրա պատճառով էլ չենք տեսնում, չենք զնահատում, իսկ երբ ստեղծված է գլուխ գործոցը, նրա արձակած լույսը գալիս տարածվում և ընկնում է

ստեղծագործության նաև այն կետերի վրա, որոնք առաջ մեզ համար մութ են եղել:

Մի փոքր հետո.

— Այստեղ մի նրբություն կա: Գլուխ գործոցը հեղինակություն է բերում նրան, ով մինչ այդ հեղինակություն չէր: Պետք է կարողանալ, և դա, իհարկե, դժվար գործ է, տարբերել չնկատված արժեքը այն գրվածքներից, որոնք, լավ չլինելով, այնուամենայնիվ թվում են լավ միայն նրա շնորհիվ, որ դուրս են եկել այդ հեղինակի գրչի տակից:

* * *

Պատերազմը նոր էր վերջացել: Ես դեռ շարունակում էի աշխատել Պետհրատում: Անահիտ Սահինյանն էլ մեզ մոտ աշխատանքի էր անցել, մանկա-պատանեկան գրականության բաժինն էր վարում: Պետհրատումն էր նաև Մարգարիտ Քաջազնունին: Վերջինս մի օր ասաց, թե լավ կլինի, եթե մեր պատանեկությանը հնարավորություն տրվի «Ուլենշպիգելին» ծանոթանալու: Հրաշալի միտք: Լույս կտեսնի պատանեկության համար, կկարդան նաև մեծերը: Եվ լավ կլինի: Սահինյանն ու ես գնացինք դիրեկտորի մոտ: Դիրեկտորը Հարություն Մկրտչյանն էր: Երկար ժամանակ պետք չեղավ համոզելու նրան: Ուրեմն՝ Շառլ դը Կոստերի գիրքը լույս է տեսնելու: Թարգմանությունը ստանձնեց Վահե Միքայելյանը, որ այդ գործն անելու ցանկությամբ վաղուց էր խանդավառված:

Այդ օրերին հրատարակչություն եկավ Իսահակյանը: Ու ես ասացի, թե մտադիր ենք «Ուլենշպիգելը» հայերեն հրատարակել:

— Շատ լավ եք անում:

Ու անդրադարձավ վեպին: Մտորում էր: Նրա հայտնած մտքերը շատ հետաքրքիր էին: Ուշադիր լսում էի նրան: Ու նա, որ հանգիստ դատողություններ էր անում, ասես ոգևորվեց և ընդհանրացրեց.

— Ժողովրդին ազգ դարձնող գրքեր կան: «Ուլենշպիգելը» դրանցից է: Նույնն է նաև մեր «Վերքը»:

Նրա այդ միտքը առիթ տվեց մտածելու, թե լավ չէր լինի, արդյոք, եթե Վարպետը համաձայններ այդ գրքի համար մի առաջաբան գրել: Հրաժարվեց, ասաց, թե ինքը մասնագետ չէ, որ դա իր ուժերից վեր է: Իսկ ես պնդում էի, համոզում, որ այն բոլորը ինչ քիչ առաջ ասաց, արդեն բավական է մի լավ առաջաբան գրելու համար: Համոզված էի, որ Սահինյանը ոչ միայն չի սրտնեղի, որ առանց իրեն գործ եմ բռնում, այլ նույնիսկ կուրախանա, որ այդ հրատարակության հետ կկապվի Վարպետի անունը: Վարպետը համաձայնեց: Այդպես էլ եղավ: Բոլորն էլ ուրախ էին, որ Վարպետը տվել է առաջաբան գրելու համաձայնություն, բայց կասկածում էին՝ կանի՞, թե չէ:

Վարպետը դժվար էր խոսք տալիս, բայց եթե տալիս էր, պարտաճանաչ էր: Երկու շաբաթ էլ չէր անցել, որ բերեց առաջաբանը:

— Տե՛ս, մի բանի նմա՞ն է:

Դա կեղծ համեստություն չէր: Հաճախ էր պատահում, որ նա գրում էր և չգիտեր՝ իսկապես լա՞վ է, թե չէ: Եվ միշտ կարիք էր զգում, որ մեկն ու մեկը զնահատության խոսք ասի: Մի օր չանցավ, և նրա առաջաբանի մատիտագիր էջերը հրատարակչության մի սենյակից մյուսն անցան: Բոլորն էլ ոգևորված էին: Երկու օր հետո եկավ հրատարակչություն՝ ամեն ոք իր պարտքն էր համարում առանձին մոտենալ և իր հիացումը հայտնել: Իսկ նա, շնայած տասնամյակների վաստակին և ունեցած փառքին, ուրախանում էր առաջին անգամ տպագրվողի հրճվանքով:

* * *

Տերյանի արխիվը նայելիս նրա թերթերի մեջ հանդիպեցի մի անավարտ կամ գուցե ավելի ճիշտ կլինի ասել սևագիր բանաստեղծություն: Երկու օր հետո Վարպետի մոտ էի՝ կարդացի:

Մի խառնեք մեզ ձեր արջի վայրի ցեղերին

Ուշադիր լսեց: Հետո ձեռիցս առավ, կարդաց մտքի մեջ, նայեց և բարձրաձայն.

Շատ է տեսել երկիրն իմ ցավ ու արհամիրքը,—
լաց է այնտեղ ամեն երգ և ողբ ամեն գիրք:

Երկրորդ տողը նորից կրկնեց: Դուր էր եկել: Այլևս ոչ
մի ձայն չհանեց: Նայում էր հեռուն, ոչ ինձ էր տեսնում,
ոչ դիմացի պատը՝ վրան Սեդրակ Առաքելյանի նկարած
մեծադիր պատկերը: Միտքը Տերյանի հետ էր: Ու հետո,
բավական ժամանակ անց, շատ հանդարտ զարձակ ինձ.

— Հա՛, դու փոքր ես, Վահանին տեսնել չէիր կարող:

Մի փոքր հետո դիմեց տիկին Սոֆիկին և խնդրեց, որ
թեյ տա մեզ: Ես պատմեցի, թե Տերյանի այդ ոտանավորը
գտնելու օրը ինչ խաղ եմ խաղացել ընկերոջս գլխին. թե
ինչպես ընկերոջս, գրականություն հասկացող մի մարդու,
կարդացել եմ Տերյանի անհայտ բանաստեղծությունը, ասե-
լով, թե հեղինակը ես եմ: Եվ նա, Տերյանի ոտանավորը
լսելուց հետո, ինձ խորհուրդ է տվել այլևս ոտանավոր գրե-
լու փորձ չանել, քանի որ դրա մեջ բանաստեղծական մի
չնչին կայծ անգամ չկա: Ասել է նաև, որ ոչ որի չկարդամ,
թե չէ ինձ կարող են ազդայնականություն վերադրել: Պատ-
մեցի նաև այն, թե ինչպես, մի երկու ժամ հետո, երբ
ասել եմ, թե բանաստեղծությունը Տերյանինն է, նա այդ
համարել է ընտիր գործ, հայրենաշունչ ստեղծագործություն
և այլն:

Ժպտաց:

— Մի՛ զարմանա: Մեզանից ամեն մեկը այդ վիճակում
լինում է՝ առանց իմանալու, որ այդ վիճակումն է: Եվ
որովհետև լուրջ է պահում իրեն, ապա անխուսափելի է լի-
նում դրա կոմիկական բնավորությունը: Նախապաշարմունքի
ուժը մեծ է: Ոչ որ մտքի բացարձակ անկախություն չունի:
Ո՞վ է մեղանից Պուշկին կամ Դյոթե կարդում, մտքի և
ճաշակի անկախ զգացումով: Ոչ որ: Կարդում ենք իմա-
նալով, որ մեկը Պուշկինն է, մյուսը Դյոթեն, ուրեմն՝ նա-
խատրամադրված:

Երվանդ Քոչարի մոտ էինք: Մտակվայից եկել էր թարգմանիչ Հակոբ Խաչատրյանը: Կանչել էին ինձ: Իսկ ես Նաիրի Զարյանի մոտ էի: Այնտեղ էր նաև Իսահակյանը: Առաջարկեցին միասին գնալ: Գնացինք: Հետո եկան և ուրիշները: Խոսք բացվեց կնոջ մասին: Իսահակյանը հիշեց ժողովրդական մի ասացվածք.

— Եթե մի գործ ես ուզում բռնել՝ խորհուրդ արա հորդ հետ: Եթե կենդանի չէ, փափախդ դիր ու նրա հետ միտք արա: Իսկ եթե փափախ էլ չունես, խորհուրդ արա կնոջդ հետ, բայց արա նրա ասածի ճիշտ հակառակը:

Խոսքը կենտրոնացավ խտացած խոսքի շուրջը: Ամեն մեկն ասում էր իր իմացած ասացվածքը: Իսահակյանը բուլորից շատ գիտեր և նրա բերած ասացվածքները նոր էին, թարմ, և շատերն առաջին անգամ էին լսում:

— Մինչև թանը բերին՝ հացը գնաց, մինչև հացը բերին՝ թանը գնաց: Մինչև երկուսը եղավ՝ ես գնացի:

Ես ասացի, թե դրա ավելի սեղմ ձևը կա:

— Աստված երկու էրնեկ միասին չի տալիս:

Վարպետը ժպտաց:

Ասացի ու հիշեցի, որ այդ ասացվածքը Իսահակյանից եմ չսել:

Բերին ինձ Լեոյի «Անի» անտիպ աշխատության ձեռագիրը: Մանոթանալս ու հիանալս մեկ եղավ: Պարզ էր, որ պետք է տպագրել: Բայց վախենում էի, թե կարող են առարկել, ասել, թե պատմություն է, այն էլ՝ Անի: Զեմ թաքցնում՝ աչքս վախեցած էր: Այդ տարվա ամռանը մի առիթով գաղափարական դասեր առել էի արդեն: Մի օր, երբ այս մտորումների մեջ էի՝ Վարպետը Պետհրատ եկավ: Ասացի մտքինս: Խնդրեց Լեոյի ձեռագիրը: Մյուս օրը զանգահարեց և ասաց, թե կարդում է մեծ հաճույքով: Մի օր, դարձյալ հեռախոսով, ասաց, թե կեսից անցել է, Լիլ երեկոյան մարդ չգա և չխանգարեն՝ կվերջացնի: Եվ իսկապես, մյուս օրը մտավ սենյակս և Լեոյի ձեռագիրը դրեց սեղանիս.

— Զտպագրելը մեղք կլինի:

Շատ էր հավանել, խոստում էր ոգևորված, նրան հատկապես դուր էին եկել Վահրամ սպարապետին նվիրված էջերը: Շարունակ դրա մասին էր խոստում:

— Ինչպե՞ս է գրել:

Խնդրեցի, որ գրախոսի, մտածելով, թե Վարպետի հեղինակությունը կարող է դեր խաղալ: Սիրով հանձն առավ: Հաջորդ օրը տիկին Սոֆիկը հեռախոսով հայտնեց, որ Վարպետը տկար է և խնդրում է ժամանակ գտնել և անցնել իր մոտ: Անմիջապես գնացի: Ասաց, թե մրսել է, իրեն լավ չի զգում և չգիտե, թե երբ յտքի կկանգնի: Գործը չհետաձգելու համար լավ կլինի մի ուրիշին, գուցե Դեմիրճյանին առաջարկել, որ գրի: Ինձ ծանոթ է՛ր նրա բարեխղճությունը և գիտեի, որ եթե գրի, պետք է հիմնավոր, հանգամանորեն գրի, իսկ հիվանդ վիճակում, դա, իհարկե, հնարավոր չէր: Համաձայնեցի: Այնուամենայնիվ խոստացավ կարճ նամակով հայտնել իր կարծիքը, թերևս դա էլ օգտակար լինի:

Երկու օր շանցած ուղարկեց ինձ այդ նամակը, որը ես ցույց տվի Հայկեսհրատի այն ժամանակվա դիրեկտոր Հայկ Դոնոյանին: Վերջինս ասաց, թե Իսահակյանի նամակում տրված գնահատականը բավական է և Լեոյի գործը անհապաղ ուղարկվեց տպարան:

Նույն օրը երեկոյան գնացի Վարպետին հիվանդատես: Պատմեցի: Շատ զգացվեց, իմանալով, իր իմիջիպալոց արված միջամտության այդպիսի կտրուկ ազդեցությունը:

* * *

1946-ին էր, հունվար ամսին: Գիտությունների ակադեմիան նշում էր ակաանվոր բանասեր Երվանդ Շահազիզի ծննդյան 90-ամյակը: Հանդեսը դեռ չէր սկսվել: Հորելյանական երեկոյի նախագահության անդամները հավաքվում էին: Այստեղ էին շատ նշանավոր դեմքեր, նաև Իսահակյանը: Նս էլ էի այնտեղ, որովհետև զեկուցումը հանձնարարված էր ինձ: Նստած զրուցում էինք, որ Շահազիզը ներս մտավ:

Վարպետն ասաց.

— Ոտքի կանգնենք՝ դարն է գալիս:

Վարպետն անտրամադիր, ավելի ճիշտ՝ մտահոգ նստած էր: Կամենալով փարատել տրտմությունը՝ ասացի, թե՛ վերջերս կարդացած մի գրքում հանդիպեցի մի մտքի, որ ճիշտ նույնությունամբ, անգամ նույն ձևակերպումով անցել էր իմ մտքով:

— Պատահում է, շատ է պատահում, որ նույն բանը երկու տարբեր մարդու մտքով անցնի:

Լոնց:

— Հիմի ես քեզ պատմեմ զարմանալի մի բան, անհրեակայելի և անբացատրելի: Երեկ գիշեր մի ոտանավոր գրեցի, հինգ տուն: Ուղեցի մերոնց կարդալ՝ քնած էին: Դրի այ այա զգրոցն ու քնեցի: Այսօր ցերեկը ժամը 12-ը կլինեի Շիրազը եկավ. «Վարպետ,— ասում է ինձ,— մի ոտանավոր եմ գրել երեկ գիշեր, կարդամ լսիր, կարծիքդ եմ ուզում իմանալ»: Ու, պատկերացնո՞ւմ ես, վերջին տունը, շորս տող, համարյա նույնն էր, ինչ որ ես էի գրել երեկ գիշեր: Եթե ես մեկն ու մեկին, թեկուզ մերոնց կարդացած լինեի ոտանավորս, չէի հավատա, թե Շիրազին չեն ասել, դե՛ արի ու հասկացիր, ինչ բան է, սա ինչ զարմանահրաշ զուգադիպություն է. նո՛ւյն տողերը, նո՛ւյն պատկերները...

1946-ին տեղի ունեցավ Հայաստանի Գրողների միության երկրորդ համագումարը: Այդ առթիվ որոշվեց լույս ընծայել «Ընտիր էջեր» անթոլոգիան, որը պետք է ամփոփեր հայ գրականության լավագույն նմուշները սկզբից մինչև մեր օրերը: Կազմվեց խմբագրական մարմին:

Չարենցը նույնպես պետք է տեղ գրավեր «Ընտիր էջերում»: 1937-ից հետո չէր տպագրվել և սա առաջին փորձն էր լինելու մեծ բանաստեղծի ժառանգությունը վերադարձնելու ընթերցողին: Որոշվեց այսպես. բոլորս կկարդանք, ամեն մեկս ընտրություն կկատարենք և հետո խմբագրու-

թյան նիստում ընդհանուր համաձայնությունը եզրակացու-
թյան կզանք, թե ինչ լույս ընծայել:

Դա մի շաբաթ առաջ էր:

Այն օրը, որ նշանակված էր Չարենցին նվիրված նիստը՝
մեքենայով գնացի Վարպետի ետևից: Գրողների տուն հա-
սանք ավելի վաղ, քան նշանակված ժամը: Մինչև խմբա-
գրություն մյուս անդամները կգային, մտքեր փոխանակե-
ցինք Չարենցի շուրջը:

— Ի՞նչ տպավորություն ես:

Դժվարացա անմիջապես պատասխանել: Որոշում էի մի
կարճ ձևակերպում: Ըստ երևույթին, հասկանում էր, թե
ինչ է կատարվում ինձ հետ, պատրաստակամ համբերու-
թյամբ սպասում էր:

— Չհաշված մի քանի գործից, — ասացի ես, — ինչով
առաջ ոգևորված էի՞ գունատ տպավորություն ստացա և
ընդհակառակը՝ շատ բան, որ առաջ չէի հավանում, այժմ
ցնցող տպավորություն թողեցին վրաս:

Ժպտաց:

— Հիշո՞ւմ ես, վիճում էիր հետս, չէիր համաձայնում:
Նորից լռեց. կարծես մտքերն էր հավաքում:

— Ժամանակը, ամեն ինչ ժամանակն է որոշում: Ժա-
մանակը, եթե նրա ազդեցության տակ ես, մոլորեցնում է,
բայց հետո հաջորդող ժամանակները ճշտում են արժեք-
ները, մաղից անց են կացնում և ինչ որ կապված է միայն
ժամանակի հետ՝ մաղից անցնում է, որպես իր դերը կա-
տարած, որպես պատմական արժեք միայն, իսկ այն, որ
ժամանակի հետ կապված լինելով, նաև ընդհանրական է՝
մնում է մաղում և շարունակում իր կյանքը նաև հետո,
երբեմն շատ երկար, անգամ դարերով:

* * *

Երեանի կինոստուդիան Ավետիք Իսահակյանին նվիր-
ված մի կինոակնարկ էր պատրաստել: Տեքստը գրել էր
նկարի ռեժիսոր Հայկազյանը: Ժիրայր Հակոբյանը, որն այն
ժամանակ գլխավորում էր ստուդիան, գոհ չէր տեքստից,
թեև նկարն արդեն պատրաստ էր ցույց տալու: Նա խընդ-

րեց նոր տեքստ կազմել, արդեն պատրաստ նկարը նկատի ունենալով: Թեև շատ էի զբաղված, շմերժեցի, որովհետև վարպետի հետ էր կապված:

Երբ տեքստն արդեն պատրաստ էր՝ սկսվեց նրա ինչպես և հրաժշտական հատվածների հնչյունագրումը: Մի քանի գիշեր ստիպված եղա ստուդիայում անցկացնել, պետք եղած փոփոխությունները կատարել, կրճատել, կամ հավելում անել, նայած տվյալ կադրի տևողությանը: Գործը նոր էր ինձ համար և, անկասկած, հետաքրքիր: Մեկ ռեժիսորի կողքին էի, մեկ հնչյունագրող օպերատորի, որ գտնվում էր հարևան սենյակում: Հնչյունագրող օպերատորը ռուս էր, հրավիրված մի այլ նկարի համար, բայց օգտագործվում էր այս ակնարկում նույնպես:

Մի քանի երգի համար հրավիրված էր Շողիկ Մկրտչյանը: Միշտ չէ, որ նրա երգը կամ դիկտորի խոսքը հնչյունագրվում էին հարթ, սկզբից մինչև վերջ համընկնելով: Պատահում էր, որ դիկտորի խոսքի ոգևորված պահին կամ Շողիկի երգի կեսին ռեժիսորն հանկարծ ասում էր «СТОП»: Ստիպված էին լինում նորից սկսել: Երբեմն պատահում էր, որ այդ շարաբաստիկ «СТОП-ը կրկնվում էր մի քանի անգամ և Շողիկը ստիպված էր լինում միևնույն երգը ընդհատել և նորից սկզբից սկսել: Այդպես եղավ «Սիրեցի յարս տարան» երգի հետ: Մի անգամ երգեց, երկրորդ, երրորդ: Չէր ստացվում: Եվ նա ստիպված էր նորից սկսել: Ես հնչյունագրողի մոտ էի նստած: Երբ Շողիկն այդ երգն առաջին անգամ երգեց, մեր ռուս ընկերը, որը, ինչպես երևաց, առաջին անգամն էր լսում, ասաց.

— Гениально! Это же гениально!

Չեմ հիշում, թե որերորդ կատարումն էր, թերևս երրորդ, Շողիկը երգեց արտակարգ: Չայնը նույնն էր, բայց հուզված գալիս էր սրտի խորքից և ազդու հնչյունների փոխակերպված, մտնում մեր մեջ, տալն ու վրա անում մեր հոգին: Թվում էր, թե Շողիկը չի երգում, այլ դիմացս, ահա այնտեղ, ձորի մեջ, մի քարի վրա, նստած է նա, որի յարին փախցրել են, «յարա տվել ու տարել»: Դա այլևս երգ չէր, այլ իրականություն, ու ես տեսնում էի մի տանջահար հոգի, որ տոշորվում է կսկիծից:

Ականջիս ինչ որ շշուկներ էր հասնում: Նայեմ տեսնեմ՝ հնչունագրող մեր ոռւս ընկերոջ աչքերը խոնավ են, իսկ ինքը շշնշում է:

— Гениально, гениально...

Ահա այդ ժամանակ էր, թե փոքր ինչ անց, որ երգը չվերջացրած, լսվեց ռեժիսորի «СТОП»-ը Դրանից հետո Շողիկը մի քանի անգամ էլ երգեց և չեմ հիշում հինգերորդ, թե վեցերորդ կատարումը լիովին համբուկավ տեղադրման ընթացքի հետ, բայց ոչ հինգերորդ և ոչ էլ վեցերորդ անգամ նա այլևս չհասավ ներգործության նախկին չափին: Ու թեև կիսատ, բայց այդ կատարումը շատերի հիշողության մեջ մնաց, որպես հոգեկան կյանքի անհամեմատելի բռնկում:

Միառժամանակ անց, երբ աշխատանքը լիովին ավարտված էր, Իսահակյանն էլ նայել էր նկարն ու գոհ մնացել, Վարպետի մոտ էի: Նստած ռադիո համերգ էինք լսում. Շողիկը երգեց «Սիրեցի յարս տարան»: Ինձ վրա տպավորություն չգործեց, ես դեռևս ու նաև հիմա, այն կատարման տպավորության տակ էի:

Վարպետը լսում էր աչքերը փակ և դեմքն արտահայտում էր մի հոգեզմայլ բավականություն: Երբ Շողիկը վերջացրեց, կմկմաց.

— Լավ է երգում:

Ձայն չհանեցի:

— Այդպես չէ՞:

Հարցին պատասխանելու փոխարեն, պատմեցի կինոստուդիայում պատահածը:

— Պատահում է, պատահում է:

* * *

Սեղանի վրա մեքենագիր թերթեր էին դրված: Վարպետը կարդում էր: Տեսա, որ բանաստեղծություններ են, բայց չհարցրի թե ումն են:

Գլուխը բարձրացրեց.

— Շիրազիին են: Բերել է թե՛ նայիր: Նոր ժողովածու է:

— Ինչպե՞ս է:

Չպատասխանեց:

— Այ, օրինակ, էս մեկը լավն է։ Ու կարդաց.

Ախ, սերը այնպես է սրտե սիրտ մտնում,
Ինչպես կույր գառն է իր մորը գտնում:

Գտնում է մանուկն ստինքը միշտ մոր՝
Ինչպես կույր գառն է իր մորը գտնում:

Դու էլ կգտնես բախտդ հեռավոր՝
Ինչպես կույր գառն է իր մորը գտնում:

Սրբազան սերը կգտնես մի օր,
Ինչպես կույր գառն է իր մորը գտնում:

Սիրտ իմ, կգտնես սերդ բախտավոր,
Ինչպես կույր գառն է իր մորը գտնում:

Ա՛խ, բախտը այդպես է սրտե սիրտ մտնում՝
Ինչպես կույր գառն է իր մորը գտնում:

— Լավ է, չէ՞:

— Լավ է, բայց մի քիչ ձգած է:

Նայում էր ինձ, բայց չէր տեսնում: Մտածում էր: Հասկացա, որ համաձայն է: Ժպտաց. պարզ է, գտել էր: Վերջըրեց մատիտը ձեռը, նորից աչքի անցկացրեց ոտանավորը և հետո արագ ջնջեց երկրորդ, շորրորդ և վեցերորդ տները:

Կարդաց ոտանավորը կրճատված:

— Արդեն լավ է, չէ՞:

— Լավ է:

Էջի տակը Վարպետը գրեց «Շիրազ ջան, թողեցի վեց տող: Դարձավ զուսպ: Ավ. Իս.»:

* * *

Գրողներից մեկը մոտեցավ Իսահակյանին.

— Ինչպե՞ս ես, Վարպետ:

Վարպետը նայեց նրան երկար, խոր հայացքով ու ասաց.

— Անիի եկեղեցին քանդում են. լսե՞լ ես:

Ու առանց պատասխանի սպասելու հեռացավ:

Մի երեկո ասաց.

— Պիես կարդալ չեմ սիրում, բայց «Համլետը» մի տասն անգամ կարդացած կամ: Մեկ էլ «Լիր արքան» եմ ձեռքս առել հաճախ:

* * *

Մի օր ասի, որ ինձ հանձնարարված է առաջաբան գրել Դեմիրճյանի «Քաջ Նազարի» նոր հրատարակության համար:

— Դրի, անպայման գրի: Զլինի, թե ծուլանաս ու շանես:

Մի պահ հետո.

— Ես էլ եմ գրել, Օհանեսն էլ: Հա՛, Շանթն էլ: Իսկ նրանից առաջ Սիպիլը: Եթե Օհանեսի գրածից փրկիսոփայություն է բխում, ապա Դերենիկը ամբողջապես փրկիսոփայություն է ներծծված:

Ես ասացի, թե մի ժամանակ մտքիս դրել էի հավաքել այդ հեքիաթի բոլոր պատումները, ոչ միայն նրանք, որ ստեղծել են հայերը, այլև նրանք, որ ծնունդ են առել տարբեր ազգերի ժողովրդական երեակայությունմբ, ու գրել մի բաղդատական ուսումնասիրություն: Մի տասը տասներկու պատում հավաքեցի և հետո էլ շարունակեցի:

— Զուր, շատ հետաքրքիր դործ կստացվեր: Բոլոր ժամանակների համար, ինչպես հիմա են ասում, իր նշանակությունը պահպանող հեքիաթ է «Քաջ Նազարը»:

Հետո նորից վերադարձավ Դեմիրճյանին:

— Եթե Դերենիկի կոմեդիան թարգմանվի եվրոպական լեզուներով՝ մեծ տարածում կգտնի. կոլորիտով ազգային, փրկիսոփայությունմբ համամարդկային է:

Լռեց.

— Զգիտեմ, թե երբ կլինի այդ, բայց որ «Քաջ Նազարը» Դերենիկին մի օր քաշելու է դեպի գրականության միջազգային ոլորտները, չեմ կասկածոմ:

Մտա առանձնասենյակը՝ գրում էր: Ասաց.

— Վերջացրի:

Ես հարցական նայեցի:

— Ոտանավոր էի գրում:

Ու կարդաց «Շոպենի մահվան քայլերգը»:

— Ինչպե՞ս է:

Ասացի, որ վերջվածքը լավ է:

— Վերջի համար եմ գրել:

Ասացի, որ լավ կլինի, «Ինձ հետը» դարձնել «Ինձ համար»:

Մտածեց:

— Ճիշտ ես ասում:

Ուղղեց:

— Էլ ի՞նչ դիտողություն ունես:

Առաջարկեցի «մտասույզը» դարձնել «մտազբաղ»: Համաձայնեց: Մի փոքր հետո առարկեց.

— Չէ, «մտասույզը» ավելի լավ է: Չե՞ս կարծում.

«մտազբաղ» լավ է հանգի համար, բայց մտքով «մտասույզն» է տեղին: Համաձայն ես:

Եվ վերականգնեց:

Վարպետին տարել էի «Աբովյանի կյանքի» նոր հրատարակությունը:

Ձեռն առավ, թերթեց.

— Լավ չեն հրատարակել. կարելի էր ավելի ճաշակով անել:

Մի փոքր հետո.

— Այո ո՞րերորդ հրատարակությունն է:

— Չորրորդ:

— Լավ է, լավ:

Մի քանի օր հետո ասաց, որ կարդացել է: Ես հարմար

չեմ դատում այստեղ մեջ բերել նրա կարծիքը, բայց կհիշեմ այդ կապակցութեամբ նրա տված խորհուրդը:

— Ուզում եմ մի խորհուրդ տալ: Մշակիր այս գործը՝ ընդարձակիր, մեծացրու: Փառք աստծո՝ հարուստ նյութ է, դու էլ ձեռքիդ տակ շատ բան ունես: Կարելի է լավ գրել: Ինձ թվում է, որ դու այդ լավ կանես:

Ես ասացի, թե վերջերս շատ գրվեց Աբովյանի մասին:

— Անմիջապես անելու կարիք չկա: Թող միառժամանակ անցնի: Հետո՝ իմ ասածն ուրիշ է. ես ուզում եմ, որ ժողովուրդը նրա կյանքի ընդարձակ, համով գրված պատմությունն ունենա: Դա շատ պետքական դիրք կլինի՝ հայրենասիրական, միառժամանակ մարդկային տրագիկ հանգամանքներով լի: Դու պետք է անպայման անես:

* * *

Գարեգին Լևոնյանի այրին այն տպավորություն էր, թե իր ամուսինը մոռացված է, չի հիշվում: Խնդրել էր Իսահակյանին միջամտել: Նա էլ ինձ հետ խոսեց, ասաց, թե հարկավոր է իսկապես մի բան անել:

Որոշվեց մի ժողովածու կազմել: Այդ գործը հանձնարարվեց ճարտարապետ Միքայել Մազմանյանին: Նա պատրաստեց ժողովածուն: Կինը շատ էր ուզում, որ գիրքը լույս տեսնի Իսահակյանի առաջաբանով: Վարպետը դեմ չէր, բայց դժվարանում էր գրել: Հիվանդությունից հետո զանգատվում էր, թե չի կարող գրիչը ձեռն առնել, աշխատել: Բայց դժվարանում էր և չափել, Լևոնյանի հետ երկար տարիների մտերմությամբ էր կապված:

Որոշեցինք, որ առաջաբանը կլինի շատ կարճ, մի էջից ոչ ավելի: Երբ գրված պատրաստ էր՝ նստեցինք միասին նայելու: Առաջաբանում այն միտքն էր արտահայտված, թե Լևոնյանը մի որևէ բնագավառի նվիրվելու, խորանալու փոխարեն ցրվել է, հազար գործի է ձեռք զարկել:

— Այս ճիշտ է: Ծիշտ է, իհարկե, բայց կարիք չկա թողնել, դե սա հո ամենակողմանի գնահատություն չէ, ոչ էլ գիտական բնորոշման փորձ, ավելի հիշատակի խոսք է: Ուրեմն՝ ի՞նչ կարիք կա:

Ուզում էր փոխել, բայց չգիտեր ինչպես:

Գրիշը վայր դրեց:

— Հանճարը նպատակասլացությունն է, մի ուղղություն, մի սեփեռուն կետ: Գյոթեի կարծիքով հանճարի առաջին հատկանիշը կենտրոնացումն է:

Մի փոքր հետո.

— Հանճարի միտքը մի ուղղությամբ է լարվում, այլևս ոչինչ չկա և գոյություն չունի նրա համար: Դրա համար էլ հանճարը արտաքին աշխարհի նկատմամբ ցրված է: Նկատված է, որ հանճարները մոռացկոտ են լինում, չեն մոռանում ինչ որ պետք է հիշեն իրենց գործի համար, իրենց նպատակի համար: Գալիլեյը հարսանեկան գիշերը, հյուրերի գնալուց հետո, բարձրանում է իր աշխատասենյակը և մինչև արշալույս աստղեր է դիտում: Երբ հոգնած իջնում է ննջարան և տեսնում իր անկողնում մի կնոջ պառկած, մնում է զարմացած: Կանչում է սպասավորին ու հարցնում, թե ո՞վ է: Երբ սպասավորն ասում է թե իր կինն է, նոր է միայն հիշում, որ երեկ երեկոյան ամուսնացել է:

Հետո ավելացրեց.

— Իհարկե, բացառություններ կան: Ես միայն երկուսը գիտեմ. Միքելանջելո և Լեոնարդո դա Վինչի: Անջելոն նկարիչ էր, քանդակագործ, ճարտարապետ: Ուսանավորներ էլ էր գրում: Դա Վինչին ավելի բազմազան էր: Շեքսպիրն էլ սրանց չափին է պատկանում, թեև հայտնի է գրականության միայն: Ի՞նչ բազմազան իմացություն. նրա մասին խոսելիս պետք է թվել ոչ թե այն, ինչ գիտեր, այլ այն, թե ինչ չգիտեր, եթե, իհարկե, կա մի բան, որ նա իմացած չլիներ:

* * *

Նոր էր լույս տեսել Չարենցի միհատորյակը: Մի օրվա մեջ գրախանութներում գիրք չմնաց: Ընթերցողները հերթ էին կանգնում, երբեմն մեկի փոխարեն գնում երկու-երեք օրինակ:

Չարենցի երկրորդ ծնունդն էր:

Զարենցը կյանք մտավ ոչ միայն առաջվա պէս ոգևորութեամբ շրջապատված, այլև գլխին նահատակի լուսապսակ։ Զկար տուն, ուր նրա հիշատակին բաժակ չբարձրացվեր։ Եվ այդպէս երկար ժամանակ, մոտ մի տարի շարունակ։

Շտապեցի Զարենցի գրքից մի օրինակ տանել Վարպետին։

Շատ ուրախացավ, շնորհակալ եղավ։

Գիրքը ձեռն առավ, ասեւ փայփայեց ու սկսեց թերթել, տեղ-տեղ կանգ առնելով, կարդալով պատահած ոտանավորը։

Տիկին Սոֆիկն ասաց, թե հեռախոսի մոտ են խնդրում ինձ։ Երբ վերադարձա՝ տեսա Վարպետին գլուխը Զարենցի գրքին դրած, լճացած աչքերով, արցունքի երկու կաթիլ դրքի բաց էջի վրա։

* * *

Զարենցի մասին հաճախ ենք խոսել։ Տարբեր ժամանակ տարբեր կարծիքներ էր հայտնում։ Ավելի ճիշտ՝ միշտ էլ մի հաստատ համոզում ուներ, բայց տրամադրութեան համեմատ ըմբռնման երանգները փոխվում էին։

Վաղուց չէի եղել մոտը, երևի ավելի, քան մի ամիս։ Գնացի։ Ասաց, որ կարդացել է Զարենցին սկզբից մինչև վերջ։

— Կարծիքս ընդհանրապէս չեմ ասում։ Վախենում եմ ճիշտ չհասկանան և սխալ բացատրութիւններ տան։ Եվ հետո, Եղիշեն արժանի է ոգևորութեան, նույնիսկ կրկնակի չափով, և՛ որպէս բանաստեղծ, և՛ մանավանդ իր դժբախտ ճակատագրով։ Դե՛, դու լավ գիտես, ի՛նչ ասեմ։

Մի կում ջուր առավ բերանը և շարունակեց.

— Գլուխ գործոցներ ունի, որոնք հայ գրականութեան ամենափառահեղ էջերի կողքին կարող են դասվել։ Թույլ գործերը շատ են. երկարախոս է, հաճախ կրկնվող, չմշակված։ Խտացում չեմ տեսնում. ինչ որ կարելի է կարճ ասել՝ ձգձգում է։ Զարմացնում է ինձ նրա ինքնասիրահարվածութիւնը. մարդ էլ իրեն էդքան գովի՞։ Մի տեղ իրեն հսկա պոետ է անվանում, մի տեղ՝ չգիտես ինչ։

Թերթեց գիրքը, բացեց մի էջ ու կարդաց.

Դարերից եկած անհուն մի պոեմ
Եղիշե Չարենց—
Նաիրի երկիր, քո երգիչը վառ,
Օրհներգուն պայծառ
Ու զավակը մեծ...

— Դե՛, ասա՛, ասա՛, տեսնեմ, ինչպե՞ս կարելի է: Եվ այ՞ բոլորը հեղափոխության թեժ օրերին: Կամ ինչի՞ նման է, երբ ասում է, որ իրեն ձիրք Իրանն է տվել, խոսք՝ Նայիրին հնամյա, «բայց Հոկտեմբերը կոչեց քեզ հանճարեղ բանաստեղծ»: Մարդ էլ ինքն իրեն հանճար անվանի: Տեսնված բա՞ն է:

Լռեց: Մի փոքր դադարից հետո.

— Չե՛մ սիրում, չե՛մ հասկանում, չե՛մ ընդունում:

* * *

Վարպետը նորից անդրադարձավ «Աբովյանի կյանքին»: Ասաց, որ Դեմիրճյանը եղել է իր մոտ, ասել է, որ հավանում է, ուզում է գրել:

Մի փոքր լռելուց հետո, ասաց.

— Գրքույկիդ որպես բնաբան կսաղեր Ուայլդի հայտնի խոսքը. «Հանճարս շռայլեցի կյանքում, տաղանդս՝ գրականության մեջ»: Աբովյանը դա ասելու գուցե ավելի իրավունք ուներ, քան սալոնից սալոն անցնող իր պարադոքսներով ու սրամտություններով փայլատակող Ուայլդը:

* * *

Մի օր էլ խոսք բացվեց «Ուստա Կարոյի» մասին:

Արամ Ինճիկյանը, թե՛

— Դա կլինի մեր առաջին փրկսոփայական վեպը:

Վարպետը առարկեց:

— Առաջ՝ հա, հիմի՛ չէ:

Հարցական հայացքով նայեցինք նրան:

— Դերենիկի վեպը կանխեց:

Վարպետն ասում էր.

— Շատ զգուշանալն էլ մի բան չի:

Եվ պատմեց, թե ինչպես մի մարդ իրեն ներշնչել է, որ եթե փողոց դուրս գա՝ անպայման տրամվայի կամ մեքենայի տակ ընկնի: Ու դուրս չի եկել: Մի օր, մի շաբաթ, ամիսներ: Երկշուղը սրտում՝ մնում է տանը: Մի տարի է անցնում, թե ինչքան, որոշում է դուրս գալ: Դուրս գալն ու մեքենայի տակ ընկնելը մեկ է լինում:

* * *

Մի օր Վարպետը հարցրեց, թե նկատե՞լ եմ, արդյոք, որ որոշ բառեր արևելահայերն ու արևմտահայերը երբեմն տարբեր են ըմբռնում: Օրինակ՝ «ռչինչ» բառը. մենք ոչինչ ասելով հասկանում ենք միջակ, վատ չէ, բավարար և այլն, իսկ արևմտահայերը՝ վատ է, մի բան չի և այլն: Այդ տարբերությունը հաճախ թյուրիմացությունների առիթ է տալիս ու քթի տակ ծիծաղելով՝ պատմեց հետևյալ դեպքը.

— Մի օր ինձ մոտ եկավ հայրենադարձ գրողներից այսինչը: 1947-ին էր, մի երկու ամսվա եկած կլինեի: Բերել էր ինձ իր մի վիպակը, որ կարդամ: Կարդացի, միջակ գործ էր: Մի տասը տասնհինգ օր հետո եկավ կարծիքս իմանալու: Սկզբում դեսից դենից խոսեցինք, բայց տեսնում էի, որ, իբր հեղինակ, անհամբեր է իմանալու կարծիքս: Ես այն է ուզում էի խոսակցության նյութը փոխել, անցնել վիպակին, երբ նա հարց տվեց. «Կարդացի՞ր, Վարպետ»: Պատասխանեցի՝ «Այո, կարդացի»: Զհամբերեց, հարցրեց. «է՛, ինչպե՞ս է»: Մի փոքր լռելուց հետո ասացի. «Ոչինչ»: Նա ապշած նայեց դեմքիս. աչքերի մեջ հուսահատություն կար: Ես ծիծաղեցի: «Սիրելի՛ս, մեր ոչինչը,— ասացի նրան,— ձեր ոչինչը չէ»:

Հիմա չեմ հիշում ոչ օթը, ոչ էլ այն, թե ովքեր կային: Միտս է միայն, որ խոսում էինք այն մասին, թե անկեղծությունն ինչ դեր է խաղում ստեղծագործելու պահին: Վարպետին տարօրինակ էր թվում, որ կարելի էր այդ հարցի շուրջը վիճել, քանի որ դա ստեղծագործական հոգեբանությունն ախարպայմանն է: Այդ միևնույն է, ասում էր նա, որ մեկը վիճի, թե մարդ առանց հացի կարող է ապրել: Եվ երբ ներկաներից ամեն մեկը ինչ որ հեղինակություն էր մեջ բերում, մեծ մասամբ Տոլստոյին, ոմանք էլ դեպքեր էին պատմում, օրինակներ հիշում, Վարպետը հետևյալ պատմությունն արեց.

Մի մարդ ոստանավորներ է գրում: Գրում է գիշեր ու ցերեկ: Ըստ երևույթին անհաջող, որովհետև ոչ ոք հանձն չի առնում տպագրել նրա գրածից գոնե մի տող: Զի ընկճվում և շարունակում է գրել: Եվ դարձյալ նույն անհաջողությունը: Ամեն տեղ մերժում են, երբեմն նույնիսկ ծաղրում: Ոչ միայն չի հուսահատվում, այլև համոզված, որ սխալվում են, պարտքի տակ ընկնելով, մի կերպ փող է հավաքում և հրատարակում իր բանաստեղծությունների մի փոքրիկ ժողովածու: Մի քանի օր անց գնում է գրախանութ և իմանում, որ ոչ մի օրինակ չի ծախվել: Մի ուրիշ խանութ է մտնում՝ այնտեղ էլ նույնը: Գրախանութից գրախանութ է անցնում և ամեն տեղ նույն պատմությունը: Մի շաբաթից հետո գնում է իմանալու վաճառվել է, թե չէ, նույնն են ասում՝ չի ծախվել: Վերջապես իմանում է, որ մի օրինակ առել են: Ուրախանում է: Մյուս օրը քաղաքային թերթում ոչնչացնող հոդված է լույս տեսնում: Պարզվում է, որ վաճառված այդ մի օրինակը հոդվածի հեղինակն է գնել: Հոդվածից հետո ծաղրում են նրան: Երբ փողոցով անցնում է՝ ի՞նչ ծաղրական խոսք ասես, որ չեն ասում, իսկ երեխաները խմբերով վազում են ետևից, կոչում «սուտ բանաստեղծ», նույնիսկ քարկոծ անում: Երբեմն պատահել է, որ ստիպված է եղել վազել, մտնել տուն և փակվել՝ դրանց հետապնդումից ազատվելու համար: Գալիս է տուն, ընկնում սեղանին ու

լաց լինում: Անիծում էր իր ծնված օրը, նզովում աշխարհը, մարդկանց, որ այդքան չար են: Անցնում են տարիներ և նա մեռնում է: Այդ ժամանակ էլ գտնվում են մարդիկ, որ դազադի ետևից ծաղրական բաներ են պատմում նրա մասին:

Մահից հետո ազգականները անհաջողակ բանաստեղծի թղթերի մեջ գտնում են նրա հիշատակարանը: Նա օր օրի գրել է իր կյանքը, նկարագրել այն տառապանքը, որ քաշում է մարդկանց ձեռին: Հիշատակարանում գանգատվում է, որ իրեն հասկացող չկա, որ ինքը շրջապատված է չար նախանձով: Նկարագրում է այն ապրումները, որ ունեցել է, երբ ամեն անգամ տուն է դարձել մերժված, ծաղրված, ոչնչացված: Նա հասկանում է, որ շրջապատի համար ինքը ոչինչ չի ներկայացնում և տանջվում է այդ մտքից, չարչարվում, պղտորվում:

Ազգականներից մեկը ավելի հումորիկ ձևով, քան լուրջ, առաջարկում է ծախծխել հանգուցյալի գույքը և հավաքված դրամով իր կյանքը դրականությանը նվիրած և հաջողություն չգտած բարեկամի հիշատակարանը լույս ընծայել ու մի-մի օրինակ բաժանել ազգականներին, որպես հիշատակ:

Այդպես էլ անում են:

Հիշատակարանը լույս տեսնելուն պես սպառվում է: Մամուլում լույս են տեսնում հիացական հոդվածներ, որոնք ավետում են ընթերցողին, թե ի դեմս հիշատակարանի հեղինակի՝ իրենց երկիրն ունեցել է, բայց չի իմացել, որ կորցրել է իսկական մի գրող: Մի տասնամյակի ընթացքում այդ հիշատակարանը հրատարակվում է մի քանի անգամ:

Ամենքը վարպետի պատմածի տպավորության տակ էին: Եվ նա մի ընդհանուր հետևություն արեց և դրանով սկսված վեճն ամփոփեց:

—Անկեղծությունը բավական չէ: Ծիշտ պիտի որոշվի, թե ինչի է ընդունակ մարդը: Եթե ստույգ է որոշվում ասպարեզը, անկեղծությունը կա և մարդը պատմելու բան ունի, այն ժամանակ արժեքը ստեղծվում է անկախ նրանից, թե նա այդ ուզում է, թե չէ:

Ես այս դրվագը ժամանակին գրի չեմ առել: Պատմում

եմ հիշողութեամբ: Ուստի և Վարպետի պատմածը չվստահեցի առաջին դեմքով շարադրել: Եվ հետո՝ ավենագլխավորը՝ մտքիս մեջ չի մնացել հիշատակարանի հեղինակի անունը, որի համար շատ ցավում եմ:

* * *

1955-ին լրացավ Իսահակյանի ծննդյան 80-ամյակը: Հորեկյանական օրերին Գրականության ինստիտուտը կազմակերպեց երկօրյա գիտական նստաշրջան: Վերջին նիստում, դա հոկտեմբերի 27-ին էր, շնորհակալության խոսք ասելու համար ամբիոն բարձրացավ բանաստեղծը:

Ես գրի առա նրա խոսքը: Այժմ աչքի եմ անցկացնում գրառումը և մի անուն անընթեռնելի է:

Ահա այդ խոսքը.

— Շատ գովեցին ինձ: Ասացին նույնիսկ հանճար: Չափազանցություն է: Հանճարներ քիչ կան, երեւի 20—30 հատ ամբողջ աշխարհում, իմ կարծիքով, իհարկե, Գյոթեն, Շեքսպիրը: Ֆրանսիացիներն ասում են, թե իրենք հանճար չունեն: Ասում են, իսկ Հյուգո՞ն: Ասում են՝... բայց ոչ, էն չի: Մի փոքր հակված են Մոլիերին հանճար կարծելու: Պուշկինը, որ հսկա է, եվրոպացիները չեն ճանաչում հանճար: Տոլստոյին համարում են: Հիմի ինձ ասում են, թե դու հանճար ես: Արի ու հավատա: Ես ո՛ւր, դրանք ո՛ւր: Բայց շատ որ ասում են՝ հավատում ես, դուր է գալիս: Լսում ենք և, իհարկե, տարան հանում ենք:

Ես շատ ուրախ եմ, որ իմ ժողովուրդը իմ երգի համն առնում է: Ներեցեք, որ ինքս եմ այդպիսի բաներ ասում: Հարմար բառեր չեմ գտնում: Հոգնած չեմ: Հուզված եմ, հուզված եմ, որ ժողովուրդը գնահատում է, սիրում ինձ:

Աշխարհից գնացողը ոչ թե հետը պետք է տանի, այլ մի բան թողնի: Ես գիտեմ, որ քիչ եմ արել, նույնիսկ՝ շատ քիչ: Կյանքս վատնել եմ թափառումների, ընթերցանության, զրույցների և սիրահարությունների մեջ: Բայց գրել եմ այն դեպքում, երբ չեմ կարողացել չգրել, երբ ասելիքս բոլս է հասել, այստե՛ղ: Երբեմն գրել եմ թափառումների

Ժամանակ, ձիու վրա: Դրա համար էլ գրածներին տակը շատ տեղերի՝ քաղաքների և գյուղերի անուններ կան, իսկ երբեմն էլ չկան. դրանք ձիու վրա գրածներն են:

Ես գիտեմ, որ մի բան թողնում եմ: Թող քիչ լինի, բայց թողնում եմ:

Հուզված եմ այն վերաբերմունքից, որ տեսնում եմ վրացիների մեջ, ուկրաինացիների, ադրբեջանցիների և, իհարկե, ռուսների մեջ:

Շատ ուրախ եմ, շատ ուրախ եմ:

* * *

Զրուցում էինք: Ասացին, թե նրան հեռախոսի մոտ են խնդրում: Վարպետը դժկամությամբ գնաց: Վերադարձավ զվարթ տրամադրությամբ:

— Տղաներն էին:

Մի փոքր հետո:

— Հրաչիկն էր, մեկ էլ Համոն:

Հրաչյա Հովհաննիսյանի և Համո Սահյանի մասին է խոսքը:

— Մի շիշ գինի են դրել սեղանին երկուսով նստել, խոսել են գրականությանից ու խմել: Մեկն առաջարկել է իմ կենացը, մյուսն էլ թե՛ արի զանգ տանք: Լավ տրամադրության մեջ էին:

Դադար:

— Լավ տղաներ են: Լավ էլ բանաստեղծներ: Համոն ինչքան առաջ կգնա՝ չգիտեմ, թե նույնը մնա, ինչ որ հիմա է՝ արդեն լավ է: Հրաչը տեխնիկայից անփուլթ է, բայց միտքը լավ է գործում:

Նայեց հեռուն:

— Լավ բանաստեղծներ են, լավ էլ տղաներ:

Հանդիպեցի ակադեմիայի դռների մոտ: Մտահոգ էր: Հարցրի, թե ինչի է եկել:

— Մկրտչի մոտ:

Խոսքը Մկրտիչ Ներսիսյանի մասին էր: Այդ ժամանակ նա Ակադեմիայի վիցե-պրեզիդենտն էր:

— Ինչ է, դարձյա՞լ միջամտության համար, — հարցրի ես:

Ձայն շհանեց: Լուռ նայում էր ինձ. հայացքի մեջ տխրություն կար, ավելի ճիշտ՝ մի այնպիսի արտահայտություն, որ թույլ էր տալիս մտածելու, թե եկել է ակամա, ստիպված, հարկադրված:

Պատմեց:

Ակադեմիայի գրավաճառ կինը մի տարվա ընթացքում տվել է քսանյոթ հազար ռուբլու պակասորդ: Պահանջում էին գումարը, և, բացի այդ՝ սպասվում էր պատիժ:

Ես ծանոթ էի այդ պատմությանը:

— Եկել եմ խնդրելու, որ հավաքեն պակասած գումարը և թեթևացնեն կնոջ վիճակը: Մի երկու հազար ես կտամ: Թող իրանք էլ տան, բոլորն էլ որ քիչ-քիչ դնեն, աննկատելի գումարը կհավաքվի: Ունենալի՝ ամբողջը ես կտայի և հարցն էլ կփակվեք միանգամից:

Ասացի, թե մի երկու հազար կարող էր պակասել և շնկատվել, բայց մի տարվա մեջ քսան յոթ հազար ռուբլի՝ անկարելի բան է:

— Ես էլ գիտեմ, որ մեջտեղը գողություն կա:

Դեմքին դժգոհություն կար: Ես շհասկացա իմ ասածիցս է դժգոհ, թե ինքն իրենից:

— Ինչ անեմ, եկավ մոտս, լաց եղավ: Իմ սիրտն էլ, գիտես էլի, փափուկ է: Որպեսզի հանգստանա, խոստացա միջամտել:

Ես նկատեցի, թե փող կարելի է հավաքել, բոլորն էլ ընդառաջ կզնան, բայց դե գողությունը մնում է գողություն:

— Ես իրեն ասացի, թե բարի մարդիկ շատ կան, բայց հիմարներ՝ քիչ:

Յերեկով գնացել էի մոտը: Ինձ հետ էին երկու երաժշտադետ ընկերներ: Ես խնդրել էի, որ Կոմիտասի ակադեմիական հրատարակության համար մի փոքրիկ առաջաբան գրի: Համաձայնել էր: Խնդրել էր անցնել իր մոտ առաջաբանի հիմնական դրույթները ճշտելու համար: Պարզվեց, որ իր մտքինը լիովին համընկնում է նրա հետ, ինչ որ մենք կուզենայինք տեսնել առաջաբանում:

Փոխադարձ ըմբռնումով ստեղծված այս խաղաղ մթնոլորտը, սակայն, հաճախ խախտվում էր հեռախոսազանգերով և այլ այցելուներով: Նրա ամենահեռավոր ծանոթներն անգամ իրենց պարտքն էին համարում պարբերաբար այցելել նրան, մի որոշ ժամանակ զբաղեցնել: Դրա մեջ թեև փոքր ինչ նախվ, բայց մի սրտազին բան կար: Իսպառ չմտածելով, որ նրանից ժամանակ են խլում, հաճախ պարապ զրույցներով հոգնեցնում էին, համոզված, որ եթե իրենք չայցելեն՝ նա կարող է վշտանալ:

Վարպետը դժգոհում էր, իսկ երբ ընկերներս գնացին և մնացինք մենակ, զանգատվեց, թե պարզապես ժամանակ չունի գրականություն մը զբաղվելու համար:

— Գործ չեմ անում, բայց գործից էլ չեմ պրծնում:

Ի՞նչ խնդրով ասես որ նրան չէին դիմում: Ծանոթ-անծանոթ գալիս էին մոտը, ոմանք էլ չէին համարձակվում աչքին երևալ՝ գրում էին, խնդրում միջամտել:

— Բանտարկված ունեն՝ գալիս են մոտս, դպրոցից հեռացրել են՝ ինձ են դիմում, մնացել է անգործ՝ խնդրում է միջամտել: Բնակարան չեն տալիս՝ ես պետք է գնամ խնդրեմ:

Ասացի, թե ինքն այնպիսի ժողովրդականություն է վայելում, որ բոլորն էլ իրավունք ունեն դիմելու իրեն:

Ժպտաց: Ինքն էլ գիտեր, որ այդպես է, բայց երբ ուրիշն է ասում՝ այլ է:

Գնացի այցելություն: Սառն ընդունեց, ավելի շուտ՝ անտրամադիր: Հասկացա, որ անժամանակ եմ եկել. ուզեցի

գնալ՝ չթողեց: Փափուկ սրտի տեր լինելով՝ իրավունք չէր համարում իր վատ տրամադրությունը դիմացինին հաղորդել: Ժպտաց, նույնիսկ փորձեց կատակ անել, բայց չէր ստացվում: Պարզ երևում էր, որ ջանք է գործ դնում իր վրա:

— Ինչ կա չկա, — դիմեց ինձ.

Սկսեցի նորություններ պատմել, զբաղեցնել նրան, միտքը շեղել, գուցե ցրվի: Մեկ-մեկ նայում էր ինձ, բայց մտազբաղ էր, անարձագանք: Հասկացա որ չի լսում ինձ:

— Երեկ Թումանյանների մոտ էի. Օհանեսի ծննդյան օրն էր: Մուշեղի հետ վիճեցինք:

Ասաց, ու լռեց:

Ձայն չհանեցի: Բնավորությունն արդեն գիտեի: Վստահ էի, որ մի փոքր հետո կբացվի, կասի ամեն ինչ ու կհանգրստանա:

— Եվ ինչի՞ մասին. Կոմիտասի: Ձի հասկանում. ընդունում է, որ հանճար է, իսկ երբ բացատրում է՝ Կոմիտասը փոքրանում է, անշքանում: Ես ասում եմ, թե Կոմիտասի մեծությունը այն է, որ հայտնագործեց հայ երգը, ապացուցեց, որ հայ ժողովուրդն էլ իր երաժշտությունը ունի: Ասում է չէ, նա սքանչելի կատարող էր: Ասում եմ դա ինչ նշանակություն ունի. կարող էր և վատ կատարող լինել, բայց մեծ՝ իր հայտնագործության մեջ: Ասում է՝ չէ ու միտքն ուրիշ ուղղությամբ է տանում: Դե արի ու վիճիր:

Ես հասկանում էի, որ նա իր ասածի հաստատման կարոտըն է քաշում: Եվ ես չզլացա այդ անել, մանավանդ, խորապես համոզված էի, որ ճշմարտությունը վարպետի կողմն է:

Ժպտաց: Իմաստության հասած լինելով, նա պահել էր, սակայն, մանկական իր պարզությունը, այն, որ մի ուրիշն էլ է հաստատում իր ասածը, բավական էր նրան: Թեև շարունակում էր խոսել ոչ պակաս կրթով, բայց ձայնի մեջ արդեն վրդովմունքի շեշտեր չկային:

— Կոմիտասին համեմատում են Թամանյանի հետ: Սխալ է. ես սիրում եմ Թամանյանին, դու այդ լավ գիտես: Գրել

եմ նրա մասին: Բայց տարբեր են, տարբեր դերով, ըստ էության: Թամանյանը հայոց ճարտարապետությունը մղել է առաջ, բայց չի կարելի ապել թե հայտնագործել է: Դրա կարիքը չկար, որովհետև հայտնագործված էր, այնքան բացարձակ, որ օտարներն էլ էին ընդունում: Հայ երգը մինչև Կոմիտասն էլ կար, իհարկե, թեև շատերը մերժում էին, բայց որն էր՝ ոչ ոք չգիտեր, ոչ ոք չէր կարողացել ասել, թե ա՛յ սա հայկական է, ազգային, իսկ սրանք՝ ո՛չ, քրդական, տաճկական, վրացական են, բայց ոչ հայկական: Կոմիտասը կարողացավ, որովհետև զգում էր ժողովրդին, ուստի և հասկանում էր, թե որն է հայկական երկրի բնությա՛ն մեջ կյանք առել և որը, թեև հայ շինականի շրթունք-ներից լսված, բայց դրսից եկած, օտարամուտ: Կոմիտասը բախտավոր էր, որ ոչ միայն իր հանճարի ուժով զգում էր դա, այլև ուներ տեսական լուրջ պատրաստություն զգացածն ապացուցելու համար:

Ասաց, ապա շեշտակի նայեց ինձ ու վրա բերեց.

— Այդ է Կոմիտասի պատմական սխրագործությունը:

Ես խորհուրդ տվի գրել դրա մասին, արտահայտվել, ասելով, որ նրա արժարժածը սկզբունքային իմաստ ունի: Ոչինչ չասաց, բայց հայացքի մեջ հավանություն կարդացի:

* * *

Աշոտ Հովհաննիսյանը հրաժեշտ տվեց ու գնաց:

Մարտիրոս Սարյանը նկատեց.

— Կաղնի էր մի ժամանակ, իսկ հիմի...

Դեմիրճյանն ասաց.

— Ծերացավ:

Վարպետը ժպտաց.

— Դո՛ւ ես այդպես ասում, մի իրեն էլ հարցրու, մարդը չի կարծում, թե ծերացել է, ուրիշներն են նրան այդպես համարում:

— Ինչո՞ւ:

Հարցապնդեց ներկաներից մի երիտասարդ:

—Երիտասարդը կյանքի հետ խաղ է անում: Կյանքի արժեքը գալիս է տարիքի հետ: Մարդը, որ ծերանում է՝ ուզում է ապրել: Է՛հ, ուրեմն, պիտի հավատա որ երիտասարդ է...

* * *

Ակադեմիայում որոշել էինք Թադևոսյանի հիշատակին նվիրված երեկո կազմակերպել: Գիտեի, որ Իսահակյանը սիրում է նրա նկարները և միշտ հիացմունքով է խոսում: Խնդրեցի հուշերով հանդես գալ:

— Չեմ կարող,— ասաց նա,— ես սիրում եմ նրա նկարները՝ Կոմիտասը, Վաղարշապատի փողոցը, խաչի երկրպագումը, պեյզաժները: Ընտիր նկարիչ է, նուրբ, ներշնչված: Իսկական բանաստեղծ է: Հուշ պատմելու համար անձնական մոտիկություն է պետք: Իսկ ես քիչ եմ հանդիպել նրան, մի երկու անգամ միայն: Ես արտասահման էի, նա այստեղ: 26-ին, որ եկա, երկու անգամ միայն տեսնեցինք, որովհետև Թիֆլիսումն էր ապրում, իսկ հետո, երբ բոլորովին եկա՝ արդեն չկար: Հիշում եմ, նազելի մարդ էր, կիրթ, բայց մոտիկից չեմ ճանաչել: Հիշատակը հարգելու համար կգամ, ներկա Վլինեմ երեկոյին, սիրով կլսեմ հուշ պատմողներին, իսկ ինքս հանդես գալ չեմ կարող:

Հարցրի Աղաջանյանի մասին:

— Սրան ավելի լավ գիտեի: Ինձ փեսա էր ասում. կնոջս հեռավոր ազգականներից էր: Ասում էր՝ «փեսա», արի քեզ մի նկարեմ, մուգեյր գցենք»: Գնացի մի օր. կտավը դրեց առաջը, բայց չնկարեց, երկու ժամ նստեց-նստեց: Ուսումնասիրում էր: Մյուսը օրը գնացի, ածխով գծեր քաշեց, հետո ջնջեց: Նույնը և երրորդ օրը: Էլ չգնացի: Շատ էր ասում արի, ասում էի կգամ ու չէի գնում:

— Ափսոս որ չի նկարել:

— Ես էլ եմ ափսոսում: Բայց դե մարդն էղպես է. կարծում է, թե էս կյանքը վերջ չունի:

Լոեց, հետո ավելացրեց.

— Մեր լավագույն դիմանկարիչն եմ համարում նրան:

Մոսկվայից նոր էի վերադարձել: Երկար ժամանակ մոտը չէի եղել: Գնացի: Խոսեցինք տարբեր հարցերից: Հետո հիշեց, հետաքրքրվեց, թե ինչպես էին անգլիացիները «Համլետ» խաղում. պատմեցի: Լսում էր մեծ ուշադրությամբ:

Ասաց, որ ինքը շատ Համլետներ է տեսել ռուսական, եվրոպական, բայց ոչ մեկն իր վրա այն տպավորությունը չի գործել, ինչ որ Մոխիսին: Եվ ապա անցավ թատրոնին, սկսեց հիշել թե ինչ է տեսել.

— Վենետիկում տեսել եմ Յակոնիի Օթելլոն: Արդեն մեծ էր, մազերը ճերմակած, բայց ինչպե՞ս էր խաղում: Մինչև հիմա էլ միտս է նրա խաղից մի տեսարան: Հիշում եմ, թե ինչպես, այլևս չկարողանալով հոգեկան ցավին դիմադրել, ընկնում էր գետին, կարծես մի սար փուլ գար: Ընկնում էր գետին և այդ վիճակում լսում Յագոյին: Չեմ կարողանում մինչև հիմա մոռանալ:

Ասում էր և աչքերը փայլում, վառվում էին, կարծես հիմա էլ աչքերի առաջ նույն տեսարանն էր:

— Տեսել եմ նաև Սառա Բերնարին. երկու անգամ, մեկ 1900-ին էր հուլիս—օգոստոս ամսին, խաղում էր Արծվիկ: Մնացել էի զարմացած: Մեկ էլ, երբ արդեն ծեր էր, ոտքն էլ փայտացած, դարձյալ նույն դերում:

— Տպավորություն թողնո՞ւմ էր:

— Տպավորություն: Այո, իհարկե, բայց ավելի ցավազին:

Հետաքրքրվեցի, թե էլենորա Դուգեին չի՞ տեսել:

— Ինչպե՞ս չէ, տեսել եմ, տեսել եմ Նորան: Նուրբ կին էր, դեմքի վշտահար արտահայտությամբ. մինչև հիմա էլ հայացքիս առջևն է:

Իսահակյանի սեղանին միշտ գրքեր կային, բոլորը նոր և մեծ մասամբ հեղինակների մականգրությամբ: Դրանց մեջ էր նաև մի պոետի նվիրած գրքույկը, որը չէի տեսել:

— Կարդացե՞լ եք:

— Չէ, նոր է բերել, բայց կկարդամ: Դե՛, ես ամեն ինչ

կարգում եմ, բայց հեղինակի նկատմամբ հավատք չունեմ: Ինքը գրողը պետք է հավատա իր ասածին, որ իր հավատն էլ անցնի ընթերցողին: Ձեռքից եկածն անում է: Գրում է վռազ, հափշտապ, որ չլինի թե մի ուրիշից ետ մնա: Գործամուլ է, делец: Ականջ է դնում, թե որտեղ ինչ կարելի է անել և անում է:

Լոնց:

— Էն օրը մի միտք շատ դուրս եկավ: Հիմի չեմ հիշում, թե որտեղ եմ կարդացել: Հիշեմ՝ կասեմ: Վերջապես, դա կարևոր չէ: Հա՛, ասում է, թե հղացումը տեղի է ունենում կայծակի արագությամբ, բայց կատարումը՝ հանդարտությամբ: Նույնը էդիստնն է ասել, բայց ուրիշ կերպ: Նա ասում է, թե մեծագույն գործերի մի տոկոսն է միայն ստեղծագործություն, մնացած 99 տոկոսը աշխատանք է: Եվ ճիշտ է դա: Ուշադրություն դարձրու բնության օրինաչափություններին. միթե նույնը չէ: Վերցրու երեխայի ծնունդը, հղացումը մի վայրկյան է, իսկ հասունացումը ինն ամիս: Փղերի մոտ՝ 8 տարի է տևում:

Նորից ձեռն առավ գրքույկը:

— Ա՛յ եթե աշխատել իմանար, թեկուզ և կոշված չլիներ, գուցե մի արդյունքի հասներ. հավաքեր, կուտակեր, ճշտեր, ստուգեր: Թող չլինի էն մի տոկոսը, բայց մյուս 99-ը հո կլինի: Շատերն են աշխատանքով բանի հասել:

Ասացի, թե վատ է նաև հակառակը, երբ մարդն ունի էն մի տոկոսը, առանց մյուս 99-ի:

— Էդ արդեն տրագեդիա է, մեծագույն դժբախտություն:

* * *

Նոր գիրքս՝ «Սիրանուշը», տարա Իսահակյանին: Մենակ էր: Թերթեց: Բնականաբար խոսք բացվեց դերասանուհու շուրջը:

— Առաջին անգամ տեսել եմ 90-ի սկզբներին: Պատանի էի, հափշտակված, երազներով տարված: Ներկայացումներից հետո երիտասարդներս գնում էինք և թատրոնի դռների մոտ սպասում նրա դուրս գալուն: Երբ երևում էր շեմքին՝

ծափահարում էինք, գոռում-գոչում: Երբեմն Շիրվանզադեն լինում էր հետը: Սիրանուշը ժպտում էր, գլուխ տալիս ու անցնում, իսկ Շիրվանզադեն, հպարտ, չէր էլ նայում մեր կողմը և եթե նայում էլ էր, արհամարհական հայացքով: Երբ Շիրվանզադեն Սիրանուշի հետ շէր լինում, մենք գնում էինք ետեկ, լուռ անխոս, ասես նրա թիկնապահները լինեինք: Նա գնում էր հանդարտ քայլերով, հաճախ շիմանալով, որ հետևում ենք իրեն: Իսկ մենք նրան տեղ էինք հասցնում, և հանգիստ վերադառնում մեր տները, համարելով, որ մեր գանձը, ինչպես համարում էինք նրան, պաշտպանված է շար վտանգից:

Լռեց, հետո շարունակեց.

— 90-ական թվականների վերջերին էր: Սիրանուշը Ալեքսանդրապոլ էր եկել: Գնացի մոտը և տարա նրան իմ առաջին գիրքը՝ «Երգեր ու վերքերը»: Մի քանի օր հետո կանչեց մոտը: Կարդացել էր, գովեց, ասաց, թե երգերդ սրտաբուխ են, անկեղծ, ջերմ: Լավ ես գրել, ապրես: Ասում էր՝ «Դու իմ մեծ մանչս ես»:

Գիրքս նորից ձեռն առավ, թերթեց, մի քանի նկարաչքի անցկացրեց: Կանգ առավ Հովհաննայի նկարի վրա: Երկար նայեց, ասես զննում էր:

— Տեսել եմ: Շատ դերերում եմ տեսել: Հետագայում հաճախ եմ հանդիպել վյանքում, զրուցել հետը, մոտիկից շփվել: Գեղեցիկ չէր, բայց հմայք ուներ, ասես ներքուստ ճառագում էր: Աչքերը լավն էին: Նրան հանդիպելիս մի զարմանալի զգացում էր համակում ինձ, ոչ միայն ինձ, շատերին: Մի պատկառանքի զգացում կար մեր մեջ Սիրանուշի նկատմամբ, որ մեզ պահում էր միշտ տարածության վրա: Թեև կանացի հրապույրով լի, նա մեզ կին չէր թվում: Կարծես եթերային լիներ, ավելի կնոջ սիմվոլացում, քան կին: Վիրավորվում էինք, երբ նրա մասին մեկն ու մեկը արտահայտվում էր որպես կնոջ: Նա վեր էր այդ բմբռնումից: Նույնը չեմ կարող ասել Օլգա Մայսուրյանի, Արուս Ոսկանյանի մասին: Սրանք երկրային էին, իսկ Սիրանուշը թվում էր մի բարձր էություն անշոշափելի, ոչ թե անմատչելի մեկի կամ մյուսի համար, այլ ընհանրապես:

Մի քանի օր հետո նորից Իսահակյանի մոտ էի: Անդրադարձավ «Սիրանուշին»:

— Ասում են լավ գիրք ես գրել: Մերոնք կարդացել են: Ես դեռ չեմ հասցրել աչքի անցկացնել:

Ասի՛ լավ ծառայություն չեն մատուցում ինձ:

Զարմացավ, թե ինչու եմ այդպիսի բան ասում: Ասացի, թե երևի գիրքը վատ չէ, բայց երբ շատ են գովում, չկարդացած մարդն մի այնպիսի վառ պատկերացում է կազմում, որը հետո, ընթերցանության ժամանակ ոչ միայն չի արդարանում, այլև հիասթափություն է բերում:

Ժպտաց.

— Ճիշտ ես ասում:

Մի փոքր հետո ասաց.

— Գիտես, որ շատ մեղիներ եմ եղել, միշտ էլ նշանավոր պատմական վայրերը չեն թողել սպասածս տպավորությունը: Օրինակ՝ Նոստր-Դամը: Կարդացել էի գրքերում, երևակայությունս ճոխ պատկերացում էր կազմել և հանկարծ... Միայն վեգուվն էր, որ ցնցեց ինձ, գերազանցեց ու անցավ: Մի տեսակ մարդու թշվառության զգացում ապրեցի բնության ահեղ ուժի առաջ:

* * *

Երբ Դեմիրճյանի մահվան լուրն առա, շտապեցի նրա տուն՝ կնոջը, քրոջը տեսնելու: Իսահակյանն արդեն այնտեղ էր: Թաշկինակն աչքերին հեկեկում էր:

— Ախպե՛ր ջան..

Նրա վիշտն այնքան մեծ էր և ապրած ցավն այնքան խոր, որ ամեն մի նոր եկողի թվում էր, թե հանգուցյալի հարազատը նա է և ոչ թե կի՞նը: Կամ քույրը, որոնք, կարծես մխիթարված այդ մեծ մարդու լացով, ազնիվ շփոթմունքի մատնված, անհանգիստ էին նրա համար:

Մի քանի հոգով Իսահակյանի մոտ էինք: Խոսք բացվեց երջանկության մասին: Ամեն մեկն իր կարծիքն էր հայտնում: Վարպետը լուռ էր: Ձայն չէր հանում և, ինչպես թվաց ինձ, ոչ մեկիս հետ համաձայն չէր: Երբ դարձանք նրան և ուզեցինք իմանալ կարծիքը, ասաց.

— Ինչ երջանկություն, եթե մահ կա:

* * *

Վարպետը վախենում էր մահից: Եվ չէր թաքցնում: Ամեն մի հասակակցի մահ նա ընդունում էր կրկնակի հարվածով: Արեղյանը մահացավ, և նա վշտացավ ոչ միայն ընկերոջ և մեծագույն հայագետի կորուստով, այլև այն պատճառով, որ ընկերոջ մահվան փաստը վկայում էր և իր մահվան մերձավորությունը: Նույնը Մանանդյանի ժամանակ, ինչպես և Աճառյանի մահվան օրերին:

Մի օր ասաց.

— Մոտենում է հերթս:

Ամենից շատ վրան ազդեց Դեմիրճյանի մահը: Դա նույն կսկիծը չէր, ինչ որ մյուսների մահվան ժամանակ: Իսահակյանի և Դեմիրճյանի մտերմությունը հնից էր գալիս. բայց վերջին մի քանի տարին այնքան մոտեցան, ընտելացան այն աստիճան, որ ցավ էին ապրում, երբ մի օր միմյանց չէին տեսնում կամ գոնե հեռախոսով չէին խոսում իրար հետ: Դեմիրճյանը նրա համար և ինքը Դեմիրճյանի համար դարձավ այն մարդը, որից այլևս զաղտնիք չէր պահում:

Դեմիրճյանի մահը կոտրեց նրան. շարքից դուրս եկավ ոչ միայն սերնդակից մի մարդ ընդհանրապես, արժեքավոր մի անձ մեր մշակութի համար, այլ մի այնքան մոտ ու հարազատ մարդ, որ լցնում էր նրա շրջապատը և որի կորուստով ամայացավ շուրջը:

Վարպետի ներկայությամբ խուսափում էինք Դեմիրճյանի մահվան մասին խոսել: Եվ եթե պատահում էր, որ մեկը,

անդիտակ նրա ապրումներին, խոսք էր բացում, Վարպետը, որ խոսելու սիրահար էր, մի տեսակ շրջապատից վախենում էր, ֆիզիկապես մնում մեզ հետ, իսկ մտքով ու հոգով դեպի սիրելի ընկերը:

* * *

Մի երեկո ասաց.

— Խեղճ Դերենիկը շատ տառապեց: Ի՞նչ էր նրա կյանքը վերջին երկու տարին: Տանջանք:

Մի կարճ դադարից հետո.

— Երբ լսում եմ, թե այսինչը ռակով հիվանդ է, այնքան չեմ մտածում, թե պիտի մեռնի, դա անխուսափելի է, որքան էն, որ չարչարվելու է:

Թեյի բաժակը մոտ քաշեց, բայց չխմեց:

— Մի ցանկություն ունեմ, իղձ, փափագ՝ մեռնեմ այնպես, որ ոչինչ չզգամ: Քնեմ ու չարթնանամ:

* * *

Մի առիթով ասաց.

— Հարստությունը կուտուրա չի ստեղծում: Սպանում է ձգտումը, հոգեկան թուլության մատնում:

Մի փոքր լռելուց հետո.

— Երկրների ու ժողովուրդների հետ էլ է պատահում նույնը: Երբ բնությունը հարուստ է ու շուայլ և կյանքը հեշտ է տրվում, ժողովուրդը անհոգ է մեծանում: Եվ հակառակը. այն ժողովուրդը, որ քարից հաց է քամում, արժեքներ է ստեղծում:

* * *

Գարնան կողմը կլինեի: Ինչ որ գործով Վարպետի մոտ զնացի: Տիկին Սոֆիկն ասաց, թե պարտեզումն է: Վարպետին դատ բահը ձեռին: Զարմացած հարցրի, թե ինչու է ինքը զբաղվում այդ գործով:

Ժպտաց:

— Ամենից առաջ, ասեմ, որ ֆիզիկական աշխատանքը լավ է ազդում վրաս: Հենց որ բաճը ձեռս եմ առնում, մի տաս տարով ջահելանում եմ:

Բաճը դրեց մի վողմ, տեղավորվեց քարե նստարանին:

— Հետո, գիտե՞ս ինչ, ապահով տան զավակները, նկատել եմ, ծուլլ արարածներ են լինում: Ուշադրություն դարձրե՞լ ես. մոծակը սրված կերպարանք ունի. ընդունել է այդ ձևը, որ կարողանա թռչել, ապահովել իրեն, իր տեղը գտնել բնության մեջ: Իսկ տղո՞ւկը. տափակ է, անձև: Մտածե՞լ ես թե ինչի. որովհետև գործ չի անում, ապրում է ուրիշի հաշվին. նեղություն չի քաշել և ինչպես կա, այնպես էլ մնացել է: Նույնը և մեծամեծների զավակները, ունևոր տան երեխաները. կուշտ և անկարիք կյանքը մղումներից դուրս է պահում նրանց, և մեծ մասամբ մարդ չեն դառնում...

* * *

Մի քանի հոգով Վարպետի մոտ էինք: Հետաքրքրվեցինք, թե ինչ նոր բանաստեղծություն է գրել: Սեղանի վրայից վերցրեց մի թերթիկ, հայացքը սահեց նրա վրայով: Մի տեղ աչքերը փայլեցին. երևում էր, որ հավանած տողերն էին: Մեկին խնդրեց, որ կարդա: Նա արագ աչքի անցկացրեց, ապա կարդաց. սկզբում հանգիստ, հետո, ոգևորվելով, կարդաց շեշտով և հանդիսավորությամբ: Վարպետը կանգնեցրեց նրան.

— Հավ ջեա կարդում:

Ու թերթիկը վերցրեց նրանից: Սկսեց կարդալ իրեն հատուկ կամկոցով: Ներկաները իրար նայեցին: Երբ Վարպետը վերջացրեց և մյուսներն իրենց հիացմունքն էին արտահայտում, ես մտածում էի, թե ինչու Վարպետն այդպես վարվեց: Նա կարդում էր արտաքուստ վատ, ինչպես ասացի, կամկոցով, բայց զգացումով, ներքին մի ջերմությամբ:

Խոսք բացվեց այն մասին, որ մարդ արարածը մեծ վշտին ավելի է դիմանում, քան մեծ ուրախությունը:

Ես արի վերջերս լսած մի պատմություն:

Մեկին անսպասելի ժառանգություն է հասնում, պատկերացումից դուրս հսկայական մի գումար: Հարազատները չգիտեն, թե ինչպես հաղորդեն այդ ուրախալի լուրը, որովհետև ժառանգորդը սրտից հիվանդ է լինում: Իր վրա է վերցնում բուժող բժիշկը, հաղորդում է հիվանդին աստիճանաբար, երբ բանը հասնում է փսկական գումարին, բժիշկը հարցնում է՝

— Ի՞նչ կտաք ինձ, եթե այդպիսի մի մեծ գումար ժառանգելու լուրը բերեմ ձեզ:

— Կեսը ձեզ:

— Իսկապե՞ս:

— Այո:

«Իսկապես» լինում է բժշկի վերջին բառը, ուրախությունից սիրտը պայթում է:

Վարպետն ասաց, թե իրեն հայտնի է մի այլ դեպք. մեկը կորցնում է հսկայական մի գումար, չգիտեմ քանի միլիոն ստերլինգ և այդ վշտից մեռնում է: Մի ուրիշը գտնում է այդ գումարը: Սա էլ ուրախությունից է մեռնում:

* * *

Զրույցի ժամանակ հիշվեց մի կին, որը բավական կարգացած է և միշտ աշխատում է ի ցույց դնել իր զարգացածությունը:

Վարպետն ասաց, թե ինքը վաղուց մի տեղ կարդացել է, թե կինն իր խելքն օգտագործում է ձեռքի ժամացույցի պես, որ մարդիկ տեսնեն, հիանան:

* * *

Վարպետը հիվանդ էր: Գնացի տեսություն: Հետո Անահիտ Սահինյանն ու Լևոն Հախվերդյանն էին: Այնտեղ տարիներն էլ կային:

Խոսք բացվեց այն մասին, թե կյանքում ինչն է շատ
լավը, թե վատը:

Մեկը թե.

— Վատը:

Զհամաձայնեց.

— Լավը:

Ասաց ու լռեց, իսկ հետո շարունակեց.

— Վատը, որ շատ լինելը, մարդիկ վաղուց իրար կերած
կլինեին: Լավն է պահում աշխարհը:

Մեկը թե.

— Գուցե ձգտումը դեպի լավը:

Վարպետը ժպտաց.

— Էն, որ մարդ ձգտում է՝ արդեն լավ է: Դե որ լավին
է ձգտում՝ հո լավ է ու լավ: Լավով է աշխարհը կանգուն:

* * *

Վարպետի մոտ մարդ կար, հիմա չեմ հիշում, թե ով:
Գործով էր եկել և ես հարմար չգտա վկա լինել նրանց խո-
սակցությանը: Մոտեցա գրակալին, ինչ որ գիրք վերցրի,
թերթեցի և, ինչպես հաճախ է պատահում նման դեպքերում,
տեղական զբաղմունք չգտած՝ նայում էի շուրջս, դիտում այն,
ինչ տեսել էի շատ անգամ: Եվ հանկարծ՝ սենյակի մի ան-
կյունում նկատեցի տիկին Սոֆիկի կիսանդրին: Քանզակա-
քործը, որ այն պահին չգիտեի, թե ով է, կարողացել էր
տիկնոջ բնավորությունն արտահայտել: Երբ Վարպետի
հյուրը գնաց՝ դարձա նրան.

— Լավ է, չէ՞:

— Ի՞նչը:

Մասնացույց արի տիկին Սոֆիկի կիսանդրին: Ձայն
չհանեց: Դժկամություն կար դեմքին: Տիկին Սոֆիկը թեյ
բերեց ու ինքն էլ սեղանի մոտ տեղ գրավեց: Մի կարճ պահ
լուռ մնալուց հետո, նայեց կնոջ կողմը և ժպտալով, միայն
իրեն հատուկ մի ժպիտ դեմքին, ասաց.

— Շատ էի գոհ մեկից, որ գոհ լինեմ երկուսից. մեկը
բավական չէր, հիմի երկուսը:

խոսք եղավ երազի մասին: Վարպետը պատմեց իր կյանքից մի դեպք:

— Մի ամառ գնացել էի Ղազարապատ: Շոգ օր էր, տանը մնալ չէր լինի: Դուրս եկա, տեսնեմ, թե որտեղ ստվեր կա: Մեր դիմացի պատը ահագին ստվեր էր գցել: Պառկեցի, գլուխս վէլ քարին դրի ու քնեցի: Թե ինչքան ժամանակ էի քնած՝ չգիտեմ, մեկ էլ հերազումս տեսնեմ, պատը, որի տակ պառկած եմ, քանդվում է: Արթնացա: Սարսափահար լինձ մի կողմ գցեցի: Իմ փախչելն ու պատի փակապես փուլ գալը մեկ եղավ:

Կարճ դադարից հետո.

— Ի՞նչ կասես սրան:

Չեմ հիշում առիթը. մի օր խոսեց Ռուբեն Սևակի մասին: Մի քանի դատողություններ անելուց հետո ասաց.

— Լսիր, պատմեմ քեզ հետևյալը: Դու, իհարկե, գիտես, որ Սևակն էլ մյուսների հետ զոհ գնաց: Բայց գիտե՞ս, որ նա ազատվելու միջոց ուներ: Ճանապարհին, դեռևս Չանդրը չհասած, ուր պետք էր նրանց սրի քաշելն, նահատակների քարավանը ուշ գիշերով կանգ է առնում մի տեղ, մինչև առավոտ հանգիստ առնելու համար, որ հետո լուսածեղին շարունակի ճանապարհը: Իմանալով այդ, տեղի շեյխը մարդ է ուղարկում իմանալու, թե մեջները բժիշկ չկա՞, արդյոք: Պարզվում է, որ շեյխի աղջիկը հիվանդ է: Իսկ Սևակը բժիշկ էր, անմիջապես գնում է: Արևը դեռ չելած քարավանը բժիշկ էր, անմիջապես գնում է հիվանդի մոտ: Մի օր հետո ծանր, մահամերձ հիվանդը սկսում է լավանալ: Երբ շեյխը աղջկա ժպիտը տեսնում է և հասկանում, որ նրա կյանքը փրկված է, բժշկին կանչում է իր մոտ. «Հայ,— դիմում է շեյխը նրան,— գիտե՞ս որ քեզ ու ընկերներիդ մահ է սպասում»: Սևակը պատասխանում է. «Գիտեմ»: Շեյխը հարցնում է նրան. «Դու իմ աղջկան փրկեցիր. ի՞նչ պարգև

ես ուզում», Սեակը ոչ մի ձայն չի հանում: «Ինչ որ մտքովդ անցնում է, ասա՛, ասա՛, մի վախենա»: Սեակը դարձյալ ձայն չի հանում: «Մեղք է, որ քեզ նման մարդը սրի քաշվի,— ասում է շեյխը:— Ուզում ես մի նժույգ տամ քեզ և ուր աչքդ կտրի, գնա»: Սեակը շարունակում է լուռ մնալ: «Ուզում ես մնա ինձ մոտ, աղջիկս քեզ. փրա վյանքով քեզ է պարտական՝ հալալ է քեզ: Իմ հարկի տակ քեզ ոչ ոք չի համարձակվի ձեռք տալ»: Սեակը նայում է շեյխին և ասում. «Ես ոչինչ չեմ ուզում. միայն մի ձի, մի մարդ, որ ինձ հասցնի ընկերներիս. որտեղ նրանք, այնտեղ էլ ես»:

Այս պատմությունը մի անգամ էլ է արել:

* * *

Մի օր ասացի, թե որոշել եմ արտասահման գնալ, շրջել, գոնե մի երկու երկիր այցելել, աշխարհ տեսնել: Հարցրեց, թե ո՞ւր եմ ուզում գնալ: Ասացի՝ Իտալիա կամ Ֆրանսիա, եթե հաջողվի՝ երկուսն էլ:

— Եթե մի տեղ գնալու լինես՝ անպայման Իտալիա. Ֆրանսիան հետաքրքիր է, բայց Իտալիան նախ և առաջ: Թե հաջողվի, գնա նաև Հունաստան, գնա այնտեղ, որտեղ սկիզբ է առել քաղաքակրթությունը: Դա առաջին աստիճանն է, երկրորդը Իտալիան է:

Խորհուրդներ էր տալիս, ոգևորված այնպես էր խոսում, կարծես արդեն որոշված և վերջացած հարց էր իմ գնալը, Թվեց, թե ուր է եղել, որտեղ և որքան ժամանակ: Ես հետաքրքրվեցի, թե ինչպես է եղել, որ Անգլիա չի գնացել:

— Լոնդոն գնալու առիթներ եղել են, բայց միշտ հետաձգել եմ, մտածելով, թե երբ էլ լինի, կգնամ ու կտեսնեմ: Հետո էլ տարիք առա, դժվար եղավ ու այդպես չգնացի:

Կանոգ առավ:

— Զարմանալի բան է մարդ ասածդ: Երբ կարող ես, քեզ թվում է միշտ կարող ես՝ հնարավորությունն արժեք չես տալիս: Երբ արդեն չես կարող, նոր սկսում ես գնահատել բաց թողած ռեալ հնարավորությունը: Զղջում ես, ցավում. բայց արդեն ուշ է և ոչինչ չես կարող անել:

Իսահակյանի մոտ էին Աշոտ Հովհաննիսյանը և Այծեմիկ Ուրարտուն։ Վարպետն ասաց, թե շուտով Ռուբենը գնալու է Հունաստան, հետո դարձավ ինձ։

— Այդ ավելի լավ է, քան Եվրոպայի շուրջ ուղևորությունը։ Ժամանակդ կարճ է, մի տասնհինգ օր, բայց գոնե մի բան կտեսնես, երկիրը կզգաս, կհասկանաս։ Թե չէ, ինչ, օրը մի քաղաք մտնելն ու դուրս գալը ինչի նման է։ Մեկ է, թե քթիդ առջևով մի համեղ ճաշ տանեն և դու հոտն առնես։

Ու սկսեց թվել քաղաքները, որ հնարավոր է շրջել, տեսարժան վայրերը հիշել։ Ասում էր մեզ, բայց մտովին տեղափոխված Հունաստան, ուր եղել էր շատ տարիներ առաջ։

— Անպայման կգնաս գերեզմանատուն։ Այնտեղ մի շիրիմ կա. վրան մի հսկա բրոնզե ցուլ։ Ամերիկացիները իր քաշով մեկ ոսկի էին առաջարկում, հույները չէին տալիս։ Գնա տես և ինձ մի լուր բեր, տեղումն է, թե արդեն տարել են։

* * *

Վարպետն այսօր նորից անդրադարձավ Հունաստան գնալու։ Շատ ուրախ է, որ ինձ հաջողվում է, վերջապես, արտասահման գնալ և այն էլ մի այնպիսի երկիր, ինչպիսին Հելլադան է։

— Երիտասարդ լինելի հետդ կգայի։

Մի քիչ հետո.

— Մի անգամ եմ այնտեղ եղել, ընդամենը մեկ և կես ամիս։ Տասնհինգ օր հիվանդ պառկած էի. բժշկին ասում էր մի բան արա, լավացրու, հետո այնտեղ, որտեղից եկել եմ, փոխարենը մի տարի կպառկեմ։ Միայն թե այնտեղ ոտի վրա լինեմ, տեսնեմ։

Ու ընկավ հիշողությունների գիրկը։

— Կանգնած եմ Պարթենոնի առաջ, անցնում եմ հին ավերակների մոտով, և մտքով արդեն Պերիքլեսի հետ եմ,

Սովորատեսի մոտ, ուշք ու միտքս ամբողջապես տեղափոխվել է հին ժամանակների Աթենքը: Բայց ահա մի ձայն՝ ճղան ու անախորժ. «Սովորատե՛ս»: Սրան հաջորդում են բառեր ու խոսքեր, որ չեմ հասկանում, բայց անեծքի շեշտ ունեն: Շուտ եմ գալիս՝ տեսնեմ մի մայր ծեծելով տուն է քարշ տալիս իր փոքրիկ ցեխակոլոլ Սովորատեսին: Չքանում է պատրանքը: Չկա Պերիքլեսը, չկա Սովորատեսը, ու ես վերստին վերադառնում եմ իմ ապրած ժամանակը:

* * *

Հունաստան գնալուցս առաջ էր:

Վարպետը պատմում էր.

— Բարձրացա Ափրոպոլիս: Հիացած կանգնած եմ Պարթենոնի առաջ. պտտվում եմ շորս կողմը, մտնում եմ ներս, նայում անկշտում: Ուզում եմ մի քար, մարմարի մի կտոր վերցնել: Դիտեմ, որ չի կարելի, գիտեմ, որ հետևում և հըսկում են: Բայց ցանկությունս մեծ է: Եվ ինչքան ժամանակ է անցնում, այնքան ավելի եմ ցանկանում, գուցե պատճառն այն է, որ արգելված է: Անցնում էի ցածր սյունաշարի մոտով, ոչ թե մոտքի, այլ ետևի, կգնաս՝ կտեսնես: Նայեմ և ի՛նչ տեսնեմ՝ գետնին ընկած է մարմարի փոքրիկ, հողապատ մի կտոր: Ու, երևակայո՛ւմ ես, զխարկս ցած գցեցի, ուղիղ մարմարի վրա, իբր թե այնպես, պատահամա՞ք ձեռիցս ընկավ: Կռացա, բարձրացրի զխարկս, հետն էլ մարմարի կտորը: Ու պատկերացնում ես: Դեռ չեմ համարձակվում նայել, վախենում եմ բռնվել, բայց գնում եմ հպարտ, մի տեսակ՝ ուժ առած, ոչ միայն երջանիկ, այլև աստվածացած: Հյուրանոց հասա, մտա իմ համարը և տեսա, որ ոչ ոք չկա շուրջս, հանեցի զրպանիցս, նայեցի, երկար նայեցի, համբուրեցի քարի այդ կտորը և հետո ընկա մահճակալի վրա ու լացի, երկար, շատ երկար արցունք թափեցի:

Հունաստան մեկնելու օրը որոշել էի գնալ Իսահակյանի մոտ և հրաժեշտ տալ նրան: Չկարողացա, որովհետև ուշ տուն եկա: Կայարան գնալուս մնում էր հագիվ քառասուն ռոպե: Որոշեցի զանգ տալ: Հեռախոսը վերցրեց հարսը՝ Բեկլան: Ես ասացի, որ այսօր մեկնում եմ և Վարպետը, եթե պատկած չէ, թող մոտենա հեռախոսին, ուզում եմ հրաժեշտ տալ: Բեկլան խնդրեց մի քանի ռոպեով անցնել: Ես ասացի, որ, դժբախտաբար, չեմ կարող:

Բեկլան պնդեց.

— Լավ կլինի գաք, կյանք է, վաղը, ով իմանա, ինչ կլինի:

Ասացի, որ շատ քիչ ժամանակ է մնացել կայարան գնալուս:

— Դուք գիտեք, — վրա բերեց Բեկլան:

Մի փոքր հետո հեռախոսը վերցրեց Վարպետը:

— Օրհնում եմ ճանապարհդ: Իմ աչքով էլ նայիր այդ հեքիաթ երկիրը: Մի ծուլանա և գրի առ տեսածդ. պետք կգա, թե չէ հետո ուշ կլինի, կզղջաս, որ չես արել: Է՛հ, ինչ ասեմ. լավ գնաս, լավ դաս: Թող աստծո աչքը վրադ լինի: Գաս թե չէ՝ անցիր, չլինի թե ուշացնես: Ուզում եմ իմանալ, թե ինչ ես տեսել: Բրոնզե ցուլը չմոռանաս:

* * *

Այլևս նրան չտեսա: Վերադարձա հոկտեմբերի 16-ին: Հաջորդ օրը պետք է գնայի իր մոտ: Եվ ցերեկը քաղաքով մեկ տարածվեց Վարպետի մահվան բոթը: Շտապեցի Իսահակյանների առանձնատունը: Դուռը բաց էր: Առաջինը հանդիպեց Բեկլան:

— Բա որ ասո՞ւմ էի:

Հիշեց նա:

Շատ մարդ կար: Մի մասը նստած էր, մի մասը կանգնած: Բոլորն էլ գլխահակ էին, կսկծի մեջ: Ոչ ոք չէր եկել մի ուրիշին ցավակցություն հայտնելու: Բոլորն իրար էին

ցավակցում։ Եվ դա հասկանալի էր։ Կորուստը ամենքինն էր, վիշտն էլ, սուգն էլ համաշխարհային էր։ Իսկ իմ ականջին հնչում էր նրա ձայնը, այնպես, ինչպես լսեցի վերջին անգամ, ինչպես լսել եմ շատ անգամներ, ինչպես լսել են շատերը, միշտ բարի, միշտ հայրական...

* * *

Վարպետի դադաղը գրված էր Հայֆիլհարմոնիայի փոքր դահլիճում։ Երբ բազմության հետ մտա դահլիճ, ապա միացա պատի տակ շարված գրողներին, հիշեցի Իսահակյանի հետ նրա տանն անցկացրած մի երեկոն։

Երաժշտության մասին էր խոսք բացվել մի օր։ Ներկաներից յուրաքանչյուրը դատողություններ էր անում, ասում, թե ինքը ինչ է սիրում։ Վարպետը ասաց, թե ինքը զերգաստում է սիմֆոնիկ երաժշտությունը։ Ամեն մեկն իր նախասիրությունն էր պաշտպանում։ Վարպետը երկար ժամանակ լուռ էր, մի տեսակ ամփոփված ինքն իր մեջ։ Ընկղմված էր հիշողությունների մեջ։

— Մի անգամ, շատ տարիներ առաջ, ուսանող ժամանակըս, լսել եմ Բեթհովեն, Յոթերորդ սիմֆոնիան։ Անջնջելի տպավորություն է թողել։ Դրան ոչինչ այլևս չհասավ՝ ինչպե՞ս է գրված և ինչպե՞ս էին նվագում։

Լոեց։

— Ձեռն հավատում, որ մարդ է գրել։ Մարդկային ուժից վեր է, թվում է թե մարդ չի ստեղծել, այլ միշտ էլ եղել է, ինչպես բնության հրաշալիքները՝ երկինքը, լուսինը, աստղերը։

Մոտեցրեց թեյի բաժակը, մի երկու ումպ բերանն առավ։

— Վախճանվել էր համալսարանի փիլիսոփայության պրոֆեսորը։ Բոլորը սիրում էին նրան, մեծ ցավ էր բոլորիս համար նրա մահը։ Համալսարանը ասես միանգամից կորցրեց իր հմայքը։ Նրա հոգեհանգստին էր, որ լսեցի Յոթերորդ սիմֆոնիան։ Հիշում եք երկրորդ մասը՝ մահվան քայլերգը։

Ձեռքը բարձրացրեց. թվում էր թե ուզում է կամացուկ երգել. շրթունքները շարժվեցին, բայց ձայն չհանեցին։ Աչքերը փակեց, իսկ դեմքը մեղմ ու բարի ժպտաց։ Ինքն իր մեջ երգում էր։

— Հանճարի էն աստիճանն է դա, երբ վերացնում է քեզ, ստիպում մոռանալ, թե որտեղ ես, համակում է քեզ իրմով, տանում հետևից։

Նորից լռեց.

— Ես չգիտեմ մի ուրիշ ստեղծագործություն, որ այդպես արտահայտի մահվան կսկիծը, բայց այնքան խոր, որ միաժամանակ հեռացնի հոգեկան ցավից, մոռացնել տա մի պահ պատահած դժբախտությունը, բարձրացնի, դարձնի փրկիսոփա։ Այստեղ է, որ կյանքը հաղթում է մահվան։

Ու հետո ասաց.

— Ես ինձ երջանիկ կզգայի, եթե իմանայի, որ հոգեհանգստիս ժամանակ երաժշտությունը գեթ մի վայրկյան կարողանա մոռացնել տալ, որ մեռած եմ։

Բոլորը կշտամբեցին Վարպետին, ասացին, թե նրան մահ չկա, ջանացին խոսակցության նյութը շեղել։

Վարպետը ժպտաց.

— Ինձ չհասկացաք. ես էլ մեռնել չեմ ուզում, ոչ էլ ասածս մի քմահաճ կատակ է։ Իմ ասածը ցանկություն է՝ տեսնել մահը հաղթված։ Եթե կսկծի ծանր պահին, երգ լինի թե երաժշտություն, մեկ է, մոռացնել տվեց մահը, գերեց դազաղը շրջապատողներին իրմով, նշանակում է հաղթում է կյանքը։

Երբ համոզվեցին, որ Վարպետի ասածը մի փրկիսոփայական խոհ է, սկսեցին վիճել հետը, հաստատել, թե երբ կսկիծը մեծ է, կորուստը իսկապես ծանր, ոչինչ չի կարող մեզ վշտից կտրել։ Եվ գուցե այս անօդուտ վեճը երկար տևեր, եթե դրությունը չփրկեր տիկին Սոֆիկը, հրավիրելով բոլորին սեղանատուն՝ մի բաժակ թեյի։

Ես չգիտեմ, թե ներկաներից ով ինչպիսի մանրամասնությունամբ է հիշում այդ երեկոն, բայց չեմ կարծում, որ նրանք, անխտիր, իսահակյանի թաղման օրը՝ հոգեհանգստի ժամին, երբ սիմֆոնիկ նվագախումբը Փարիզից նոր եկած

Օհան Դուրյանի ղեկավարությամբ նվազում էր Բեթհովենի Յոթերորդ սիմֆոնիայի երկրորդ մասը, չհիշեին Վարպետի պատմածը, տեսնելով նրա ցանկությունը կատարված:

Արցունքն աչքերին, հարազատները խմբված էին մի կողմում: Գրողներն ու արվեստագետները գլխահակ շարված էին պատերի տակ: Անվերջանալի բազմությունը անցնում էր համարաթյալ: Դազադի չորս դին սգո պահակները հաջորդում էին միմյանց: Չկար անտարբեր հայացք:

Ժողովրդական գործիքների անսամբլն էր նվազում: Վարպետի երգերն էին երգում: Սրանց փոխարինեց սիմֆոնիկ նվագախումբը՝ երգչախմբի հետ միասին: Պուլտին մոտեցավ Օհան Դուրյանը: Երբ հասավ երկրորդ մասը ու նվագի հնչյունները զալիս մտնում էին մարդու հոգու խորքերը, զարկում սրտի լարերին, հեռանում, հետո կրկին վերադառնում ու նոր ուժով զարկում, ես մտածում էի, որ եղավ այն, ինչ երազում էր Վարպետը:

Մարդիկ հարցնում էին, թե ով է անծանոթ դիրիժորը: Ոմանք նվագի չափի տակ օրորում էին իրենց գլուխները: Նվագը համակել էր: Բոլորի կեցվածքը փոխվել էր, աչքերի արտահայտությունը նույնպես: Մարդիկ, ես չգիտեմ թե որքան ժամանակ, նվագի հետ էին, ամբողջապես նրա ողբերգական թովչանքին հանձնված: Այդպես էր գոնե մի կարճ ժամանակ: Դա Վարպետի ասած կյանքի հաղթանակն էր: Դա Վարպետի հաղթանակն էր: Բացահայտ հաղթանակը: Այլևս ոչ ոք չէր վիճում նրա հետ:

Այդպես են իմաստունները, նրանք հաղթում են նաև մեռած ժամանակ...

* * *

Վերջին գրառումս է ձեռքիս: Դնում եմ թղթապանակի մեջ ու մտածում, թե մեծ մեղք է ընկնում վրաս. ինչո՞ւ այնքան կամք ու հետևողականություն չունեցա, որ գրառեի ամեն մի այցս:

Փակում եմ թղթապանակն ու դնում մի կողմ:

... Բարձրացնում եմ գլուխս, նայում լուսամուտին: Եվս

մի ժամ՝ և լույսը կբացվի: Ի՞նչ է սպասում այսօր մեզ.
ո՞վ կծնվի, ո՞վ կմեռնի, ո՞վ ում հետ կգտնվի և ինչքան
տղաներ հավիտենական սիրո երդում կտան կամ ինչ մեծ
հայտնագործություն կկատարվի՝ ոչ ոք չգիտե: Կիմանանք
հետո:

Ես մոտենում եմ օրացույցին և պոկում հոկտեմբերի
30-ի թերթիկը ու նայում երկա՛ր-երկար: Երեկ նա այսօր
էր, այսօր արդեն անցյալ, ուրեմն և՛ հուշ, հիշողություն:
Հիշողություն, որ ներկայի ուժ ունի:

«Երևան, Գնունի փողոց, № 37, Ստեփան Զորյանին» — նորից աչքի անցկացրի ծրարի վրա եղած հասցեն և մտաբակել: Պարզվեց, որ պատշգամբում կանգնածը հենց նա է, ում փնտրում եմ: Չճանաչեցի ոչ միայն այն պատճառով, որ առաջին անգամն էի տեսնում. պարզապես աչքերին չկար այն պենսնեն, որով պիտի լիներ իմ պատկերացումով Զորյանը, քանի որ այդպես էի տեսել նրան «Տխուր մարդիկ» գրքի լուսանկարում:

Հանձնեցի երկտողը, որ գրել էր Պահարեն իր անվանի բարեկամին, իբրև հանձնարարական՝ Համալսարանական կրթություն ստանալու ցանկությամբ Թիֆլիսից երևան եկած գրաբերի մասին, ասելով թե իր երիտասարդ ընկերն է և խնդրում է նրա բարյացակամ ուշադրությունը:

Զորյանն առաջարկեց նստել, և սկսվեց զրույց մի բաժակ թեյի շուրջ: Հստ էության դա ոչ այնքան զրույց էր, որքան հարց ու փորձ, որի նպատակն էր՝ պարզել իմ ով և ինչ լինեի:

Երբ բավական ժամանակ էր անցել՝ տեղիցս վեր կացա և հրաժեշտ տվի: Զորյանն ինձ օգտակար լինելու պատրաստակամություն հայտնեց և առաջարկեց մեկ-մեկ անցնել իր մոտ:

— **Նզրուցենք, կիսոսենք:**

Բայց ես այլևս չգնացի: Չգնացի նաև, երբ նրա կարիքը զգում էի չափազանց: Համալսարանական քննություններ տալիս, քննվելու էի նաև մաթեմատիկայից: Չէի հասկանում՝ բանասիրական ընդունվելու համար մաթեմատիկան ինչ գործ ունի: Չգիտեի, թե ինչ եմ անելու, երբ այդ առարկայից բոբիկ էի: Միջամտության կարիքն անխուսափելի էր,



իսկ իմ միակ հեղինակավոր ծանոթը Ստեփան Զորյանն էր։ Զգնացի և շխնդրեցի։ Առաջին հանդիպմանը Զորյանն ինձ թվաց քաղաքավար, նույնիսկ ուշադիր, բայց փոքր-ինչ սառն ու պաշտոնական։ Եղած վերաբերմունքն էլ բացատրում էի պարտադրված, քանի որ ընկերը նամակով դիմել էր իրեն»

Ու ես ցավում էի դրա համար։ Այն էլ շատ։ Հենց թեկուզ այն պատճառով, որ Զորյանին իբրև գրողի սիրում էի, նրա պատմվածքները կարդացել էի հաճույքով, իսկ մի քանիսը՝ մի քանի անգամ։

Ես հետո միայն հասկացա, թե Զորյանն ինչքան նման է իր պատմվածքներին։ Զխորացած ընթերցողին Զորյանը կարող է սառը և անգամ անտարբեր հեղինակ թվալ, մինչդեռ նա ջերմ է, միայն թե այդ ջերմությունը թաքնված է։ Երբ առաջին անգամ զրուցում էր ինձ հետ, այնպես թվաց, որ նա թեև հարց է տալիս, լսում է պատասխանը, բայց մնում է չեզոք։ Մի խոսքով, նրանցից չէ, որ միանգամից են մտնում կյանքիդ մեջ կամ առաջին իսկ հանդիպումից քեզ առնում են իրենց կյանքի մեջ ու թվում է՝ դա քո առաջին այցը չէ նրա տուն։

Տարիներ անց ավելի ճանաչեցի Զորյանին և, մտերիմ հարաբերությունների մեջ լինելով, հասկացա, որ առաջին հայացքից է այդպես, արտաքին տպավորություն միայն, իսկ իրականում սրտագին բարեկամ է ու ընկեր։

• • •

Իմ առաջին այցը Ստեփան Զորյանին 1932-ին է եղել, աշնանը։ Դրանից հետո Գրողների տանը, որ Լենինի հրապարակի վրա էր, մեկ-մեկ հանդիպում էինք, նա ինձ հարցնում էր՝ «Ինչպե՞ս եք» և վերջ։ 1933-ին, դարձյալ Գրողների տանը, երեկ դարձյալ աշնան կողմը կլինեմ, նա ինձ հարցրեց, թե ինչո՞ւ չեմ այցելում իրեն։ Եվ առաջարկեց ժամանակ գտնել և անցնել։

Գնացի։ Եվ սկիզբ առավ մի բարեկամություն, որ ինձ համար միշտ թանկ է եղել։

Փոխադրվեցի բանասիրականի երրորդ կուրսը և համալսարանը թողի: Պետք էր աշխատել: Ինձ ասել էին, թե կրտսեր գիտաշխատակցի տեղ կա գրական թանգարանում, որը գլխավորում էր Խորեն-Սարգսյանը: Ասել էին նաև, որ Զորյանը և Սարգսյանը լավ բարեկամներ են: Խնդրեցի Զորյանին՝ միջամտել: Խոստացավ, բայց հարկ համարեց զգուշացնել.

— Խոսելը խոսեմ, բայց ճիշտ է, արդյոք, ուսումը կիսատ թողնել:

Ես բացատրություն տվի:

— Ես հասկանում եմ, սիրելիս, բայց մարդ պետք է կրթություն ստանա անպայման: Երիտասարդ ես, նշանակություն չես տալիս, հետո, տես՝ կզոջաս, և կարող է ուշ լինել:

Ես ասացի, թե հիմա աշխատել եմ ուզում, իսկ հետո կշարունակեմ:

— Այդ լավ է: Եթե դրությունն այդպես է, որ պետք է աշխատես՝ աշխատիր, բայց հետո, հենց որ հնարավոր համարես՝ շարունակիր ուսումդ:

Ես մի տարի աշխատեցի թանգարանում՝ Խորեն Սարգսյանի ձեռքի տակ: Եվ քիչ բան շտվորեցի: Մի օր Զորյանին հայտնեցի՝ վերադառնում եմ համալսարան, և միացա դասընկերներին: Ուրախացավ, բայց մի բան ասաց, որ այն ժամանակ զնահատել չկարողացա, հիմա եմ հասկանում և ինքս եմ առիթ ներկայացած դեպքում երիտասարդներին հաճախ ասում:

— Լավ է, իհարկե, խելոք բան ես անում, բայց իմացիր, որ էն մի տարին կորավ-զնաց:

Ես չհասկացա:

— Էդպես է: Ամեն բան իր ժամանակն ունի: Կրթությունը, սիրելիս, այն էլ բարձրագույն, սիստեմ է: Բաց թողածիցդ ինչ-որ բաներ գուցե յրացնես, բայց շատ բան էլ կմնա չբացված:

Ժամանակն անցավ ու ես հասկացա, թե որքան ճիշտ էր Զորյանը:

Մի օր խոսեց Շիրվանզադեի մասին.

— Ինչպես է իրեն թույլ տվել հեզնել Սունդուկյանի նման հեղինակին, թե իբր չի իմացել ինչպես գրի՝ «ես սիրում եմ Ձեզ», թե՞ «ես Ձեզ սիրում եմ»: Ինչպես չի հասկացել, որ Ռիթմի խնդիր է: Ամեն մի հեղինակ խոսքի իր Ռիթմն ունի:

Մի անգամ էլ անդրադարձավ Շիրվանզադեին՝ Պոռչյանի կապակցությամբ.

— Ես կողմնակից չեմ մեմուարների, որտեղ մարդը, թեկուզ և մեծ, իդեալականացվում է, հեղինակը կոծկում է նրա մարդկային թուլությունները: Բայց ինչպես կարելի է գրչակից ընկերոջը ծաղրել:

* * *

Նոր էի անցել Հայպետհրատ աշխատանքի, որ պատմրվածքի մրցանակաբաշխություն հայտարարվեց: Զորյանին հարցրի՝ մասնակցելո՞ւ է:

— Ոչ:

Զարմացա, որովհետեւ, որպես պատմվածքի վարպետ, կարող էր շահել:

— Ձեմ մասնակցում սկզբունքով:

Եվ բացատրեց.

— Մասնակցողը որպես կանոն շահելու հույս ունի: Այդպես էլ պետք է լինի, այլապես չի մասնակցի: Եվ այդ հույսից էլ ծնվում է մի ամբողջ հոգեբանություն Եւ միայն շահելու, այլև շահելու դեպքում ինչը ինչպես է լինելու: Ու հանկարծ... չի շահում: Հույսերի կործանում: Եվ մարդը պարզ չէ՞ որ ծանր է տանելու իր անհաջողությունը, քանի որ իրեն նախապատրաստել և հուսադրել էր հակառակ ոգով:

Մի փոքր հետո.

— Եվ ընդհանրապես, սիրելիս, եթե մի լավ բան է սպասվում իմ կյանքում, ինձ տրամադրում եմ բացասա-

րար՝ չի՛ լինելու, չի՛ հաջողվելու: Եթե գլուխ է գալիս՝ շատ
լավ, եթե ոչ՝ ոչինչ, մասնավանդ որ ինձ տրամադրել էի
պատրաստ լինելու բացասական լուծման:

* * *

Հայպետհրատը ձեռնամուխ եղավ Ստեփան Զորյանի
ժողովածուի հրատարակչությանը շորս հատորով: Եվ քանի
որ բոլոր գործերը չէին ընդգրկվելու՝ առաջարկեցի կոչել
«Ընտիր երկեր»: Դիմադրեց, ասաց, թի լավ չէ: Ես պըն-
դեցի և նա, դժկամելով, համաձայնեց: Երբ առաջին հա-
տորը լույս տեսավ, եկավ ու ասաց, թե ինքը լավ չի գտնւմ
իրեն, որ ժողովածուն լույս է տեսնում այդ հավակնոտ
խորագրով: Փորձեցի նորից համոզել, ասելով, թե ընդունված
է և շատերը, հատկապես բանաստեղծներն այդպես են
վերնագրում: Ռուս ժամանակակից գրողներից մի երկուսի
անունը տվի, որոնք այդպես էին կոչել իրենց ժողովածունե-
րը, մերոնցից մի երկուսին հիշեցի:

— Շատերի հետ գործ չունեմ: Դու ինձ լսիր, գեներալալե:
Վրացերեն այս խոսքը, որ նշանակում է սիրելիս՝ հաճախ
էի գործածում:

Ասաց, որ գրքի լույս տեսնելու առաջին գիշերը չի քնել,
մտածել է,՝ մտածել, մեղադրել իրեն, որ գիշեց, չպնդեց
իրենը:

Ասացի՝ Իսահակյանը չառարկեց, որ իր երկհատորյա
ժողովածուն նույն այդ վերնագրով լույս տեսնի:

— Իսահակյանը Իսահակյա՛ն է, սիրելիս, նա կենդանի
կլասիկ է. ինչ նրան թույլատրելի է, չի նշանակում, թե ինձ
ներելի է:

Խնդրեցի բացատրել:

— Ժողովածուն կոչել ընտիր երկեր՝ նշանակում է ան-
համաստ լինել: Ինչպե՞ս կարող է հեղինակն ընթերցողին
ներկայանալ, ասելով, թե ժողովածուի մեջ ընդգրկված եր-
կերն ընտիր են: Ընթերցո՞ղը պետք է որոշի՝ ընտի՞ր է թե
ոչ, մամոն՞ը, քննադատությո՞ւնը, բայց ոչ հեղինակը: Ա՛յ,
ուրիշ բան է, երբ հեղինակը արգեն չկա և նրա գործերից

ընտրութիւնն են կատարում և լույս ընծայում: Ուրիշը՝ հասկանալի է, բայց ինքը հեղինակը ուղղակի, թե անուղղակի իրեն գնահատական տա, տեսնված բան է:

Եվ նա այնպիսի համառությամբ պնդեց, որ հրատարակչութեան պատմութեան մեջ եղավ երևի չեղածը. «Ընտիր երկեր» վերնագիրը երկրորդ հատորից իր տեղը զիջեց «Երկերի ժողովածուին»:

Զորյանի գրույցների ժամանակ հայ գրողներից երկուսի անունը հաճախ էի լսում: Մեկը Թումանյանն էր, մյուսը՝ Տերյանը: Թումանյանի մասին խոսում էր հպարտությամբ, իսկ Տերյանի հանդեպ ուներ սիրահարվածի քնքշութիւն: Նա այն համոզման էր, թե հայկական բանաստեղծութիւնը եվրոպական կատարելութեան հասավ Տերյանի շափաթոյում: Թումանյանը նրա համար իղեալ էր: Եվ այդ հանգիստ ու հավասարակշռված մարդուն խիստ վրդովում էր Հովհաննես Թումանյանի հասցեին ուղղված ամեն մի քննադատութիւն:

Մի օր հետաքրքրվեցի, թե արեւմտահայ բանաստեղծներից որի՞ն է սիրում:

— Դանիել Վարուժան... մեծ բանաստեղծ է:

Հիացմունքով տվեց երկու անուն ևս՝ Դուրյան, Մեծարենց:

Հարցրի Սիւրմանթոյի մասին: Ասաց, թե իր վրա տպավորութիւն չի թողնում: Լավ հիշում եմ, որ նկատեց, թե նրա հայրենասիրութիւնը դեկլարատիվ է:

Գրաքննադատներից բարեկամութիւն էր անում Խորեն Սարգսյանի հետ:

Զորյանի երկերի ժողովածուի առաջին հատորն արդեն

պատրաստ էր տպագրության: Հարցրի, թե ինչ կարծիքի է, եթե մի առաջաբան գրվի: Ասաց, որ դեմ չէ: Հետաքրքրվեցի՝ իբրև հեղինակ ո՞ւմ է առաջարկում:

— Խորեն Սարգսյանին:

Մի պահ կանգ առավ, բայց ավելի վճռական, քան քիչ առաջ՝ ասաց.

— Միայն նա, ուրիշ ոչ ոք:

Զորյանի գործերի առաջին ընթերցողն էր Խորեն Սերգեևիչը և խորհրդատուն միաժամանակ: Անվերապահությամբ չէ որ ընդունում էր գրականագետ ընկերոջ դիտողությունները, բայց նրա նկատմամբ ավելի հավատ ուներ, քան մեկ ուրիշի:

Մի օր այսպես խոսեց Խորեն Սերգեևիչի մասին.

— Գուցե թուիքը մեծ չէ, բայց ունի ամենագլխավորը՝ գրականության զգացողություն: Քչերին է տրված: Եվ հետո՝ ազնիվ է գրականության նկատմամբ: Սա նույնպես շատ կարևոր է և գնահատելի: Ես հավատում եմ նրան:

* * *

Սիրում էր Գեղամ Սարյանին: Նրա մի քանի ոտանավորները անգիր գիտեր: Գեղամն էլ Զորյանին էր սիրում, բարձր էր գնահատում որպես գրողի և բարեկամություն էր անում նրա հետ:

* * *

Պատերազմից առաջ էր:

Գրականության և լեզվի ինստիտուտը հանձն առավ պատրաստելու հայ գրականության պատմության դասագիրք միջնակարգ դպրոցների 8,9 և 10-րդ դասարանների համար:

Այդ դասագրքի հեղինակներից էի: Գրել էի Հարություն Ալամդարյանին, Մեսրոպ Թաղիադյանին և Խաչատուր Աբովյանին նվիրված գլուխները:

Ստեղծվեց խմբագրական կազմ: Ընդգրկվեց նաև Ստեփան Զորյանը:

Խմբագիրները կարդացել էին դասագիրքն և իրենց դիտողություններն էին անում հեղինակներին, խորհուրդներ տալիս:

Հիշողությանս մեջ մնացել է Զորյանի դիտողությունը՝ բնաշխարհ բառի սխալ գործածության վերաբերյալ:

Գրել էի, հիմա բառացի չեմ հիշում, թե ինչպես, որ Աբովյանը բնաշխարհը լավ է զգում: Միտքս ափս էր, թե Աբովյանն ունի հայկական բնության զգացողություն:

Զորյանն ասաց.

— Բնաշխարհ բառն այլ իմաստ ունի, քան գործածված է: Խոսքը բուն երկրի, այսինքն՝ հայրենիքի մասին է: Հայաստանը բնաշխարհ է Հայաստանից դուրս ապրողների համար:

Միտքս մնաց և այլևս չմոռացա: Հիմա, երբ հանդիպում եմ բնաշխարհ բառի գործածությանը նույն իմաստով, ինչպես ես էի գործածել, հիշում եմ Զորյանին:

* * *

Գևորգ Էմինի «Նախաշավիղը» դեռ լույս չէր տեսել: Կարդացի Իսահակյանին, կարդացի նաև Զորյանին: Հավանեց, ասաց, թե անպայման շնորհք ունի տղան և պետք է գրական ասպարեզ բերել: Պետք է օգնել, որ ոտքի կանգնի:

Երբ գիրքը լույս տեսավ, ես «Սովետական գրականություն» ամսագրի խմբագիրն էի: Հարցրի՝ չե՞ր կամենա, արդյոք, գրախոսական գրել: Համաձայնեց, գրեց և, ինչպես այդ վայել է ավագին, շնորհավորեց նոր բանաստեղծի մուտքը գրականության:

* * *

Կրացավ Ավետիք Իսահակյանի ծննդյան 65-ամյակը: Զորյաններն այդ առթիվ 1941-ին հունվարի 19-ին ճաշ-կերույթ տվին: Գրական աշխարհից շատ մարդ կար:

Իսահակյանը, որին ուղղված էին բոլոր կենացները, խնդրեց մի թուղթ և մատիտով գրի առավ «Բինդյուլ» բանաստեղծությունը: Պատրաստվեց, որ կարդա: Բոլորը լռեցին: Վարպետը խնդրեց, որ մի ուրիշը կարդա: Բոլորին շատ դուր եկավ Իսահակյանի գործը:

Աղմկալի ծափերի մեջ կորան ոտանավորի վերջին բառերը: Վարպետը ձեռագիրը նվիրեց Զորյանին: Նորից ծափահարություն բարձրացավ:

Նորեն Սարգսյանը, որ թամադայություն էր անում, առաջարկեց հրապարակել ամսագրի առաջին իսկ համարում ու նայեց վարպետին: Վարպետն էլ հարցական նայեց ինձ: — Հիանալի առաջարկ:

Արձագանքեցի ես:

Նորեն Սերգենիշը ամփոփեց, ասելով, թե որոշումն ընդունվում է միաձայն, մանավանդ որ ամսագրի խմբագիրը համաձայն է, խմբագրական կոլեգիայի անդամներից չորսը ներկա են, մյուսներն էլ, հուսանք, որ դեմ չեն լինի:

* * *

Կարդացի Պարույր Սևակի առաջին ոտանավորներից՝ չոգևորվեց.

— Դատողական է, երկար է գրում, հստակ չի մտածում:

Մի այլ անգամ կարդացի «Ռեքվիեմ» շարքը, որը հաջորդօրն ուղարկելու էի տպարան ամսագրի հերթական համարում լույս ընծայելու համար, բայց խանգարողներ եղան և լույս չտեսավ: Ինչպես միշտ՝ ուշագիր լսեց, մի երկու տեղ հուզվեց, խնդրեց որոշ հատվածներ վերակարդալ:

— Թոհչք ունի, թափ, բայց խառն է, մի քիչ էլ մոլթ: Հուսանք, որ ժամանակին կհստակվի:

Որդին՝ Լևոնը պատմեց, որ հոր հիվանդանոցում եղած ժամանակը տարել է «Անլուելի զանգակատունը»: Հայրն առաջարկել է կարդալ: Լևոնն ասում է, որ ամբողջի մասին ոչինչ չասաց, բայց որոշ հատվածներից ազդվել էր:

Լրագրերը հաղորդեցին, որ Ստեֆան Յվայզը մահացել է, Ավելի ճիշտ՝ ինքն ու կինը անձնասպան են եղել:

Պատանեկության տարիներին շատ էի կարդացել Յվայզի նովելները, կենսագրական ակնարկները և միշտ հաճույքով, հետաքրքրությամբ, տարվելով: Որոշեցի խմբագրածս ամսագրում հեղինակի մահվանն անդրադառնալ, տպագրել նրա նովելներից գոնե մեկը: Կանգ առա «Անծանոթ կնոջ նամակի» վրա: Խնդրեցի Վահե Միքայելյանին թարգմանել: Մինչ այդ, որքան հիշում եմ, Յվայզ հայերեն չէր թարգմանվել:

Զորյանին խնդրեցի ամսագրի համար մի փոքրիկ հոդված գրել Յվայզի մասին: Հրաժարվեց: Նրա կարծիքով, լավ կլիներ հայերեն թարգմանել ու տպագրել Կոնստանդին Ֆեդինի այդ առթիվ գրած շատ լավ հոդվածը, որը կարճ է, սեղմ և այնքան լավ է, որ դժվար է գերազանցել:

Մտածեցի, որ լավ կլինի եթե Յվայզի նման հեղինակը ներկայացվի հայ ընթերցողին ավելի լայն: Այսինքն՝ հրատարակվի նովելների մի ժողովածու, ընտրելով լավագույնները: Զորյանը հավանություն տվեց մտքին: Կազմեցի թարգմանելի նովելների ցանկը և ցույց տվի Զորյանին: Ասաց լավ է, բայց ավելացրեց «Լեպորելլան», խոստանալով, որ ինքը կթարգմանի: Անմիջապես կապվեցի թարգմանիչների հետ՝ Երվանդ Տեր-Մինասյան, Համբարձում Մազմանյան, Արշավիր Խոնդկարյան: Որոշվեց, թե ով ինչ է թարգմանելու: Խնդրեցի Զորյանին հանձն առնել խմբագրությունը: Ասաց սիրով՝ և կարճ ժամանակից սեղանին դրեց «Լեպորելլայի» թարգմանությունը և խմբագրված ժողովածուն:

— Քիչ գրողների է կնոջ հոգեբանությունն այնպես հայտնի, ինչպես Յվայզին:

Եկա՛վ Պետհրատ և հարցրեց ծանոթ շեմ, արդյոք, Յանի «Զինգիզ խան» վեպին:

Չէի կարդացել:

Դիրքը թողեց մոտոս և ասաց, թե ինքը տրամադիր է թարգմանելու, եթե հրատարակչությունը վեպին ծանոթանալուց հետո համոզվի, որ արժե տպագրել:

Եվ հետո անհարմար զգացումով ավելացրեց.

— Դրամի կարիք ունեմ:

Ես ասացի, թե ինչո՞ւ է անհարմար զգում, մենք բավական մոտ մարդիկ ենք, կարող է անկեղծորեն ասել, որ իրեն փող է հարկավոր:

— Մոտ ենք, դրա համար էլ շեմ ասում: Հանկարծ չմտածես, թե շարաշահում եմ մոտիկությունը:

Հարցրի՝ ավելի լավ չի լինի՞, եթե հրատարակչությանը ինքնուրույն գործ առաջարկի:

— Պատրաստ ոչինչ չունեմ:

Մի փոքր հետո.

— Ավելի լավ է թարգմանեմ: Շատ եմ թարգմանել, սովոր եմ:

Հաջորդ օրը պայմանագիր կնքվեց նրա հետ՝ Յանի վեպը թարգմանելու համար:

Աղջիկս նոր էր ծնվել: Հետաքրքրվեց, թե անունը ինչ եմ դրել: Ասացի:

— Լավ է, մանավանդ տարածված էլ չէ:

Հետո խորհուրդ տվեց, որ գրի առնենք նրա հարցերը, պատասխանները, որպես անմիջական տրամաբանություն արտահայտություն օրինակների: Չափազանց հետաքրքիր քաներ են ասում և անսպասելի:

— Մեր Լիկիը, որ փոքր էր, մի օր հարցրեց, թե ինչպիսի է այս թուշունի անունը: Պատասխանեցինք՝ այսպես: Անմիջապես հարցրեց՝ իսկ ինչպե՞ս է ազգանունը:

Նար-Դոսի երկերի ժողովածուի հերթական հատորն էր ստացվել տպարանից: Զորյանը հատորը թերթելուց հետո ասաց.

— Շիրվանզադեի ընդգրկումը չունի, բայց մշակված հեղինակ է: Հավանում եմ լեզուն: Ոչ մի դիտողություն չես անի: Բառի ճաշակ ունի: Հետո, նուրբ հոգեբան է:

Ես նրա միտքը վերադարձրի դեպի Շիրվանզադեն:

— Մեծ խնդիրներ է դնում, ընդգրկումը լայն է, մասշտաբը մեծ, մեծապւան վեպի կարողության տեր: Հետո՝ թափ ունի: Բայց չունի Նար-Դոսի գրական կուլտուրան, լեզվի խնամքը, հոգեբանական թափանցման նրբությունը:

* * *

Մի օր խոսեց Վահրամ Փափազյանի մասին:

— Արտիստ է: Ոտից-գլուխ արտիստ:

Մի փոքր հետո.

— Բոլորը դերասաններ են, իսկ Փափազյանը արտիստ է: Ես նկատի չունեմ նրա գեղեցկությունը, որ իսկապես արտակարգ է, նկատի ունեմ նրա էությունը՝ միտքը, հոգին, հայացքը, շարժումը, ամեն ինչ արտիստական է:

Մի կարճ դադար:

— Զեմ հավատում, թե մեր թատրոնը մեկ էլ այդպիսի ծնունդ ունենա: Դարը մեկ են այդպիսիները աշխարհ գալիս. Իսկական հրաշք է: Արվեստի հրաշք է Փափազյանը: Եվ նրանով հպարտանալու փոխարեն՝ փայտն առած հետևից ենք ընկել, չիմանալով, որ Փափազյաններն այն արտակարգ անհատականություններն են, որոնք չեն հաշտվում կյանքի ընդունված կանոնների հետ՝ ամենաընդարձակ առումով:

* * *

«Վարդանանքի» (առաջին գիրքը) և «Պապ թագավորի» հրատարակությունները համարյա թե համընկան: Ավելի շուտ՝ ամիսների տարբերությամբ հաջորդեցին միմյանց: Նոր էր լույս տեսել առաջինը, երբ վաճառքի հանվեց երկ-

րորդը: Համեմատությունը դարձավ անխուսափելի: Կարծես այդ երկու պատմավեպերը մրցության էին դուրս եկել միմյանց հետ: Կարծիքները բաժանվեցին, մի կողմից՝ դեմիրճյանականներ, մյուս կողմից՝ զորյանականներ, մանավանդ որ վեպերի ոճաբանությունը տարբեր էր միմյանցից:

Սա երկու վեպի էլ հրատարակիչն էի, երկու հեղինակի էլ բարեկամը: Եվ վեճերի ժամանակ, հատկապես թեյասեղանների շուրջը, պաշտպանում էի «Պապ թագավորի» կողմնակիցներից «Վարդանանքը» և հակառակը:

Սա ո՛չ դեմիրճյանական էի, ո՛չ էլ զորյանական, ավելի ճիշտ՝ և մեկն էի, և մյուսը, համարելով, որ այդ ստեղծագործությունները համեմատելի չեն, երկուսն էլ գրական գոյության տարբեր իրավունքներով են գրականություն մտել:

«Սովետական Հայաստան» լրագրում լույս տեսավ իմ հոդվածը «Պապ թագավորի» մասին: Բավական ընդարձակ քննախոսական էր դա, որը նույն գործի մասին Ակադեմիայում կարդացածս դասախոսության համառոտագրությունն էր:

Սա բարձր էի գնահատում վեպը, գտնում, որ, իր գեղարվեստական արժանիքներից բացի, այս երկը պատմագիտական նոր ըմբռնում է արժարժում: Եվ դա ոչ միայն պատմական առանձին մանրամասների լուսաբանության առումով: Նաև հիմնական հարցի՝ Պապ թագավորի կերպարի մեկնաբանության տեսակետից՝ ընդդեմ Փավստոս Բուզանդից՝ եկող և դարերի ընթացքում ավանդական ուժ ձեռք բերած միտումնավորության: Հոգվածի վերջին մասը վերաբերում էր վեպի գեղարվեստական արժանիքներին ու թերացումներին:

Սա նկատեցի մի բան, բայց եզրակացություն չկատարեցի: Հոգվածը լույս տեսնելուց հետո բավական ժամանակ անց, հրատարակչությունում, համեմայն դեպս ինձ մոտ, ո՛չ Զորյանը երևաց, ո՛չ էլ Դեմիրճյանը: Եվ դա այն դեպքում, երբ օր չկար, որ Դեմիրճյանը չհայտնվեր, իսկ Զորյանը երկու-երեք օրը մեկ անպայման գալիս էր, թեկուզ մի կարճ ժամանակով:

Գրողների տանը հանդիպեցի Դեմիրճյանին, ինչ-որ հարց տվի՝ պատասխանեց կարճ։ Այդ դեռ ոչինչ։ Հեռացավ անմիջապես, այդ էլ կարծես ոչինչ, բայց, ինչպես ինձ թվաց հարցիս պատասխանելիս ձայնը կտրուկ էր, սառը և անբավական։ Չհասկացա պատճառը, և բնականաբար, վերագրեցի տրամադրության հանկարծակի փոփոխության՝ չմտածելով անգամ այդ վերաբերմունքը ու ինձ մոտ չգալը միմյանց հետ կապելու մասին։

Գրողների տանը, մի այլ օր, Զորյանին տեսա։ Նիստ էր։ Ուղեցի բարեկէլ՝ գլուխը շոշեց։ Ինձ թվաց, որ չնկատելու է տալիս։

Հետո պարզվեց, որ Դեմիրճյանի և Զորյանի վերաբերմունքն իսկապես փոխվել է, և պատճառը իմ հոգեվածն է։ Ե՛վ մեկն է նեղացած, և՛ մյուսը։

Զորյանը չէր սպասում, որ իր վեպի շուրջ մամուլում լույս տեսած դրվատական հոգեվածների կողքին կարող է հրապարակվել այնպիսին, ուր լինեն նաև քննադատական դիտողություններ։ Եվ հանկարծ հոգեվածի հեղինակն էլ՝ իր բարեկամը։ Չեմ կարծում, թե նա թույլ տար իրեն դիտավորություն վերագրել, բայց երևի այն համոզման էր, որ գոնե այդ ժամանակ, երբ ընթերցողները տաք-տաք վիճում էին և տարբեր գնահատականներ տալիս իր և Դեմիրճյանի վեպերին, չարժեք ընթերցողի ուշադրությունը հրավիրել իր գրքի պակասությունների վրա, մանավանդ որ հակված չէր ընդունելու, թե դիտողություններս արդարացի են։

Դեմիրճյանը ոչ մի նշանակություն չէր տալիս հոգեվածիս քննադատական մասին։ Նրա համար կարևոր էր հոգեվածի բուն՝ առաջին մասը, ավելի ճիշտ՝ հոգեվածի պաթոսը։

Նախ, ասաց, թե ավելի բարձր կարծիք ունեի իմ գրական ճաշակի մասին։ Երկրորդ՝ նա շատ զարմացած էր, թե ինչպես «Վարդանանքով» հիացողը կարող է «Պապ թագավորը» հավանել։ Եվ կամ՝ հակառակը։ Կամ-կամ։ Եվ, վերջապես, շատ էլ երկու վեպի հրատարակիչն էի, չէ որ մասնակից էի իր վեպի ծնունդին։ Իսկ երբ մի մարդ մի գաղափար պաշտպանում է դեռ նրա աշխարհ գալուց առաջ — խրատաբանում էր նա, — պետք է առավել ևս պաշտպան կանգնի

լույս աշխարհ գալուց հետո, մանավանդ որ իր իսկ խոս-
տովանությամբ ստացվել է ավելին, քան ինքը սպասում էր:

Դեմիրճյանի հետ հաշտվեցինք: Եվ նա այլևս դրան
չանդրադարձավ:

Զորյանի սառնությունն ավելի երկար տևեց, երևի մի ամսի
չափ: Մի օր էլ նրա հետ հաշտություն կնքվեց: Գրողների
և գրականագետների մի մեծ խումբ մեկնում էր Դսեղ՝
Ռումանյանի տուն-թանգարանի բացմանը: Խորեն Սարգս-
յանը, Զորյանն ու նրա որդին՝ ու ես հայտնվեցինք մի կու-
պիում: Հետո պարզվեց, Խորեն Սերգեևիչն է տոմսերն այդ-
պես վերցրել: Ճանապարհին, գիշերով, երբ Սարգսյանը քուն
մտավ, բացատրվեցինք:

Արևի ճառագայթ ընկավ սառույցի վրա...

Զորյանը նույնպես այլևս չվերադարձավ այս միջադե-
պին, նույնիսկ այն դեպքում, երբ խոսք էր բացվում իր
վեպի մասին կամ էլ «Վարդանանքի», որի գնահատությանը
երբեմն-երբեմն անդրադարձել ենք և վիճել, ունենալով տար-
բեր տեսակետներ:

* * *

Լույս էին տեսել Օլգա Գուլազյանի «Հուշերը»: Մի քանի
օր հետո Զորյանն ասաց.

— Եթե ուզեմ՝ գրող կդառնար:

Մի փոքր հետո.

— Այդ ինչ լավ է գրել մանկությունը: Թաղը, թաղի մար-
դիկ, դպրոցը, չէ՛, շատ լավ է գրված: Եվ մեկ էլ՝ Ի՞նչ հա-
մեստություն:

Լռություն և հետո.

— Վատ է հրատարակված: Մի՞թե չէր կարելի ավելի
լավ թղթի վրա տպագրել: Հետո ասաց, թե գուցե գրի այս
գրքի մասին:

* * *

Մի օր եկավ ու սեղանիս դրեց ոտանավորների տետր:

— Կարդա, հետո կխոսենք:

Տետրը տարա տուն և նույն օրը երեկոյան կարդացի մեծ

հաճույքով: Հեղինակն անպայման բանաստեղծ էր: Երկու կարծիք չէր կարող լինել այդ մասին՝ կազմակերպված շափածո, խոսքի կուլտուրա, թարմ պատկերներ, մտքի անսեթևեթ, կասեի անպաճույճ արտահայտություն, միաժամանակ անմիջական տպավորությունների ուժգնություն, անկեղծ հուզականություն: Տեսրի վրա անունը չկար:

Երկու օր հետո հանդիպեցինք: Իմ տպավորությունն ասացի:

— Չէի կասկածում, որ կհավանես: Հեղինակը Բաքվում ապրող մի երիտասարդ՝ է՝ Համո Սահյան: Շատերից, որ արդեն անուն ունեն, լավ է: Հավատացած եմ, որ առաջ կգնա: Պետք է օգնել, պետք է տեր կանգնել:

Ու առաջ, թե ինչպես կարելի է կապվել բանաստեղծի հետ և խնդրեց մտածել նրա գրքույկը հրատարակելու մասին: Խոստացավ գրքույկի խմբագիրը լինել:

Ես նամակ գրեցի հեղինակին: Մի որոշ ժամանակ անց լույս տեսավ Համո Սահյանի առաջին գրքույկը՝ «Որոտանի եզերքին»: Զորյանը այնքան արժեք էր տալիս Սահյանին և նրա հետ հույսեր էր կապում, որ մի օր էլ զեկուցում կարդաց: «Գրական թերթում» լույս տեսավ Նաիրի Զարյանի հոդվածը. ոգևորված էր ասպարեզ եկած նոր բանաստեղծով:

* * *

Մի օր բավականին անախորժ վեճ տեղի ունեցավ իմ ու Զորյանի միջև:

Նյութը «Վարդանանքն» էր, ավելի ճիշտ՝ վեպի մի մանրամասնությունը, որով հիացած, անզգուշություն ունեցա շեքսպիրյան ոգով գրված համարել:

Խոսքը վերաբերում է հետևյալ տեսարանին. պարսիկներից ուրպես հայ անիրավված Կողակը իր վրեժխնդրությանը հագուրդ տալու համար, գիշերվա մի ուշ պահի, երբ իր իշխանը խոր քուն էր մտել, միզելով հանգցնում է ատրուշանը:

Ես գարմադած էի, թե այդպիսի տեսարան հորինելու

համար գրողի միտքը որքան հանդուգն պետք է լինի: Երկրորդ, համոզված չէի, թե տվյալ հոգեվիճակն արտահայտելու համար կարելի էր գտնել մի ավելի ազդեցիկ մանրամասն, քան դա է: Եվ, վերջապես, գեղարվեստական կատարումը՝ զուսպ, խորը, քչով շատ ասված և այլն:

Զորյանը համաձայն չէր: Ես մեղմ եմ ասում, նրան պարզապես վրդովում էր իմ հիացումը: Նա հնարավոր էր համարում, որ գրական հարցերի շուրջ մոտիկ մարդիկ կարող են տարբեր տեսակետներ ունենալ: Բայց այս դեպքում նա չէր հասկանում ու ոչ մի կերպ չէր կարողանում հաշտվել այն մտքի հետ, որ կարելի է հավանել մի տեսարան, որ պարսավելի պիտի համարվի:

Զորյանը վեճերի ժամանակ պահում էր իրեն հանգիստ, առարկում էր առանց կրքի, ավելի տրամաբանելով, համաշխարհային գրականությունից օրինակներ բերելով: Այս անգամ այդպես չէր: Վրդովված էր:

— Գրականությունից դուրս բան է այդ տեսարանը: Միզե՛լ...

Նա չէր հասկանում, չէր պատկերացնում, որ միղելը կարող է գեղարվեստական պատկերացման առարկա դառնալ: Չէր հասկանում, զարմանում էր և միանգամայն անկեղծ:

Ես էլ ասում էի, թե ամեն ինչ էլ կարող է պատկերացվել ու պատկերվել: Հիշում էի Շեքսպիրին, օրինակ էի բերում Ռեմարկի վեպից: Նայած ինչի համար է արվում, և գլխավորը, ինչպես է արվում:

— Նատուրալիզմ է դա: Հակաէսթետիկական...

Եվ նայում էր ինձ հիասթափված հայացքով: Ես այն տպավորություն էի, որ հարցը ոչ «Վարդանանքին» է վերաբերում, ոչ էլ Դեմիրճյանին, այլ գեղագիտական ելակետին: Տարիների ընթացքում ճանաչելով ինձ, նրան թվում էր, որ իր նման՝ ես նույնպես չպիտի հավանեմ: Մինչդեռ խնդիրն ավելի խոր արմատներ ուներ՝ արվեստի առարկան սահմանափակված է, թե անսահմանափակ:

Վեճը տեղի էր ունենում թեյասեղանի շուրջը: Եվ տանեցիք, թեև լուռ էին, բայց անհանգիստ հետևում էին խոսք ու

պատասխանին: Լավ հիշում եմ, որ տիկին Սաթենիկը, կամենալով վերջ տալ անախորժ վեճին, ասաց.

— Այդպես էլ կլինի, այնպես էլ, դուք ինչո՞ւ եք արյուն պղտորում:

Եվ առաջարկեց ինձ թուզի մուրաբա վերցնել, և այդ պահին նայեց ինձ, հասկացնելով, թե լավ կլինի խոսակցութեան նյութը փոխել: Ու հակառակ իմ խոր հարգանքին դեպի տիկին Զորյանը և միաժամանակ անկեղծ ցանկութեանը՝ վերջ տալու վեճին, չկարողացա շեղել հունը: Դա իմ ուժերից վեր էր:

Զորյանների տանը ես մնում էի երկար, երբեմն մինչև գիշերվա ժամը մեկը, նույնիսկ երկուսը: Եթե փորձ էի անում գնալու՝ տանտերն ասում էր.

— Ինչո՞ւ ես շտապում, դեռ վաղ է: Նստիր, նստիր, նոր ենք խոսքի ծերը բացել:

Տեսնելով, որ չեմ կարողանում փոխել նյութը, որոշեցի գնալ և օգտվելով դադարից՝ բարձրացա աթոռից ու ասացի՝ «արդեն ուշ է, գնամ», թեև դեռ տասնմեկն էլ չկար:

Զորյանն այս անգամ ինձ պահելու փորձ չարեց:

Երբ տուն էի գնում՝ Զորյանները, այդ թվում և Ստեփան Իլյիշը, միշտ խմբվում էին միջանցքում՝ հյուրին ճանապարհելու համար: Դա նրանց տան սովորութիւնն էր, ով էլ լինէր հյուրը: Ստեփան Իլյիշն ամեն անգամ կրկնում էր նույնը.

— Չուշացնես զաւր:

Այս անգամ ոչինչ չասաց:

Տարիներ են անցել, Զորյանը չկա: Ես էլ արդեն փոքր չեմ, երևի ավելի տարիք ունեմ, քան Զորյանը հիշածս վեճի ժամանակ, ու թեև այն կարծիքի չեմ, թե իրավացի չէի, բայց, անկեղծ ասած, կկամենայի, որ այդ վեճը եղած չլինէր ու ես իմ ավագ ու թանկագին ընկերոջ խաղաղ հոգին վրդոված չլինեի: Ու եթե հիմա պատմում եմ, ապա նրա համար միայն, որ այդ վեճը պարզում է Զորյանի գեղագիտութեան ինչ-որ կողմեր:

Մի օր ավագ որդին՝ Լևոնը, պատմեց «Պապ թագավորի» հետ կապված մի դեպք:

— Անցնում էի բուլվարի մոտով, տեսա բազմություն է հավաքված մեկի գլխին: Մի մարդ, երեի ութսունին արդեն մոտ, գիրք էր կարդում, ընդհատում էր ընթերցանությունը, բացատրություններ տալիս լսողներին, հետո նորից շարունակում կարդալ, կրկին բացատրություններ տալ: Ավելի մոտ կանգնեցի, որ իմանամ, թե ինչ գիրք է կարդում. «Պապ թագավորն» էր:

Զորյանը հուզվեց, Վեպը մոտք էր գործել ընթերցող լայն շրջանները: Նշանակում է հասել է նպատակին:

* * *

Ասում էր, թե ինքը հաճախ է անդրադառնում Պուշկինին:

— Պուշկինը խաղաղություն է բերում հոգուս: Ահա քեզ ներդաշնակության իդեալ:

Մի օր ձեռին տեսա Աննա Ախմատովայի բանաստեղծությունների նոր լույս տեսած ժողովածուն:

* * *

Մի օր ասաց.

— Ժամանակ որ ունենամ՝ գրելու եմ իմ գրքերի պատմությունը: Դոգերինը կարդացել ես: Ա՛յ, մի այդպիսի գիրք էլ ես միտք ունեմ գրելու: Երբեմն դրանք շատ-շատ հետաքրքիր կողմեր են ունենում:

Այդ կապակցությամբ խոսք բացվեց գրողի ստեղծագործական կյանքի, նրա խիստ անձնական յուրահատկությունների, նախասիրությունների և հակումների մասին և այդ առթիվ հիշեց, որ Բակունցն իրեն ասել է, թե պատմվածք կամ վեպ գրելիս իր ամենասիրելի զբաղմունքն արդեն գրված երկը արտագրելն է:

Զորյանի ծննդյան 60-ամյակը նշվեց: Երեկոն տեղի ունեցավ ռուսական թատրոնի շենքում: Դահլիճը լիքն էր, բայց իրեն արժանի ջերմություն չկար: Ես այդպես էլ չհասկացա, թե ի՞նչն էր պատճառը, լավ չէին կազմակերպել, թե՞ մի այլ բան: Վերջը խոսքը տվին հոբելյարին, նա էլ գործը բոլորովին փչացրեց: Ասաց, որ ինքը գրականությունը զբաղվել է իր ազատ ժամերին, երբեք չի մտածել, թե հասարակական գործ է կատարում կամ ժողովրդին ծառայություն է մատուցում, ոչ էլ այն կարծիքի է, թե ինքը մեծ վաստակներ ունի, որ իրավունք համարեր մի այսպիսի հանդեսի, և այս երեկոն էլ կազմակերպվել է հակառակ իր կամքի:

Ոնց որ բռնես ու քեզ համար եկած հարգող մարդկանց զխին սառը ջուր լցնես:

Ներկաները դժգոհ մնացին: Ըստ երևույթին գտան, որ համեստությունն էլ մի չափ ունի, որին հասնելիս պետք է կանգ առնել: Չափի զգացումով աչքի ընկնող Զորյանն այդ օրը խախտեց՝ ծայրահեղության հասնելով:

Երկու օր հետո մոտն էի: Անդրադարձանք հոբելյանին:

— Ինձ սխալ հասկացան,— ասաց Զորյանը,— ուզում էի ասել, թե ես ավելի թարգմանությունը եմ զբաղվել, քան գրականությունը:

Մի պահ լռելուց հետո.

— Ոչ մի հոբելյան, այլևս ոչ մի հոբելյան:

Ու նա չէր հասկանում, թե այդ ինչպես կարողացան համոզել իրեն, որ հոբելյան անի: Նա հոբելյանների գնում էր, մասնակցում եթե պետք էր, սիրով խոսք էլ էր ասում: Բայց չէր պատկերացնում իրեն հոբելյարի վիճակում: Ուշադրության բացարձակ կենտրոնում գտնվելը հակառակ էր նրա բնության: Եվ նա շատ էր զարմանում ու չէր ներում իրեն, որ ուրիշների խելքով ընկած՝ համաձայնել է:

— Ոչ մի հոբելյան այլևս:

կրկնեց իր քիչ առաջ ասածը՝ երդում տվողի լրջությամբ:

— Այ՛ կտեսնես:

Եվ փոխեց խոսակցության նյութը:

* * *

Սարգիս Մելիքսեթյանի «Հովհաննես Աբելյան» աշխատությունն էր լույս տեսել: Մոտոն էի, թերթում էր գիրքը: Հարցրի, թե շա՞տ է տեսել Հովհաննես Աբելյանին և ի՞նչ կարծիքի է:

— Շատ եմ տեսել: Մեծ դերասան էր անպայման, բայց կոպտություն ուներ և ինչ-որ տեղ էլ անմշակ էր: Հողի տարերքը ուժեղ էր մեջը, նրան կարելի էր համեմատել մեր լեռների հետ: Ոչ առաջ, ոչ էլ հետո մեր դրամատիկ դերասաններից ոչ մեկի խաղում այդքան հայկականություն չեմ տեսել:

Մի պահ լռեց, մտածեց կարծես և շարունակեց.

— Գիտե՞ս, եթե մշակվեր՝ մի բան գուցե և կորցնեիր: Գուցե և այն չլիներ:

Հարցրի, թե ինչ դերեր է հավանել:

— Էլիզբարովը: Հոյակապ էր, բայց ոչինչ չէր հասնի Բարխուդարին: Կոթող էր:

Հարցրի, թե իր կարծիքով ով է հիմա շարունակում Աբելյանին:

— Հրաչյա Ներսիսյանը: Բայց սա կարծես ավելի մշակված է, քան նա, թեև նրա թափը չունի: Աբելյանը ինձ վրա ջրվեժի տպավորություն է թողել միշտ:

Դադարից հետո.

— Չափազանց հուզական էր, անմիջական, անկեղծ, երբեք անտարբեր չեմ նայել: Դրամատիկ պահերին արցունքները վազում էին աչքերից. լալիս էր և լացացնում: Ասում են, թե դերով այնպես էր ապրում, որ փորձերին էլ էին աչքերն արցունքոտվում: Հա՛, այս էլ ասեմ, որ ոչ մի հայ դերասան չունեիր առնականության և քնարականի Աբելյանի ներդաշնակությունը: Աբելյանից հետո մեկ էլ Հրաչյան:

Հարցրի, թե անկախ կերպարից, ինչ խաղում էր Արեւ-
յանը, ունե՞ր հոգեկան աշխարհի մի անկյուն, որ իրենն էր.
միայն իրենը, իր անվան հետ կապված:

— Դժվարանում եմ ասել: Մասնագետ չեմ:

Մի պահ լուռ մնաց:

— Գուցե... Չէ՛, չէ՛, դժվար է ասել:

Մի շաբաթ հետո մոտն էի և նա ասաց.

— Գտա՝ անարդար կերպով հալածվածի ճնշվածության
դրաման:

* * *

Լույս էր տեսել Դեմիրճյանի «Քաջ Նազարը»՝ իմ առա-
ջաբանով:

Ասաց, որ կարդացել է առաջաբանը, բայց կարծիք
չհայտնեց: Դա մեծ մասամբ նշան էր չհավանելու:

Մի փոքր հետո ասաց, թե իր խոր համոզումով «Քաջ
Նազարի» մշակումներից լավագույնը, այնուամենայնիվ,
մնում է Թումանյանինը: Նա հարազատ է ժողովրդական
մտածողությանը, ոգուն: Իսահակյանի մշակումն էլ առանձ-
նապես սրտովը չէր, թեև գտնում էր, որ հետաքրքիր է:

Հետո հարցրեց՝ իսկ ծանոթ է ինձ Շանթի մշակումը:
Չէր կարդացել, լսել էր դրա մասին: Հետաքրքիր է, թե ի՞նչ
ուղղությամբ է տարել, հեքիաթի ո՞ր կողմերին է ավելի
ուշադիր եղել:

* * *

Ժամանակին գրառում չեմ արել և այդ պատճառով
զգուշանում եմ Զորյանի խոսքը բերել բառացի: Չեմ հիշում
առիթմ ինչ էր, բայց նա այն միտքը հայտնեց, թե ինքը
հիանում է գրողի թափով, բայց հաճախ գրողը հենց իր
թափից դառնում է անհավասար, և նկատեց, որ հեղեղն իր
հետ ինչ ասես չի բերում: Գնահատելով հանդերձ՝ ասաց, թե
ինքը գերադասում է այն գրողներին, որոնք կարևորություն
են տալիս մշակմանը, բառի ստույգ ընտրությանը, ներքին
տրամաբանությանը, կառուցվածքին, մասերի համաչափու-

թյանը, մանրուքների նկատմամբ ուշադիր լինելուն, որի բացակայությունը հաճախ բերում է աննեղելի վրիպումներ, թափթփվածություն: Վերջապես, երբ հեղինակը գրում է այնպես, ասես, ինքը չկա:

Եվ հետո, հիշում եմ, որ ավելացրեց, թե շատերը զարմանում են, թե ինչու ինքը չի հավանում այսինչ կամ այնինչ համբավի հասած գրողին: Դա նրան ժխտելու փորձ չէ, այլ գրական նախասիրություն:

* * *

Ուզեցի իմանալ, թե ինչ կարծիքի է Շանթի մասին:

— Ահա մի հեղինակ, մի դրամատուրգ, որ ներկայանալի է նաև այլ ժողովուրդների համար ավելի, քան մեր շատ և շատ գրողներ:

Հարցրի, թե պիեսներից ո՞րն է հավանում, արդյոք «Հին աստվածներ»:

— Հաջողության բաժինն ընկավ «Հին աստվածներին»: Ի՞նչ էր կատարվում հայ մտավորականության հետ «Հին աստվածների» առաջին ներկայացումների ժամանակ... Երևի հայ թատրոնն այդպիսի օրեր չի ունեցել: Գուցե մեկ էլ Պետրոս Ադամյանի ժամանակ: Շանթին գալիս էին նայելու վրացիներ, ռուսներ, ադրբեջանցիներ: Թարգմանվեց ռուսերեն, այն էլ երկու անգամ: Նաև իտալերեն...

Կարճատև լուսնություն:

— Բայց ըստ իս՝ գլուխ-գործոցը, «Կայսրն» է: Կուռ կառուցվածք: Ոչ մի ավելորդ տեսարան:

Մի պահ կանգ առավ:

— Ինչպիսի՞ Օհան Գուրգեն էր Փափազյանը: Երևի չեն տեսել: Այդպես էլ կարծում էի, դու այն ժամանակ փոքր էիր, իհարկե:

* * *

Մի օր խոսք բացվեց Գուրգեն Մահարու մասին:

— Մահարու բանաստեղծությունները չեմ սիրում: Ար-

ձակը հավանում եմ: Իմ կարծիքով նա բարձր է ուրիշ ար-
ձակագիրներին, որ ավելի մեծ անուն ունեն:

Հետաքրքրվեցի, թե ի՞նչն է նրան գրավողը:

— Նախ՝ բնական է: Ու երկրորդը՝ գուցե մեզանում
միակն է, որի հումորը վշտախառն է: Դա ես համարում եմ
մաքուր հայկական առանձնահատկություն:

* * *

Ես մի ժամանակ տառապում էի բառաստեղծության ցա-
վով: Գրական թանգարանում աշխատած ժամանակս ավտո-
գրաֆ բառի թարգմանությունը գտա՝ ինքնագիր: Նրբ ասի
ինձ հետ աշխատող ընկերներին՝ ուրախացան, ոգևորվեցին,
իմ «հայտնություն» օրը Զորյանի մոտ էի: Նրան էլ ասացի,
նա էլ հավանություն տվեց, գովեց: Բոլորիս սպասում էր
հիասթափություն: Ես հեծանիվի գլուխը նորից անողի վի-
ճակումն էի: Այդ բառի հայտնությունն արվել էր վաղուց,
դեռևս անցյալ դարի 90-ական թվականներին: Թանգարա-
նային զբաղմունքիս կապակցությամբ անհրաժեշտ եղավ
թերթել Ռափայել Պատկանյանի՝ Դևոբգ խալաթյանի խմբա-
գրությամբ հրատարակված երկհատոր ժողովածուն, որի
առաջաբանում էլ այդ բառը կար: Եվ հենց այն իմաստով,
ինչ առաջարկում էի ես:

Սառը ջուր մաղվեց բոլորիս վրա:

Երեկոյան նորից Զորյանի մոտ էի: Ասացի, հանգըս-
տացրեց.

— Շատ մտածելու պետք չկա: Ստեղծվել է, բայց կիրա-
ռում չի գտել: Հիմա պիտի գործածել:

Մի քանի տարի անց, Պետհրատում եղածս ժամանակ,
հրատարակության էի պատրաստում Հովհաննես Հովհան-
նիսյանի ընտիր երկերի մի փոքրիկ ժողովածու: Ռուսական
հրատարակություններից ինձ ծանոթ էր վերնագրային հաս-
կացողությունը: Մտածեցի, որ լավ կլինի, եթե մենք էլ
ունենանք նույն վերնագիրը՝ Հատընտիր: Հրատարակչույթու-
նում առարկողներ կային, խորհուրդ չէին տալիս, ասում
էին, թե ճիշտ կլինի ռուսական Избранное-ն հայերեն

արտահայտել ոչ մեկ բառով՝ երկերի հատընտիր ժողովածու։
Զորյանը և Սարյանը եկել էին հրատարակչություն։ Ասացի նրանց։ Զորյանը հաստատեց։ Սարյանը թե՛ այդ բառը չունե՞նք։

Զորյանը թե։

— Ունենք, բայց ոչ խորագրի հասկացողությամբ։ Մի վախենա, դիր։ Կանցնի և կտարածվի։

Ասացի հրատարակիչ ընկերներին խորհուրդ։

— Վայ թե ճիշտ են ասում,— դարձավ Սարյանը Զորյանին։

— Կարծում եմ, որ ոչ։ Գործածիր, մի վախենա։ Կարճ ժամանակից կերևա՝ ճիշտ է, թե ոչ։

Եվ հետո ավելացրեց.

— Մի խորհուրդ տամ քեզ. առիթ որ լինի՝ մի ուրիշ գրքի վրա էլ դիր նույն վերնագիրը, թող հաստատվի։

Հետեւելով Զորյանի խորհրդին մի տարի էլ չէր անցել նույն վերնագիրը դրի Մայակովսկու ժողովածուն հրատարակելիս։ Մի քանի տարի անց, չեմ հիշում 1945-ին էր, թե 1946-ին, այդ վերնագրով հրատարակեց իր ժողովածուն նույնիսկ Գեղամ Սարյանը։ Հետո նաև Հովհաննես Շիրազը։

Եվ այսպես, «Հատընտիրը» մտավ գործածության մեջ։

Տարիներ անցան։ Թատերական մի հավաքույթի, որին ներկա էր և Զորյանը, գործածեցի մի բառ՝ ընդերել։ Նա ուշադրություն դարձրեց դրա վրա։ Ես ասացի, որ ВНЕДРИТЬ բառն եմ հայերենի թարգմանել, բոլորը գործածում են արմատավորել, այսինքն՝ укоренить։

Զորյանը մտածում էր։

— Երեակայիր, ինձ դուր է գալիս։ Բայց վախենում եմ արմատ չծգի։ Լեզուն զարմանալի բան է, մեկ էլ տեսար՝ չընդունեց։

Զորյանի կասկածն 'անհիմն չէր։ Իմ ուսանողներից մեկը գործածեց մի քանի անգամ, հետո դադարեց։ Վերջերս դարձյալ հանդիպեցի իմ մի ուրիշ ուսանողի հոգվածում։ Զեմ հասկանում՝ չի մտնո՞ւմ, թե դժվար է անցնում։ Ճիշտ ու հաջող գտնված բառը միանգամից է գործածություն գտնում, և այնպես՝ ասես առաջին անգամ չէ որ գործածվում է։

Մի անգամ էլ, զրույցի ժամանակ, անդրադարձանք բառաստեղծությունը:

— Նոր բառ ստեղծելը այնքան էլ հեշտ գործ չկարծես: Լեզու իմանալը քիչ է և ցանկություն ունենալն էլ բավական չէ: Բայց նորաստեղծ բառը գնահատել կարողանալն էլ հեշտ գործ չէ:

Ու բերեց երկու օրինակ:

— Ելույթ բառը ստեղծել է Թադևոս Ավդալբեկյանը: Աբեղյանը սկզբում չէր հաշտվում, նույնիսկ ծաղրում էր: Կամ էլ, օրինակ, օճրազ-ը օբրազ էինք գրում, կամ՝ պատկեր, վերջը Տիգրան Հախումյանը գտավ՝ կերպար, բայց արի տես, որ Լևոն Քալանթարը չէր ընդունում, ասում էր երկար է և առաջարկում էր կերպ:

Լռեց:

— Հիմա որ ժամանակ է անցել ու այդ երկու բառն էլ սովորական են դարձել, մարդ նախ զարմանում է, որ դրանք չեն եղել ու վաղուց չեն ստեղծվել, երկրորդն էլ՝ զարմանում ես, որ Աբեղյանի ու Քալանթարի նման մարդիկ միանգամից չկարողացան ընկալել: Եվ այն դեպքում, երբ Աբեղյանը բառաստեղծման փորձ ուներ: Գիտե՞ս չէ, որ ռազմական տերմինների բառարան է կազմել, նաև բժշկական տերմինները մշակողներից է:

Մի օր ասաց.

— Օտար բառերի առատ գործածությունը չի կարող կասեցնել լեզվի զարգացումը, եթե միայն ծայրահեղության չհասցվի, ինչպես նաև օտար բառերից խուսափելու միակողմանիությունը:

Լուռ մնաց:

— Լեզվի պահպանման ամենակարևոր ազդակը մտածողությունն է: Սրա խախտման առաջն է հարկավոր առնել, պետք է այնպես անել, որ մտածողությունը պահպանի իր

ազգային-ժողովրդական հիմունքները, երբեմն-երբեմն
թարմանալով այլ լեզուներից փոխառումներ անելով: Բայց
դա պետք է արվի շատ զգույշ, չափն իմանալով: Շարահյու-
սությունն է գլխավորը, դա որ հայկական եղավ, մնացածը
վախենալու չի:

Մի պահ կանգ առավ:

— Այս ասպարեզում դեղագործի զգուշությունն է պետք.
եթե դեղագործը սխալվի և մի միլիգրամ ավել տա դեղը՝
ճակատագրական կլինի հիվանդի համար: Այստեղ էլ շնչին
անզգուշությունն իր հետ անուղղելի ավերումներ է բերում:

Հայացքը կենտրոնացավ:

— Զարմանաս, եթե ասեմ, որ լեզուն պահպանում են
մեկ նրանք, որ մի այլ լեզու չգիտեն, մեկ էլ նրանք, որ
շատ լեզուների են տիրապետում, բայց հայերենը հիմնավոր
գիտեն: Այդպիսին էր, օրինակ, Հովհաննես Հովհաննիսյանը:
Հայ գրողներից ոչ մեկը հայերենի նրա զգացողությունը
չունի: Գրաբար գիտեր: Գիտեր նաև բարբառներ: Գիտեր
օտար լեզուներ՝ ֆրանսերեն, գերմաներեն, անգլերեն: Գիտեր
հին լեզուներ՝ լատիներեն, և հունարեն: Իսկ ռուսերեն՝ գի-
տեր այնպես, որ ռուս գրողները նրա մոտ խորհրդի էին
զալիս: Ա՛յ ումից պետք է իսկական հայերեն սովորել:
Հա՛, այս էլ ասեմ, եթե չգիտես: Հովհաննիսյանը իրավա-
բանական տերմինների ստեղծման հանձնաժողովի մեջ
էր: Եվ եթե մենք հիմա ունենք այդ ասպարեզից օրինակելի
տերմիններ, ապա, իհարկե, Հովհաննիսյանի շնորհիվ:

* * *

Մի օր ասաց, թե գրականագետներից իր վրա միշտ լավ
տպավորություն է թողել Վահրամ Թերզիբաշյանը:

— Լավ գրականագետ է, ես նրա հոգվածները հաճույքով
եմ կարդում: Ճաշակ ունի, շատ բան դիտե, մոտեցրած ունի,
հետաքրքիր մտքեր, դատողություններ ունի, նաև սուր աչք,
դիտողականություն: Բայց ափսոս, որ թափթփված հեղի-
նակ է, գրածը մշակելու, կատարյալ դարձնելու սեր չունի:

Մի օր ցերեկով, ժամը երկուսը կլինեիր, գնացի՝ առանց զանգահարելու: Շտապ գործ ունեի: Այն ժամանակ Զորյանները ապրում էին Աբովյան փողոցում:

Հարցրի՝ չե՞մ խանգարում:

— Բա դու չգիտե՞ս, գենացվալե, որ ես մինչև մեկն եմ աշխատում:

Ու ձեռքը տարավ դեպի սեղանը, որի վրա թանաքաման էր դրված, գրիչ և մեկ էլ գրելու պատրաստ թուղթ, կողքին՝ ձեռագիր:

Հարցական նայեցի իրեն:

— Աղայանի մասին գրածս հուշն է: Վաղը սկսելու եմ արտագրել: Դե՛, այսինքն՝ մշակել, լավացնել:

Հետո նկատեցի, որ չգրված թղթի վրա գրել էր վերնագիրը՝

«Ղազարոս Աղայան»:

Այդ ժամանակ նա տպագրության էր պատրաստում հուշերի գիրքը:

«Սիրանուշ» գրքից մի օրինակ տարա Զորյանին, թերթեց, մի երկու լուսանկարի վրա կանգ առավ, երկար նայեց: Հասկացա, որ միտքը գնաց ետ, դեպի Սիրանուշի ժամանակները: Բայց ձայն չէր հանում:

Հարցրի՝ տեսե՞լ է բեմում:

— Շատ:

— Իսկ կյանքո՞ւմ:

— Մի երկու-երեք անգամ:

Ու հետո՞ ասաց.

— Փայլում էր բեմում, կախարդում հանդիսատեսին, իսկ կյանքում համեստ էր, վերին աստիճանի համեստ, պահում էր իրեն շատ սովորական, չընդգծելով իր ով լինելը: Զեմ հիշում, որ հավաքույթների ժամանակ իր անձը կենտրոն դարձնեիր:

Զորյանի ելույթները գրական մեծ հավաքույթներում՝ համագումար, պլենում, ընդհանուր բնույթի էին՝ լեզվի մաքրության խնդիր, վարպետության հարցեր, կլասիկներից սովորելու անհրաժեշտություն և այլն: Այդ մասին խոսում էին, ասում, թե ինչու ասածը չի մասնավորեցնում մեր գրականության օրինակներով: Ես ուզեցի, որ նա իմանա դա և մի օր հաղարդեցի իրեն, ասացի, թե դժգոհում են, բայց անուններ չտվի:

Նախ՝ չհամաձայնեց, ասաց, որ դա այնքան էլ այդպես չէ ու հիշեց, թե ինչպես է ինքն իր ելույթներում զնահատել նոր, շնորհալի բանաստեղծների և արձակագիրների առաջին գործերը և հետո գրական առանձին երկերի քննարկումների ժամանակ քննադատական դիտողություններով ելույթներ ունեցել: Եվ ասես, իբրև ասպացույց, իր ասածների՝ գրասեղանի գզրոցից հանեց ու դրեց իմ առջև մի հոդված, բավական ընդարձակ, որ, ինչպես ինքն էր ասում, գրել էր 1950-ին, բայց հետո հրաժարվել տպագրելու մտքից: Նա ասաց, որ այդ հոդվածը գրական մանրուքների մասին է՝ դիտողական, հոգեբանական, տրամաբանական, համեմատությունների, լեզվական թերացումների:

Ասաց, թե մեր գրողները գրական մանրուքին կարևորություն չեն տալիս, մինչդեռ անցյալում քննադատությունը Տոլստոյի նման հեղինակին կշտամբել է «Պատերազմ և խաղաղություն» վեպի մի արտահայտության համար՝ «քսաներկուամյա գեներալ», գրում էին՝ չի կարելի հասկանալ, թե ի՞նչ է ուզում ասել. գեներալն է քսաներկու տարեկան, թե՞ քսաներկու տարվա գեներալ է:

Եվ նա ասաց, որ ինքը վերցրել է մեր վեց արձակագրի գրքերի առաջին էջերը, որպեսզի չմտածեն, թե ինքը տենդեցի՞ր և է ուրոնել ու գտել է գրքի թույլ էջեր:

— Առաջին էջը, — նկատեց նա, — հեղինակները սովորաբար մշակում են ավելի խնամքով:

Բացի այդ՝ քննության էր առել նաև չորս բանաստեղծի նյութերը, հիմք ունենալով «Սովետական գրականության

անթալոգիան» մտածելով, որ, եթե արժանացել են տեղ գրավելու հոբելյանական հրատարակության մեջ, ուրեմն նրանք հեղինակների լավագույն էջերից են:

Ու նա պատմեց, որ հոգվածք տարել է «Սովետական գրականություն», Սողոմոն Սողոմոնյանին,— նա էր խմբագիրն այն ժամանակ: Սա էլ հավանել է ու ասել, թե անպայման կտպագրի: Մի օր էլ հավաքում է կոլեգիայի անդամներին, որ Զորյանը կարդա հոգվածը: Ոչ ոք չի առարկում, բայց չի հրատարակել, հասկանալով, որ համատարած ու փոխադարձ գովեստների այդ շրջանում իր հոգվածը չի ներվի, և առաջին հերթին հենց այն գրողների կողմից, որ դժգոհում են, թե Զորյանն ընդհանուր է խոսում: Ու այդպես, ահա քանի տարի է՝ հոգվածը մնացել է իր թղթերի մեջ:

* * *

Ի տարբերություն Դեմիրճյանի՝ գրական երկի մանրամասների մշակման սեր ունեւր: Ստորակետ, թե բուլթ կամ բառերի դասավորությունը ետ թե առաջ՝ կարող էին նրան երկար զբաղեցնել: Մի օր ասաց, թե ինքը եկել է այն եզրակացության, որ շեշտերով այդքան հաճախ կարիք չկա ծանրաբեռնել շարադրանքը: Դեպք կա, երբ շեշտը դնես, թե չէ, ընթերցողը մեկ է կարդալու է շեշտով, որովհետեւ խոսքն ինքնաբերաբար վերցնում է շեշտը: Օրինակ բերեց՝ «այդ օրը հուզված էին և ամուսինը, և կինը»: Ինչո՞ւ ընթերցողի աչքը զբաղեցնել շեշտի նշանով, երբ լինի, չլինի, միևնույն է, ընթերցողը ինքնաբերաբար շեշտով է կարդալու:

* * *

Հուշերի գիրքը խմբագրելու օրերին հարցրի, թե այդ ինչպե՞ս է պատահել, որ Զարենցի մասին չի գրել: Ես ունեի իմ բացատրությունը, բայց ուզում էի իմանալ, թե ինքն ինչ կասի: Ինձ թվում էր, որ Զարենցի բուռն կյանքը, անհավա-

սարակչիո խառնվածքը երևի չեն բռնում այն հանդարտ ոճին, որով Զորյանը գրում էր իր հուշ-դիմանկարները:

— Մտադիր եմ գրել: Եվ կգրեմ անպայման, ուրիշների մասին էլ եմ գրելու՝ Թամանյանի, Կոջոյանի: Մի սա հրատարակենք, հետո էդ էլ կանենք:

* * *

Նա մի օր անդրադարձավ բավական ժամանակ առաջ տեղի ունեցած մի խոսակցության:

— Հիշո՞ւմ ես, հետաքրքրվում էիր Չարենցի հուշերով: Ուզո՞ւմ ես մի հատված կարդամ:

Եվ կարդաց սկիզբը:

Պատմում էր, թե ինչպես Չարենցի «Դանթեական առասպելի» մասին «Մշակ» լրագրում լույս է տեսել Գարեգին Լևոնյանի դրվատական գրախոսականը: Չարենցը գալիս է «Մշակի» խմբագրատուն, համոզված, որ այնտեղ կտեսնի և կծանոթանա իր քննադատի հետ: Լևոնյանը չի լինում: Իսկ Զորյանն այդ ժամանակ աշխատում էր «Մշակում» որպես թարգմանիչ: Այստեղ էլ տեղի է ունենում նրանց ծանոթությունը:

Ասաց, որ հիմա պատրաստում է շարունակությունը, որը նվիրված է Չարենցի և Արփենիկի հարսանեկան հանդեսին:

* * *

Մոսկվա էր մեկնում: Գնում էին շատ գրողներ: Բոլորի համար ինքնաթիռի տոմս էին վերցրել: Զորյանը մեկնելու էր երկու օր շուտ՝ զնացքով:

Հետաքրքրվեցի, թե ինչու սավառնակով չի գնում:

— Ես մեր պապերի օրինակին եմ հետևում: Ուղքս հողից կտրել չեմ սիրում:

Այսպես ասում էր և հաճախ կրկնում, թեև նա սավառնակ էր նստել դեռ 30-ական թվականներին, երբ դա երթևեկություն տարածված ձև չէր:

Վահրամ Փափազյանի «Հետադարձ հայացքի» առաջին գիրքը խմբագրելիս հաճախ էի լինում Զորյանների տանը: Եվ պատմում էի մեկ այս կտորը, մեկ այն: Զորյանն էլ հաճույքով լսում էր:

— Դե՛, նա հարուստ կյանք է ունեցել, պետք է որ պատմելու շատ բան ունենա:

Շաբաթը մեկ լինում էի և ամեն դնալիս մի նոր բան պատմում: Ինքս ոգևորվում էի և նրանց էլ ոգևորում:

Մի օր էլ հետս վերցրի մի-երկու հատված և պատմելու փոխարեն կարդացի:

Զորյանը հիացավ:

— Հաճելի անակնկալ:

Աչքերը հաճույքից փայլում էին:

— Իսկական գրող է:

Եվ դրանից հետո խմբագրածս մասից հատվածներ էի տանում և կարդում: Զորյանն անհամբեր էր լսելու և խնդրում էր ավելի հաճախ լինել:

Ու մի օր ասաց.

— Հիմա մեր գրողներից ոչ մեկն այդպես գրել չի կարող:

* * *

«Հետադարձ հայացքի» առաջին գիրքը, ընթերցող հասարակության վրա ցնցող տպավորություն գործեց:

Դիրքն ուներ, մեղմ ասած, չհավանողներ, ավելի ճիշտ՝ հակառակորդներ և՛ թատերական աշխարհից, և՛ մանավանդ, գրական: Զորյանն ու ես հաճախ ենք անդրադարձել և չենք կարողացել բացատրել այդ չարակամությունը:

— Ի հեճուկս դրանց,— մի օր ասաց Զորյանը,— կկազմակերպենք Փափազյանի գրքին նվիրված երեկո և կմեծարենք:

Զորյանը խոսեց ում հետ պետք էր, և տեղի ունեցավ այդ երեկոն՝ իր իսկ նախագահությամբ: Եվ նա իր բացման խոսքում բարձր գնահատեց Փափազյանի գրիչը:

Ուրիշներն էլ խոսեցին: Բոլորն էլ հիացմունքով էին արտահայտվում: Բայց Զորյանը մի անակնկալ էր պահել ժողովականների համար: Վերջում նա առաջարկեց Փափազյանին ընդունել Գրողների միության անդամ:

Ներկաները բուռն ծափահարությամբ ընդունեցին Զորյանի առաջարկը:

Հստ պայմանավորվածության առաջաբան էի գրելու Զորյանի «Հուշերի գրքին»:

Մի օր հարցրեց.

— Քոնից բացի մի-երկու խոսք էլ ես, ինչպես ասում են՝ «Հեղինակի կողմից» գրե՞մ, թե չէ:

Այն կարծիքին էի, որ ոչ, նկատի ունենալով հրատարակվիք գրքում ընդգրկված հուշերի վեճի առիթ շտվող բնույթը, բայց, միաժամանակ, այդ հարցի լուծումը կախում ուներ և այն բանից, թե ի՞նչ խնդիրներ է մտադիր արժարժել:

— Ես գրել եմ,— ասաց նա,— կարդամ ու նոր որոշենք: Կարդաց:

Դա մի երեք, թե չորս էջ իր գեղեցիկ ձեռագրով գրված խոսք էր, որն ինձ անհավասար թվաց: Սկզբում նա բացատրում էր, թե ինչու իր հուշերի մեծ մասի գործողության վայրը Թիֆլիսն է: Բացատրությունը նորություն չէր և, ճիշտն ասած, արված էր երկար: Հետո նա անդրադառնում էր, թե մեր մշակույթի հայտնի դեմքերից ում է հանդիպել Թիֆլիսի փողոցներում, հասարակական հավաքույթներում, թատրոնում: Վերջում էլ շատ սեղմ, նշում էր, որ հուշը, անձնական ընկալումների ծնունդ լինելով, կարող է չհամընկնել նույն նշանավոր մարդուց մի ուրիշի ստացած տպավորության հետ:

Ես ասացի, որ այս երրորդ մասը թերևս արժե ընդլայնել և առաջաբանի գլխավոր առանցքը դարձնել:

Չհամաձայնեց: Ասաց, որ իր համար կարևորը առաջին

երկու կետերն են: Մի խոսքով, որոշեցինք նրա այդ խոսքը չդնել:

Հիմա, երբ նա չկա ու ես անդրադառնում եմ այդ օրվան, մտածում եմ, որ հուշերի վերահաստատարակության ժամանակ կամ էլ հոգվածների հատորը կաղմելիս, արժե տեղ տալ և դրան, մանավանդ որ կարճ, բայց լավ էր բնութագրել հատկապես Սունդուկյանին և Պռոշյանին: Ըստ երևույթին, այդ խոսքը մասամբ էլ գրել էր այն նստատեղով, որ թեկուզ մի-երկու խոսք ասի նրանց մասին, ում հետ այնքան չէր հանդիպել, որ հուշ գրի: Որքան միտս է մնացել հիշվում էին նաև Աբելյանը, Սիրանույշը, Մայսուրյանը: Եվ գուցե դարձյալ մի երկու դեմք:

* * *

Բոլորել էր Ավետ Ավետիսյանի ծննդյան 60-ամյակը: Սունդուկյանի անվան թատրոնը հրատարակեց դերասանին նվիրված մի ալբոմ՝ իմ առաջարկով:

Ձորյանին տեսա ալբոմը թերթելիս: Հարցրի՝ կարդացե՞լ է: Ասաց.

— Ինչ-որ կարծես չի ստացվել:

Ասացի, որ ես էլ այդ կարծիքի եմ, որ չի ստացվել: Եվ միաժամանակ ասացի, թե այդ մի քանի էջը գրել ու մշակել եմ մի քանի անգամ, աշխատել եմ շատ ավելի, քան մի այլ բան գրելիս:

— Ինչքան էլ աշխատեիր՝ չէր ստացվի: Այս դեպքում քիչ ու շատի խնդիր չէ: Ավետ Ավետիսյանը քո հերոսը չէ:

Եվ հետո ավելացրեց, թե ինքը լավ կարծիք ունի Ավետ Ավետիսյանի մասին, հատկապես Սունդուկյանի պիեսներում խաղալիս:

* * *

Ես միշտ տանում էի իմ նոր գիրքը՝ մակագրված: Հաջորդ այցիս՝ կասեր.

— Կարդացի:

Կհայտնեիր իր կարծիքը: Եվ հետո կվերցնեիր գիրքը գրասե-

ղանի վրայից, կթերթեր ու էջ առ էջ կծանոթացներ, թե լուսանցքներին մատիտով ինչ նշումներ է արել, որոնք մեծ մասամբ սխալներ ու վրիպումներ էին՝ փոքր ու մեծ, մի դեպքում կասեր, որ իսկական բառը գտնված չէ, մի այլ դեպքում՝ մի բառի կրկնության վրա կհրավիրեր իմ ուշադրությունը: Կամ էլ՝ շարադրանքի տրամաբանական սխալը ցույց կտար: Կամ կասեր, որ այսինչ միտքը համոզիչ չէ:

Մի խոսքով, չափազանց ուշադիր էր և չէր սիրում, երբ իր բարեկամ հեղինակներն իրենց մտքերը անփութ են ձևակերպում և մանավանդ՝ մոտթ:

— Ձեմ հասկանում, թե ինչ ես ուզում ասել:

Մի փոքր հետո՝

— Պետք է կարողանալ միտքը արտահայտել պարզ, հստակ:

Ձէր տիրում ածականախեղդ շարադրանք:

— Գավառականություն է:

Կասեր և միշտ օրինակ կբերեր Տոլստոյին:

— Ոչ մի ավելորդ բառ, ոչ մի պատահական բառ: Ամեն ինչ մտածված է, ճիշտ գտնված և միաժամանակ՝ չափազանց պարզ:

Եվ տարիների ընթացքում գրքից-գիրք անցնում և կրկնվում էին նույն պահանջները՝ մտքի հետևողականություն, ներքին տրամաբանություն, անսեփեկթ ոճ, կուռ նախադասություն, լեզվի պարզություն, մտքի հստակություն:

Իսկ երբ բերածս գիրքը հավանած չէր լինում, ոչինչ չէր ասում, իբր ոչ բերել եմ, ոչ էլ ինքը կարդացել է, ոչ էլ այդպիսի գիրք գոյություն ունի ընդհանրապես:

* * *

Մի օր խոսք բացվեց Հակոբ Պարոնյանի մասին:

— Ես հիացած չեմ Պարոնյանով: Նա ավելի ֆելիետոնիստ է, քան երգիծաբան: Եվ, փակապես, լավ ֆելիետոններ ունի:

Մի պահ կանգ առավ և հետո շարունակեց.

— Ա՛յ, ուրիշ բան է Երվանդ Օտյանը: Երգիծաբանը նրա նման կլինի՝ հոգեբան է, խոր հեղինակ է: Հիշիր «Ծապլը-վարը», համեմատիր «Մեծապատիվ մուրացկանների» հետ: Տե՛ս, թե ինչպիսի ընդգրկում է: Գրական կատարելություն է, իսկական գլուխ-գործոց: Սա, իհարկե, կարող է պատիվ բերել եվրոպական գրականությանն անգամ: Կամ հիշո՞ւմ ես «Համբարձում աղան»: Ի՛նչ գործ է:

* * *

Նկարչության մասին խոսք բացվեց: Առիթը իր աշխատասենյակի պատից կախված մի բնանկար էր՝ «Մենավոր կաղնի», որ փրեն նվիրել էր Հակոբ Կոջոյանը:

— Մեծ նկարիչ է Մարտիրոս Սարյանը: Ես մասնագետ չեմ, գուցե իրավունք էլ չունեմ տեսակետ հայտնելու, բայց, իմ համեստ կարծիքով, նա շատ առաջ մղեց մեր նկարչության զարգացումը: Բայց ինձ մի բան անհասկանալի է. ինչո՞ւ, ոչ մի կերպ չեմ հասկանում, թե ինչու Կոջոյանը սովերի տակ է մնացել: Մարտիրոսից հետո նա է ամենացայտունը: Եվ իր արմատներով ավելի է կապված ազգային իրականության և արվեստի հետ:

* * *

Հարցրի Շահխաթունու մասին, ասի, որ մեր դերասանները գովում են, համեմատում Փափազյանի հետ:

— Լավ դերասան էր, նույնիսկ շատ լավ: Ինքն էլ գեղեցիկ տղամարդ էր՝ արծվատես, գույները շատ էին, տիպը արևելյան: Փափազյանի հետ համեմատել չի կարելի: Որտե՞ղ Շահխաթունին, որտե՞ղ Փափազյանը: Ընդհանրապես ոչ ոքի չի կարելի համեմատել Փափազյանի հետ:

* * *

Խոսք բացվեց դերասանուհիների մասին: Բարձր գնահատական տվեց Օլգա Գուլազյանին:

— Ա՛յ դերասանուհի: Իսկական վարպետ է: Նուրբ, հմուտ, պարզապես անթերի:

Հարցրի թե ինչ դերեր է հավանել:

— Նառալիա և էփիմիա: Մանավանդ առաջինը: Երկուսն էլ անկրկնելի երեւոյթներ են, իսկական գլուխ-գործոցներ:

* * *

Թեյասեղանի շուրջը՝ ոգետրված խոսում էի Սարոյանի մասին:

Դեմքն անհաղորդ էր:

Ես չդիտեի, որ Զորյանը Սարոյանով հրապուրված չէ: Շարունակում էի խոսել, իսկ նա ձայն չէր հանում:

Լեոնը, որ ներկա էր, չհամբերեց.

— Մեր Մահարին նրանից լավ գրող է:

Հայրը զսպեց որդուն, ասելով, թե կարիք չկա չափազանցությունների մեջ ընկնել:

* * *

Կսել էր, որ Հարություն Թուրշյանը Սարդարապատի ճակատամարտին նվիրված աշխատություն է գրել: Հետաքրքրովեց, թե ե՞րբ է լույս տեսնելու, ինչո՞ւ է ձգձգվում: Ու հետո.

— Մի բան պատմեմ քեզ:

Ասաց, բայց անմիջապես չսկսեց:

— 1918 թվականին թուրքական զորքերը մտել էին Ղարս, Ալեքսանդրապոլ և ուժեր էին կուտակում Երևանը գրավելու համար. պատրաստվում էին Սարդարապատ մըտնել, որ հետո անցնեն էջմիածին: Հայոց զորքերի հրամանատար Նաղարեբեկովը գեներալ Սիրիկյանին ուղարկում է Գևորգ Հինգերորդ Ամենայն հայոց կաթողիկոսի մոտ՝ խնդրելու, որ միաբանության հետ քաշվի Սևան կամ գոնե Բյուրական:

— Ես ոչ մի տեղ չեմ գնա, գեներալ,— պատասխանում է կաթողիկոսը:— Թող թուրքերն իմ դիակի վրայով մտնեն էջմիածին: Եթե դուք չեք կարող պաշտպանել մեր հայրենի սրբությունը, ես կպաշտպանեմ:

— Հա՛, այս էլ ասեմ քեզ,— հանկարծ ընդհատեց պատ-

մությունը Զորյանը,— որ կաթողիկոսը հայտնի չէր որպէս քաջ մարդ: Գեներալն ասում է, թե դա կաթողիկոսի կարծիքն է, իսկ ի՞նչ կասի միաբանությունը: Կաթողիկոսը տեղնուտեղը կանչում է դիվանապետին և կարգադրում բոլոր միաբաններին անմիջապէս հրավիրել Վեհաբան: Երբ միաբանները գալիս են, կաթողիկոսն ասում է, թե ինչո՞ւ է կանչել իրենց, ո՞րն է իր որոշումը և միաժամանակ ավելացնում, որ յուրաքանչյուրն ազատ է իր սեփական վճիռը կայացնելու: Բոլորը թե՛ որտեղ կաթողիկոսը, այնտեղ էլ իրենք:

— Որ այդպէս է, եղբայրներ, եղբք մի-մի Դևոնդ Երեց, գնացեք և խրախուսեցեք զորքին, ոտքի հանեք գյուղերի և քաղաքների մարդկանց: Գիշեր-ցերեկ զանգահարովթյուն թող լինի, որ մեր ժողովուրդն իմանա, թե ինչ վտանգ է սպառնում հայրենիքին:

Այդպէս էլ լինում է: Զորս կողմը՝ զանգահարովթյուն:

Թշնամու արշավող ուժերի համեմատ Սարգարապատի զորքը նվազ էր:

Սարգարապատ է գնում Գարեգին եպիսկոպոսը: Տեսնելով, որ հուսահատության հասած զինվորները հռետորների խոսքին ուշադիր չեն, ինքն է խոսում:

— Հայրենիքը վտանգի մեջ է: Ինչպէս էլ լինի հարկ է դիմադրել թշնամուն, որ պաշտպանեք ձեր հայրենիքը, ձեր պատիվը: Հին դարերում այսպիսի վտանգավոր ժամանակները զորքի հրամանատարները գնացել են էջմիածին, համբուրել կաթողիկոսի աջը և առել նրա օրհնությունը:

— Հիմա վտանգն այնքան մեծ է,— ասում է Եպիսկոպոսը զինվորներին, որ Ամենայն հայոց կաթողիկոսն ինքն է ուղարկել ինձ ձեզ մոտ: Ես էջմիածնից եկել եմ և համբուրում եմ բոլորիդ ձեռքերը և կոչ անում՝ փրկեցե՛ք հայրենիքը:

Այս ասելիս Զորյանը մի պահ կանգ առավ: Հուզված էր: Աչքերի մեջ արցունք երևաց: Նրա ինքնատիրապետումն շատ ուժեղ էր և այդպիսի բան չէի հիշում, որը պատահած լինէր նրա հետ: Մի-փոքր անց շարունակեց ընդհատած պատմությունը:

— Հրաշք կատարվեց, զորքը, ասես, ուժ առավ, որին

միացել էին գյուղերից, քաղաքներից եկած շատ մարդիկ, և ոգևորված սլացան թշնամու դեմ:

Ասաց ու կանգ առավ:

— Դե՛, հետո ինչն ինչպես է լինում՝ հայտնի է:

Մի փոքր դադարից հետո ասաց, թե այս պատմությունը ինքը լսել է Սարգարապատի ճակատամարտից մի տարի անց:

* * *

Հիվանդանոցում էր: Գնացի տեսության: Շնորհավորեցի «Վարազդատի» լույս տեսնելը:

Խոսք բացվեց Մահարու վեպի շուրջ: Հետաքրքրվեց, թե այդ ի՞նչ աղմուկ է հանել վեպը: Պատմեցի:

Մայրահեղությունների կողմնակից շլինելով՝ գտավ, որ վեպը քննադատվում է հախուռն հայրենասիրության դիրքերից: Գործածեց վերջին խոսքը և ավելացրեց, թե չի սիրում այդ բառը՝ «դիրքերից»: Հետո ավելացրեց, թե ժամանակ կանցնի և մարդիկ այդ բոլոր հարցերին հանդարտ աչքով կնայեն: Այն ժամանակ վեպի մասին կդատեն գեղարվեստական արժանիքների տեսանկյունով:

— Չեմ կարծում, թե քննություն բռնի:

Ափսոսաց, որ գրքի օրինակն իր մոտ չէ: Որ լավանա և տուն վերադառնա՝ ցույց կտա Մահարու մեղանշումները մարդկային հոգեբանության դեմ:

Ես ասացի, թե գեղարվեստական անմոռանալի էջեր կան, լավ է գծված քաղաքի կերպարը, վեպը կարդալուց հետո սիրում ես Վանը, վերջապես, հետաքրքիր բնավորություններ:

— Օրինակ:

Հարցրեց:

— Օրինակ՝ Ախանես աղան:

— Քաղաքը խառնվել է իրար, մարդիկ խուճապի են մատնվել, իսկ նա իր հերոսին, ինչպես ինքը Մահարին կասեր՝ գործուղում է մեռած հղբոր կնոջ ծոցը:

Ձղջացի, որ խոսակցություն եմ բացել այդ նյութի շուրջը: Աշխատեցի փոխել նյութը, նրա միտքը շեղել ուրիշ ուղղությամբ:

Երկար տարիների բարեկամության ընթացքում չէի հիշում նրան հիվանդ, չէի տեսել անկողնում: Ու երբ իմացա, որ հիվանդացել է՝ մի առանձին նշանակություն չստացավ: Ոչ էլ անհանգստացա, երբ իմացա, որ հիվանդանոց են փոխադրել: Եվ հանկարծ լսում եմ, թե Մոսկվայից բժիշկ են հրավիրել, գուցե նա մի ճար գտնի: Ուրեմն՝ լուրջ է վիճակը: Եվ, այնուամենայնիվ, կարծում էի, թե ուր որ է վտանգը կանցնի, ապաքինված տուն կվերադառնա և կյանքը կընդունի իր առաջվա պատկերը: Այսպես էի կարծում: Երևի, ավելի շուտ՝ այդպես էի ցանկանում: Եվ հանկարծ... Ժանր բոթ՝ Զորյանը չկա: Որքան անհավատալի, նույնքան էլ դաժան: Շտապում եմ Զորյանների տուն:

Գրականությունը մեծ կորուստ կրեց: Ծանր հարվածի տակ ընկան հարազատները: Ընկերները նույնպես: Սրանցից մեկն էլ ես:

Կորցրի մի շատ հարազատ մարդ, որի մոտ հաճախ էի լինում: Հատկապես նրա կյանքի վերջին մի քանի տարին: Կորցրի մի ընկեր, որն ինձ համար չափի զգացման իդեալն էր:

Զորյանի ներկայությամբ ես անկեղծ էի, սրտաբաց: Ոչ մի գիվանագիտություն չկար իմ մեջ նրա հանդեպ: Ու ես հավատում էի, — գոնե ես այդպես էի կարծում, — որ նա էլ անկեղծ է ինձ հետ: Դիվանագիտություն չէր անում: Նրբանկատություն՝ այո, բայց ոչ գիվանագիտություն: Ու ես հաճախ էի իր խորհրդի կարիքը զգում, ինչպես եղել են նաև դեպքեր, երբ արածս սխալ քայլը նրան եմ խոստովանել:

Զորյանի մեջ մի գիծ կար, որ չկար ոչ մեկի մեջ, նույնիսկ նրանց, որ ավելի մեծ էին, քան նա: Ոչ ոք չի հիշում մի դեպք, որ ստիպել Զորյանին զրել կամ ասել մի բան, եթե դա հակառակ էր նրա համոզումներին: Ոչինչ չի արել նա ստիպված: Ինչ որ զրել է, զրել է իր համոզումներին հավատարիմ: Եվ նա չէր հարգում իր զրչակից ընկերների կյանքի այն դեպքերը, երբ նրանք տուրք տալով՝ զրել են մի բան, որի համոզումը չեն ունեցել: Եվ իրավացի էր: Անցնող

ժամանակների հետ անցել են բոլոր ժամանակավոր հովերը, իսկ տուրքը մնացել է գրողի կենսագրության մեջ: Իր սովազ ընկերների հարկադրված քայլերին նա տալիս էր բացատրություն, և, հաճախ նպատակ ունենալով մեղմել կամ նույնիսկ արդարացնել, ասում էր, թե ինքը գրող է, միայն գրող, իսկ նրանք, գրականության նշանավոր դեմքեր լինելուց բացի, գրական-հասարակական գործիչներ են նաև:

Մի խոսքով, միշտ հարազատ էր մնում ինքն իրեն:

Իր մաքրությունը նա մնաց անհամեմատելի:

Ասում են, ճանապարհ անցնողը ուզի չուզի՝ փողոտվում է: Զորյանն ինչպե՞ս կարողացավ անցնել այնքան երկար և փողոտ ճանապարհ՝ և չփողոտվեց բնավ: Ինչպե՞ս կարողացավ այնքան դժվար տարիների միջից անցնել ու մնալ մաքուր: Անհավատալի բան, որ, սակայն, փաստ է: Ու երևի դա է պատճառը, որ ինձ համար նրա դատավճիռը թանկ էր: Որքա՞ն է պատահել, որ պղտորված պահիս գնացել եմ մոտը, մնացել մինչև գիշերվա ուշ ժամը և խաղաղված տուն դարձել:

Մի վախ միշտ ապրել է մեջս. երբ գնում էի ծովափ ամառային հանգստի և կամ էլ երկար ճանապարհ՝ Մոսկվա, Ռիգա, Լենինգրադ և կամ արտասահմանյան շրջագայության, կարծում էի, թե մի բան է պատահելու և այլևս տուն չեմ դառնալու: Ու ես սովորություն էի դարձրել՝ ճանապարհավելուց առաջ գնալ և հրաժեշտ տալ Զորյանին: Ինձ թվում էր, թե գնում եմ վերջին անգամ տեսնելու: Ու ես գնում էի, ասես, նրա օրհնությունն առնելու:

Զկար հեռու ճանապարհ գնալու մի դեպք, որ չայցելի Զորյանին, որին հայտնի էր իմ նախապաշարումը: Միծաղում էր իմ այդ թուլության վրա, բայց երբ որևէ տեղ դնալուց առաջ գալիս էի մոտը, միշտ ասում էր.

— Ինչ լավ ես անում, որ գնում ես: Քանի երիտասարդ ես՝ գնա, գնա աշխարհ տես: Գնա տես ու արի պատմի: Տե՛ս, իմացիր, անհամբերությունամբ սպասելու եմ վերադարձիդ:

Աստուծ էր ամեն անգամ համարյա նույն խոսքերը: Ու
ես ինչ հաճույքով գնում էի, նույն հաճույքով էլ վերադառ-
նալուց հետո առաջին տունը, ուր մտնում էի՝ Զորյաննե-
րինն էր:

Հիմա նա չկա: Չկա նրա մարդկային կիրթ ու ազնիվ
հայացքը, որի կարիքն այնպես զգում էր իր բովանդակ
շրջապատը:

De/uzerth
yupshus
Sundertg n. D. 6th



Տարբեր ժամանակներ հիշել եմ Թադեոս Ավդալբեկյանին, միտքս գնացել-հասել է 30-ական թվականների առաջին կեսերը ու պահանջ եմ զգացել գրիչ վերցնելու և գրելու: Ու եթե չեմ արել, ապա այն պատճառով, որ միշտ մտածել եմ, թե երկու-երեք հանդիպումը բավարար է ընթերցողին քիչ թե շատ գոհացնելու, թե ասածս կցկտուր մի-երկու խոսք է լինելու այժմ քչերին հայտնի այդ նշանավոր մարդու մասին:

Նրկար մտածեցի ու որոշեցի, այնուամենայնիվ, պատմել ունեցածս թեկուզ և մի քանի հանդիպման մասին, որ անջնջելի հետք էր թողել նոր-նոր գրիչ բռնող բանասերի հոգում:

* * *

Թադեոս Ավդալբեկյանը շաբաթվա մեջ մեկ կամ երկու անգամ գալիս էր Գրականության թանգարան, որտեղ աշխատում էի որպես կրտսեր գիտական աշխատակից: Գալիս էր դատեր՝ աշակերտուհի Մայիսի հետ: Թե ինչ հարց էր նրան բերում թանգարան՝ չգիտեմ, բայց որ նայում էր միջնադարյան ձեռագրերը, որոնք, բավական թիվ կազմելով, պահվում էին թանգարանի վարիչ Խորեն Սարգսյանի աշխատասենյակում՝ այդ ինձ հայտնի էր: Բերում էին իր պատվիրած ձեռագիրը, նա զննում էր ուշի-ուշով և իրեն հարկավոր հատվածները հանձնարարում դատերը՝ արտագրելու:

Մինչև իր ուզած ձեռագիրը կբերեն, մոտենում էր թանգարանի աշխատակիցներիս, որ այն ժամանակ երեքն էինք՝ Արամ Ինճիրկյանը, Նշան Մուրադյանը ու ես, և զրուցում էր:

Ավդալբեկյանը նման չէր մեկ-մեկ թանգարան եկող ավագ սերնդի մյուս դեմքերին, ասող-խոսող մարդ չէր:

Այդպես էր գոնե թանգարանի աշխատակիցներին տպավորութիւնը, մանավանդ որ սպասելիս մինչև ձեռագիրը կրերեն լուռ նստում էր, ինքն իր մեջ ամփոփւած, մի փոքր էլ մոռալ: Եվ նրա այդ պահածը խանգարում էր հարցեր տալ մեզ զբաղեցնող խնդիրների շուրջ: Եթե ինքը խոսեր լավ, եթե չէ՝ ոչ:

Տարիներ անց, իմացա, որ ընտանեկան և ընկերական հավաքույթներում եղել է զվարթ մթնոլորտ ստեղծողներից՝ ասող, կատակող, սրամտող:

Ես արդեն երկու թե հրեք հոգւածի հեղինակ էի: Մի անգամ մոտեցավ իմ գրասեղանին ու հարցրեց ինձ՝ ի՞նչ եմ գրում հիմա:

Ես թեև համոզված չէի, թե նրան իսկապես հետաքրքրում է այդ հարցը և հարցումը համարում էի մի պարզ ուշադրութիւն միայն, շոյված զգացի նրա վերաբերմունքից:

Ասացի, որ հիմա ոչինչ չեմ գրում, համոզվել եմ, որ գրելու համար ինձ դեռ շատ գիտելիք է պակասում, և որոշել եմ կարդալ:

Ավդալբեկյանն անմիջապես շարձագանքեց ասածիս, նայեց ինձ երկար, կարծես ուզում էր հասկանալ՝ անկեղծ էի, թե համեստ երևալու մի փորձ էր դա: Հետո ասաց, որ դա ուրախացնում է իրեն. լավ է, որ ուզում եմ կարդալ, կարդալ ու լրացնել իմ գիտելիքները: Բայց... Այստեղ նա կանգ առավ: Ապա խոսքն առաջ տարավ. նախ՝ զարգացումը վերջ չունի, մարդ որքան կարդա, այնքան ավելի կհամոզվի, որ քիչ բան գիտե: Կարդալու, զարգանալու ցանկութիւնը լավ է զուգակցել զրեւոն: Եվ հետո՝ միշտ պետք է հիշել, որ մարդ զարգանում է ոչ միայն կարդալով, այլև գրելով: Կարդալը մարդուն գիտելիք է տալիս, բայց գրելիս մարդ բացվում է...

— Գրել պետք է անպայման: Գրեցեք, մի հանձնեք տպագրութեան, թող մնա տանը: Զգրելով մարդը կորցնում է գրելու վարժութիւնը:



Մի օր, այս անգամ խոսքն ուղղելով երեքիս, մի այսպիսի միտք արժարժեց.

Երիտասարդ տարիներից անհրաժեշտ է մշակել շտապելու ընդունակություն: Կան գրողներ, որ թանաքը դեռ չշտապած՝ հոգւածը տպագրության են հանձնում: Մարդ պետք է գրի, գրածը նորից աչքի անցկացնի, ուղղի, շտկի: Ինչ որ անելու է՝ անի, մի խոսքով, երբ իրեն կթվա, որ ավարտել է ու այլևս անելիք չունի, մի կողմ դնի: Միառժամանակ՝ մի շաբաթ, մի ամիս, երբեմն նույնիսկ ավելի երկար ժամանակով: Լավ կլինի, եթե մի այլ գործով զբաղվի, որ հեռանա նյութից և այն ժամանակ կտեսնի պակասություններ ու թերություններ, որ առաջ չէր նկատել:

Դառը ժպիտ գծվեց շրթունքներին, որն անմիջապես էլ անհետացավ:

— Ես քիչ եմ տպագրվում և հաճախ եմ համոզվել, թե որքան լավ է, երբ երկար ժամանակ անցնելուց հետո վերակարդում ես մի ամիս կամ մի տարի առաջ գրածդ:

Տեսնելով, որ ուշադիր լսում ենք, նա շքահայտեց խոսքը, թեև խնդրած ձեռագիրն արդեն բերել էին:

Նա ասաց, թե մեր աճելու, զարգանալու տարիներն են, որ վաղը մենք այն չենք լինի, ինչ այսօր ենք, ամեն մի օրը, ամեն կարգացած զիրքը մեզ փոխում է, դարձնում ավելի հասուն, քան առաջ էինք: Եթե մեկ կամ երկու ամիս առաջ մեր գրածը հիմա կարդանք, դժգոհ կմնանք ու կզղջանք, թե ինչու ենք տպագրել, և այլևս ոչինչ փոխել չենք կարող: Սակայն կատարյալ դարձնելու ցանկությունը սահման չունի և պետք է կարողանալ գտնել կանգ առնելու կետը, այլապես կառաջանա միշտ դժգոհ մնալու, սեփական գրածը երբեք չհավանելու մի հոգեբանություն, որ երբեմն հիվանդագին բնույթ է ստանում: Մենք չենք կարող հիմա գրել այնպես, ինչպես ի վիճակի կլինենք գրելու մի տասը տարի հետո:

Մի անգամ հետաքրքրվեց, թե մեզանից ով ինչ օտար լեզվի է տիրապետում:

— Օտար լեզու սովորեք անպայման, ձեզ շատ բան կտա:

Մատեների արանքով մի նայեք, ինչպես հիմա ընդունված է: Տարիներ կանցնեն և դուք կզղջաք չիմանալու համար: Չեմ ասում, թե մի քանի լեզու՝ թեև շատ լավ կլինի, ժողովուրդն ասում է՝ մարդը քանի լեզու գիտի, այնքան էլ մարդ է: Բայց մի լեզու գոնե՝ անպայման:

Կարճ դադարից հետո լրացրեց ասածը:

Գրականությանը զբաղվողներին խորհուրդ են տալիս ֆրանսերեն սովորել: Գուցե և ճիշտ է, բայց ինքը խորհուրդ է տալիս գերմաներեն իմանալ, գերմանացիք բանասիրական մշակված դպրոց ունեն, գրականագիտական զարգացած միտք:

Այդ օրը նա մենակ էր եկել և կարճ ժամանակով՝ ինչ-որ բան ճշտելու նպատակով: Մենք դեռևս իր խրատի տպավորության տակ էինք, որ գնաց:

Հիմա չեմ հիշում, թե ով, բայց լավ միտս է, որ ասաց, թե Թադեոս Ավդալբեկյանն այնքան գիտե գերմաներեն, որ բնագրից թարգմանում է «Կապիտալը»: Ինչ կարող էր լինել ավելի դժվար թարգմանելի: Ըստ երևույթին նրան օգնում էր տնտեսագետ լինելը, մանավանդ որ ժամանակին այնքան էր ուսումնասիրել Մարքսի տնտեսական զարգացման տեսությունը, որ աշխատություն էր գրել դրա մասին: Վերջապես, տնտեսագիտական հայերեն տերմինների բառարանի հեղինակ էր:

Ավելի զարմանալին այն էր, երբ իմացանք, չգիտեմ իհարկե, թե որքան ճիշտ, որ Ավդալբեկյանը Գևորգյան ճամարանում սովորած գերմաներենը խորացրել է, կատարելության հասցրել ինքնուրույնաբար, ոչ միայն Գերմանիայում չլինելով, այլ նաև ամբողջ կյանքում Երևանից դուրս եկած չլինելով:

Մենք հնարավոր չհամարեցինք հաջորդ նրա այցին

հարցնել, թե որքան է ճիշտ մեր լսածը, բայց մի խիստ կարևոր հզրակացության եկանք: Եթե մարդ մի բանի իսկապես ձգտի ամբողջ հոգով, անկարելի է, որ նպատակին չհասնի: Շատ տարիներ անցան, ամեն մեկս ինչ-որ մի բանի տեղ դարձանք, գրքեր հրատարակեցինք և ուշադիր դիտելով կյանքը՝ շատ առիթներ ենք ունեցել համոզվելու, թե որքան ճիշտ է այդ՝ ոչ միայն մտքի հետևողականություն, այլև հետևողականություն մի բան ցանկանալիս, ձգտելիս: Ուստի՝ անցնող տարիների հետ կրթվելու է ոչ միայն միտքը, այլև կամքը:

Իս գիտական երկու զեկուցում եմ լսել, որոնք ինձ վրա թողել են անջնջելի տպավորություն: Մեկը Գևորգ Բաշինջադյանի լեզվաբան որդու զեկուցումն էր, որ ուներ հետևյալ կառուցվածքը. դրույթ, դրույթը հաստատող փաստագրական նյութ, ընդհանրացնող հզրակացություն: Մյուսը Թադեոս Ավդալբեկյանինը, որ ուղղված էր «Խորենացու առեղծվածի հարցի լուծումը» աշխատության դեմ, որի հեղինակ Հակոբ Մանանդյանը այն համոզմանն էր, թե Մովսես Խորենացին 9-րդ դարումն է ապրել:

Ավդալբեկյանը զեկուցմանն անցնելուց առաջ զգուշացրեց, թե ինքը խոսելու է գրքի մի գլխի մասին միայն, որ վերաբերում է Խորենացու բառապաշարին, բայց ի միջի այլոց նկատեց, թե ինքը դիտողություններ ունի նաև մյուս գլուխների վերաբերյալ:

Նա հանդես եկավ հեղինակի հիմնական դրույթի դեմ: Զեկուցումը գրված էր, խոսում էր բանավոր, մեկ-մեկ նայելով ձեռքի թերթիկներին: Դա, ըստ երևույթին, կոնսպեկտ էր, մեկ-մեկ նայում էր, խոսում, հետո թերթերը վերցրած, կավիճը ձեռքին մոտենում էր գրատախտակին: Զեկուցողը սկզբում գրատախտակին գրեց Խորենացու գործածած այն բառերը, որոնք, ըստ գրքի հեղինակի, չեն հանդիպում 9-րդ դարից առաջ ապրած հեղինակների գործերում: Դրանից

և, բխում էր գրքի հեղինակի այն հիմնական հետևությունը, թե հորինացին 9-րդ դարի պատմիչ է:

Ավդալբեկյանը գրատախտակի վրա գրեց 8-րդ դար և դիմացը այդ նույն բառերը՝ ասելով, թե դրանք այդ դարի որ հեղինակների մոտ են հանդիպում: Այնուհետև գրեց 7-րդ դար և դիմացը նշեց, թե այդ բառերից որոնք են գործածվել այդ դարից պահպանված գործերում: Նույն ձևով մատնանշեց 6-րդ և 5-րդ դարերը:

Հեղինակի սխալը, ըստ զեկուցողի, եղել է այն, որ ավելի վստահել է հայկական լեզվի բառգրքին, քան սկզբնաղբյուրներին: Եվ հետո ավելացրեց, թե հեղինակի բերած բառապաշարը հերքվում է ու եթե մի շնչին մասն անգամ ճիշտ համարվի, կարելի է ենթադրել, թե 6-րդ կամ 7-րդ դարու է, բայց ոչ 9-րդ:

Շատ գիտնականներ էին ներկա: Ներկա էր և Աճառյանը, որը բարձրաձայն ծիծաղում էր, հենց որ Ավդալբեկյանը դարից-դար իջնելով, քարը-քարի վրա շթողեց, հերքեց գրքի հեղինակի բոլոր կովանները, այսինքն ապացուցեց, թե հակառակ նրա պնդման, այդ բոլոր բառերը կան 9-րդ դարից առաջ ապրած հեղինակների մոտ:

Առարկությունն այնքան համոզիչ էր, որ ոչ ոք ավելացնելու բան չունեիր, առարկելու մասին խոսք անգամ չէր կարող լինել:

Այնքան խորն էր Ավդալբեկյանի զեկուցման թողած տպավորությունն ինձ վրա, որ 1940-ին, թեև բավական ժամանակ էր անցել, նրա կառուցման սկզբունքը փոխ առա իմ մի զեկուցումն անելիս: Աբովյանի ծննդյան թվականի հարցը քննելիս, հաստատելու համար, որ 1809 թվականն է ճիշտ, ես տվյալները բերում էի անհայտացման թվականից սկսած՝ 1848-ից ու տարի առ տարի իջնելով, հասա մինչև 1809 թվականը: Ու ես էլ, նրա նման, կավիճը ձեռքիս, գրատախտակին մոտենալով, գրում էի թվականները և դիմացը նշումներ կատարում:

Կարդացի նիկողայոս Ադոնցի մի փոքրիկ հետազոտությունը, որ կոչվում էր «Վասակը պատմիչների դատաստանի առջև» («Васак перед судом историков»): Կարդալս ու Հովհ. Հովհաննիսյանի «Սյունյաց իշխանը» հիշելս մեկ եղավ: Նորից աչքի անցկացրի պոեմը և համոզվեցի, որ բանաստեղծն ավելի վաղ է հասել Վասակի գնահատության վերանայմանը, քան ժամանակակից պատմաբանները, օրինակ՝ Գարագաշյանը, որի քննական պատմությանը ծանոթ էի ուսանողական առաջին տարուց: Մտքովս անցավ մի հետազոտական ակնարկ գրել: Իմ ակնարկի կենտրոնական հարցը լինելու էր, թե ինչպես գեղարվեստական գրականությունը հաճախ կանխում է պատմական գիտությունը:

Սկսեցի նյութեր հավաքել: Երկու ուղղությամբ էի նյութ կուտակում. մի կողմից՝ համաշխարհային գրականության այն տվյալները, որոնք հնարավորություն էին տալու միտքս հաստատելու, մյուս կողմից, հիմնվելով Ադոնցի ու Գարագաշյանի վրա, պարզել, թե ինչպես մշակվեց ու ամրացավ Վասակին դատապարտող ավանդական պատկերացումը:

Որքան հեշտ էի հավաքում առաջին կարգի նյութերը և մտքումս ամեն մի նոր տվյալ անմիջապես գտնում էր իր տեղը, այնքան ավելի էի խճճվում, երբ հարցը վերաբերում էր հայոց պատմությանը: Ես զգացի, որ պատմագիտական պատրաստությունս բավարար չէ: Նախ՝ համալսարանում լավ չէինք անցել մեր պատմության ինձ այժմ հետաքրքրող ժամանակաշրջանը, և հետո՝ հիմա էի հասկանում, թե մի կուրս սովորելը և դրա հաջորդը բաց թողնելը, մի խոսքով՝ թոխչներով ուսանելը ինչպիսի բացասական ազդեցություն է ունեցել ինձ վրա:

Մի երկու-երեք ամիս անցավ ահագին նյութ հավաքվեց, բայց շարունակում էի մթան մեջ խարխալել, հստակ չէի պատկերացնում Վասակի կերպարը, կամ, ավելի շուտ, չունեի այնքան պատրաստություն, պատմական այնպիսի

կազմակերպված մոտեցում, որ կարողանայի մեր ժողովրդի պատմության ընդհանուր ընթացքի մեջ տեսնել նրան:

Ու ես այնպիսի հուսահատ պահեր ունեցա, որ որոշեցի միառժամանակ դադարեցնել պարապմունքս, մտածելով, թե անցնող օրերն իրենց հետ կբերեն մտքի հստակություն ու ես նոր կանցնեմ շարադրելուն:

Ահա այդ օրերին լույս տեսավ Ավդալբեկյանի նոր գիրքը՝ «Հովհաննես Հովհաննիսյան»: Շտապեցի մի օրինակ ձեռք բերել: Ու թեև այդ գրքում ինձ հուզող հարցը չէր քննված, միայն ակնարկել ու անցել էր հեղինակը, բայց հենց այնտեղ դտա այն, ինչն ինձ համար պարզ չէր, իսկ գրքում ցույց էր տրված հասարակադիտական և պատմական հմուտ վերլուծություն:

Շարունակել հետազոտությունը այլևս միտք չունեի, և իմ այդ օրերի զբաղմունքից, որ տեեց մի կես տարուց ավելի, մնաց երկու բան՝ մեկ վերնագիրը, որ Ադոնցի ազդեցությունամբ էլ ձևակերպել էի այսպես՝ «Պատմությունը բանաստեղծի դատաստանի առջև», երկրորդը՝ մի ուսանելի դաս: Ու մի անգամ ես համոզվեցի, որ, բացի այն բացառիկ տվյալներից, որ ունեի Ավդալբեկյանը, ինչ մեծ նշանակություն ունի հիմնավոր կրթությունը գիտությունը զբաղվողի համար: Ես չէի կարող ոչ այն ժամանակ, ոչ էլ հետո գրել այնպես, ինչպես գրել է Թադեոս Ավդալբեկյանը. նա իր մտքերն արտահայտում էր մի պարզությամբ, որին գիտնականը հասնում է, երբ նյութի խորքի թափանցումն ունի: Ինձ մնաց մի մխիթարություն իմ և այդ պատկառելի գիտնականի մտքի զուգադիպությունը:

* * *

Ահա բոլորը ինչ հիշում եմ: Այստեղ էլ պետք է վերջակետ դնել, եթե այս դրվագները մեքենագրող Սիրուշ Գաբրիելյանը չհայտնեի, որ «Կուսհրատում» աշխատելիս ինքն է մեքենագրել «Կապիտալի» հայերեն թարգմանությունը և չավելացնել միաժամանակ, որ թարգմանիչը սովորություն ունեի վերջին էջում հիշել աշխատանքն ավարտելու ոչ միայն

թվականը, ամսաթիվը, այլև ժամը, նույնիսկ հոգեվիճակն ու տրամադրությունը:

Մայիս Ավդալբեկյանը, որին հաղորդեցի լսածս, հաստատեց և տրամադրեց «Կապիտալի» թարգմանության հետ կապված մի հիշատակագրություն, որ անհրաժեշտ համարեցի բերել ամբողջությունը, քանի որ այդ հակիրճ խոսքն ավելի է բնորոշում մարդուն, քան բազմաթիվ էջեր:

«Հանրօգուտ մի նշանավոր նպատակակետի հասնողի ուրախությամբ գրանցում եմ, որ այսօր, 1937 թվականի հուլիսի 10-ին, առավոտյան ժամը 7-ին ու 20 րոպեին, թարգմանեցի պրծա «Կապիտալի» վերջին գրքի ամենավերջին երեսը:

Այսպիսով ահա համեստ ուժերով ավարտված է Կարլ Մարքսի «Կապիտալի» բոլոր 1-ին, 2-րդ, 3-րդ և ու 3-րդ բ հատորների գերմաներենից հայերեն ամբողջական թարգմանությունը, որը սկսել էի 1931 թվականի հոկտեմբեր—նոյեմբերից:

Исполнен долг!

Կիսհույս եմ, որ ոչ միայն նորահաս ու վերահաս սերունդները, այլև հասուն ժամանակակիցներն ըստ արժանվույն կգնահատեն իմ այս բոլորանվեր մասնակցությունն աշխատավոր մարդկության ազատագրման մեծ գործին»:

* * *

Միշտ չէ, որ մարդու վաստակն ու համբավը հավասարակշռում են միմյանց: Պատահում է, որ հռչակն անցնում է ստեղծված արժեքից: Պատահում է և հակառակը. վաստակն արժանի է լինում ավելի լայն համբավի, քան այն, որին արժանացել է իսկապես:

Թադեոս Ավդալբեկյանը հենց նրանցից էր, որի արածն ավելի էր, քան նրա ճանաչումն էր և՛ այն ժամանակ, երբ նա կար, և՛ հիմա, երբ վաղուց չկա: 1937-ին հիստունեղու տարեկան էր, երբ ընդհատվեց նրա կյանքը: Եվ մի բնատուր մեծ ձիւրք մնաց կիսակատար:

Իմ ծանոթությունը Մանուկ Աբեղյանի հետ տեղի է ունեցել ինքնասիրությունս շոյող այնպիսի պայմաններում, որ ինձ հաճելի է գրի առնել ու թղթին հանձնել:

1929—1932 թթ. ուսուցիչ էի Ախալքալաքում: Երեք տարի աշխատելուց հետո փոխադրվեցի Երևան: Եկա Կոմկոմբեյոս: Բայց կես տարուց թողեցի համալսարանը: Դժվար տարիներ էին: Մեկնեցի Թբիլիսի, որտեղ մայրս ու եղբայրս էին ապրում: 1933-ին նորից տեղափոխվեցի Երևան: Այս անգամ՝ վերջնականապես: Պետք է շարունակեի կրթությունս: Թբիլիսիի ավագ ընկերներս, լուրջ ու փորձված մարդիկ, խորհուրդ էին տալիս, թե ում դասախոսություններին հատկապես հետևեմ: Մեկը-մյուսի հետևից շարվում էին անուններ՝ Մանուկ Աբեղյան, Հրաչյա Աճառյան, Հակոբ Մանանդյան, Յուլիա Խանդադյան: Եվ էլի ուրիշ անուններ, բոլորն էլ հայտնի:

Հասա Երևան և պարզվեց, որ սրանցից ոչ մեկը այլևս դասախոս չէ համալսարանում: Տխրեցի, բայց ի՞նչ կարող էի անել: Շատ էի ցանկանում տեսնել ու տեսա բոլորին, և խոստովանություն լինի, Մանանդյանը և Խանդադյանը ոչինչ, մի-թեթե մոտենում էին իմ պատկերացմանը, իսկ Աճառյանը և մանավանդ Աբեղյանը ոչ մի տպավորություն չթողին: Կատարյալ հիասթափություն:

Հիասթափությունը չխանգարեց, սակայն, որ Աբեղյանի ոչ մի դասախոսությունը, ոչ մի ելույթը բաց չթողնեմ, մանավանդ որ Թբիլիսիում շատերը, հատկապես Արամ Երեմյանը ամենից ավելի ուշադրությունս հրավիրում էին այդ նշանավոր հայագետի վրա: Անունն անգամ ակնածանքով էին տալիս: Ու ես փողոցում հանդիպելիս՝ խոնարհ

բարեկամ էի, նա էլ մի պահ ղարմացած նայում էր ինձ և, ըստ երևույթին, մտածելով, թե իր բազմաթիվ ուսանողներից եմ, պատասխանում էր ու անցնում:

Եվ ահա ներկայացավ ծանոթության առիթը:


Նորից թողել էի համալսարանը և աշխատում էի Գրական թանգարանում: 1935-ին թանգարանը Գրողների տան դահլիճում կազմակերպեց գիտական հաղորդումների երեկո: Երկու հաղորդում պետք է լսեին ներկաները. հորեն Սարգսյանինը և իմը. Սարգսյանը թանգարանի վարիչն էր, ես՝ թանգարանի կրտսեր գիտաշխատակից, Նթե իմանայի, որ Գյուլիքեվիչյանն է նախագահելու և ովքեր են հրավիրված լսելու՝ ոչ մի կերպ չէի համաձայնի ամբիոն բարձրանալ: Բայց եղածը եղած էր, և նահանջելու տեղ չկար:

Իմ նյութն էր՝ «Նար-Դոսի նամակները Մինաս Բերբերյանին»:

Մավալվեց մտքերի փոխանակություն, որի կենտրոնը, թող ներվի, որ այդ ասում եմ ես, իմ հաղորդումը դարձավ: Ավելի ճիշտ՝ պահպանողականության գնահատության հարցը: Վիճարկվում էր հաղորդման այն միտքը, թե պահպանողականությունը միատարր հասկացողություն չէ, հետևապես պետք է տարբերակված մոտեցում ունենալ: Եվ, բացի այդ, նաև այն դրույթը, որ պահպանողական մտածողությունը ինչ-որ դեպքերում ռեակցիա էր ցարիզմի ազդահալած քաղաքականության դեմ, հետևապես ճիշտ կլինի, եթե ինչ-որ շափով ընկալվի նաև իբրև ժողովրդի ազգային ինքնապահպանման փորձ:

Մտքերի փոխանակությունը բուռն էր: Մասնակցեց Մառուկ Աբեղյանը նույնպես: Աբեղյանի գրական կյանքի սկիզբը կապված էր «Նոր-Դարի» հետ և նրա ելույթը, բացի ըստ էության խոսք լինելուց, ժամանակակցի վկայություն էր միաժամանակ:

Դրանից հետո, փողոցում հանդիպելիս, Աբեղյանը բարեկամ արձագանքում էր ծանոթի արտահայտությամբ:



Անցավ մի քանի տարի:

1939-ին էր: Աշխատում էի երկու տեղ՝ Հայպետհրատում Գեղարվեստական գրականության բաժինն էի վարում և համատեղությամբ՝ Գրականության և լեզվի ինստիտուտում ավագ գիտաշխատակցի պաշտոնակատար:

Հայտնեցին թե Պետհրատի դիրեկտորը խնդրում է իր մոտ: Այդ տարիներին դիրեկտորը Հայկ Դոնոյանն էր:

Արեղյանն էր նստած սենյակում՝ ակնոցներն աչքերին, մռայլատես ու, ինձ թվաց, մի-փոքր էլ բարկացած:

— Ծանոթացեք:

— Մենք ծանոթ ենք, — ասաց Արեղյանը՝ չխախտելով դեմքի դժկամ արտահայտությունը:

— Ընկեր Արեղյանը դժգոհում է, որ 1937 թվականին իր ուսումնասիրության ձեռագիրը տպարան ուղարկելուց հետո տեղից չի շարժվել:

— Քանի՞ տարի կարելի է սպասել մի գրքի հրատարակության:

Լսվեց գիտնականի անբավական ձայնը:

— Ընկեր Արեղյան, կապ պահպանեք Զարյանի հետ և նա կկարգավորի գրքի հրատարակության ընթացքը և դառնալով ինձ ավելացրեց.

— Գիրքը կոչվում է... — չհիշեց:

— «Ժողովրդական խաղիկներ», — օգնության հասավ հեղինակի բամբ ձայնը:

Արեղյանը գնաց:

★ ★ ★

Մի շաբաթ էլ չէր անցել՝ Արեղյանի տանն էի: Գնացել էի գրքի տպագրության հետ կապված հրատարակչական մի-երկու խնդրի շուրջ համաձայնություն ստանալու:

Ես առաջին անգամն էի լինում նրա տանը:

Պատերին նկարիչ որդու՝ Մհեր Արեղյանի կտավներն էին: Գիրք քիչ կար:

Երբ հանդիսանաւ գործնական մասը վերջացավ ու ես
ոտքի ելա հրաժեշտ տալու: Նա ինձ պահեց: Նստեցի:

— Չեմ հասկանում՝ դուք ո՞րտեղ եք աշխատում:

— Երկու տեղ:

Մի պահ լռութիւն:

— Ուզում եմ մի բարեկամական խորհուրդ տալ. եթե
գիտութեամբ պետք է զբաղվե՞ք՝ թողեք հրատարակչական
գործը:

Մի պահ կանգ առավ և ապա շարունակեց.

— Ուժեքը չի կարելի ջլատել, ուշադրութիւնը ցրել: Գի-
տութեան մարդը շատ բանից պետք է հրաժարվի, որ ուսում-
նասիրութեան մեջ խորանա:

Արեւելյանի խորհուրդն ինձ համար մնաց խորհուրդ: Ես
ուժ չդտա մեծա՝ հրաժարվելու հրատարակչական գործից:
Ավելին. մի տարի անց մի երրորդ գործ հանձն առա՝ գրա-
կան ամսագրի խմբագրութիւնը:

Ես այն ժամանակ էլ, հետո էլ համաձայն էի Արեւելյանի
խորհրդի հետ, երբեք չմոռացա այդ խորհուրդը, ուրիշներին
հաճախ եմ ասել նույնը, բայց ինքս չեմ հետևել և իմ
ամբողջ կյանքի ընթացքում զգացել եմ այդ խորհրդի ան-
ողորք ճշմարտութիւնը:

* * *

Հրատարակչութեան դիրեկտորն հետաքրքրվեց «Ժողո-
վըրդական խաղիկների» ընթացքով: Եվ այդ կապակցու-
թեամբ անդրադարձանք Արեւելյանին ընդհանրապես: Նա
գիտեր, որ Արեւելյանը մեծ գիտնական է և ընդունում էր, որ
հրատարակչութիւնը լավ չի վարվել հետը: Առաջարկեց ինձ
գնալ գիտնականի տուն և «խաթրը առնել», իսկ դա նշա-
նակում էր՝ իմանալ, թե ինչ ունի հրատարակելու:

Գնացի: Հաղորդեցի դալուս նպատակը և զգուշացրի, որ
դիրեկտորի հանձնարարութեամբ եմ եկել, հետևապէս լիա-
զորված եմ վճռելու հարցերը տեղն ու տեղը:

Արեւելյանը հիշեցրեց, որ մի քանի ամսից բոլորում է
Մեսրոպ Մաշտոցի ծննդեան 1500 ամյակը և ինքը այդ առ-

Թիվ հրատարակության է պատրաստում «Վարք Մաշտոցին», այլ ձեռագրերի բաղդատությամբ, ներածական ուսումնասիրությամբ, մեկնություններով հանդերձ:

Հարցրի, թե հնարավո՞ր չի համարում, արդյոք, Կորյունի բնագրի հետ տալ նաև նրա աշխարհաբար թարգմանությունը: Համաձայնեց, ավելացնելով, որ դժվարը ձեռքի տակ ճշտված բնագիր ունենալն է:

* * *

Պետհրատում ձեռնամուխ եղա տարբեր մատենաշարերի հրատարակության: Մեկն էլ դրանցից հայ պատմագիրներն էին՝ աշխարհաբար թարգմանությամբ:

Գնացի Աբեղյանի հետ խորհրդակցելու: Հավանություն տվեց, գտավ, որ օգտակար գործ կլինի, վերջապես բնթերցող լայն շրջանները կժանոթանան մեր պատմիչներին:

Շատ ուրախացա, հատկապես, երբ նա դրական վերաբերվեց նաև մշակածս կառուցվածքին՝ ներածական ուսումնասիրություն, թարգմանություն և մեկնություններ:

Հարցրի, թե առաջին հերթին ո՞ր պատմիչներին պետք է հրատարակել:

— Նախ Խորենացի: Եվ մի-փոքր մտածելուց հետո...

— Եղիշե, Բուզանդ, Փարպեցի:

Հետաքրքրվեցի, թե պատմիչներից որի՞ն կուզենար ինքը թարգմանել և հետո՞ ընդհանրապես ո՞ւմ հրավիրել աշխատակցության:

— Անպայման Ստեփան Մալխասյանին, կարող եք նվա-տի ունենալ նաև Երվանդ Տեր-Մինասյանին: Ծիշտ կլինի դիմել Հրաչյա Աճառյանին նույնպես, թեև չեմ կարծում, թե համաձայնի:

Լռեց:

— Իսկ դո՞ւք:

— Ես ի՞նչ:

— Ոչինչ հանձն չե՞ք առնելու, օրինակ Կորյունը:

— Կորյունը հարմար չի դա մատենաշարին, տարբեր է բնույթը, նեղ գիտական:

Այն կարծիքին չլինելով, թե այդ խախտումը մի մեծ մեղք կլինի, խնդրեցի իր համաձայնությունը: Համաձայնեց: Հավատացած էի, որ հրատարակչությունը ղեկավարությունը չի առարկի: Եվ այդպես էլ եղավ:

* * *

Մի զեկուցում կարդաց, որ հետազայում լույս տեսավ առանձին գրքով: Վերնագիրը երկար էր՝ «Վիշապներ կոչված կոթողները իբրև Աստղիկ-Դերկետո դիցուհու արձաններ»: Անզգուշություն ունեցա իրեն ասելու, որ երկար է, մի՞թե կարճ վերնագիրը գերադասելի չէ:

— Ի՞նչ կառաջարկեիք, օրինակ:

— Միայն «Վիշապներ»:

— Ոչ մի դեպքում:

Կտրեց նա:

— Վերնագիրը նրա համար է, որ իմացվի, թե ինչի մասին է խոսքը, ուստի այն հետազոտության հիմնական էությունն է ամփոփում: Թող երկար լինի, ոչինչ, բայց ճշգրիտ լինի, ընթերցողն անմիջապես կհասկանա, թե ինչի մասին է խոսքը և հենց սկզբից էլ կիմանա իրեն հետաքրքրում է գրքում արժարժվող հարցը:

Մի-փոքր լռելուց հետո ասաց.

— Դիտություն մեջ վերնագիրը գայթ չէ:

* * *

Թեկնածուական դիտերտացիա էի պաշտպանում՝ Աբովյանի «Նախաշավիղը» և նրա պատմությունը: Գիտխորհրդի անդամները տեղ էին գրավել նախագահության մեջ: Այնպես պատահեց, որ Մանուկ Աբեղյանը զբաղեցրեց կողքիս ազատ աթոռը:

Ես խոր ափնածանք ունեի Աբեղյանի նկատմամբ, և, ճիշտն ասած, քաշվում էի նրա ներկայությունից և ուրախ կլինեի, եթե այդ օրվա նիստին եկած չլիներ: Մեր Ակադեմիան, այն ժամանակ՝ Արմֆան, դիտերտացիայի պաշտպա-

նության իրավունքը նոր էր ստացել և դա անդրանիկ պաշտպանությունն էր:

Աբեղյանը նկատեց իմ հուզմունքը և փորձ արավ հանգստացնելու:

— Մի հուզվեք, ամեն ինչ լավ կլինի:

Ես ամբիոն բարձրացա՝ գիտխորհրդի անդամներին ծանոթացնելու դիսերտացիայի հիմնական դրույթներին: Երբ նստեցի՝ Աբեղյանը խնդրեց դիսերտացիան: Թերթեց ուշադիր, ինչ-որ տեղեր կանգ առավ: Եվ երբ վերջացրեց՝ դարձավ ինձ.

— Ընկեր Ջարյան...

Եվ արեց հրեք այնպիսի հիմնավոր դատողություն, որ եթե մեկնումեկը ինձ ասած լիներ մինչ այդ, հազիվ թե համաձայնի պաշտպանությամբ հանդես գալ: Իսկ եթե սկզբից մինչև վերջ կարդար, երևի քարը-քարի վրա չթողներ,— մտածեցի ես: Հրատարակելիս էլ չէի կարող աչքի առաջ ունենալ նրա ասածները: Դիսերտացիան արդեն տպագրված էր, բայց դեռ հրապարակ չէր հանվել: Ես հերք անկազմ օրինակ բերել էի տպարանից ու հանձնել ինստիտուտի գիտնական քարտուղարին, որ այն ժամանակ խորեն Սարգսյանն էր: Վախը սրտիս մեջ էր՝ հանկարծ վեր կենա ու խոսի: Վայն եկել ու տարել է ինձ: Շատերը խոսեցին, ոչ ոք չէր նկատել Աբեղյանի նկատած թերությունները: Իմ բախտից չխոսեց:

* * *

Երբ «Նախաշավիղը» լույս տեսավ՝ մի օրինակ տարա Աբեղյանին:

Ընդհատեց զբաղմունքը, շնորհակալություն հայտնեց բերածս գրքի համար Գիրքը ձեռքն առավ, թերթեց.

— Կավ եք արել, որ լուսատիպ նմանահանությամբ եք հրատարակել:

Հարցովորձ արեց, թե ինչպե՞ս եմ, ինչո՞վ եմ հիմա զբաղվում:

Աչքս ընկավ գրասեղանի վրայի թղթերին և հասկանալով, որ գալուս պատճառով ընդհատել է պարապմունքը՝ հրաժեշտ տվի ու գնացի:

* * *

Պաշտոնատեղում նստած՝ հրատարակչական գործերով էի զբաղված: Հավեց դռան բախոց:

— Մտեք:

Անփութ ձայն տվի ես:

Դռների մեջ Աբեղյանը երևաց:

— Կարելի՞ է:

Հարցրեց նա առանց տեղից շարժվելու:

Անմիջապես ընդառաջ գնացի, աթոռ առաջարկեցի և խնդրեցի նստել:

Զեռքի գիրքը դրեց սեղանին:

— Նոր աշխատասիրությունս է լույս տեսել «Դուստնական երգեր», բերել եմ ձեզ հիշատակի համար:

— Ես գնեի եմ, — թռավ բերանցիս:

— Ոչինչ: Զեր օրինակն էլ մեկին կնվիրեք:

— Շնորհակալ եմ, շատ զգացված:

Շփոթված էի նրա վերաբերմունքից և չգիտեի, թե նման դեպքերում ինչ է հարկավոր ասել: Թեև խիստ շոյված, լավ չէի զգում ինձ, որ ինքն է բերել:

— Ընկեր Աբեղյան, ինչո՞ւ եք նեղություն քաշել ու բերել, իմաց կտայիք՝ ինքս կգայի՝ ձեր տուն:

— Զի կարելի, ընդունված չէ: Եթե հիվանդ չէ հեղինակը, ապա ինքը պետք է տանի: Դա ընդունված կարգ է: Ոչ մի նշանակություն չունի՝ նվիրողն է տարեց, թե ստացողը: Հարգանքի նշան է այդ և խորհուրդ կտայի ձեզ՝ հետևել դրան:

Հիմա չեմ հիշում, թե ինչու խոսք բացվեց այն մասին, թե հեղինակն ում պետք է գիրք նվիրի: Նա մի ամբողջ պատմություն արավ այդ հարցի շուրջ:

— Նախ այն մարդկանց, որ իրենց մասնակցությունն են բերել գրքի տպագրությանը՝ սրբագրչից մինչև հրատարա-

կիչը: Հետո՝ գրչակից ընկերներիդ, իհարկե, ընտրությամբ, մանավանդ նրանց, որ կարդացել են ձեռագիրդ, խորհուրդներ տվել: Այն գիտնականներին, որ քեզ ուսուցիչ են եղել կամ էլ՝ թե ուսուցիչ չեն եղել պաշտոնապես՝ երախտապարտ եք: Հա՛, մեկ էլ՝ մոտիկ մարդկանց: Վերջապես՝ նաև նրանց, որ իրենց գիրքը նվիրել են ձեզ: Գոնե մեկ անգամ պետք է պատասխան տալ:

Հիշեցի, որ ես նրան տարել էի «Նախաշավիղը»: Սա նրա պատասխանն էր:

Ու ես մինչև օրս հաճախ եմ հիշում Աբեղյանի այս այցը, հաճախ եմ պատմում ուրիշներին, թե ինչ ասաց այդ մեծ մարդը և բարոյական ինչ ուսանելի խրատ կաք նրա խորհրդում:

* * *

«Ժողովրդական խաղիկները» լույս տեսան:

— Գիտական գիրքը մի անգամ է լույս տեսնում, վեպ հոչէ, որ վերահրատարակվի, ուրեմն պետք է հարկ եղած հոգը տանելք, որ լավ թղթի վրա տպագրվեք:

Դժգոհեց Աբեղյանը:

— Այս էլ իմ գիրքը, բերել եմ մի օրինակ ձեզ, թող հիշատակ մնա ինձանից:

Այլևս նրա դեմքը չունեի մի-վրոք առաջվա մռայլութունը: Ժպտում էր: Իսկ նա ժպտում էր մաքուր, անմեղ, անքեն:

* * *

Մի օր հարցրի՝ ճանաչո՞ւմ էր Մամբրե Մատենճյանին:

— Ինչպես չէ, ներսիսյանում միաժամանակ դաս ենք տվել, նույնիսկ միասին ուսումնական ձեռնարկ ենք կազմել:

— Ուրեմն լավ գիտեք:

— Իսկ ի՞նչ կա որ:

— Ուզում էի իմանալ ձեր կարծիքը նրա մասին:

— Ինչ ասեմ. հետաքրքիր մարդ էր, անպայման ընդու-

նակ, լավ հոգևոր էր, նրան լսողները հափշտակվում էին, հատկապես երիտասարդությունը: Ինքնահավան էր և արտաքին տպավորությանը մեծ տեղ էր տալիս: Երբեք նրանից հասարակ ու պարզ ձևակերպված միտք չեմ լսել, անպայման շլացուցիչ:

Դադար:

— Գիտեք, ընդունակությունը վտանգավոր բան է լուրջ դպրոց շանցած և մանավանդ լայն Վոլոդյովսկանություն վայելողի համար: Ապրում են ընդունակության հաշվին և կործանվում: Մատենճյանը իրալեց ու անցավ և լուրջ հետք չթողեց մեր գրականության մեջ, մինչդեռ կարող էր:

* * *

Գրականության և լեզվի ինստիտուտի գիտխորհուրդը բանասիրության դոկտորի աստիճաններ էր շնորհում մեր տարեց գիտնականներին: Շնորհվում էր աստիճանը՝ առանց քննելու: Գրականության պաշտպանության՝ *honoris causa*: Օրակարգում Ստեփան Մալխասյանին դոկտորի աստիճան շնորհելու հարցն էր դրված: Դա 1940-ին էր: Ես այդ ժամանակ արդեն գիտխորհրդի անդամ էի: Այդ նիստերին ելույթ ունեցողները խոսում էին գիտնականի արժանիքների մասին հիմնավորում, թե ինչու պետք է շնորհվի նրան գիտական այդ աստիճանը:

Արեղյանը ներկա էր: Շատերը զարմացած էին, կարծում էին, թե կխուսափի, չի գա, որովհետև ինչ-որ առիթով գժտվել էին և խուսափում էին միմյանց հանդիպելուց:

Շրեկի մի երեք մադդ խոսել էին, որ Արեղյանը ձայն խնդրեց: Բոլորը նստած էին խոսում: Այդպես էր ընդունված կարգը: Արեղյանն էլ, որ գալիս էր նիստի, նույնպես իր կարծիքը հայտնում էր նստած: Այս անգամ նա ոտքի կանգնեց: Ու երբ սկսեց, ամենքը նկատեցին, որ հուզված է:

Նստած լինելով սեղանի մոտ, ես տեղնուտեղը գրի առա Արեղյանի ելույթը: Այնպես որ, համարյա բառացի եմ բերում ասածը:

— Եթե կար խոսել այն մասին, որ Ստեփան Մալխասյանն

արժանի է դոկտոր լինելու, անտեղի է՝ Ստեփան Մալխաս-
յանն այն գիտնականն է, որի անունն շատ բան է ասում:
Նա ըստ էության դոկտոր է, անկախ նրանից՝ մենք այդ աս-
տիճանը կտանք նրան, թե ոչ:

Մի պահ կանգ առավ, շունչ քաշեց, կամենալով աճող
հուզմունքի առաջն արձեփել:

— Ես ամաչում եմ, որ նրանից առաջ եմ դոկտորություն
արժանացել, ես ամաչում եմ, որ իր ուսուցչին աշակերտն է
ձայն տալու, ես ամաչում եմ, որ հակառակը չէ... Առաջինը
նրա հարցը պետք է լուծվեր և հետո մերը...

Այլևս ոչ ոք չխոսեց: Նույնիսկ քվեարկելու հարկ չեղավ:

* * *

1940-ի ուշ աշնանը նշանակվեցի գրական ամսագրի
խմբագիր:

Ըստ իմ ծրագրի՝ ամսագիրը և՛ արտաքինապես, և՛ բովան-
դակությամբ տարբերվելու էր նախորդից: Մտքովս անցավ
փոխել ամսագրի վերնագիրը: Զհաջողվեց, հանդիպեցի դի-
մադրություն: Մնացածը թվում էր ինձ իմ իրավասությանը
ենթակա ու ես գործում էի իմ նախաձեռնությամբ: Փո-
խեցի ամսագրի շափսը, — շարվածքը, ձևավորումը: Խմբա-
գրական նոր կազմ հաստատել տվի: Մտքիս դրի գեղարվես-
տական գործեր տպագրել խիստ ընտրությունամբ, որ ամսա-
գրում հրապարակվելը լինի ամեն մի, նույնիսկ հուշակավոր
գրողի ձգտումը: Որոշեցի չսպասել, որ գրողները նյութ
բերեն, ինքս էի հետները պայմանավորվում, իհարկե, ոչ
ամենքի հետ: Բացի այդ, մտածում էի, թե ամսագիրը կա-
րող է ավելի հետաքրքիր լինել, եթե նրա էջերում հայագի-
տական հարցեր արծարծվեն: Իսկ այդ նպատակով հարկա-
վոր էր ապահովել անվանի գիտնականների աշխատակցու-
թյունը: Եվ կարողացա առնել նրանց համաձայնությունը՝
աշխատակցել ամսագրին մեծ ու փոքր հոդված-ուսումնա-
սիրություններով:

Մի խոսքով՝ ինձ հարկավոր էր գնալ Աբեղյանի մոտ և ապահովել նրա մասնակցությունը հենց առաջին համարից: Ես հիշում էի նրա խորհուրդը: Բայց այդ շրջանում,— խոսքը 1940—1941 թթ. է վերաբերում,— իբրև հրատարակիչ մոտը հաճախ էի լինում, գզացել էի նրա համակրական վերաբերմունքը և վստահ էի, որ չի մերժի աշխատակցել:

Ներկայացա և պարզեցի դալուս պատճառը: Միաժամանակ շտապեցի ասել, որ մտադիր եմ նույն խնդրանքով դիմել Աճառյանին, Մալխասյանին, Ղափանցյանին:

Երկար մտածեց:

— Ես կարող եմ տալ մի ականարկ, որ պատրաստ է, մնում է վրայից մի անգամ էլ անցնել՝ «Մեսրոպ Մաշտոցը և գրի ու գրականություն սկիզբը»: Մի շաբաթից կամ տասը օրից պատրաստ կլինի: Բայց...

Ու կանգ առավ:

— Ըի՞շտ եք վարվում ինձ ու ինձ նմաններին ձեր ամսագրի հեղինակ դարձնելով: Դրանից չի՞ փոխվի, արդյոք, ամսագրի բուն նշանակությունը: Չե՞ն դժգոհի գրողները, արդյոք: Չէ՞ որ դա գրողների հանդեսն է և բնական է, որ նրա խնդրո առարկան լինելու է արդի գրականությունը: Գուցե խուսափեք մի համարում մի քանի հայագետի տեղ տալուց: Այս անգամ մեկին, մի երկու համար հետո մի ուրիշին: Մտածե՞լ եք դրա մասին:

Ես այնպես էի խանդավառված իմ ծրագրով, որ Աբեղյանի խորհրդի իմաստը բնավ չընկալեցի, ոչ էլ մտածեցի նախագգուշացվող հետևանքների մասին:

Ամսագրի էջերում միաժամանակ կամ միմյանց հաջորդելով՝ հանդես եկան Մանուկ Աբեղյանը և Հրաչյա Աճառյանը. Ստեփան Մալխասյանը և Գրիգոր Ղափանցյանը, Արսեն Տերտերյանը և Գարեգին Լևոնյանը: Եվ ուրիշներ: Թյս անունները, բնականաբար, փոխադրեցին ինձ մի այլ մթնոլորտ, ու ես խմբագրական կոլեգիան դարձրի «խմբագրական մարմին», գրախոսության բաժինը՝ «մատենախոսություն»:

Ամսագիրը բավական խիստ քննադատվեց մամուլում, Քննադատությունն ուղղված էր նոր խմբագրի դեմ: Քննա-

դատվեցի, որ ամսագիրը, այժմեական լինելու փոխարեն, իր էջերը զիջում է անցյալին:

Երբ հրաժեշտ էի տալիս, դռների մեջ Աբեղյանն ասաց, բայց այս անգամ այնպիսի մեղմությամբ, կարծես անհամար էր զգում անդրադառնալ նույն հարցին.

— Քանի՞ տարեկան եք:

Պատասխանեցի:

— Երանի՞ ձեզ:

Բայց ես զգում էի, որ դա չէ ասելիքը:

— Դժվար կլինի, շատ դժվար երեք ծանր պարտականու-
թյուն ունենալ... Բոլոր գեպքերում հաջողություն և մ ցան-
կանում ձեր նոր գործին:

Լռեց մի պահ, հետո ավելացրեց.

— Մի շաբաթից պատրաստ կլինի «Մաշտոցը»:

* * *

Իլյա Աբուլաձեից ստացա մի հոդված: Նա վիճում էր Աբեղյանի հետ՝ մեր ամսագրում նրա տպագրված ուսում-
նասիրական ակնարկի կապակցությամբ: Ես անմիջապես
զնացի Աբեղյանի մոտ և հարցրի, թե կկամենա՞ ծանոթանալ:
Հրաժարվեց, բացատրելով, թե ինքը դա գիտական էթիկա-
յին հակառակ է համարում: Տպագրվելուց հետո կկարդա,
եթե առարկելու բան ունենա՝ կգրի պատասխան:

Աբուլաձեի հոդվածը լույս տեսավ: Դրանից հետո մի-
երկու անգամ հանդիպեցի Աբեղյանին, նա ոչ մի խոսքով
չանդրադարձավ, ասես Աբուլաձեի առարկությունը լույս չէր
տեսել: Հետո խմացա, որ չի կարդացել:

Մի օր նա եկավ ու խնդրեց ուշադիր լսել իրեն: Եվ
կես առ կես հերքեց Աբուլաձեի առարկությունները և
հայցրեց՝ կտպագրե՞մ, եթե այս բոլորն ինքը գրի իբր
պատասխան:

Համաձայնությունս ստանալուց հետո հետաքրքրվեց,
թե իր հոդվածը երրորդ համարում լույս կտեսնի՞:

Ասացի չորրորդը վաղը վաճառքի է հանվելու, իսկ հինգ-
երրորդը մամուլի տակ է արդեն: Պատահական հանգամանք-

ների բերումով երրորդ և չորրորդ համարների մամուլները համարյա միաժամանակ տպագրության հանձնվեցին: Այդ պատճառով էլ երկու համարը միմյանց հաջորդելով լույս աշխարհ եկան, արագացնելով հինգերորդի գործը տպարանում:

— Ուրեմն, ի՞նչ, մնում է վեցերորդի՞ն:

Խոստացա մի բան անել: Ձէի կարող մերժել Աբեղյանին, բայց և ինքս էլ չգիտեի, թե ինչպես եմ խոսքիս տերը լինելու, երբ հինգերորդի մամուլները էջկապված և վերջնական սրբագրության էին ենթարկված:

Աբեղյանը պատասխանը բերեց ավելի ուշ, քան պայմանավորվել էինք: Ընկա դժվար կացության մեջ: Ծանր ու թեթև արի և միակ ելքը երևի այն էր, որ հինգերորդին միացնեի վեցերորդ համարից տպարան ուղարկված և էջկապ արված նյութերը և հրատարակեի միացյալ համար:

Ամեն մի հանդիսման՝ Աբեղյանը հարցնում էր.

— Ի՞նչ եղավ:

Ես նրան հանգստացնում էի, թե շուտով կլինի, բայց համարը ուշանում էր: Ծիշտն ասած, Աբեղյանին այդպես անհամբեր չէի տեսել:

Պատերազմը սկսվեց, կյանքը խառնվեց: Եվ Աբեղյանն այլևս չէր հարցնում, թե երբ լույս կտեսնի ամսագիրը: Տպարանում չէին շտապում սկսել տպագրությունը միացյալ համարի, որի խաղաղ բովանդակությունն արդեն չէր համապատասխանում կյանքի նոր ընթացքին:

Համարը լույս տեսավ զգալի ուշացումով:

* * *

Մի քանի անգամ եղել եմ Աբեղյանի տանը հրատարակչական գործերով: Երբեմն կարճ եմ մնացել, այնքան, որքան գործը պահանջել է, երբեմն էլ ոտս կախ եմ գցել, մնացել, որ հետը մի-փոքր զրուցեմ:

Մի անգամ դիմեցի նրան, թե կյանքի հարուստ ուղի է անցել, շատ մարդկանց է հանդիպել, ծանոթ եղել, հետները

բարեկամութիւնն արեւ, արդյոք ճիշտ չէ՞ր լինի, եթե գրեթէ
իր հուշերը:

Եվ ավելացրի.

— Պետհրատն իր վրա կվերցնի գրքի տպագրութիւնը,
եթե ուզե՞ք՝ այժմանից կարելի է պայմանագիր կապել:

— Պետք է, անշուտ, ես էլ եմ հասկանում, բայց դեռ
ժամանակը չէ: Հետազոտելու բաղմամբիվ խնդիրներ ունեմ:
Ի՞նչն է շտապ, հուշե՞րը, թե՞ գրականութեան պատմութիւնը:
Հարցը սովեց և ինքն էլ պատասխանեց.

— Իհարկե, պատմութիւնը: Ա՛յ, եթե հասցենեմ վերջաց-
նել, այն ժամանակ գուցե:

Ու մի պահ լռելուց հետո շարունակեց խոսքը.

— Մի խնդիր կա, որ կարող է չգրելուս պատճառը դառ-
նալ: Պետք է ճշմարտութիւնը գրեմ, միայն ճշմարտութիւնը:
Կտպագրե՞ք, ո՛չ, չե՞ք տպագրի, բարեկամ: Կասե՞ք՝ այս
կարելի է, այն չի կարելի, ուրեմն ինչո՞ւ դրեմ: Շատ խընդ-
րեցին, մի քանի անգամ ասացին, որ Թումանյանի մասին
հուշեր գրեմ: Չէի համաձայնում, բայց հենց որ ասի
կգրեմ, միայն թե չթաքցնելով ճշմարտութիւնը, հանգիստ
թողին, այլևս չստիպեցին: Չխոստացա, փորձ արի, մի-եր-
կու բան գրի առա, բայց հետո հրաժարվեցի: Ոչ, չեմ գրի,
ավելի լավ է իմ գործերով զբաղվեմ:

* * *

Գնացել էի Աբեղյանի մոտ: Ձեռքին Երեանում լույս
տեսնող ռուսական թերթն էր՝ «Կոմունիստը»: Աչքիս
վրդովված էր երևում: Այն է ուզում էի հարցնել, թե ինչ է
պատահել՝ ինքը բացվեց:

— Այսպես էլ բա՛ն կլինի. հողված են պատվիրում, չես
ուզում գրել՝ խնդրում են, վերջն էլ վարվում են իրենց
կամեցածի պես: Ես Մանուկ Աբեղյան եմ ստորագրել, իսկ
ներանք բռնել են ու ավելացրել՝ ակադեմիկոս: Չեմ հասկա-
նում՝ դա ինչի՞ համար է:

Երբեք այդպիսի զվարթ տրամադրությամբ չէի տեսել Աբեղյանին: Միծաղում էր, կատակում: Արեց հետևյալ պատմությունը, որն ընդհատվում էր հանկարծ, որովհետև չէր կարողանում զսպել ծիծաղը:

Դեմիրճյանը, ինչպես հայտնի է, խոսելիս փոքր-ինչ կակազում է: Իսահակյանը՝ նույնպես: Մի օր նրանք հյուր են լինում մի գյուղացու տանը: Տանտերը, նույնպես կակազ մի մարդ, սրանց պատվին ընթրիք է տալիս, և հաճելի զրույցը, գեղջկական սեղանի շուրջը, տևում է մինչև ուշ գիշեր: Խոսում են միայն Իսահակյանն ու տանտերը: Դեմիրճյանը ձայն չի հանում: Սրտնեղում է Իսահակյանը, բայց ուրիշների ներկայությամբ հարմար չի գտնում ընկերոջը դիտողություն անել: Մյուս օրը, առավոտյան կողմը, թողնում են հյուրընկալ տունը: Երբ բավականին հեռանում են՝ Իսահակյանը հայտնում է իր դժգոհությունը.

— Ի՞նչ պիտի մտածեր տանտերը, կասեր գյուղացի եմ՝ բանի տեղ չդրեց:

Դեմիրճյանը կակազելով պատասխանում է.

— Դու կակազ, նա կակազ, ես էլ որ խոսելի՝ պիտի կարծեր, թե իրեն ձեռ եմք առնում:

Աբեղյանին ասացի, թե այդ պատմությունը կարդացել եմ, բայց չեմ հիշում որտեղ:

— Գուցե, գուցե: Ապա հարցրեք Ավետիքին կամ Դեմիրճյանին:

Հարցրի Դեմիրճյանին՝ պատահե՞լ է այդպիսի դեպք:

— Միտս չէ, գուցե:

Ու ինքն էլ հետաքրքրվեց.

— Ինչպես ասացի՞ր, հապա նորից պատմիր:

1944-ի գարնանը կազմակերպվեց Մհեր Աբեղյանի ստեղծագործությունների անհատական ցուցահանդեսը, և հայրը ցանկություն էր հայտնել ներկա լինել բացմանը:

Համբարձումը հաշանյանը, որ Մհերի քենակալն էր, հանձնարարություն է ստանում՝ Աբեղյանին ուղեկցել նկարիչների տուն:

Անցան օրեր: Խաչանյանը հանկարծամահ եղավ: Սգից հանելու սովորույթի համաձայն՝ Մհերի կինը, Լուսիկը քրոջը տանում է իրենց տուն: Աբեղյանը բռնում է տիկին Խաչանյանի ձեռքը և ասում.

— Գնաց խառնվեց հազար տարվա մեռելներին:

Հետո ավելացնում է.

— Մի տարվա մեռածը և հազար տարվանը՝ նույնն է: Նկատելով, որ շրջապատողները չեն հասկանում իրեն՝ ասում է.

— Այսպես էլ անարդար բան կլինի՞. նա երիտասարդ էր ու չկա, ես ծեր եմ և կամ:

* * *

1944-ի գարնանն էր: Գնացել էի Աբեղյանի մոտ գործով: Տրամադրությունը բարձր էր: Մեկ նստում էր, մեկ վեր կենում: Ժպտում էր: Իսկ ժպտում էր նա, ասես արեգակի ճառագայթ էր ընկնում ժայռաբեկորի վրա և լուսավորում, տեսանելի դարձնում մի թաքնված հրապույր, որ բարության վսեմ արտահայտություն էր, որը պահում էր հոգու խորքերում...

Հարցրի, թե չէ՞ր կամենա նոր աշխատություն առաջարկել հրատարակչությանը:

— Ինչպես չէ, ինչպես չէ: Երկու ուսումնասիրություն ունեմ պատրաստ: Մեկը մեր քերականության խնդիրներին է վերաբերում, մյուսը՝ վիպական բանահյուսությանը: Այս մեկի ծավալը կարող է վախեցնել, բայց եթե տպագրվի, որքան էրախտապարտ պիտի լինի:

Դա իմ վերջին հանդիպումն էր:

* * *

1944 թվականն էր:

Աբեղյանի որդին մեկնելու էր Մոսկվա:

Տրեսյակովյան պատկերասրահում կազմակերպվելու էր

հայկական կերպարվեստի ցուցահանդես, նա կազմակերպիչ-ներին էր: Աբեղյանը, որ վատառողջ էր, նկատում է որդու տարակուսանքը՝ զնա՞, թե մնա:

— Գնա, մի վախենա, չեմ մեռնի,— ասում է հայրը: Գնա, բայց աշխատիր սեպտեմբերի 24-ին այստեղ լինել:

Մի օր Աբեղյանը հարցնում է հարսին՝ Լուսիկին:

— Նամակ գրելո՞ւ ես Մհերին:

— Իհարկե:

— Գրիր, որ սեպտեմբերի 24-ին այստեղ լինի:

— Ի՞նչ է, այդ օրը քա՞ն կա:

— Ոչինչ, դու գրիր, որ ըմոռանա և այդ օրը անպայման այստեղ լինի:

Անցնում է մի քանի օր: Լուսիկը նամակ է գրում Մհերին, հաղորդում է ամուսնուն հոր խնդրանքը՝ սեպտեմբերի 24-ին անպայման Երևանում լինելու մասին, բայց միաժամանակ զգուշացնում է, թե հայրիկը չի ասում, թե ինչու:

Աբեղյանը հարցնում է.

— Գրեցի՞ր, Լուսիկ:

— Գրեցի, հայրիկ:

— Գրեցի՞ր, որ սեպտեմբերի 24-ին այստեղ լինի:

— Գրեցի, հայրիկ:

Զայն չի հանում: Անցնում է ժամանակ: Վրա է հասնում սեպտեմբերի 24-ը և այդ օրը վախճանվում է Մանուկ Աբեղյանը:

Լսածիս մասին հարցրի Մհեր Աբեղյանին, նա հաստատեց, ավելացնելով.

— Սեպտեմբերի 24-ի երեկոյան Մոսկվայում զնացինք ներկայացում նայելու: Ներկայացման կեսին հանկարծ մի չարագուշակ զգացում ընկավ սիրտս:

— Հայրիկին բան պատահեց:

Ասացի ես կողքիս նստած Ռուբեն Դրամբյանին:

Հաջորդ օրը ստացվեց դժբախտությունը հաստատող հեռագիր:

Մանուկ Աբեղյանի մահը ինձ համար անսպասելի էր։ Ոչ այն պատճառով, որ առողջ էի կարծում։ Այն պատճառով, գլխավորապես, որ ինձ չէր թվում, թե նա էլ է ենթակա բնության օրենքներին, մի օր ծնվել է, մի օր էլ մեռնելու է։ Եվ, այնուամենայնիվ, վախճանվել էր։ Զկար այլևս հայագիտության գագաթը։

Գրականության և արվեստի մեծերի հետ եմ բարեկամություն արել և հակառակ մի քանի տարվա իմ հաճախակի այցերին, չեմ վարող ասել, թե նրա հետ մտերմություն ունեի, թեկուզ այնքան, որքան դրա իրավունքն է ունենում սիրված աշակերտը։ Իսահակյանի և Դեմիրճյանի հետ վիճում էի, թույլ էի տալիս անգամ կատակել։ Իսկ Աբեղյանի հետ հարաբերությունս պաշտոնական էր։ Մի ուժ կար Աբեղյանի մեջ, որ ստիպում էր ինձ, և ոչ միայն ինձ, նույնիսկ տարեց ու մեծահոշակ մարդկանց, ինչ-որ տարածություն վրա մնալ։ Բոլորն ակնածում էին, պատկառում։ Երբ նա սենյակ էր մտնում, քո կամքից անկախ՝ ոտքի էիր կանգնում։

Ուսուցիչներ կան, թեկուզ և նշանավոր փրենց ասպարեզներում, որոնց աշակերտները գալիս և անցնում են նրանց։ Ես համարյա թե չգիտեմ չգերազանցված ուսուցիչ։ Իմ ճանաչածներից միակը Մանուկ Աբեղյանն էր, որ գերազանցել էր իր հայտնի ուսուցիչներին, իսկ աշակերտներից ոչ մեկը նրան գերազանցել չկարողացավ։ Աբեղյանը ուսուցիչ էր և ուսուցիչ էլ մնաց։

Այս մեծահռչակ գիտնականի անունը վաղուց էի լսել, դեռևս աշակերտ ժամանակվանից: Իմ հայոց լեզվի ուսուցիչը՝ Մկրտիչ Մկրտումյան, որ էջմիածնի Գևորգյան ճեմարանն էր ավարտել, հիացած էր խոսում նրա մասին, ու նրա պատմածները անհավատարի էին թվում մեզ, մանավանդ երբ ասում էր, թե նա կազմում է (թե՞ կազմելու է, լավ չեմ հիշում) հայոց լեզվի քերականությունը՝ աշխարհի բոլոր լեզուների համեմատությամբ:

Ասում են առաջին տպավորությունը չի փոխվում և մարդուն ուղեկցում է մինչև նրա կյանքի վերջը: Եվ այն ժամանակ, և հետո, երբ արդեն անձնական ծանոթություն ունեի հետը, չէի կարողանում «անջատվել» առաջին անգամ լսածիցս ու միշտ, նրան տեսնելիս, մտածում էի, թե այդքան բան ի՞նչպես է ամփոփվում մի զլխի մեջ:

Երբ առաջին անգամ տեսա Աճառյանին, հետո էլ ծանոթացա հետը, մտածում էի՝ այդպիսի մեծություն և այդպիսի պարզ, հասարակ պահվածք: Չնայած իր ծայրահեղ զբաղվածությանը՝ մատչելի էր բոլորին, կարող էր ամեն մեկը մոտենալ, իրեն հետաքրքրող հարցը տալ և պատասխան ստանալ: Հազիվ ծանոթացած՝ կատակներ էր անում: Մի խոսքով՝ իր արտաքինով, իր պահվածքով չէր զանազանվում իր շրջապատի մարդկանցից:

* * *

Աչքի եմ անցկացնում գրառումներս և, թող խոստովանություն լինի, ծանոթությունս այդ մեծ գիտնականի հետ, ցավոք, իմ օգտին չէ: Եղածը եղել է ու ինձ մնում է անել այդ պատմությունը ինչպես որ պատահել է:

Աճառչանը Հայկեստհրատին տպագրության առաջարկեց իր «Հայոց լեզվի պատմություն» աշխատության առաջին հատորը: Վերապահություն կար նրա այդ ուսումնասիրությանը նկատմամբ: Մառի ազդեցությունն այդ ժամանակ ուժեղ էր բոլորի վրա, այդ թվում և իմ, իսկ Աճառչանի գիրքն այլ մոտեցումով էր գրված, եթե շասենք՝ հակառակ:

Ես պետք է պատասխան տայի: Ստիպված էի արհեստական պատճառներ մեջ բերել: Մի անգամ ասացի, թե լավ թուղթ չունենք:

— Ինչ թղթի վրա ուզում եք տպագրեք, թեկուզ շաքար փաթաթելու թղթի վրա, բայց տպագրեք: Լավ գրքի համար թուղթը ոչ մի նշանակություն չունի:

Մի այլ անգամ ասացի, որ երևի հարկ կլինի առաջաբան գրել և հայտնել անհամաձայնություն՝ որոշ տեսակետների նկատմամբ: Համաձայն է:

— Համաձայն եմ, իհարկե:


Ու բարձրացրեց երկու ձեռքը, որպես հանձնվելու նշան: Հետո ձայնն իջեցրեց և կամացուկ ասաց.

— Առաջաբան չէ, ինչ ուզում եք գրեք, միայն թե տպագրեք: Գրեցեք, որ այս գիրքը մի գրող չարժե, գիտություն հետ ոչ մի կապ չունի, գրեցեք, ինչ ուզում եք գրեցեք, բայց տպագրեք:

Եվ հետո ավելացրեց.

— Ոչ մի առաջաբան անհաջող գրքին հաջողություն չի բերի: Եվ հաջողված գրքի ճանապարհը փակել չի կարող ոչ մի բացասական առաջաբան:

Իմ սխալը եղավ այն, որ խորհրդակցեցի համալսարանի այն լեզվաբանների հետ, որոնք Մառի երկրպագուն էին: Հրատարակչության մեջ ծանր կացություն էր ստեղծվել: Զգիտեինք ինչ անել: Հայկեստհրատի ղեկավարությունն այս բոլորի մասին իրազեկ դարձրեց վերադաս մարմիններին: Նրանք գտան, որ Աճառչանի նման գիտնականին մերժել չի կարելի, բայց ասացին, որ լավ կլինի, եթե Պետական հրատարակչության փոխարեն համալսարանը լույս ընծայի, որպես ուսումնական ձեռնարկ, ու եթե անհրաժեշտ են համամարում՝ թող մի առաջաբան կցեն, քննադատեն հեղինակի



սխալ հայացքները, բայց նշեն նաև գրքի արժանիքները: Ինձ վրա դրվեց այս որոշմանը պրոֆեսորին տեղյակ պահելու ծանր պարտքը:

Լսեց և ասաց.

— Ես այդպես էլ սպասում էի:

Եվ հետո.

— Ձեզանից չեմ նեղանում, դուք կարգադրություն եք կատարում:

Ես չթաքցրի, որ ես էլ այնպես եմ մտածում, ինչպես որոշում կայացնողները:

— Ձեզ պատիվ է բերում այդ անկեղծ խոստովանությունը, բայց չեք կարող երևակայել, թե ինչ մոլորության մեջ եք: Կհասկանաք մի օր, թե ե՞րբ՝ չեմ կարող ասել, բայց կհասկանաք անպայման երևի ինձանից հետո:

Մի հեղնական ժպիտ գծվեց դեմքին.

— Ասենք, ինձ համար միևնույն է, թե ով է տպագրում, միայն թե լույս տեսնի:

* * *

Փողոցում հանդիպեցի, մոտեցա, բարևեցի, հարցրի թե ինչպես է:

Հարցս օդի մեջ կախված մնաց: Կշտամբող հայացքը հառեց վրաս:

— Ի՞նչպես մինչև հիմա չեք ասել, թե ով է ձեր աները:

— Հաբեթ հաշատրյանը, — վրա բերի ես:

— Թանկագին մարդ էր ինձ համար: Շատ հիշողություններ են կապված նրա հետ: Իսկ եթե իմանայիք, թե ինչպես էր սիրում Կոմիտասը նրան:

* * *

Ես հազիվ մի-երկու անգամ եմ եղել նրա տանը և մնացել եմ զարմացած, որ այն սենյակում, ուր նա պարապում էր, գիրք չկար: Անգամ իր հրատարակած գրքերը չկային: Պահարաններում տպագրության պատրաստ և հերթի սպասող ձեռագրեր: Սեղանի վրա կային գրքեր. երբ մի-երկուսը

աչքի անցրի, հասկացա, որ առաջիկա հետազոտութեան կապակցութեամբ դրանք գրադարաններից էին բերված:

Ջարմանք հայտնեցի, որ գոնե իր տպագրած աշխատութիւնները չի պահուում:

— Իսկ ինչո՞ւ պահեմ, ինչի՞նչ են պետք:

Ու հետո քացատրեց այսպես.

— Աշխատութիւնը ձեռագիր վիճակում իմն է, տպագրվելուց հետո՝ ընթերցողներինն է: Իսկ ես իմ աշխատութիւնների ընթերցողը չեմ:

* * *

Նշանակվեցի զրական ամսագրի խմբագիր և որոշեցի հայագետների աշխատակցութիւնը խնդրել: Դիմել էի Աբեղյանին, ուրիշներին նույնպես: Հիմա խնդրում էի Աճառյանին: Մերժեց, ասաց, որ զբաղված է իր հիմնական գործերով:

Ամսագիրը հետաքրիր դարձնելու ծրագրիս մեջ մի կետ կար. գրախոսութիւններ շատ տպագրել և, շարքային հեղինակների կողքին թեկուզ և կարճ հոգեվածների տակ, ունենալ անվանի դեմքերի ստորագրութիւն, անկախ այն բանից, գրող է, թե գիտնական: Դա ինձ մասամբ հաջողվեց:

Աճառյանի հետ խոսելիս հիշեցի, որ նա խաչատուր Կանայանի թեկնածուական դիտարկագրի ընդդիմախոսն էր: Կանայանի դիտարկագրի էլ նվիրված էր Ավետիք Իսահակյանի բանաստեղծութիւնների լեզվին: Ընդդիմախոսութիւններն էլ սովորաբար գրավոր էին լինում: Խնդրեցի, որ համաձայնի իր ընդդիմախոսականը տպագրել, որպես գրախոսութիւն:

— Այդ կարելի է:

* * *

Ամսագրի մի օրինակ ձեռքին խմբագրութիւն եկավ Աճառյանը: Եվ հայտնեց, որ, հակառակ իր մերժման, ինքը այժմ պատրաստակամութիւն է հայտնում աշխատակցելու: Ու եթե խմբագրութիւնը դեմ չէ, գուցե արժե պայմանավորվել, թե առաջին հոգեվածը ի՞նչ հարցի վերաբերի:

Լսել էի, որ Աճառյանը կազմում է անձնանունների բա-
ռարան: Խնդրեցի, որ մի հոգված գրի անձնանունների մա-
սին ընդհանրապես, կանգ առնելով հայկականի վրա:

— Շատ լավ:

Համաձայնեց:

— Իսկ ի՞նչ ծավալով:

Ես խնդրեցի, որ գրի հեղինակային մի ամսուկի շափով:

— Ժամկե՞տ:

— Մի ամիսը բավական է:

— Ինչո՞ւ այդքան շատ:

— Ուրեմն՝ երբ կուզեք բերեք:

Մի փոքր հետո հարցրեց.

— Ձեր անունը, ի՞նչ եք կարծում, հայկական է:

— Հայկական չէ:

— Ընչական է հապա:

— Երեի՞ իսպանական:

— Իսկ ինչո՞ւ եք այդպես կարծում:

— Դուրեքս Իբարուրիի որդու անունը Ռուբեն է:

— Ոչ, իսպանական չէ, հրեական է, ավելի ստույգ՝
բերայական: Մի ամբողջ նախադասություն է. Ռու՝ նշանա-
կում է տես, բեն՝ որդի:

Ես լսում էի Աճառյանին և հիշում, որ գրողների տան
ատամնաբույժը, ազգովթյամբ հրեուհի տիկին Վանեցյանը
«Ах эти беды» էր կոչում կիրակի օրերը իրենց տուն
եկող ամուսնու՝ առաջին կնոջ շարաճճի տղաներին, որ
գալներուն պես տակնուվրա էին անում ամբողջ տունը:

— Ձեր մտքերն ուրի՞շ տեղ են:

Ես ասացի, թե ինչ հիշեցի, ինչպես նաև այն, որ
Ֆեյխտվանդերի «Հրեական պատերազմ» վեպում գլխավոր
հերոսը կոչվում էր Հովսեփ-բեն-Մատաթիա: Ուրեմն՝
Մատաթիայի որդի Հովսեփ է նշանակում:

— Իհարկե:

Մի փոքր հետո.

— Հիշեք ձեր պատանեկությունը, անպայման կարդա-
ցած կլինեք «Բեն-Հուրը»: Ձեր մտքով չի՞ անցել, որ նշա-
նակում է կրակի որդի:

Ես լսում էի կլանված ու ցավում, որ իր ուսանողը չեմ եղել:

— Հիմա ասեմ, թե ինչ իմաստ կարող էր պարունակել ձեր անունը: Հավանաբար դա բարեմաղթություն է, որ արվել է այն տղամարդուն, որի կինը իրար ետևից աղջիկներ է բերում, այսինքն՝ արժանանա որդու տեսություն: Կամ էլ այդ ասված է այն հորը, որի որդին պատերազմի դաշտումն է կամ պանդխտության մեջ, ուրեմն բարեմաղթում են նրա վերադարձը: Բայց սա ենթադրություն է, իմ ենթադրու-

Մի պահ հետո ավելացրեց.

— Հետաքրքիր է:

Եվ ապա.

— Ես գնացի:

* * *

Չանցավ մի քանի օր՝ Աճառյանը խոստացած հոգվածը դրեց սեղանիս:

— Ե՞րբ կարող եմ իմանալ պատասխանը՝ տպագրո՞ւմ եք, թե ոչ:

— Հենց հիմա:

— Ինչպես թե՛ հենց հիմա:

— Համարեք ձեր հոգվածն ընդունված, կհրապարակվի երրորդ համարում:

— Թող լինի երրորդում, բայց ես ուզում եմ իմանալ խմբագրի որոշումը՝ հոգվածը կարդալուց հետո միայն: Ե՞րբ ի վիճակի կլինեք հայտնելու ինձ ձեր որոշումը:

— Թեկուզ վաղը:

* * *

Հաջորդ օրը Աճառյանը եկավ ու նստեց դիմացս:

— Կարդացի՞ք:

Ձէի կարդացել: Ներողություն խնդրող հայացքով մեղավորա նայեցի իրեն:

— Ոչինչ, ոչինչ, մի նեղվեք: Կարող եմ վաղը գալ, մյուս օրը: Բայց մի բան ասեմ. ձեզանից մեծ եմ և ինձնից ձեզ խրատ կհասնի: Աշխատեցեք ստույգ լինել, տված խոսքը պահել:

Ժպտաց, ինչ-որ բան ասաց պահլավերեն, որից ոչինչ չհասկացա:

Նայեց ինձ:

— Տեսնում եմ, որ պարսկերեն չգիտեք: Ռուսն ասում է՝ մարդ պետք է իր տված խոսքի տերը լինի: Իմաստուն խոսք է: Պարսիկն էլ ասում է. մինչև խոսքը տալը՝ դու ես խոսքի տերը, խոսք տալուց հետո՝ խոսքն է քո տերը:

Նորից ժպտաց:

— Հո չե՞ք նեղանում:

* * *

Հաջորդ օրը, որպեսզի ժամանակ չկորցնի, ինքս գնացի մոտը, հայտնեցի, որ կարդացել եմ, պայմանավորվածություներ երրորդ համարի վերաբերյալ պահպանվում է:

— Իսկ ինչո՞ւ ոչ երկրորդում:

Ասացի, որ երկրորդը մամուլի տակ է և կես էջ անգամ հիմա տեղադրել չեմ կարող: Եվ հետո հարցրի՝ մի՞թե միևնույն չէ մի ամիս առաջ, մի ամիս հետո:

— Ես գործնական մարդ եմ, և այսօրվա գործը վաղվան չեմ թողնում: Կյանք է, ամեն ինչ կարող է պատահել:

Շատ ուշ էր, չէի կարող որևէ հոգված հանել և տեղը Աճառյանինը դնել:

* * *

Երևի մարդիկ կան, որոնց նախազգացումն ուժեղ է: Ըստ երևույթին դրանցից էր Աճառյանը:

Երրորդ համարի ուրիշ նյութերի հետ հոգվածն ուղարկեցի տպարան: Ստացանք սրբագրաթերթերը:

Այդ օրերին լույս տեսավ ամսագրի դեմ գրված բավական խիստ մի հոգված: Խմբագիրը խստագույնս քննադատվում էր գրական հանդեսը ժամանակակից հարցերից հեռու պա-

հելու համար: Հոգվածի հեղինակը և նրա հետ միասին նաև ուրիշներ, անվանի գրողներից, օրինակ Դեմիրճյանը, Գրողների միության նախագահության նիստին ինձ կշտամբեցին գրական սխալ քաղաքականություն վարելու համար:

Հոգվածը լույս տեսնելու հաջորդ օրը Աճառյանը եկավ խմբագրություն և խնդրեց իր նյութը չտպագրել:

Ես ասացի, որ քննադատությունն իրեն չի վերաբերում: Համառեց, ասելով, որ իր համար չի անհանգստանում, որ ինքը հրի ու ջրի միջով անցած մարդ է և մտածում է խմբագրության մասին: Եվ ավելացրեց, թե ինքը չի կամենա, որ ուրիշներն էլ իր պատճառով հարվածի տակ ընկնեն:

Ես ցույց տվի հոգվածի սրբագրաթերթերը: Նա ասաց.

— Ուզո՞ւմ եք վերադարձրեք ինձ, ուզո՞ւմ եք պահեք ձեզ մոտ, բայց ոչ մի դեպքում մի տպագրեք:

Նրա խոսքը կտրական էր:

Եվ այդպես, ստիպված եղա հոգվածը հանել երրորդ համարից:

* * *

Աճառյանը եկել էր խմբագրություն, բայց մեր խոսակցությունն ընդհատվեց: Եկավ մի գրող, ներողություն խնդրեց պրոֆեսորից, ասաց, թե շտապում է և բառացիորեն երկու խոսք ունի փոխանակելու: Երկու խոսքը դարձավ հարյուր, և քառորդ ժամից ավելի Աճառյանը ստիպված էր լսել իրեն չհետաքրքրող մի հարց ու պատասխան, մի որոշ իմաստով՝ վեճ:

Զրուցակիցս դուր չեկավ Աճառյանին. երբ գնաց՝ հարցրեց.

— Ո՞վ էր այդ տգետը:

Եվ տվի այցելուի ազգանունը:

— Զեմ լսել, բայց...

Եվ հետո ասաց պարսկերեն մի խոսք, որի հայերենն իր թարգմանությամբ ստացվեց այսպես. «Մարդ կա՝ գիտի, և գիտի, որ գիտի, մարդ կա՝ գիտի և չգիտի որ գիտի, մարդ կա՝ չգիտի և գիտի որ չգիտի, մարդ կա՝ չգիտի և չգիտի որ չգիտի»:

Ու ասաց, թե քիչ առաջվա այցելուն վերջիններից է՝
չգիտի, որ չգիտի:

Մի-փոքր դադարից հետո ավելացրեց.

— Դրանց թիվը հիմա շատ է:

* * *

Ես չեմ հիշում, որ Աճառյանը սխալվեւ: Ինչ որ ասում
էր՝ ճիշտ այդպես էլ լինում էր: Բայց մի անգամ սխալվեց:

Հանդիպեցինք փողոցում: Նկատեց, որ տրամադրութունս
բարձր է:

— Ի՞նչ է պատահել, աչքիս զվարթ եք երևում:

— Պրոֆեսոր, կարող եք շնորհավորել, կինս ազատվել
և աղջիկ է բերել:

— Շնորհավորում եմ: Առաջնե՞կն է:

— Ոչ, մեկն ունեի, արդեն, դարձյալ աղջիկ, անունը
Արփենիկ: Սրան էլ կոչեցինք Տաթևիկ:

— Ինչո՞ւ:

Նախ՝ հայկական է, վերջապես՝ տարածված չէ:

— Զի էլ տարածվի:

Եվ հետո վրա բերեց.

— Սարքովի է: Երգչուհու հայրն է հորինել: Նրա աղջիկն
է այդ անունը կրում, հիմա էլ ձերը, ու այդպես էլ կմնա:

Այս այն դեպքն էր, որ Աճառյանը, կարծեմ, սխալվեց:

* * *

Աճառյանը հրատարակություն էր եկել մի հարցով:
Հեռախոսային զանգն ընդհատեց մեր խոսակցությունը: Երբ
վերջացրի և ուղեցի անցնել ընդհատված խոսակցությանը՝
Աճառյանը միջամտեց.

— Դուք հեռախոսով խոսելիս ասացիք՝ «կողմնակից չեմ
այդպիսի փոխհարաբերության»: Զեր մտքով չի՞ անցել, որ
հարաբերության կողքին այդ փոխը միանգամայն ավելորդ է:
Հարաբերություն բառն ըստ իմաստի այդ նախածանցը
կրում է իր մեջ, ուրեմն էլ ինչո՞ւ ծանրաբեռնենք առանց
այն էլ երկար բառը:

Մի օր հարցրեց.

— Հայտնի՞ է ձեզ, որ ես զբաղվել եմ նաև գրականությամբ:

— Ուսանողական տարիներիս կարդացել եմ ձեր գրած հայոց նոր գրականության պատմության երեք պրակն էլ:

— Ավելի լավ:

Ասաց ու լուռ մնաց: Մի կարճ դադարից հետո խոսեց.

— Մի առաջարկ ունեմ. չե՞ք հանձնարարի ինձ պատրաստելու Դուրյանի ժողովածուն: Կճշտեմ նախորդ հրատարակության սխալները: Համաձայն եք:

Խնդրեցի ներկայացնել ինձ ասպագա հրատարակության ծրագիրը:

— Ես արդեն մտածել եմ այդ մասին: Նախ՝ բանաստեղծություններ, հետո՝ թատերգություններ, վերջում՝ նամակներ: Այս է իմ ծրագիրը: Ինչպե՞ս եք գտնում:

Լավ ծրագիր էր:

— Իսկ առաջաբան և ծանոթություններ:

— Ծանոթություններ գուցե. ես կմտածեմ այդ մասին, բայց առաջաբան հարկավոր չէ: Ես այն համոզման եմ, որ բոլոր առաջաբանների կյանքը կարճ է: Չե՞ք նկատել, որ զիրքը վերահրատարակվում է, իսկ առաջաբանը՝ ոչ: Այլ խնդիր է, երբ գրքին կցվում է բանասիրական բնույթի ներածական ուսումնասիրություն:

1946-ին էր: Յուրտ ձևում, հունվար ամսին նշվելու էր Երվանդ Շահազիզի ծննդյան 90-ամյակը:

Երեկոյի օրը, ցերեկվա ժամը 12-ը կլիներ, Աճառյանը եկավ գրականության ինստիտուտ և հրավիրատոմս խնդրեց: Բոլոր հրավիրատոմսերը բաժանված էին:

Խորեն Սարգսյանն ասաց, որ Աճառյանը կարող է առանց տոմսի էլ գալ, նրա առջև բոլոր դռները բաց են:

— Ես կարգ ու կանոն սիրող մարդ եմ և չեմ թույլ տա ինձ մի տեղ գնալ, որտեղ մուտքը հրավիրատոմսերով է, իսկ ես անտոմս եմ։

Եվ պնդեց, թե խնդրում է իրեն հրավիրատոմս տալ։ Շահագրիզն իր տեսուչն է եղել Նոր-Նախիջևանում, միասին աշխատել են, վաղուցվա բարեկամներ են և ինքը պետք է իր ներկայությամբ հարգի նրա հոբելյանը։

Խորեն Սերգեևիչը առաջարկեց ինձ ինստիտուտի աշխատակիցներից որևէ մեկին խնդրել, որ իր տոմսը զիջի Աճառյանին։ Շատերը տոմս առաջարկեցին, համարելով դա իրենց համար պատիվ։

Աճառյանը Սարգսյանին տվեց մի ծրար։

— Խնդրում եմ հանձնել հոբելյարին։

Խորեն Սերգեևիչը հարցրեց.

— Թույլ կտա՞ք հրապարակել երեկոյին։

— Ինչու չէ։

Իբրև երեկոյի կազմակերպիչներից, մի քառորդ ժամ շուտ գնացի։ Դեռ վաղ էր և դահլիճում ոչ ոք չկար, բացի Աճառյանից, որ գրավել էր երկրորդ շարքի պատի տակի աթոռը։

Ես ուղեկցեցի նրան բեմի նախասենյակը։

— Հետո կլցվեն,— հայտնեց իր երկյուղը Աճառյանը,— և ինձ համար տեղ չի լինի դահլիճում։

Ես նրան հանգստացրի, թե նրա տեղը նախագահության մեջ է։

Այդ օրը նա բարձր տրամադրություն մեջ էր և անկեղծ ուրախանում էր Շահագրիզի հասցեին ասված ամեն մի լավ խոսքի համար։

Երբ երեկոն վերջացավ և հասարակությունը խուռներամ դուրս էր գալիս, միջանցքում պատահամբ հայտնվեցի Աճառյանի կողքին։

— Եթե ոչինչ արած չլիներ՝ հասներ այս տարիքին, էլի պետք է այս երեկոն կազմակերպվեր։ Իննսուն տարի, կատակ չէ. դա նշանակում է հաղթել բնությանը։

Կարճատև լուսնոտից հետո.

— Իսկ իմ աչքերը վաղուց դաժանում են ինձ... Իսկ յոթանասունս նոր եմ լրացնելու...

Խոսքն ընդհատեց և ապա շարունակեց.

— Գործ անող մարդու համար մեծ բախտավորություն է Երվանդի նման հասնել իննսուն տարվան:

* * *

Աճառյանը ութսունը չլրացրեց: Եվ դարմանալի բան: Երբ առաջին անգամ լսեցի Աճառյանի անունը, նա, կարծեմ, հիսուն տարեկան էլ չկար, իսկ նրա անվան շուրջը արդեն առասպելներ էին հյուսվում: Գիտություն մեջ հաղվագյուտ ժողովրդականություն ունեցող մարդ, որի անվան շուրջ զանազան ճիշտ և անճիշտ պատմություններ բերն-բերան էին անցնում:

Աճառյանի մասին մտածելիս ես միշտ անդրադարձել եմ նրա արտակարգ անհատականություն լինելուն: Նրան կյանքը օժտել էր մի հիշողությամբ, որ առասպելական էր, աշխատասիրությամբ, որ բոլոր համեմատություններից դուրս էր, ինչպես նաև գիտական մտքի այնպիսի հղացումներով, որ նույնիսկ իբրև դադափար և ծրագիր արժանի էին բարձր գնահատության: Աճառյանի արածը մի մարդու գործ չէ, այլ մի ամբողջ հաստատության: Աճառյանին մոտ կանգնած ընկերներս ասում էին, թե նա թողել է այնքան ձեռագրեր, դեռևս չհրապարակված աշխատություններ, որ լի ու լի բավական է մի երեք, նույնիսկ չորս գիտնականի ծանրակշիռ վաստակ կազմելու համար:

Աճառյանը օժտվածության և աշխատասիրության ներդաշնակության բացառիկ օրինակն է:

Մեր վերջին հանդիպմանը խնդրեցի նրան թարգմանել գրաբար մի նախադասություն Սարգիս Տիգրանյանի ընդարձակ նախաբանից՝ կցված «Գոթողիայի» հայերեն թարգմանությանը: Իմ տված թերթիկը մոտեցրեց իր աչքին այնքան մոտ, որ թուղթը կաշում էր արտևանունքներին: Իմացա, որ մի աչքը չէր տեսնում բոլորովին, իսկ մյուսը՝ մի քառորդով միայն: Եվ այդ վիճակում նա շարունակում էր կատարել այնպիսի գործեր, որոնք վեր էին մի մարդու ուժերից:

Շատ էր տարբեր իր արտաքին նկարագրով այս նշանավոր հայագետը Աբեղյանից և Աճառյանից: Առաջինը թեև կարճ էր, բայց մոնումենտալ տպավորություն էր թողնում, նման էր կաղնու, ժայռաբեկորի, որին թվում էր թե հողմերն իսկ ի վիճակի չեն սասանելու: Երկրորդը չուներ նրա ամուր կառուցվածքը: Վտիտ էր ու անտպավորիչ, գոնե առաջին հայացքից. ներքուստ կենտրոնացած և խիստ լուրջ, արտաքուստ նա ցրված մարդու տպավորություն էր թողնում, մանավանդ եթե չգիտեիր, թե ով է: Սիրում էր զավեշտը, և դիմացինը լավ չէր հասկանում, որտեղ է անկեղծ ու անմեղ կատակը, և որտեղ՝ խայթը, թաքնված անմեղ կատակի տակ:

Այս երկուսից բոլորովին տարբեր էր Ստեփան Մալխասյանը թե՛ իր արտաքին պատկերով, թե՛ խառնվածքով, մանավանդ եթե նկատի առնվի անմիջական տպավորությունը, որ նոր մարդը կարող էր ստանալ նրանից:

Աբեղյանի համար գիտական զբաղմունքն էր կյանքի գլխավոր, երևի ճիշտ կլինի ասել՝ միակ նպատակը: Այդ նպատակից շեղումներ չուներ, ամբողջապես կենտրոնացում էր, ծայրահեղ, այսինքն՝ այնպիսի չափերի հասնող, որ ճաշի սեղանի մոտ նստած ավելի մտքերի հետ էր, քան սեղանակիցների, ու նրան այնքան չէր զբաղեցնում այն, թե ինչը ինչի հետ պիտի ուտել, որքան՝ ինչքան կարելի է շուտ ավարտել ճաշը և վերադառնալ գրասենյանի մոտ:

Աճառյանը, որ նույնպես գիտությունը նվիրված էր այնպես, որ չգիտեմ, թե ինչ ուժ կարող էր փոխել նրա կյանքի ընթացքը, հակված էր դեպի ժամանցը և վայելքը. նրան կարելի էր «Աբիսողոմ աղա» ճաշարանում տեսնել անեկդոտ պատմելիս կամ էլ սրտանց քրքշալիս: Ճաշելու և



ընթերցելու պահերը նրա համար բավականութուն էին, թվում էր չի էլ շտապում վերադառնալ իր զբաղմունքին։ Ու շատ էր զարմանալի դա, նույնիսկ անհասկանալի, եթե աչքի առաջ ունենանք նրա բանասիրական հետազոտությունները, որոնք բնույթով չափազանց աշխատատար էին։ Ե՞րբ էր ժամանակ գտնում կամ ինչպե՞ս կարող էր ժամավաճառ լինել, չէ՞ որ նա այն մարդն էր, որի մասին ասում էին, թե գտել է օրվա քսանչորս ժամերից ավելի ժամանակ ունենալու և աշխատելու գաղտնիքը։

Աճառչանի զբաղմունքը այնքան կենտրոնացած էր, որ նա, որպեսզի հետո կարողանա շարունակել, իրեն ենթարկում էր ցրվելու ցանկությունը։ Իսկ այդ կենտրոնախույս վիճակը պահանջում էր անշատման ընդունակություն, որն ամենքը չունեն։ Առօրյա կյանքում նրա սերը դեպի կատակները, սրտագին ծիծաղը զվարթ պատմություն լսելիս՝ բնական հատուցումն էին այն լարված լրջության, որի մեջ էր գիտական զբաղմունքի ժամերին։

Ստեփան Մալխասյանը, ինչպես ասացի, նման չէր ո՛չ մեկին, ո՛չ էլ մյուսին։ Նրա մեջ կար բնության ներդաշնակությունից մի բան, որ նրան հեռու էր պահում բոլոր ծայրահեղություններից։ Աբեղյանի անունը բավական էր, էլ չեմ խոսում նրա անժպիտ արտաքինի մասին, որ դիմացինին պահեք տարածության վրա։ Աճառչանի անունը ուներ Աբեղյանի մազնիսական ուժը, բայց, հակառակ հաճախ հանդիպելու ցանկությունը, երբեմն խուսափում էիր, մտածելով, թե հանկարծ նրա լեզվի խայթի զոհը չդառնաս։

Ստեփան Մալխասյանը վարվեցողությամբ չափազանց մեղմ էր։ Չեմ կարող ասել, թե Աբեղյանն ու Աճառչանը բարյացակամ չէին, բայց այն, ինչ այդ երկուսի ներսումն էր թաքնված, Մալխասյանի համար, ներքին հատկություն լինելուց բացի, արտաքին շեշտված կողմ ուներ նաև։ Աճառչանին և Աբեղյանին մի բանի համար դիմելուց առաջ երկար-բարակ պիտի մտածեիր՝ ասե՞լ, թե չէ, իսկ Մալխասյանի պահվածքն այնպիսին էր, որ նրան դիմողը մտա-

տանջություն չէր ապրում: Դա էր պատճառը, որ Մալխաս-
յանին մի անգամ հանդիպողը նորից մոտը գնալու, զրու-
ցելու, ինչ-որ հարցեր լուծելու ներքին համարձակություն էր
ունենում:

* * *

Երբ առաջին անգամ հանդիպեցի՝ Մալխասյանը ութսուն-
երկու տարեկան էր, իսկ ես երեսունս դեռ չէի բոլորել: Եվ
բնական է, որ ես մի որոշ վարանում ապրեցի նրա սեն-
յակի դուռը բախելուց առաջ: Բայց ոչ մի կասկած և ապ-
րում ինձ հետ չէին դարձնի, քանի որ ուղարկված էի նրա
մոտ՝ Հայպետհրատի ղեկավարության հանձնարարությամբ,
որտեղ աշխատում էի: Հարցը վերաբերում էր իր կազմած
«Հայերեն բացատրական բառարանին», թեև հիմնական
բոլոր խնդիրները լուծվում էին ավելի բարձր մակարդակով,
քան հրատարակչությունն էր: Ես այն օղակն էի, որ կապում
էի հեղինակին և հրատարակչությանը միմյանց:

* * *

Աշխարհաբար թարգմանությամբ հայ պատմիչների
մատենաշար հրատարակելու կապակցությամբ պետք է
հանդիպել Մալխասյանին: Մանուկ Աբեղյանը խորհուրդ էր
տվել առաջին հերթին նրան տեսնել, նրա հետ համաձայ-
նության գալ: Եվ ապա միայն նոր բանակցություններ սկսել
ուրիշների հետ:

Մալխասյանը Թբիլիսիումն էր ապրում և ոչ ոք չգի-
տեր, թե նա մեկ էլ երբ կլինի Երևանում: Ես շատ էի
ողբում, որ մատենաշարի ծրագրով, որպեսզի նամա-
կագրությամբ պարզելի ինձ հետաքրքրող մանրամասնու-
թյունները, եթե, մասնավոր, հանձն առնեի Խորենացու
թարգմանությունը, որով սկսվելու էր մատենաշարը:

Գիշերը գնացք նստեցի և առավոտյան Թբիլիսիումն էի,
ուր միշտ հաճույքով եմ ոտք դրել, քանի որ կյանքիս առա-
ջին քսան տարին անցել է այնտեղ:

Ժամանակ չկորցրի, շտապեցի Մալխասյանի տուն։ Հայտնեցի, թե ինչ նոր մատենաշար է ծրագրվում ու ես էլ նրան դիմում եմ հրատարակչության անունից՝ երկրորդն էլ՝ Աբեղյանի խորհրդով, շեշտելով, թե նա է ասել, որ առաջինը իրեն դիմենք։

Մալխասյանի դեմքին երևաց մի ժպիտ, որ մատնում էր շոյվածությունը։ Ասաց, թե նախընտրում է Բուզանդի թարգմանությունը, բայց Աբեղյանի խորհուրդը հորենացուց սկսել՝ ճիշտ է։

Նա այս բոլորն այնպես ասաց, որ կարող էր այն տպավորությունը ստացվել, թե ոչ թե ինձ հետ է խոսում, այլ մտմտում է ինքն իր հետ։ Թվում էր, թե որոշում կայացնելու պահը պիտի նրա դեմքին հաղորդեր կենտրոնացում, բայց դեմքի արտահայտությունն այնպես էր, կարծես վերացած մի ապրումի մեջ է։ Եվ հանկարծ դեմքը փոխվեց, վերացական արտահայտությունը չբացավ և ինձ նայեց իր սովորական աչքերով, որոնց մի մասը, միշտ թաքնված էր մնում իջած կոպերի տակ։

— Որքա՞ն ժամանակ կտաք։

— Մի տարի։

Զրույցը տեղի էր ունենում 1939-ի աշնանը։

— Համաձայն եմ։ Ուրեմն ասում եք՝ Աբեղյանի խորհրդով եք եկել ինձ մոտ։ Լավ, լավ, կանեմ անպայման։

— Իսկ Բուզա՞նդը։

— Բուզան՞դը ինչ... Ա՞յդ էլ եք ուզում։

— Անպայման։

— Հենց որ հանձնեմ հորենացին։

Հարցրի, թե ինչպես ճիշտ կլինի գրել՝ Բյուզա՞նդ, թե Բուզանդ։

— Բուզանդ, հիմք ընդունելով Փարպեցուն։

* * *

Մեր հալածեալներից մեկը հորենացու առեղծվածին անդրադառնալով՝ կամենում էր հաստատել, որ նա ավելի ուշ ժամանակների ծնունդ է, քան ավանդաբար համարվում է և, միաժամանակ, մեղադրում էր պատմիչին, թե նա

իր կյանքի տվյալներն այնպես է հաղորդում, որ կարծես, թե փնքը հինգերորդ դարու է:

Շատերը վրդովվեցին: Եղան առարկություններ՝ բանասիրական, պատմական, ապացուցելու համար հակառակը: Եվ առարկողներից մեկը Մալխասյանն էր, որ մի ամբողջ գիրք գրեց՝ հիմնավոր, փաստարկներով լի:

Մալխասյանը, մինչև գիրք հրատարակելը, մեր Ակադեմիայում այդ նյութի շուրջ մի դասախոսություն կարդաց:

Դասախոսության ժամանակ, երբ կամեցավ անդրադառնալ առարկող կողմի այն մտքին, թե հորենացին ճիշտ չի հաղորդում իր կյանքի տվյալները, դասախոսի վրդովված հուզմունքը հասավ այնպիսի չափերի, որ նա ի վիճակի չեղավ իշխելու իր վրա և... աչքերից արցունքներ թափվեցին:

— Պատկերացնո՞ւմ եք,— ասաց նա կերկերուն ձայնով,— գտնվում են մարդիկ, այն էլ գիտություն մեջ, որ ասում են, թե պատմահայր Մովսես հորենացին սուտ է խոսում...

Այդ դասախոսությանը ներկա էր Հրաչյա Աճառյանը: Վերջում նա մոտեցավ Մալխասյանին, ուզեց ինչ-որ բան ասել, բայց ոչինչ չասաց, սեղմեց ձեռքը, գրկեց ծերունուն ու երկար ողջագուրված մնաց...

* * *

Դնացել էի Թբիլիսի: Ես արդեն նշանակված էի «Սովետական գրականություն» ամսագրի խմբագիր և մտքովս անցավ Ստեփան Մալխասյանի աշխատակցությունը խընդրել:

— Գիտեք ինչ, ինձ համար դժվար կլինի որևէ բան գրել ձեզ համար, թեև կկամենայի:

Լռեց:

— Գուցե ավելի լավ կլինի, եթե ստանձնածս գործը ժամանակին կատարեմ: Ո՛չ, ո՛չ, ինձ մի մղեք զայնպիսի: Դա կարող է ինձ խանգարել: Գիտեք ինչ, միշտ հիշեցեք, գիտությունը սիրում է կենտրոնացում: Գյոթեի խոսքը հայտնի՞ է ձեզ՝ հանճարը մտքի կենտրոնացումն է: Շատ ճիշտ միտք է:

Ասաց ու հանկարծ շտապեց նկատել:

— Ինձ անհամեստ մարդ չհամարեք և չկարծեք, թե հանճարի տեղ եմ դնում ինձ, բայց կյանքն ապացուցել է, որ շատ ընդունակ մարդիկ բեղմնավոր չեն. եղել, որովհետև կենտրոնանալու կամք չեն ունեցել, և, ընդհակառակը, միջակ ընդունակության մարդիկ, ինչպիսին օրինակ ես եմ, արդյունքի եմ հասել, որովհետև կենտրոնացումը աշխատողի ուժերը կրկնապատկում է:

* * *

Անցավ ժամանակ, ես նորից այցի էի գնացել մանկությանս վայրերը: Որոշեցի անցնել Մալխասյանի տուն. նախ՝ ուզում էի գործի ընթացքին տեղյակ լինել, և ապա՝ ինձ հաճելի էր հանդիպել մի մարդու, որը, խոշոր դեմք լինելով, իրեն պահում էր այնքան պարզ ու անմիջական, դիմացինին նշանակություն տալով, որ վերջինս էլ թե էր առնում, ինքն էլ կարևորությունը համակվում սեփական ուժերի նկատմամբ:

— Մի բան եմ խնդրելու, կարծում եմ չեք զլանա ընդառաջել, մանավանդ որ ընդունված ձև է: Թարգմանությունը ժամանակին կտամ, մեկնությունները նույնպես, բայց ներածությունը մի-փոքր կուշանա: Ներածականը հռոմեականով կհամարակալեք, որ պատրաստ մամուլների համարակալումը ստիպված չլինեք փոխելու:

Պայմանավորված ժամանակ ստացա Թարգմանությունը ծանոթագրությունների հետ միասին: Ուղարկեցի արտագրելու մեկին, որի անունը տվել էր ինքը, իսկ ես անմիջապես գնացի Աբեղյանի՝ հետ խորհրդակցելու՝ թե ո՞ւմ հանձնեմ խմբագրությունը:

Աբեղյանը զարմացած նայեց ինձ, թե այդ ի՞նչ հարց եմ տալիս և ասաց.

— Իսկ այդ ո՞վ է, որ իր վրա կառնի Մալխասյանին
խմբագրելը:

Աբեղյանը տեսնելով, որ ոչինչ չեմ ասում, վրա բերեց.

— Հանգիստ ուղարկեցեք տպարան: Ինչո՞ւ եք ավելորդ
ժամանակ կորցնում և զուր տեղը դրամ ծախսում:

* * *

Կարճատև հանդիպումներից եկա այն եզրակացություն,
որ նա իր առջև հարց չէր դնում, թե իրեն դիմողն արժանի՞
է իր վերաբերմունքին, թե ոչ: Աջակցում էր բոլորին անխը-
տիր: Եվ սկզբունքով:

Ես մի օր հարցրի նրան, թե ինչպե՞ս կարելի է ընտրու-
թյուն չանել: Եվ նա հետաքրքիր բացատրություն տվեց:

— Ես, իհարկե, հասկանում եմ, որ ինձ շրջապատող
երիտասարդները, ընդունակությամբ, պատրաստու-
թյամբ միմյանցից տարբեր են: Ես այդ հասկանում եմ, և, այնու-
ամենայնիվ, հովանավորում եմ, օգնության ձեռք պարզում
բոլորին, որովհետև ոչ ոք երաշխավոր չէ, թե այսօրվա
շնորհալի մարդուց վաղը ինչ կմնա, իսկ նվազ ընդունակ
աշխատասիրության շնորհիվ ինչպիսի արժեքներ կստեղծի:

* * *

Խորենացին լույս տեսավ: Ընդունելությունը լավ էր:

«Սովետական գրականություն» առաջին համարում
տպվեց Վարազ Առաքելյանի գրախոսությունը Խորենացու
հրատարակության մասին: Հոդվածագիրը բարձր էր գնահա-
տում արվածը, համարում Խորենացուն արժանի հրատարա-
կություն: Նա գտնում էր, որ թարգմանիչը պարզել է անցյա-
լում սխալ հասկացված և այդ պատճառով անճիշտ թարգ-
մանված որոշ նախադասություններ ու բառեր, ինչպես նաև
առանձին մոլթ համարված կետեր: Նա միաժամանակ որոշ
առարկություններ էր ներկայացնում և թարգմանության մեջ
հայտնաբերում մի-երկու բացթողում բնագրից:

Մալխասյանն անտարբեր շմնաց և պատասխան-հոդված

դրելու համաձայնություն առավ ինձանից: Եվ զրեց «Ակամա պատասխան»: Հարցն այն չէ, որ նա հերքեց առարկությունները, մի բառի շուրջ քննադատի դիտողությունը համարեց հետաքրքիր կամ էլ շնորհակալություն հայտնեց բացթողումներ նկատելու համար: Կարևոր հմ համարում ընդգծել, որ վեճի բռնվելով մի երիտասարդ բանասերի հետ, որի անունը գուցե և մինչ այդ իրեն ծանոթ չէր, ինչպիսի հարգանքով էր խոսում իր մայրամուտին հասած գիտնականը:

* * *

«Բառարանի» առթիվ հանդիպեցի Մալխասյանին:

Առաջին հարցը, որ տվի, այն էր, թե քանի՞ տարվա ընթացքում է նա կազմել իր բառարանը:

— Ոչ-լրիվ տասներեք տարվա ընթացքում:

Եվ հետո վրա բերեց.

— Իմ բառարանի ընդգրկածն ավելի է, քան հայերեն մյուս բառարանները, որ մեկն էլ վերցնելու լինենք, բայց իմ բառարանը փոքր է հայոց լեզվի ամբողջության բաղդատությունը:

Մի կարճ դադարից հետո.

— Որպեսզի հասնեի համեմատական լիակատարության, ես զործի էի անցնելու հենց որ մի այսպիսի բառարան կադմելու միտքը հղացա, երբ երիտասարդ էի, բայց, ուսուցիչ լինելով, չէի կարող նվիրվել մեծ ժամանակ պահանջվող մի այդպիսի աշխատանքի: Սկսեցի ուշ, վաթսուներորս տարեկան հասակում, երբ արդեն ավարտած պիտի լինեի:

Նա խոսում էր ու ես, այնուամենայնիվ, չէի հասկանում, թե ինչպես է նա մի այդպիսի վիթխարի աշխատանք հաղթահարել տասներեք տարվա ընթացքում:

— Ես մի լավ հատկություն ունեմ, կարողանում եմ կազմակերպել օրս: Եթե հետաքրքիր է՝ ասեմ:

Ու պատմեց.

— Ամեն օր, որպես պարտագիր կարգ, առավոտյան ժամը յոթին ես իմ գրասեղանի մոտ էի: Հա՛, ասեմ, որ ուսուցչությունը թողել էի և որոշել ոչ մի այլ բան չանել, բացի «Բառարանից»: Ինչպես ասացի՝ առավոտյան կանուխ

սկսում էի աշխատանքը: Իննին տիկին Սաթենիկը դուռը բացում էր, որ նշանակում էր, թե թեյը պատրաստ է: Կես ժամ մնում էի թեյասեղանի մոտ, հետո վերադառնում աշխատասենյակ: Ժամը մեկին տիկինս նորից էր բացում դուռը և կանչում նախաճաշի: Կրկին կես ժամ սեղանի շուրջ: Եվ հետո աշխատում էի մինչև ժամը չորսնկեսը և նորից կանչվում էի ճաշի: Այս անգամ մնում էի մեկ ժամի չափ, որից հետո այլևս չէի մոտենում գրասեղանիս: Մի-փոքր հանգստանում էի, իսկ երեկոյան հյուր էինք ընդունում, հյուր էինք գնում: Միշտ մի զբաղմունք լինում էր, որ ոչ մի կապ չունեիր «Բառարանի» հետ: Ամենագլխավորն այն է, որ ոչ միայն «Բառարանով» չէի զբաղվում հետճաշյա ժամերին, այլև մտքով անգամ չէի անդրադառնում նրան: Եվ այսպես, ամեն աստօր օր կրկնում էր նույնը տարիների ընթացքում:

Մի պահ լռեց և ապա ասաց.

— Գիտությունը չի սիրում, երբ գիշերն ու ցերեկը մարդիկ խառնում են իրար: Ոչինչ չունեմ, արդյունքի հասնում են մարդիկ, բայց դա չի կարող ուժից չզցել: Եռանդի ճիշտ բաշխումը, կարգապահությունը, այսինքն՝ հանգիստը հանգիստ, աշխատանքը աշխատանք, գիտնականի երկարատև գործունեության զրավակալաններն են: Ոչ էլ կարելի է մի օր աշխատել, մի օր չաշխատել, թե ինչ է՝ տրամադրություն չունի: Ամեն օր գործ, ամեն օր աշխատանք, քիչ կամ շատ:

* * *

Հակառակ հեղինակի հետ ունեցած պայմանավորվածությանը, հակառակ բարձրագույն մարմինների ցուցումին, թե Մալխասյանի բառարանի տպագրությունը հարկավոր է սկսել, խանգարող հանգամանքներ կային: Ես այդ պատմությունը չեմ անի, բայց կարող եմ վկայել, որ նա, ութսունն անց այդ գիտնականը երբևէ չասաց, թե վախենում է, որ տպագրությունը ձգձգվի ու ինքն իր աչքով չտեսնի աշխատությունը: Չեմ հիշում ոչ մի խոսակցություն մահվան մասին: Նա ապրում էր այնպիսի հոգեբանություն, որ թվում

էր միշտ ապրելու է: Նա տրտնջում էր, որ տպագրութիւնը ձգձգվում է, հրատարակչութիւնը դանդաղ է գործում, վճռական քայլերի չի դիմում, բայց երբեք, կրկնում եմ, չէր ասում թե ինքը ծեր է, որ կարող է մի օր իրեն բան պատահել, ոչ այն ժամանակ, երբ գնում և գալիս էր, ոչ էլ, երբ վերջնականապէս տեղափոխվեց Երևան, որպէսզի վերահսկի բառարանի սրբագրութիւնը:

Կամենում եմ հիշեցնել, որ նա այդ տարիներին արդեն բոլորել էր իր ութսունհինգ տարին և նույնիսկ անցել:

■ ■ ■

Բարձրագույն մարմինները հրատարակչութիւնն առաջարկել էին շատ գրքերի տպագրութիւնից հրաժարվելու գնով, կարճ ժամանակում «Բառարանի» չորս հատորը հանձնել ընթերցողին: Ծրագրվեց այսպէս՝ մի տարվա ընթացքում չորս մեծագիր հատոր հրատարակել: Զեռագիրը հրատարակչութիւնն էր հանձնվել 1935-ին: Անպայման նկատի էր առնված և՛ հեղինակի տարիքը, և՛ այն գիտակցութիւնը, որ սա ոչ վեպ է, ոչ էլ գիտական սովորական աշխատութիւն, այլ բառարան, հետեւապէս տպագրութիւնը կատարվելու է միայն և միայն նրա կենդանութիւն օրով, որպէսզի հսկի տպագրութիւն ընթացքին, մինչև բառարանի լույս աշխարհ գալը:

Հրատարակչութիւնը դրված էր ծանր կացութիւն մեջ: Եվ չի կարելի ասել, թե նրա ղեկավարները դա չէին հասկանում: Այն ժամանակ Հայպետհրատն ուներ իրեն ենթակա տպարան, և նա բոլոր միջոցները ձեռք առավ կարելուն չափ կարճ ժամանակում հաղթահարել համարյա մի անհնար դժվարութիւն:

Ինձ վրա, իբրև հրատարակչութիւնը և հեղինակին կապող օղակի, դրված էր դժվար մի խնդիր՝ համոզել հեղինակին, որ նա հրաժարվի ձեռքի շարվածքի պահանջից, որովհետև այդ դեպքում գործը տարիներ կարող էր տևել, և համաձայնի լինոտիպային շարվածքին, որ կարելի լինի արագացնել: Ես հասկանում էի ձեռքի շարվածքի շահեկանութիւնը, բայց

ուրիշ ելք չկար: Դժվարությամբ, բայց հաջողվեց ստանալ համաձայնությունը:

Ձեռագիրը բաժանված ըստ հատորների, 1943-ին ուղարկվեց տպարան, նախ առաջինը, կարճ ժամանակից երկրորդը, մի որոշ ժամանակ անց նաև երրորդը: Բոլոր ուժերը լարվեցին: Թեև չորրորդն էլ համարյա պատրաստ էր, բայց շուղարկվեց, որովհետև միևնույն է, այնտեղ ընթացք չէր ստանա: Առաջադրանքը կատարվեց, բայց ոչ լիովին: Առաջին երեք հատորները լույս տեսան 1944-ի ընթացքում, չորրորդը՝ 1945-ին:

* * *

Իմ հաճախումները պարբերական բնույթ ստացան: Եվ միշտ գործով եմ գնացել մոտը, երբեմն հագիվ մի տասը րոպե եմ մնացել, երբեմն բավական երկար, մանավանդ եթե տիկին Սաթենիկն առաջարկում էր միասին նախաճաշել: Եղավ մի երկարատև շրջան, երբ համարյա մոտը չեղա՝ հիվանդացել և անկողին էի ընկել:

Աշխատանքի եռուզեռի ժամանակ հիվանդացա և ժամանակավորապես փոխարինվեցի ուրիշով, որպեսզի գործը ոչ մի պատճառով կանգ չառնի, բայց Մալխասյանը, ըստ երևույթին, ընտելացել էր ինձ: Երբ երկար բացակայությունից հետո ներկայացա իրեն, հետաքրքրվեց, թե ինչպես է առողջությունս: Ասացի, որ տաս օրից ավելի է ոտի վրա եմ, բայց չէի գալիս՝ Շեքսպիրյան փառատոնի պատճառով: Պատմեցի մի-երկու մանրամասնություն: Միաժամանակ ասացի, որ Վահրամ Թերզիբաշյանի զեկուցման մեջ հիշվեց նաև ինքը՝ «Լիրի» և «Մակբեթի» թարգմանության կապակցությամբ:

— Երիտասարդական տարիների իմ հափշտակություններից էր Շեքսպիրը: Հետագայում մարեց Շեքսպիր թարգմանելու ցանկությունս: Դեր խաղացին «Մակբեթի» թարգմանության շուրջ առաջացած որոշ հանգամանքներ: Այն ժամանակ էր դա, երբ Աբեղյանն էլ Գոգոլի «Տարաս Բուլբան» թարգմանեց: Դե՛, արդեն անցած-գնացած պատմություն է:

Մի օր նա առաջ, որ իր ձեռագրից գրաշարները միշտ դժգոհ են մնացել և այդ պատճառով ստիպված է եղել գրածն արտագրել տալ: Նկատեց նաև, որ իր տիկնոջ ձեռագիրը գեղեցիկ է, օգնել է, թե բառարանի մի որոշ մասը նրա արտագրածն է: Այդ պատճառով,— ավելացրեց նա,— ինքը մեքենա է ձեռք բերել:

— Ո՞վ է մեքենագրելու,— հարցրի ես,— տիկին Սաթե-նի՞կը:

— Ինչո՞ւ Սաթենիկը, ես եմ մեքենագրելու:

Նա այդ տարի ուսթունհինգից անց էր:

— Դժվար չի՞ լինի:

— Ձեմ կարծում, համոզված եմ, որ շուտ էլ կսովորեմ. աշակերտ ժամանակս դաշնամուր եմ նվագել, մատներին մի ժամանակվա վարժությունն ինձ կօգնի:

Ես զարմացա բոլորովին, երբ նա հայտնեց, որ գրամեքենան գնել է արդեն և ձեռքով մատնացույց արեց սենյակի մի անկյունը:

— Փորձ արե՞լ եք արդեն և հաջողվե՞ց, ինչպես կարծում էիք:

— Ոչ, դեռ չեմ փորձել:

Քաշեց գրասենյանի գլորոցը և այնտեղից հանեց մի մեքենագրված գրություն, որ ուղարկել էր նրան, եթե չեմ սխալվում, էջմիածնի Մայր աթոռի դիվանապետը:

— Ձեզ դո՞ւր է գալիս այս գրության տառատեսակը: Ամերիկյան գրամեքենա է:

Շեղ տառեր էին դրանք, բավական դուրեկան:

— Թե՞ սա է լավ:

Ինձ տվեց մի թերթիկ, որի վրա, ինչպես հասկացա, մի չորս տող էր տպված փբրե գրամեքենայի տառատեսակ:

Ամերիկյան գրամեքենայի տառատեսակն ինձ ավելի գեղեցիկ էր թվում:

— Ինձ էլ:

Եվ բացատրեց, որ երկրորդը իր գնած մեքենայի տառատեսակն է, բայց ինքը գրամեքենան չի օգտագործում, որով-

հետև խոսել է կաթողիկոսի հետ և ստացել նրա համաձայնությունը՝ փոխանակելու իր գնածը ամերիկյանով, որից յոթ հատ վերջերս ստացել է Վեհարանը:

Ուրեմն՝ զրամեքենա ձեռք բերելը բավական չէր, բավական չէր մեքենագրություն սովորելու հոգնությունը այդ տարիքում, և հանկարծ, այդ բոլորի հետ միասին, գեղեցիկ տառատեսակներ ունենալու լուրջ մտահոգություն:

Մանրո՞ւք է: Համաձայն եմ: Բայց, նախ, կյանքի մանրամասնությունը մարդուն երբեմն ավելի է բացահայտում, և հետո՝ մտահոգությունն այդ տարիքում վկայություն է ոչ միայն ապրելու և գործելու ներքին մղումների, այն կամքի, որ մարդու ներքին աշխարհը նպատակով, իմաստով է հաղեցնում, այլ նաև գեղեցիկ ապրելու, գեղեցիկ գործելու ձգտման:

* * *

Ես ինձ թույլ կտամ մի շեղում, որը թերևս օգնի բացատրելու գիտնականի մարդկային կերպարը:

Մարտիրոս Սարյանն այն դիմանկարիչներից է, որոնք, ինչպես հայտնի է, բնորդին ենթարկում են խստագույն քննության, ըստ որում, գրեթե միշտ, թափանցելով նրա հոգու խորքերը, տեսնելու, թե այնտեղ մոլթ կետ կա՞, թե ոչ: Ու եթե հայտնագործում էր՝ չէր ներում: Ոչ ոք չի խուսափել նկարչի «դատախազական» այդ հայացքից, որը հաճախ թափանցում էր այնքան արագ, նկարելու մեկ կամ երկու սեանսի ընթացքում, որ բնորդը գլխի չէր ընկնում, իսկ եթե հասցնում էր գլխի ընկնել, ապա այն ժամանակ, երբ արդեն ուշ էր լինում:

Եվ մարդկային խառնվածք, թաքնված մտքեր և կրքեր կարդացող այդ վարպետին «չհաջողվեց» գեթ մի մոլթ անկյուն գտնել իր հերթական «զոհի»՝ Մալխասյանի հոգեկան աշխարհի այն խորշերում, որոնք սովորաբար մարդկանց աչքից աննկատ են մնում:

Գնացեք պատկերասրահ և մի անգամ էլ դիտեցեք Ստեփան Մալխասյանի դիմանկարը:

Սրբի է նման:


Չգիտեմ ով ինչպես՝ բայց ամեն մարդ իր բախտի տերն է: Ես չեմ կարող դժգոհել: Ավելին. ես չափազանց գոհ եմ ու եթե իմ կյանքում ինչ-ինչ բաներ, որ չպիտի լինեին եղել են՝ մեղավորը միայն ես եմ: Որ գոհ եմ՝ դրա մի պատճառն էլ այն է, որ ճակատագիրն ինձ պարգևել է անմոռանալի հանդիպումների շուրջ հնարավորություններ:

Եվ այժմ, երբ մարդ հանրագումարի է բերում, թե ինչ է եղել իր կյանքը՝ դտնում է մի հարստություն, որի գիտակցությունը և ունեցել է, և չի ունեցել:

Եվ գուցե լավն էլ դա է:

Չհասկանալ, թե ինչպես է հարստացնում ինձ Ավետիք Իսահակյանին մոտիկից տեսնելու, նրա տանը լինելու բախտը: Մյուս կողմից էլ դա, այդ չհասկանալն օգնել է ինձ՝ թույլ տալով, որ հարաբերություններն ընթանան իրենց բնական հունով:

Բախտավոր պատահականություններ ամեն մեկի կյանքում էլ լինում են: Մի այդպիսի բախտավոր պատահականություն էլ Հովսեփ Օրբելու հետ ծանոթանալս էր: Բայց, ավա՜ղ, հակառակ սովորությունս, զրառումներ չեմ արել, կարծել եմ, թե սա առաջին և վերջին հանդիպումն է ու երբ նորից եմ հանդիպել՝ չեմ մտածել, թե երրորդն ու չորրորդն էլ կլինեն: Դրա պատճառով այդ մեծ մարդու ասածները շարադրում եմ հիշելով, առանց այն հնարավոր ճշտության, որի համար միշտ հիմք են ծառայել նույն օրը կամ էլ մի-երկու օրից, թարմ տպավորության տակ արված գրառումներս:



1939-ին էր: Վաղ աշնանը: Ավելի ճիշտ՝ սեպտեմբերի առաջին օրերը: Այդ տարի, ինչպես դրանից առաջ և բավական ժամանակ հետո, ամեն երեկո մի քանի ժամ աշխատանքի վայրում էինք լինում: Պարտադիր կարգ էր: Դե՛, գործն էլ, եթե սիրում ես, սկիզբ ունի, բայց վերջ չունի: Մի խոսքով՝ խանդավառ տարի էր հրատարակչության աշխատողների համար՝ նշվելու էր «Սասունցի Դավթի» 1000-ամյակը: Գործ շատ կար: Երևանում, ընդհանրապես մեր ամբողջ հանրապետության մեջ տոնահանդես էր սեպտեմբերի առաջին օրերից սկսած:

Մի տեղ ցուցահանդես էր բացվում, մի այլ տեղ՝ գիտական նստաշրջան և այսպես շարունակ: Բոլոր հիմնարկներում կազմակերպվում էին երեկոներ: Մամուլն ամեն օր հրապարակում էր հաղորդումներ այն մասին, թե երկրի այսինչ կամ այնինչ քաղաքում հայ ժողովրդական վեպին նվիրված հանդիսավոր երեկո է տեղի ունեցել: Գրվում էր և այն մասին, որ «Սասունցի Դավթի» թարգմանվում է տարբեր լեզուներով՝ ռուսերեն, ուկրաիներեն, վրացերեն, ադրբեջաներեն, ուզբեկերեն:

Մեր հրատարակչությունն էլ գրքերի մի ամբողջ շարք էր նախատեսել, ամենագլխավորը իհարկե, ժողովրդական վեպի հայերեն և ռուսերեն հոբելյանական հրատարակչություններն էին, մեկը-մյուսից շքեղ:

Երևանը սպասում էր մեծ թվով հյուրերի: Գալիս էին Մոսկվայից ու Լենինգրադից: Գալիս էին Կիևից ու Մինսկից, Թբիլիսիից ու Տաշքենդից: Որտեղից՝ միայն չէին գալիս: Եվ ամեն մի ազգություն ուղարկում էր իր պատվիրակությունը մի նշանավոր գրողի գլխավորությամբ:

Հայաստանի Գրողների միության անդամների վրա շատ պարտականություններ էին դրված: Տարբեր հաստատություններում գեկուցումներ կարդալ, դիմավորել հյուրերին, ցույց տալ Երևանը, ուղեկցել նրանց դեպի հիշարժան վայրերը: Եթե ասեմ, որ այդ օրերին Գրողների միության անդամները, որոնք այն ժամանակ այդքան շատ չէին, ինչպես

հիմա, գիշերներն էին միայն կարողանում տուն ընկնել, չափազանց ություն չի լինի:

«Սևան» հյուրանոցի ռեստորանը, կառավարության որոշումով, սպասարկելու էր միայն հյուրերին: Մեզ կտրոններ էին բաժանել, որով իրավունք ունեինք մեր ցանկացած ժամանակ սեղան նստել, հյուրասիրել: Մի խոսքով, ծանրաբեռնված էինք անշափ:

Ես դիմավորելու էի ադրբեջանական պատվիրակությանը: Ինձ հանձնարարվեց, որովհետև մի տարի առաջ հայկական պատվիրակության կազմում մեկնել էի Բաքու՝ մասնակցելու Միրզա Ֆաթալի Ախունդովի ծննդյան 125-ամյակի հոբելյանական օրերին:

Հեռագիր ստացվեց, որ ադրբեջանցի ընկերները, Սամեդ Վուրդունի գլխավորությամբ գալու են Աղստաֆայով:

Մեկնելուս նախորդ օրը Երեկոյան Պետհրատումն էի: Զանգ:

— Բարի երեկո, Ռուբեն Վարոսովիչ:

Զայնն ինձ ծանոթ չէր և առաջին անգամն էի լսում, որ ինձ հայրանունով կոչեն, մանավանդ այդ տարիներին միմյանց դիմելու ուսական ձևը տարածված չէր:

— Ձեզ հետ խոսում է Օրբելին, Իոսիֆ Աբգարովիչը:

Զարմացա: Տեսել էի, լսել զեկուցումները, ելույթները, բայց իրեն անձամբ ծանոթ չէի: Ակնածանքից էր, թե ինչից՝ ոտքի ելա:

— Ինձ ասացին դուք վաղը մեքենայով մեկնելու եք Աղստաֆա՝ Ադրբեջանից ժամանող ընկերներին դիմավորելու: Զի՞շտ է:

Ես հաստատեցի:

— Ժամանելու են նաև էրմիտաժի աշխատակիցները: Ես կարող եմ Աղստաֆա մեկնել ձեր մեքենայով:

Այ քեզ բախտավորություն:

Հա՛, այն էլ ասեմ, որ այն տարիներին Մոսկվա-Երևան, Երևան-Մոսկվա ճանապարհը Բաքվի վրայով էր ու մի քանի օր էր տևում:

Պայմանավորվեցինք, որ առավոտյան կանուխ կհանդիպենք «Ինտուրիստ» (այժմ «Երևան») հյուրանոցի դռանը:

Մտատանջության մեջ ընկա՝ ի՞նչ եմ խոսելու նրա հետ ճանապարհին։ Իզուր, որովհետև Օրբելին, ինչպես դա հատուկ է իրոք մեծ մարդկանց, հանդիպեց և այդ ամբողջ ճանապարհին իրեն պահեց այնպես, կարծես, իր ուղեկիցը ոչ ավել, ոչ պակաս՝ իրեն հավասար մի մարդ է։ Ելլ ապա՝ խոսում էր, մտքեր հայտնում, հետաքրքիր պատմություններ անում։ Ես չնկատեցի, թե ինչպես ժամանակն անցավ։ Ոչ մի խոսք չբացեց «Սասունցի Դավթի» մասին։ Զրույցն ուրիշ նյութերի շուրջն էր։ Ու երբ նրա ուշադրությունը դարձրի դրավրա, ասաց, թե ինքը որպես կանոն, հեռու է պահում միտքը այն հարցից, որի մասին մի կամ երկու օր հետո խոսելու է հրապարակավ։ Լավ հիշում եմ նաև այն, որ ասաց, թե խոսել այդ մասին՝ նշանակում է ուղեղը զբաղեցնել դրանով, դա էլ իր հետ բերում է մտքի այնպիսի նոր առկայծումներ, որոնց մասին մինչ այդ չես մտածել, իսկ դրանք կարող են ավերել այն կառուցվածքը, որն արդեն մշակվել է մտքումդ։

* * *

Գնացքը դանդաղ մոտեցավ Աղստաֆա կայարանին ու կանգ առավ։ Կառամատույցում մեր կամքից անկախ, անշատովեցինք։ Հյուրերը, որոնց դիմավորելու էինք, տարբեր վազոններում էին։

Պարզվեց, որ Օրբելուն տրամադրել են բեռնատար մեքենա, որը արդեն հասել էր Աղստաֆա, քանի որ էրմիտաժի աշխատակիցները իրենց հետ բերելու էին համարյա արդեն պատրաստ ցուցահանդեսի համար ցուցանմուշներ՝ մեծ-մեծ արկղներով։

Ես չեմ հիշում, թե ովքեր էին Լենինգրադից եկողները, բայց, միտտ է, որ մի հինգ հոգի պիտի լինեին։ Վերադարձին Օրբելին շնորհակալություն հայտնեց իրեն Աղստաֆա հասցրնելու համար։ Ես ասացի, թե մեքենայում տեղ կա։ Հրաժարվեց՝ լավ չի լինի, եթե թողնի ընկերներին բեռնատար մեքենայում և միանա մեզ։

Ես ասացի, թե նրանք կհասկանան և ներողամիտ կլինեն։ Օրբելին չուշացրեց պատասխանը։

— Բայց ես ինձ չեմ ների, վերջապես, այնտեղ կանայք կան:

Վուրդունն էլ խնդրեց, բայց դա էլ չօգնեց:

Ճանապարհին երկու թե երեք տեղ կանգ առանք, Օրբելու բեռնատարը հասնում էր մեզ ու անցնում: Նա աշխատակիցների հետ կանգնած էր մեքենայի մեջ, և քամին խառնում, պոկում էր նրա մազերը: Մեզ ձեռքով էր անում:

Սևանից հետո մեր մեքենան մի տեղ էլ կանգ առավ: Օրբելու բեռնատարը նորից երևաց: Նրանց մեքենան կանգ առավ և Օրբելին իջավ, մոտեցավ և հաճելի անակնկալ՝ ցույց տվեց «Սասունցի Դավթի» լենինգրադյան հրատարակությունը:

Չէինք կարողանում պոկվել գրքից, հատկապես նկարազարդումներից, որ արել էր Երվանդ Քոչարը:

— Ա՛յ ճաշակ, ա՛յ արվեստ:

Կրկնում էր քթի տակ Վուրդունը:

Հիանում էինք նկարներով, բացվեց այն էջը, որի վրա էր Օրբելու ասելով իր ամենահավանած նկարը՝ Դավիթը և նրա կողքին՝ ձիու գլուխը, որի ձախ աչքը փակել էր իր ձեռքով:

— Սա,— ասաց նա,— կարելի է արվեստի մեծագույն գործերի կողքին դնել և, համոզված եմ, կդիմանա մրցությունը:

* * *

Լեզվի և գրականության ինստիտուտի Գիտական խորհրդի նիստն էր: Քննության էր դրված «Վերք Հայաստանի» գիտական հրատարակության հարցը: Ես, որպես ղեկուցող, ներկայացրի հրատարակության սկզբունքները, ինձ հետ բերել էի այլ ընթերցողների գործնական մի քանի էջ, տպարանում շարված թերթեր:

Նոր էր խորեն Սարգսյանն ինձ ձայն տվել, որ մեզ համար անսպասելի նստասրահ մտավ Օրբելին: Նիստին ներկա էին քսանից ավելի մարդ: Օրբելին, որ նոր էր ժամանել Լենինգրադից, մոտեցավ և մեկ-մեկ սեղմեց բոլորի ձեռքը, ապա տեղ գրավելով, խնդրեց շարունակել նիստը:

Սկզբում մի փոքր շփոթվեցի, բայց շուտով հաղթահարեցի հուզմունքս և շարունակեցի խոսքս:

Սա իմ երկրորդ հանդիպումն էր Օրբելու հետ:

* * *

Մի քանի օր անց, Խաչիկ Մոմջյանը, որ այն ժամանակ Արմֆանի գիտնական քարտուղարն էր, խնդրեց իր մոտ անցնել:

Գնացի:

Նա ասաց, որ նկատի ունենալով իմ խմբագրական աշխատանքի փորձը, առաջարկում է հանձն առնել Հասարակական գիտությունների «Տեղեկագրի» խմբագրի պաշտոնը: Զհամաձայնեցի: Ինձ նոր էին ազատել «Սովետական գրականություն» ամսագրի խմբագրի պարտականություններից:

Մոմջյանն ասաց, որ ինքը խոսել է Օրբելու հետ և ստացել նրա հավանությունը: Նա առաջարկեց գնալ Օրբելու մոտ, բայց ես կտրականապես հրաժարվեցի, իմանալով, որ իմ մեջ ուժ չեմ գտնի նրան դիմադրելու:

Այդ առաջարկը, իհարկե, շոյեց ինձ, մանավանդ որ իմ թեկնածություն հեղինակը Մոմջյանն էր, որի մասին բարձր համարում ունեի, բայց իմ մեջ դեռ թարմ էին խմբագրի պաշտոնից հանվելուս վիրավորանքն ու դառնությունը:

Ես Մոմջյանին չասացի այս բոլորը, բերի բոլորովին այլ պատճառներ, տրոնք նա համոզիչ չհամարեց, և խնդրեցի շնորհակալությունս հայտնել Օրբելուն՝ վստահության համար:

Մի քանի օր անց ինձ իր մոտ կանչեց Օրբելին: Կարծում էի, թե նույն խնդրով, մինչդեռ ասաց, թե ուղում է զրույցել ինձ հետ իմ ղեկուցման հետ կապված մի քանի հարցի շուրջ: Ուրեմն՝ ղեկուցումս նրան զբաղեցրել էր: Հայտնեց իր ընդհանուր տպավորությունը, ապա տվեց մի քանի խորհուրդ, որոնք ի վիճակի էր անելու միայն նա, ով շատ երկար զբաղվել էր հենց այդ նյութով, և միաժամանակ իր կարծիքը

հայտնեց այլընթեռումների փորձնական օրինակների մասին, որից երևաց, որ հրաշալի տիրապետում է նաև պոլիգրաֆիական գործին։

Իմ երջանիկ օրերից մեկն էր դա։

* * *

Մի օր հավաքեց պատմաբաններին ու գրականագետներին իր մոտ ու ասաց՝ ինչ որ ըստ հետազոտական ծրագրի գրում եք, հասկանալի է, բայց, դրանից բացի, թեկուզ կարճ՝ կամ որպես գրքույկ, կամ որպես հոդված, անհրաժեշտ է, որ ամեն մեկը հանձն առնի որևէ հայրենասիրական թեմա։ Ամեն մի հետազոտողի քաղաքացիական պարտքն է դա։ Եվ պետք է գրել՝ միշտ հիշելով, որ հիմա պատերազմ է, հայրենիքը վտանգի տակ է։

Տասնիններորդ դարով զբաղվող պատմաբանների մեծ մասը հանձն առավ գրել հայազգի զորավարների մասին, որոնք մեծ անուն էին հանել ցարական Ռուսաստանի բանակում։ Բանասերներն էլ հանձն առան գրելու իրենց ուսումնասիրած գրողների հայրենասիրության մասին։

Ես մտածեցի, թե կգրեմ Աբովյանի հայրենասիրական ոգու մասին, բայց ինձ կանխեց Հայկ Գյուլիքեվլյանը։ Մնում էր այլ ընտրություն կատարել ու ես կանգ առա Տերյանի վրա։ Բայց, ինչպես հաճախ է լինում ամեն մարդու հետ, այնպես էլ ինձ հետ, խորագրից այն կողմ չանցա։ Վերնագիրը մտածել էի ռուսերեն՝ «Терян в поисках Родины» ու մինչև հիմա էլ մտածում եմ, մտածում, ու դրա հայերեն թարգմանությունը ճապաղ մի վերնագիր է ստացվում։

Մի օր, երբ Օրբելին արդեն պրեզիդենտ չէր, պատերազմական օրերն էլ անցած մի պատմություն էին, լենինգրադյան հանդիպումներից մեկի ժամանակ արի նրան խորագրի այս պատմությունը և հայտնեցի իմ զարմանքը, թե ռուսերեն ստացվեց, հայերեն՝ ոչ, տվեց իր բացատրությունը։

Ռուսական լեզվամտածողությունը, — ասաց նա, — վերնագրային տրագիցիաներ ունի։ Լենինգրադում, Մոսկվայում

և գուցե այլ քաղաքներում նույնպես, մեծ խմբագրատներն ունեն վերնագրերի մասնագետներ, որ հատկապես պահվում են վերնագրեր հորինելու համար: Նույնը կա նաև Եվրոպայում: Եվ հետո հարցրեց, թե չե՞մ նկատել, արդյոք, որ մասնագիտական որևէ հարց մշակելիս ռուսական լեզվամատածողությունն սկսում է միջամտել, որովհետև մասնագիտական առումով ավելի մշակված է, քան հայերենը: Եվ դա տեղի է ունենում անկախ ռոսաերենին տիրապետելու չափից, քանի որ մասնագետը հաճախ է դիմում ռուսական գրականության օգնությանը:

Եվ հետո եզրակացրեց.

— Որքան կարելի է շատ պետք է հրատարակել հայերեն մասնագիտական գրքեր, որպեսզի մասնագիտական լեզվամատածողությունը մշակվի: Դա երկար ժամանակ և համբերություն պահանջող գործ է ու վեր մի սերնդի ուժերից:

* * *

Լևոն Քալանթարը հաճախ էր այցելում Օրբելուն: Պետերբուրգի համալսարանից գիտեին միմյանց: Երկուսն էլ պրոֆ. Մառի մոտ էին սովորել:

Նրբեմն-երեմն հս էլ էի միանում Քալանթարին, որն այն ժամանակ Ռուսական թատրոնի գեղարվեստական ղեկավարն էր: Այնտեղ էր լինում Տրեվերը, մի համակրելի կին և լուրջ գիտնական: Օրբելու անփոփոխ խորհրդատուն: Միառին գիրք էին գրել՝ «Սասանյան մետաղ»: Եվ Տրեվերն էլ այդ վերաբերմունքին պատասխանում էր երախտագետ հավատարմությամբ: Ավելի հաճախ կարելի էր հանդիպել Տոկարսկուն, որի կյանքում Օրբելին մեծ դեր էր խաղացել, և նրանք լավ բարեկամներ էին:

Իոսիֆ Աբգարովիչը գրեթե ամեն հանդիպման աշխատում էր Քալանթարի վրա ազդել, որ թողնի թատրոնը, կապվի գիտության հետ:

Քալանթարն ասում էր.

— Ուշ է:

Օրբելին անմիջապես վրա էր բերում.

— Ուշ չէ: Գիտությունը սիրում է հասուն տարիք:

Եւ ինչ-որ չափով կարողացաւ ազդել Լեոն Քալանթարի վրա: Չթողեց թատրոնը, բայց սառեց, մանավանդ անբավական լինելու պատճառներ ունեւ: Եւ այն կարճ ժամանակը, որ նա անցկացրեց գիտութեան մեջ, եղաւ բավական արդյունավետ:

Եւ մի օր, դառնալով ներկաներին, առանձնապէս Կամելիա Վասիլենա Տրեվերին՝ ասաց, թե ոչ ոք չգիտէ, թե Քալանթարն ինչպիսի գիտնական կդառնար, եթե թատրոնին չնվիրվեր: Ու միտս է մնացել, որ ասաց, թե Մառի աչքը Լեոնի վրա էր, իր բոլոր սաներից ամենից ավելի նրա հետ էր հուլիսներ կապում:

* * *

Արշավիր Մելիքեանից հետո միակ հոգսորը, որ ինձ վրա խոր տպավորութիւն էր թողել՝ Հովսեփ Օրբելին էր:

Ամբիոնի մոտ նրա երեւալը բավական էր, որ դահլիճը հավատով լցվեր նրա նկատմամբ: Օրբելին իր փառահեղ մորուքով նման էր մոգի:

Նա իր խոսքը հանդարտ էր սկսում, հնարավորութիւն տալով ունկնդրին՝ մտնել իր նյութի ընդհանուր մթնոլորտի մեջ: Երբ համոզվում էր, որ իրեն լսողները մտքով և, գլխավորը, զգացողութեամբ իր արծարծած հարցերի ոլորտումն են՝ նրա հանգիստ խոսքը թափ ու փայլ էր առնում: Օրբելին կարողանում էր իր խոսքի հմայքին ենթարկել ունկնդրին: Ինքը հուզվում էր և հուզում մի ամբողջ լսարան, որքան էլ մեծ լիներ:

Նա հասնում էր առավելագույնին. ամենատարբեր խառնըվածքի և ամենատարբեր պատրաստութեան տեր մարդկանցով լեցուն դահլիճը մի կէս ժամում դարձնում էր մի մտքի, մի հուլիզի, մի կամքի ենթակա միասնական լսարան:

■ ■ ■

Հայտարարվեց Օրբելու դասախոսութիւնը՝ «Մոքսի հայկական բարբառի ուսումնասիրութիւն»:

Երբ տեսա, որ դահլիճը լեփ-լեցուն է ոչ միայն գիտութեամբ զբաղվողներով, հասկացա որ նրանց բերել էր

Օրբելու համբավը, բայց ոչ դասախոսութեան առարկան: Խոստովանութիւն լինի, լավ չէի պատկերացնում, թե մի այդպիսի մասնագիտական հարց, ինչպես է ներկայացնելու դասախոսը, որ նյութից անտեղյակ ունկնդիրները ևս հետաքրքրութեամբ լսեն:

Նա սկսեց նրանից, թե ինչպես է ինքը ձիով, դեռևս քսանհինգ տարին չբոլորած, ճանապարհով դեպի Մոքս: Սկիզբն առնեն լարեց ունկնդիրներին: Կենդանի պատկերացում տվող ձևակերպումների օգնութեամբ նկարագրում էր Վանա լճի հարավային մասում, լեռների մեջ կորած Մոքսը, այնտեղ ապրող հայերին և քրդերին, ինչպես նաև Մոքսի քուրդ կառավարչին,— անունը միտս չի մնացել,— նրա կերպարը, տան կենցաղը, սովորույթները: Եվ հետո անցավ բուն հարցին, ոչ միայն բարբառային նյութերի հավաքմանը՝ բարբառագիտական բառարան կազմելու համար, այլև իր գրի առած հեքիաթներին, առակներին, զվարճալի պատմութիւններին, երգերին, առածներին և ասացվածքներին: Ասաց նաև, որ մի որոշ ժամանակ անց, նորից է եղել Մոքսում ու հավաքել նույնպես քրդական նյութեր:

Թվում էր, թե դահլիճում տիրող աշխույժ մթնոլորտը պահելու համար կպատմի իր գրառած ժողովրդական նյութերից, հատկապես զվարճալի պատմութիւններից, բայց նա չարեց այդ: Նա խոսում էր մասնագետների համար, շմոռանալով բանասիրութեան հետ կապ չունեցողների ներկայութիւնը: Ոչ բանասերների համար մատչելի ձևով, բանասերների համար հարցի բնորոշ կողմերով պատմեց իր հավաքած նյութի մասին, բացատրեց դրանց նշանակութիւնը և բոլորը լսում էին կլանված ուշադրութեամբ, աշխատելով նրա ասածից ոչինչ բաց չթողնել:

Տարիներ են անցել ու հիմա անդրադառնալով նրա բանախոսութեանը, հասկանում եմ, որ այդ բոլորը պատմեց ոչ այնքան Մոքսի բարբառի, խոսք ու բանի պատկերացումը տալու նպատակով, որքան բացատրելու այդպիսի աշխատանք կատարելու մեթոդաբանութիւնը, որ նա ժառանգել էր Մառի գիտական դպրոցն անցնելով:

Հետաքրքիր էր լսել, որ տպարանում Օրբելին սեփական

ձեռքով շարեւ է իր աշխատասիրությունը, որը, հիմա չեմ կարողանում մտաբերել, թե ինչու լույս չի տեսել, թեև ինքը, կարծեմ, ասաց այդ մասին:

Միտս է մնացել նրա դասախոսության վերջվածքը:

Նա ասաց, թե Մոքսը հիմա անմարդաբնակ է: Համաշխարհային առաջին պատերազմի ժամանակ բնաջնջվեցին այնտեղ ապրող հայերն ու քրդերը: Եվ այն, ինչ ինքն արել է՝ պնդելն ու թերևս միակ վկայությունն է հազարամյակներ ապրած և այժմ անհետացած հայկական ու քրդական մի օջախի, նրա անկրկնելի կյանքի մասին:

* * *

Մի օր հարցրինք, թե ինչո՞ւ հայերեն չի խոսում:

Ժպտաց:

Ասաց, որ ամբողջ կյանքը Պետերբուրգում է անցել և հայերենն իրեն համար ավելի գրքային մի լեզու է եղել, քան խոսակցական:

Ու այդ կապակցությամբ հետևյալ պատմությունն արեց.

Միշտ էլ Մառի Անվո արշավախմբումն է եղել: Մի օր իրեն վատ է զգում և չի գնում պեղումների, մնում է տանը: Եվ խոսակցության է բռնվում Միքայել վարդապետի հետ, որը, հայերենից բացի, մի այլ լեզու չգիտեր: Խոսում են տարբեր հարցերի շուրջ, և վարդապետը, կարծելով, թե Օրբելին վրացի է, հաճոյախոսում է.

— Ինչ լավ եք խոսում հայերեն, պարոն Օրբելի:

Օրբելին վստահ իր հայերենի վրա, մի պահ զարմացած է մնում և ապա ասում՝ ուրիշ ինչ կերպ կարող էր լինել, չէ՞ որ ինքը հայ է: Ասում է և հանկարծ հիասթափություն է կարգում Միքայել վարդապետի աչքերում:

— Ինչ վատ եք խոսում հայերեն, պարոն Օրբելի:

Պատմեց և ասաց, թե հաճախ է ինքը որոշել սիրտ անել ու իր հրապարակային ելույթներից մեկը հայերեն սկսել, բայց հենց որ հիշել է Միքայել վարդապետի ասածը, թևաթափ է եղել: Եվ այսպես տարիներն անցել են: Ավելացրեց

նաև, թե իրեն համար հիմա ավելի հեշտ է մի նոր լեզու սովորել, նույնիսկ ճապոնեան, քան ամբիոնից հայերեն խոսել: Դուք երևի չեք պատկերացնում հոգեբանական արգելքի կաշկանդող ուժը:

* * *

Հնությունների պահպանության կոմիտեի աշխատակիցները, որոնց մեջ էր նաև իմ տիկինը, որոշեցին հավաքվել մեր տանը՝ դիմավորելու 1943-ի Նոր-տարին:

Տոկարսկու հետ եկավ նաև Օրբելին և հայտարարեց իրեն ինքնակոչ սեղանապետ:

Կավ հիշում եմ, որ Իոսիֆ Աբգարովիչը, որպես ավադագույնը, բաժակ բարձրացրեց և առաջարկեց խմել Նոր-տարվա կենացը: Ամեն Նոր-տարվա հետ մարդը հույս է կապում՝ անցյալ տարի չեղավ, Վլինի այս տարի: Եվ այդ հույսն էլ պահում է մարդուն: Ուրեմն՝ կենացի համար բարձրացված բաժակը պետք է պարպել համոզված և հավատալով, որ այս Նոր-տարին անպայման կլինի հույսերի իրականացման տարի: Հուսանք, ասաց նա, որ կկատարվի ամբողջ մարդկության հույսը, 1943 թվականը հաղթանակի տարի լինի:

Հիշում եմ նաև, որ բաժակ բարձրացրեց և խմեց Պիոտրովսկու կենացը: Նրա արժանիքները բնութագրող խոսքեր չասաց, բայց այնպես, ինչպես իրավունք ունի անելու ուսուցիչը, երբ մանավանդ խոսքը վերաբերում է արժանավոր աշակերտին, 1944 թվականը հայտարարեց նրա դոկտորանալու տարին:

Օրբելու առաջարկած կենացն ընդունվեց ծափահարությամբ: Եվ այդ սրտագին մթնոլորտում իրեն նեղված զգացող Պիոտրովսկին, ուսուցչի օրհնութունն ունենալով, մի քանի ամիս անց հաջողությամբ պաշտպանեց իր «Ուրարտուն» և ստացավ դոկտորական աստիճան:

Օրբելին կենացներ էր առաջարկում: Խմբական երգերն ընդմիջվում էին պարերով՝ աղջիկները՝ նազով լի, տղաները՝ թափով ու խոլական: Ռաֆո Իսրայելյանը կատակներ էր անում և սրախոսում: Մեկ էլ հանկարծ լռություն էր իջնում ու լսվում Վարազդատ Հարությունյանի սրտալի երգը:

Գեղեցիկ մարդ էր Օրբելին։ Տոհմական ազնվականության դրոշմը դեմքին էր։ Ես հիշում եմ նրան նաև առանց մորուքի։ Պատերազմի տարիներին հայմորիտ ուներ, պետք է վիրահատության ենթարկվեր։ Բժիշկների պահանջով հրաժարվեց մորուքից և թողեց միայն բեղերը։ Պետրոս Առաջինին էր նման։

Ներկայանալի անձնավորություն էր։ Մի նշանակալի բան կար արտաքին պատկերի մեջ և հնարավոր չէր կողքից անտարբեր անցնել։ Երբ հայտնվում էր մի տեղ՝ սենյակը լցվում էր անմիջապես։ Բավական է հեռանալ, որ դատարկություն զգացվեր։

Ես տաղանդավոր մարդկանց հանդիպել եմ բավական։ Եվ միշտ ուրախ մի զարմանքի մեջ եմ եղել այն զգացումից, թե բնությունը երբեմն որքան շռայլ է լինում իր ընտրյալների նկատմամբ։

Օրբելին մեկն էր դրանցից։

Օրբելուն նմանվել չէր կարելի։ Դառնալ Օրբելի՝ նույնպես հնարավոր չէր։ Պետք էր ծնվել այդպիսին, կրելով իր մեջ ապուպայերից եկող ազնվական մի զեն, գումարած նաև տարիների կուտակում և այն, ինչ հայտնի է որպես պետերբուրգյան դպրոց։

Գիտությամբ զբաղվելը համատեղում էր աշխարհիկ կյանքի հետ։ Այդ կողմից նա էապես տարբերվում էր մեր շատ մեծանուն հայագետներից։ Վերածնությունից մի բան կար Օրբելու մեջ։ Մեծ երկրպագու էր ամեն գեղեցիկ բանի՝ լինել բնություն, լինել կին, լինել կերուխումի սեղան։ Ինչ-որ գեղեցիկ էր՝ սիրելի էր նրան, մոտ և ընդունելի։

Բուռն էր, տաքարյուն։ Մայրահեղ շափերի էր հասնում նրա վերաբերմունքը։ Երբեք ու ոչ ոքի նա հանգիստ ու անտարբեր չէր վերաբերի. կամ սիրում էր, կամ ատում, կամ գնահատում կամ ոչնչացնում։

Երբ նա Արմֆանի, հետո էլ Գիտությունների ակադեմիայի պրեզիդենտ էր, մի երկու-երեք մարդ չէին կարողանում գնալ մոտը, չէր ընդունում։ Քարտուղարուհուն պատվիրել էր

տարբեր պատրվականերով թույլ չտալ նրանց մտնել իր առանձնասենյակը, իսկ եթե դրանք, այնուամենայնիվ, անցնում էին առաջին արգելքից և հայտնվում պրեզիդենտի դռների մեջ, նա աղմկալի ձայնով ետ էր դարձնում, չնայելով ոչ տարիքի, ոչ սեռի:

Բորբորվում էր, նույնիսկ անպատվում, երբ համոզվում էր թե իրեն խաբել են ուզում: Չէր սիրում շողոքորթներին: Հղուշացնում էր, թե շողոքորթությունն իր մեջ կրում է դավաճանության թաքնված հնարավորություններ: Ուստի՝ պետք է զգուշանալ հենց սկզբից:

Սիրում էր երիտասարդներին: Բավական է մեկի մեջ մի փոքրիկ կայծ տեսնել, կզբաղվեր նրանով, ժամեր կտրամադրեր, բոլոր տեսակի ընդառաջումներ կաներ, միայն թե ասպարեզ ստանա: Եվ, միաժամանակ, կատակով զգուշացնում էր իր ունեցած վերաբերմունքի մեջ թաքնված եսասիրական մի շահ: Այսպես էր նա բացատրում իր միտքը: Սերունդները հաջորդում են միմյանց փորուստներով և ձեռքերումներով: Ամեն մի եկող սերունդ նախորդի ինչ-որ գծերից հրաժարվում է, բայց իր հետ բերում է մտածողության և հոգեբանության այնպիսի փոփոխություն, որ չի ունեցել նախորդ սերունդը և չէր էլ կարող ունենալ իբրև այլ ժամանակների ծնունդ: Շփվել երիտասարդության հետ, եզրակացնում էր նա, նշանակում է ժամանակի ոգին զգալ և: Գլխավորը, հոգով երիտասարդ մնալ:

* * *

Լուրեր էին տարածվել, թե Ախթամարն ավերված է: Թե ինչպես դա կազդեր հայ արվեստը սիրողի վրա՝ դժվար չէ պատկերացնել: Հաստատ չգիտեինք, բայց մեզ հասած լուրը հավանական էր համարվում, մանավանդ որ Անիի կառույցներից մի-երկուսը երկու ճանապարհորդ գետնին հավասարեցված էին տեսել:

Եվ հանկարծ, Օրբելու ձեռքն է ընկնում արտասահմանյան մի հանդես, — եթե չեմ սխալվում՝ Լոնդոնում լույս տեսած, — որտեղ Թուրքիայից, ավելի ճիշտ՝ Վանից վերադարձած թղթակիցը, հոգվածի հետ միասին հրապարակել է սեփական

աչքով տեսած և տարբեր կետերից իր իսկ լուսանկարած Ախթամարը, այդպիսով վկայելով աշխարհին տաճարի կանգուն վիճակը:

Օրբելին, որ դեռևս 1912-ից ակտիվ էր ուսումնասիրել կղզու հուշարձանախումբը, հասկանալի է, թե ինչ ուրախություն պիտի ապրեր, իմանալով, որ տաճարի ավերման մասին տարածված լուրերը ճիշտ չեն:

Չէր կասկածում, որ իր հետ շատերը կուրախանան նրանում: Եվ օրերից մի օր մի ընդարձակ հեռագիր ստացա, որով շնորհավորում էր հայ արվեստով զբաղվողներին՝ իր ուրախառիթ լուրով:

1957-ին խոսեցի մեր Ակադեմիայի պրեզիդենտի հետ՝ Արվեստների պատմության և տեսության սեկտորի հիմքի վրա Արվեստի ինստիտուտ ստեղծելու մասին: 1948-ից սկսած, դեռևս պրոֆ. Քուշնարյանի ղեկավարության ժամանակներից ի վեր, մեր հետազոտական օջախն այնքան արդյունավետ էր գործել, որ հասունացել էր հայագիտության նոր ճյուղի գործունեությունը ինստիտուտի մակարդակով ծավալելու համար:

Պրեզիդենտը համաձայնեց, ասաց, որ իսկապես արդեն ժամանակն է և հարցրեց, թե ո՞վ է գլխավորելու ինստիտուտը: Իմ կարծիքով միակ թեկնածուն Օրբելին էր: Պրեզիդենտը ճիշտ համարեց իմ առաջարկը, բայց ասաց, որ հաղիվ թե համաձայնի:

Ես խնդրեցի նրա թույլտվությունը՝ մեկնելու Լենինգրադ և Օրբելու հետ բանակցություններ վառելու: Խնդրեցի նաև թույլ տալ ինձ Իոսիֆ Աբգարովիչին ներկայանալ ոչ միայն արվեստաբանների, այլ նաև պրեզիդենտի անունից:

Երեք օր հետո Լենինգրադումն էի: Օրբելին ընդունեց ինձ այն սրտաբացությամբ, որով դիմավորում էր հյուսիս եկած ամեն մի երևանցու:

Լսեց ինձ ուշադիր, ասաց, որ վաղուց պետք էր ինստիտուտ ստեղծել, և՛ հետազոտության բնագավառն է լայն, և՛ բավա-

կանաչափ երիտասարդ ուժեր կան և ինքն էլ շոյված է առաջարկի համար, խնդրեց իր շնորհակալությունը հայտնել և՛ պրեզիդենտին, և՛ սեկտորի աշխատակիցներին, բայց մերժեց:

Այս զրույցից մի տարի անց ստեղծվեց ինստիտուտը և Օրբելին եղավ առաջին ողջունողներից մեկը:

* * *

Հետաքրքրվեց, թե ովքեր են աշխատում ինստիտուտում, ի՞նչ ենք ծրագրել անել առաջիկայում: Ուշադիր լսեց, հավանություն տվեց և ապա ասաց.

— Իմ խորհուրդը ձեզ:

Եվ գործունեության մի ամբողջ ծրագիր գծեց իմ առջև:

Հատուկ ուշադրություն դարձնել ճարտարապետության պատմությանը, որքան կարելի է՝ շատ երիտասարդներ պատրաստել, նյութի ընդգրկումը լայն է և աղերսները համաշխարհային արվեստի հետ չափազանց մեծ են: Մեկ էլ՝ մանրանկարչությամբ զբաղվողներ պատրաստել: Մի մարդու ուժերը երբեք բավարար չեն կարող լինել, այն էլ եթե հայերեն չգիտե: Մեծ ուշադրություն գրաբարին, բոլոր աշխատակիցները պետք է անպայման գրաբար իմանան:

Մի կարճ դադարից հետո ասաց, թե թատրոնի ուսումնասիրությունն անհրաժեշտ է նույնպես, բայց այդպիսի լայն հնարավորություններ չունի: Հետո ասաց, որ երաժշտագետների թիվը բավական մեծ է և լավ կլինի մղել նրանց դեպի ժողովրդական երգերի հավաքում: Երբեք չպետք է մոռանալ, որ ամեն անցնող օր իր հետ անվերադարձ տանում է մի երգ: Եվ հետո խոսեց ան մասին, թե ինչ անակրկալներ են սպասում այն երաժշտագետներին, որոնք կնվիրվեն միջին դարերի երաժշտությանը:

Լսավ հիշում եմ նրա մի խորհուրդն էլ. աշխատակիցներին հարկավոր էր մղել դեպի հարցի կոմպլեքսային քննություն, գեղարվեստական կյանքի լայն զուգորդումներով, հայրենականը միշտ դիտել համաշխարհային երևույթների ընդհանուր շղթայի մեջ:

Լենինգրադ էի մեկնել: Ձանգեցի Իոսիֆ Աբգարովիչին և հարցրի, թե կարո՞ղ եմ իրեն տեսնել: Այս անգամ դա մի պարզ այցելություն չէր, այլ նաև փորձ՝ համոզելու նրան, որ մեր ինստիտուտին հանձնի իր «Ախթամար» աշխատությունը, որը, ինձ հասած լուրերով, ավարտել էր:

Չմերժեց, բայց և չհամաձայնեց: Ասաց, որ նախ շարադրանքը վերջացած չէ, դեռ գրվելու է մի գլուխ ևս, որով սկսվելու է աշխատությունը, ապա նաև տողատակի ծանոթագրությունները:

Ես հայտնեցի մեր ինստիտուտի պատրաստակամությունը, եթե նա վստահի: Ասացի, որ իր ընտրությունները երկու աշխատակից կժամանեն Լենինգրադ և կմնան այստեղ այնքան ժամանակ, որքան որ պետք կլինի ծանոթագրությունները պատրաստելու համար: Իոսիֆ Աբգարովիչն ասաց, թե ինքը զգացված է ինստիտուտի վերաբերմունքից, բայց նկատեց, որ Լևոն Գյոզալյանը, եթե հարկ լինի իրեն կօգնի, մանավանդ այստեղ է, իր կողքին: Բայց ավելացրեց, որ խոստանում է աշխատությունն ավարտելուն պես՝ հրատարակության տնօրինությունը հանձնել մեր ինստիտուտին:

Դա իմ վերջին հանդիպումն էր մեծանուն գիտնականի հետ:

Շաբաթը յոթ օր ունի: Դրանցից մեկն է կիրակի: Օրբելին իմ մտապատկերում միշտ նմանվել է կիրակի օրվան:



get out

h

many soft



Ես չգիտեմ մի այլ դերասանուհի,— խոսքը անցած հիսնամյակի հայ թատրոնի մասին է,— որ իր ժամանակակիցների կյանքում այնպիսի ազդեցիկ դեր խաղացած լինի, ինչպես Արուս Ոսկանյանն իր բեմական գործունեության վերջին երկու տասնամյակում:

Արուս Ոսկանյանը լայն ժողովրդականություն ուներ: Ոչ ոք անտարբեր չէր: Երիտասարդությունը պաշտում էր նրան: Մանավանդ ուսանողները: Նրա պատկերած հերոսուհիները իրենց սիրով ու կարոտով, իրենց երազներով ու տառապանքով, վատահաբար կարող եմ ասել, փնտրվող օրինակ էին թատերասրահում նստած տղաների ու աղջիկների համար:

Ես էլ մեկն եմ հղել այն ժամանակվա երիտասարդներից, և Արուս Ոսկանյանի օրինակի վրա զգացել եմ, թե ինչ անմիջական միջամտություն կարող է ունենալ բեմական արվեստը մարդկանց կյանքում: Ոչ մեկիս համար Արուս Ոսկանյանը այն հմայիչ կինը չէր, որին կարող էր ձգտել նրանով հրապուրված երիտասարդը: Դերասանուհու գեղեցիկ ըմբռնումն էր նա: Մեր ականջին հասնում էին տարբեր պատմություններ նրա կյանքից,— իրական, թե հորինված,— և մեզ համար նա այդ պատմությունների հերոսուհին չէր, այլ կրողը հոգեկան այն գեղեցկության, որ հանդիսատեսը գտնում էր նրա պատկերած Ռաուլենդլայնի, Նորայի կամ Կատերինայի մեջ:

Չէի ասի, թե գեղեցկուհի էր, բայց երևի շատ գեղեցկուհիներ կգերադասեին նրա զրավչությունն ունենալ: Նրա երկնագույն աչքերը, լայն ու բարձր ճակատը, գլխի բացառիկ զրվածքն ուսերին, երկարավուն վիզը, դեմքին խաղացող գույները, երեք կողմից դեմքը շրջանակող խարտյաշ մա-

զերը և մանավանդ արտահայտությունն աննկարագրելի հրապույր էին հաղորդում, պարզապես դարձնում անդիմադրելի: Եվ որ գլխավորն է՝ չէր «կոտրատվում» նազից, ինչպես սովորաբար գեղեցիկ կանայք, երբ տեսնում են, որ դիմացի տղամարդը նկատել է իրենց հրապույրը: Նազելի էր Արուսի էությունը: Եվ որ գլխավորն է՝ պահում էր իրեն այնպես, ասես, ոչ հայտնի է իրեն իր արտաքին հմայքը, ոչ էլ իբր տեսնում է դրա ազդեցությունն իր հետ խոսողի վրա:

Նույնը կարող եմ ասել և նրա մտքի վերաբերյալ: Խելոք ու կարգացած՝ երբեք չէիր նկատի կանանց մոտ հաճախ դիտված արհեստական ջանքը՝ նրանց ասես այնքան չի զրադեցնում գրույցի բուն միտքը, որքան ապացույցն այն բանի, թե իրենք պակաս գիտուն չեն, քան իրենց հետ խոսող տղամարդը: Արուսին հարցը զբաղեցնում էր ըստ էության և դրա քննությանը հանձնվում էր ամբողջապես, մանավանդ եթե համոզված էր: Բայց երբ նյութը չգիտեր, շուներ իր տեսակետը, վարանոտ մի արտահայտություն կար հայացքի մեջ կամ էլ հանդես էր բերում լսելու մի զարմանալի պատրաստակամություն, որը բառերով երևի այսպես կարելի էր ձևակերպել՝ «Ի՞նչ եք ասում», «Չա՛տ հետաքրքիր է», «Չէի լսել. մի՞թե ճիշտ է» և այլն, և այլն: Այսինքն՝ որքան տրամադրված խոսելու, վիճելու, տրամաբանելու, իր միտքը հաստատելու, ուներ լսելու, ասածիդ նկատմամբ ուշադիր լինելու հազվագյուտ բնորոնակություն: Նրա հետ խոսելը, գրուցելը, մանավանդ վիճելը մեծ բավականություն էր, երևի ոչ պակաս, քան նրա մասնակցությամբ ներկայացում գիտելը:

Արտաքին հրապույրի ներգործությունը անկասկած էր: Բայց երիտասարդությանը դրավում էին առանձնապես հոգեկան նկարագրի այն դժերը, որ ունեին Արուսի հերոսուհիները կամ «վերագրում» էր նրանց դերասանուհին:

Արուսի անձնավորած հերոսուհիները դառնում էին հոգեկան գեղեցկության չափանիշ. եթե երիտասարդ աղջիկները ձգտում էին նմանվել նրա հերոսուհիներին, ապա տղաներն ուզում էին, որ իրենց ընտրյալը ինչ որ կերպ հիշեցնի նրանց:



Ինձ հայտնի է մի երկու դեպք, թե ինչպես Արուսին բեմում տեսնելուց հետո տղան սառել է դեպի իր սերը, չգտնելով իր ընտրած աղջկա մեջ այն, ինչ տեսել է բեմական հերուստուհու մեջ:

Ուսանող ժամանակս մի առիթով իմ պրոֆեսորներից մեկի տանն էի երեկոյան ժամին, որտեղ շատ հյուրեր կային, ընտիր մտավորականներ: Գնացել էի գիրք վերցնելու շրջոց, որ գնամ, պահեց: Ու երբ Արուսի մասին խոսք բացվեց, հասկացա, որ տարեց մարդկանց կյանքում ևս դերասանուհին տնի իր տեղը: Ձէ որ մի ժամանակ նրանք էլ են երիտասարդներ եղել: Նա իր խաղացած դերերով անցած-գնացած կյանքի՝ գեղեցիկ սիրո, երազի ու ձգտումի վերհուշ է, հաճախ որոնված և չգտնված, հաճախ էլ գտնված ու կորցրած, բայց բոլոր դեպքերում, որպես հոգու խորշում թաղված մի գանձ ու հարստություն, որ ամեն անգամ կյանքի է կոչում Արուսին իր արվեստով:

Նրա խելքը և հմայքը համագործակցում էին:

* * *

Ուշ ծանոթացա հետը, 1940-ին միայն, կարծեմ ապրիլի 30-ին: Այդ օրը հրավիրված էի Պոլիտեխնիկական ինստիտուտ Աբովյանի մասին զեկուցում կարդալու: Հրավիրված էր նաև Արուս Ոսկանյանը, զեկուցումից հետո հանդես էր գալու գեղարվեստական ասմունքով: Այդ ինստիտուտում մի երկու-երեք անգամ եղել էի և համոզվել, որ ուշադիր և հետաքրքիր մի լսարան է, որի համար արժե խոսել: Երբ եկա զեկուցման՝ Արուս Ոսկանյանն արդեն այնտեղ էր: Ինձ ներկայացրին նրան: Ես շտապեցի ասել, որ իր արվեստի երկրպագուներից եմ:

— Շատ ուրախ եմ:

Ժպտաց և անմիջապես փոխեց խոսակցության նյութը:

— Որքա՞ն եք խոսելու:

— Մի ժամ, կամ գուցե մի փոքր ավելի:

Բայց ես ռզևորվեցի ու իմ զեկուցումը տեղեց երեք ժամ:

Հնամիջմանը մեղավոր տեսքով մոտեցա՝ դերասանուհուն։ Արուսը թեև ժպտում էր, բայց կապույտ աչքերի մեջ կշտամբող հայացք կար։

— Այս ի՞նչ արիք, այդքան խոսել կլինի, սպասելուց հոգևորվյալ իջավ վրաս։ Ես հիմա ինչպե՞ս բեմ բարձրանամ, անաստված։

Ես շփոթված էի ու չգիտեի ինչ ասել։ Մեղավոր լռությամբ կանգնել էի նրա առաջ։ Ձգիտեի ինչպես արդարանալ ու ինձ մատուցված ծաղկեփունջը մեկնեցի իրեն։

— Ի՞նչ անեմ, ներե՞մ...

Նա շարունակում էր ժպտալ և այլևս կշտամբանք չկար նրա աչքերի մեջ։

— Մի՞թե չգիտեք, որ երկար զեկուցումը դե մոդե է հիմա։ Որքան կարճ՝ այնքան ազդեցիկ ու լավ։

Ձայնը իջեցնելով և կամացուկ, համարյա շշուկով, որ երեկոյի կազմակերպիչները չլսեն, ասաց.

— Երիտասարդ եք, ընկեր Ջարյան և ինձանից ձեզ խրատ. միշտ հիշեք, որ երկար խոսքը հագեցում է առաջ բերում. պետք է կայծը ձգել ոսկնդիրների սրտերի մեջ ու, չսպասելով, որ հանդի, ամբիոնից հեռանալ։ Նրանք դեռ ուզում են լսել, իսկ դասախոսը վերջացրել է արդեն։ Երբեք չպետք է կշտացնել, պետք է կարոտի մեջ թողնել։

Ասաց ու նայեց ուղիղ աչքերիս մեջ։

— Հո չե՞ք նեղանում։

— Ոչ, ինչ եք ասում. ճիշտ հակառակը. շնորհակալ եմ լավ խորհրդի համար։

Ձանգը տվին, նա պետք է բեմ գնար։

— Մենք դեռ կհանդիպենք. դուք պետք է ձեր մեղքը քավեք։

Ասաց ու գնաց։ Ես երկար մտացի տեղում գամված։ Ես երջանիկ էի այդ պահին, երջանիկ սիրելի դերասանուհու հետ ծանոթանալու, նրանից կշտամբվելու, ճիշտ խորհուրդ լսելու համար, որին, ավա՜ղ, այդպես էլ չկարողացա հետևել ու իմ ամեն մի երկարավուն ելույթից հետո միշտ ականջիս հնչում է դերասանուհու կշտամբող ձայնը։

1940-ի ամառը հանգստանում էի Սևանա կղզում։ Այն-

տեղ էր նաև Արուս Ոսկանյանը: Ես եկա Սեան, մի երկու, թե երեք օրից մեկնեց: Հարց ու փորձ: Զրույցներ տարբեր խնդիրների շուրջ: Հիշում եմ շատ լավ էր լողում, ասես ձուկ լինեի: Նա և Վաղարշ Վաղարշյանի կինը մրցում էին իրար հետ: Թեև Քուի ափին մեծացած՝ լողալ չգիտեի: Նայելով Արուսի և Աղավնի Գասպարովնայի թեթև ու հանգիստ լողին, կարծեցի թե մի դժվար բան չէ ու ինձ գցեցի ջուրը: Խեղդվելու վրա էի, Արուսը վրա հասավ ու ջրից դուրս բերեց ինձ: Նա ինձ հանդիմանեց վաղեմի բարեկամուհիս: Այդ օրվանից նա ինձ հետ խոստում էր դուռով:

* * *

Մեր մի հանդիպումը, որի մասին պատմելու եմ մանրամասն, տեղի ունեցավ նույն տարվա վերջին, եթե չեմ սխալվում դեկտեմբեր ամսին:

Հեռախոսային զանգ: Արուս Ոսկանյանի ձայնն է: Սկզբում մի երկու բնդհանուր խոսք, ապա խնդրանք, այս երկու օրը ժամանակ գտնել և անցնել իր մոտ, գործ ունի հետս: Խոստացա հաջորդ օրվա երեկոյան ժամը ութին լինել իր տանը:

Գնացի: Դիմավորեց մի գիրք ձեռքին, որ ըստ երևույթին կարդում էր: Ընդունեց ժպտադեմ: Ավելի գեղեցիկ ժպիտ չեմ տեսել: Ինչպես նաև չեմ տեսել մի այլ կին, որ այդպիսի հմայք ունենար: Նայում էիր և թվում էր թե դեմքից լույս է կաթում, ջերմություն:

Նոր էինք սկսել զրույցը, որ Արուսին դուրս կանչեցին: Մենակ մնալով՝ ինձ համար զբաղմունք ստեղծեցի. ոչանտարբեր դեպի գիրքը՝ սկսեցի աչքի անցկացնել դեռասանուհու գրադարանը: Մի գիրք նայեցի, հետո մի ուրիշը: Երբ տանտիրուհին վերադարձավ՝ ձեռքիս էր Եղիշե Չարենցի «Էպիքական լուսաբաց» ժողովածուն՝ բանստեղծի ինքնագիր մականգրությամբ:

Բանաստեղծի ձեռագիրը միանգամից այնքան հիշողութթյուններ վերակենդանացրեց, որ նայում էի Արուսին և ոչ մի խոսք չէի ասում, թեև նկատում էր, որ արտակարգ հուզ-

ման մեջ լինելով՝ արտահայտվելու կարիք ունեմ: Արուսը ժպտում էր բարի և շարաճճի խորամանկությամբ: Ես նրա այդ հայացքը, որ կարծես չէր համապատասխանում իմ հոգեվիճակին՝ հասկացա հետո, երբ մի փոքր անց մեկնեց ինձ Չարենցի մի անտիպ ձեռագիրը՝ «Գովք Արուսին» խորագրով:

Լավորակ թղթից պատրաստված փոքրադիր տեսրում բանաստեղծը մաքուր արտագրել էր Արուս Ոսկանյանին նվիրած չափածո ձոնը կամ, ինչպես ինքն է ասում՝ պոեմը: Ինչպես երևում է, ամեն կերպ աշխատել էր տեսրին գրքույկի ձև տալ՝ շապիկ էր պատրաստել, անվանաթերթ, յուրաքանչյուր էջում տեղավորել միայն մի ութնյակ, ամեն մի ութնյակի սկզբնատառ՝ այլ գույնի թանաքով էր գրել: «Հրատարակելով» իր «գրքույկը» մի օրինակ տպաքանակով՝ բանաստեղծը նվիրաբերել էր դերասանուհուն:

«Նվիրում եմ,— գրված է վրան,— իրեն՝ Արուսին՝ նրա հանճարով և հրով ներշնչված այս պոեմը՝ հայկական Մեկ-պոմենայի տաճարի չքնադագույն և արևահամ դիցուհունույն Արուսի մասին»:

Եվ հետո հետևյալ պայմանն է դրել.

«Սիրելի Արուս, խնդրում եմ այս պոեմը, քանի դեռ չի հրատարակված, ոչ ոքի թույլ չտալ արտագրելու: Իսկ տպագրության իրավունքը պատկանում է միայն անձամբ քեզ՝ եթե ես ներկա չլինեմ»:

Ես շատ կուզեի արտագրել պոեմը, ունենալ ինձ մոտ բայց չէի համարձակվում թույլտվություն խնդրել, նկատի ունենալով հեղինակի դրած խիստ պահանջը: Արուսը, որի աչքից ոչինչ չէր վրիպում՝ ասաց.

— Եթե ուզում ես՝ արտագրիր:

Եվ նա ասաց, թե քանի որ Չարենցն այլևս կենդանի չէ, պապա ուրեմն պոեմի նկատմամբ բոլոր իրավունքները, բանաստեղծի կամքի համաձայն, պատկանում են իրեն: Միաժամանակ զգուշացրեց.

— Արտագրիր, բայց տես՝ չհրապարակես: Այդ թող ինձ: Եթե ինձ չհաջողվի՝ դու արա, երիտասարդ ես և ինձանից

աւելի երկար կապրես: Դե, դու աւելի լավ գիտես, թե ինչ-
պես պետք է անել, հրատարակիչ մարդ ես:

Շատ տարիներ անց, երբ Արուս Ոսկանյանն էլ չկար, ես
իրավունք վերապահեցի ինձ հրատարակութեան հանձնել
պտեմը:

* * *

Արուսը նկատեց, որ հայացքս իրենից երբեմն-երբեմն
սահում և կանգ է առնում իր ձեռքի գրքի վրա:

— Սառա Բեռնարի հուշերն են: Կարդացե՞լ ես.

— Այո:

— Ֆրանսերեն կարդո՞ւմ. ես.

— Ոչ:

— Ապա ինչպես:

— Ռուսերեն թարգմանութիւնն եմ կարդացել:

— Զգիտեի, որ ռուսերեն թարգմանութիւնը կա: Իսկ
ինչպե՞ս գտար, հետաքրքր՞ւր է:

— Հետաքրքիր է, անշուշտ: Նույնիսկ շատ: Վաղուց եմ
կարդացել, մի տաս տարի առաջ: Ախալքաւակում, որտեղ
հայոց լեզվի ու գրականութեան դասատու էի: Եւ մնացել է
ընդհանուր տպավորութիւնը միայն: Սիրով նորից կկարդա-
յի, եթե գտնեի գիրքը: Թեև, խոստովանութիւն լինի, Սառա
Բեռնարով այնքան էլ ոգեւորված չեմ:

Արուսի հայացքի մեջ հիասթափութեան մի շող երևաց,
բայց մի վայրկյան միայն, հետո անմիջապես աչքերը
կենտրոնացան, կարծես հարցնում էր՝ «ինչո՞ւ»:

— Դուզեական եմ:

— Դժվար է էլեռնորայով չհրապուրվել, — ասաց նա, մի
պահ կանգ առավ, կարծես մտածեց՝ ասի, թե չէ, ապա
շարունակեց, — դերասանութիւնը, սիրելիս, արվեստ լինե-
լուց բացի, արհեստ է ու ես հիանում եմ այն արվես-
տագետներով, որոնք բնութեան շնորհները մշակում են,
հղկում: Ես նկատի ունեմ մեր գործի արհեստը, որի կատարե-
լութեանը հազվագյուտ դերասաններ են հասնում: Մեր դերա-

սաններին Վաղարշը, դերասանուհիներին Օլգան: Մյուսները խեղճ են: Մեր արհեստի անհասանելի բարձունքը Փափազյանի խաղն է:

Ես լուռ էի: Եվ իմ լռութունը համաձայնության նշան համարելով, նա առաջ տարավ խոսքը:

— Հետո, բավական չէ, որ դերասանը նյութը լավ զգա: Սուր, խոշոր միտք է պետք: Երբ դերասանը բեմ է գալիս, հանդիսատեսը պետք է ոչ միայն մարդկային կյանքի մի պատկեր տեսնի, այլև ընդունի և ոգևորվի այն մտքով, որի համար բեմ է բարձրացել:

Մի պահ լուռ մնաց, ֆրանսիական դերասանուհու հուշերի գիրքը բացեց, նորից փակեց:

— Կարդում եմ այս գիրքը և հասկանում, որ այդպես խաղալ կարողանալու համար, մարդ պետք է Սառայի հանձարն ունենա: Դա տվածությունիկ է, կամ կա, կամ չկա. բայց նրան, իբրև բարձրագույն օրինակ աչքի առաջ ունենալ և բնության քիչ տվածը արհեստով և մտքով հարստացնել, միանգամայն հնարավոր է:

* * *

Սենյակ մտավ մի երիտասարդ աղջիկ:

— Ծանոթացիր,— դարձավ ինձ Արուսը,— եղբորս աղջիկն է, Վարդգեսի:

— Մարգարիտ,— ներկայացավ նա:

Արուսը սիրով նայեց Մարգարիտին, հետո ինձ ու ասաց.

— Մարգարիտը խոստացել է աղջիկ ունենալու դեպքում անունը Արուս դնել:

Մարգարիտը շիկնեց:

— Հորաքո՛ւյր:

— Ի պատիվ ինձ, ու ես անսահման շոքված եմ դրանից. անհամբեր եմ, թե երբ է այս աղջիկը մեծանալու, ելք է ամուսնանալու ու երբ է իմ անունը կրողն աշխարհ գալու, որ ուրախանամ:

Դերասանուհին այս աշխարհին վաղ հրաժեշտ տվեց, բայց Մարգարիտն իր խոստման տերն եղավ և աղջկան կոչեց Արուսիկ:

Նրանք ներողություն խնդրեցին և մի պահ ինձ մենակ: Թողին:

* * *

« Հայելու սեղանի վրա մետաղ դրամներով լի թեյի մի ափսե էր դրված:

Արուսը ներս մտավ ու տեսնելով ինձ հայելու սեղանի առաջ կանգնած, հարցրեց.

— Նախապաշարումներ ունե՞ս.

Զհասկացա հարցը:

— Ես ունեմ:

Ասաց ու ձեռքն առավ մետաղյա դրամներով լի ափսեն:

— Եթե փողոցում, մայթի վրա ընկած է մետաղ դրամ, ըստ ժողովրդական նախապաշարման պետք է վերցնել: Եթե արծաթ է՝ գտած դրամը ծախսելու փ, եթե պղնձե դրամ է և դուշն է քեզ նայում, պետք է առնել ու պահել, ոչ մի դեպքում չծախսել: Ասում են՝ բարաքյաթ է բերում: Այս դրամները փողոցում եմ գտել և չեմ ծախսում, սպասում եմ, սպասում եմ բարաքյաթին:

Նայեց ինձ:

— Իզուր ես ժպտում: Հարցը հո նախապաշարված լինելը չէ, այլ այն, որ հավատով ես լցվում, սպասումով, իսկ ավելի մեծ բան, քան սպասումը ինձ հայտնի չէ:

* * *

Մարգարիտը հրավիրեց մյուս սենյակը թեյ խմելու: Երբ սեղանի շուրջը երեքս տեղ գրավեցինք, Արուսն ասաց.

— Հիմա ասեմ, թե ինչու եմ խնդրել, որ նեղություն քաշես և գառ: Մեկ կամ երկու ամսից, երևի գալ տարվա փետրվարին, նշվելու է իմ ծննդյան հիսնամյակը: Ես ուզում էի խնդրել, որ հանձն առնես զեկուցումը:

Առաջարկը խիստ անախտալ էր ու ես մի պահ շփոթվեցի: Ինձ համար մեծ պատիվ էր այդպիսի դերասանուհու հոբելյանին զեկուցումով հանդես գալը, բայց այն ժամանակ ես թատրոնով չէի զբաղվում և, անկեղծ ասած, վստահ չէի, որ կարողանամ իրեն քիչ թե շատ արժանի զեկուցում կարդալ: Նա իմ ոչ մի պատճառաբանությունը հարգելի չհամարելով, շարունակում էր համոզել ինձ: Ես իսկապես չէի պատկերացնում ինձ թատերագետի վիճակում, թեև թատրոնը սիրոսմ էի և Արուս Ոսկանյանն էլ մեկն էր բեմի այն վարպետներից, որի խաղով միշտ հիացել եմ: Դժվար էր, ճիշտ է, բայց համառ գտնվեցի ու մերժեցի:

Հիմա, երբ տարիներ են անցել ու ես էլ թատրոնին ավելի եմ նվիրված, քան գրականությունը, ցավում եմ, ավելին, չեմ ներում ինձ, որ կարող էի վշտացնել մի այդպիսի լուսավոր արվեստագետի: Հոբելյանին զեկուցումով հանդես եկավ Վաղարշ Վաղարշյանը: Այդ զեկուցումը հրապարակվեց ու ես հիմա էլ համոզված եմ, որ այդ մակարդակին գոնե այն ժամանակ չէի կարող բարձրանալ:

Իմ մերժումը մեղքի պես ծանրացավ հոգուս վրա և արտիստուհու մահից հետո, շատ տարիներ անց, «Արուս Ոսկանյան» դիմանկարը գրելիս՝ միշտ աչքիս առաջ էր ափնարկիս հերոսուհուն կշտամբալի հայացքը: Ես չգիտեմ, թե որքան եմ հաջողել վերստեղծել դերասանուհու կերպարը, բայց որ վերջացնելուց հետո փոքր ինչ թեթևացած զգացի ինձ, այդ ճիշտ է:

* * *

Մի երկու-երեք անգամ Արուս Ոսկանյանին հանդիպել եմ Իսահակյանի տանը: Վարպետը սիրում էր նրան և մի առանձին գուրգուրանքով էր վերաբերում: Արուսն էլ լավ էր զգում իրեն ու, թեև միշտ անկեղծ ու անմիջական, բացում էր վշտացած սիրտը բանաստեղծի առաջ, գանգատվում, նա էլ ուշադիր լսում էր դառնացած դերասանուհուն, որն ասելով ու պատմելով թեթևանում էր:

Մի անգամ տեսել եմ նրան արցունքներն աչքերին:

— Դեր շունեմ խաղալու, Ավո, հասկանո՞ւմ ես, դեր:

խոսք բացվեց գնացքով ճանապարհ զնալու մասին: Մեկն ասաց. թե ինքը նախընտրում է «միջազգային» վագոնը՝ մաքուր է, հարմար և վերջապես գեղեցիկ: Մի ուրիշը գերադասությունը տվեց այն վագոններին, որտեղ շատ ժողովուրդ կա՝ պարզ ու հասարակ մարդիկ:

— Մաքուր և հարմար ողն է, մշտական բնակություն հոչես հաստատում: Մի փոքր՝ նեղվում ես, բայց լսում ես պարզ մարդկանց զրույցը, իմանում, թե ինչպես է ապրում ժողովուրդը:

Միջամտեց Արուսը:

— Ես դերասանուհի եմ և ինձ համար, ինչ խոսք, շատ հետաքրքիր է լինել ժողովուրդի մեջ, լսել նրանց, տեսնել թե ինչպես են ուրախանում, սրամտում, միմյանց ձեռ առնում: Մեկ էլ տեսար մեկը պատմում է իր վիշտը, իսկ մյուսները, բոլորովին անծանոթ մարդիկ, հանգստացնում են նրան հարազատի անկեղծ դպացումով: Մարդիկ այստեղ շատ արագ են մոտիկանում:

Մի պահ լռելուց հետո:

— Ծիշտ ասած, ինձ համար պակաս հետաքրքիր չէ, եթե չասեմ, թե ավելի հետաքրքիր է փափուկ վագոնը, որտեղ մարդիկ չգիտես ինչու այն չեն ինչպես երևում են և, չնկատելով, խաղում են, որ չլինի թե իրենք պատահական համարվեն ընտրյալների շրջանում և իրենց պատում են այն լրջությամբ, որ չունեն և ստացվում է կեղծ ու հիմար վիճակ: Շատ հետաքրքիր է տեսնել, թե ինչպես մարդիկ աշխատում են, իրենց տեսքին պատկառելիություն հաղորդելով, երևալ ավելի նշանակալի, քան իսկապես են: Հավառակ հասարակ մարդկանց՝ այստեղ ծանոթությունը տեղի է ունենում ուշ կամ երբեք, որովհետև քաղքենի լինելով, իրենց արժանապատվությունից ցած են համարում՝ առաջինը խոսք բացել, հետաքրքրություն ցույց տալ: Մի խոսքով՝ առատ նյութ արվեստագետի համար:

Մի անգամ էլ, դարձյալ վարպետի տանը, խոսում էր այն պարտականությունից, որ թատրոնն ունի ազգային լեզվի մաքրությունը պահպանելու նկատմամբ: Այդ խնդիրը դերասանուհուն շատ էր զբաղեցնում և նա ներկայացած առիթն օգտագործում էր ու խոսում դրա մասին, երբեմն էլ, ինչպես հայտնի է, հանդես էր գալիս հրապարակավ՝ ամբիոնից կամ մամուլի էջերում՝ հոդվածներով:

— Մեկը Ղարաբաղի շեշտեր ունի խոսքի արտաբերության մեջ, մի ուրիշը՝ Թիֆլիսի: Երրորդի մոտ զգալի է Գյումրիի:

— Ոմանք էլ Պոլսի շեշտերով են խոսում,— նկատեց վարպետն ու ժպտուն հայացքը հառեց դերասանուհու վրա:

Արուսը զգաստացավ, մի պահ կարծեց, թե բանաստեղծն իրեն է ակնարկում և թույլ ու կամացուկ հարցրեց.

— Ո՞վ օրինակ:

— Օրինակ ես ուզում. Կոթիկյանը:

— Ճիշտ է:

Վայրկենական լռություն տիրեց:

— Քչերն են մաքուր հայերենով խոսում:

— Կյանքից է,— ասացի ես:

Վարպետն ու Արուսը նայեցին ինձ:

Փորձ արի բացատրել միտքս: Ես ասում էի, որ կյանքը և բեմը միմյանց հետ կապված ազդակներ են: Իհարկե՝ բեմը պետք է օրինակ տա, բայց հիմա մեր մտավորականության թիվը անցյալ ժամանակների հետ համեմատած շտեմնված չափերի է հասել: Գավառներից լցվում են մայրաքաղաք: Գալիս են նաև Վրաստանից, Ադրբեջանից, Ռուստովից, Մոսկվայից: Որտեղից միայն չեն գալիս: Վերջապես, տեղի է ունեցել հայրենադարձություն: Երևանը հիմա լեզվական մի խառնարան է: Սրա առաջն առնել չի կարելի, անխուսափելի ընթացք է և ժամանակ է պետք, որ մի հիմքի վրա մեր լեզուն և դրա հետ միասին նրա արտաբերությունը դառնան միասնական:

Վարպետը հավանութիւն տվեց ասածիս:

Արուսն էլ առարկութիւն չուներ, բայց շարունակում էր ասել և, իհարկե, միանգամայն իրավացի, թե մեր լեզվի կանոնավորման մեջ թատրոնի դերը մեծ է:

* * *

Մի երկու օր անց գնացի Սունդուկյանի թատրոն՝ ներկայացում նայելու: Ճեմասրահում հանդիպեցի Արուսին ու, զրույցի բռնվելով, այդպես էլ դահլիճ չմտա:

Դերասանուհին նորից անդրադարձավ բեմական խոսքին: Նա շարունակեց Իսահակյանի տանը սկսած զրույցը բեմական խոսքի մաքրութեան մասին: Երբ զրույցն ավելի մասնավորվեց, զգուշաբար նկատեցի, որ Հրաշայի ու իր՝ Արուսի խոսքի մեջ լսելի է բաղաձայնների կոշտութիւն:

Նա երկար համոզում էր ինձ, թե իսկական հայերենում այդպես է և դա, բացի գեղեցկութիւնից, առնականութիւն է հաղորդում լեզվին:

Ես համաձայն չէի ու փորձ արի առարկելու, բայց ոչ այն հաջողութեամբ, ինչպես նա, որովհետև ոչ նրա փաստական պաշարն ունեի, ոչ էլ երկար-բարակ մտածել էի այդ հարցերի շուրջ: Հետո, երբ շատ տարիներ անցան ու ես բավական նյութ և դիտողութիւն կուտակեցի, համոզվեցի, որ նույն Պոլսից եկած Փափազյանի խոսքը շահեկանորեն տարբերվում է երկուսից էլ: Գտա դրա բուն աղբյուրը, հասկացա, որ ինչ-ինչ սկզբունքներ Սիրանուշի միջոցով Ադամյանից հասել են Փափազյանին: Մնալով նույն կարծիքին ինչ տարիներ առաջ, ցավում էի, որ Արուսը կողքիս չէ, եթե ոչ կարելի էր այն ժամանակ սկսված և ընդհատված վեճը հիմա շարունակել:

* * *

Հարցրի Սիրանուշի մասին, հետաքրքրվեցի, թե դերասանուհիներից ո՞ւմ է ամենից ավելի պարտական:

— Ավելի զարմանահրաշ բան, քան Սիրանուշը, գոնե ես չեմ տեսել թատրոնում: Եթե նա հայ ծնված չլիներ, այլ

իտալացի կամ ֆրանսիացի, ապա նրա տեղը կլիներ էլեո-
նորա Դուգեի և Սառա Բեռնարի կողքին:

Մի պահ կանգ առավ:

— Դիտեմ որ կզարմանաս, եթե ասեմ, թե մի այլ մեծ
դեմք ևս ունեւ մեր թատրոնը: Եթե ոչ ավելի գերազանց,
ապա Սիրանուշից ոչ նվազ: Խոսքս Հրաչյա Ազնիվի մասին է,
իմ ուսուցչուհու, որին շատ և շատ եմ պարտական: Կոկորդը
ցավում էր և նա վաղ թողեց բեմը:

Մի պահ կանգ առավ, ասես ուժ հավաքեց և զսպեց վրա
հասնող հուզումը:

— Երբ հիշում եմ նրա պարապմունքները, հիշում եմ
նրա ցույց տված տեսարանները, հիմա էլ մնում եմ զարմա-
ցած: Նա այդ անում էր մեկ-մեկ, որովհետև ցույց տալն իր
սկզբունքին հակառակ էր, բայց երբ մի երկու անգամ փոր-
ձում էի և չէի հաջողում՝ հուսահատությունից, թե բեմի կա-
րոտից, — իսկ նա բեմը վաղ էր թողել հիվանդության պատ-
ճառով, — ինքն էր խաղում և ինչպես էր կերպարանափոխ-
վում, դառնում թուրքովին այլ մարդ ու, թեև ոչ բեմական
զգեստ կար հագին, ոչ գրիմավորված էր, ոչ էլ դահլիճ ու
հանդիսատես կար դիմացը, նա այնպիսի ցնցող ազդեցու-
թյան էր հասնում, որ իբրև աշակերտուհի ուշադիր հետևե-
լու փոխարեն դառնում էի հիացած հանդիսատես, և հիմա էլ,
չնայած քանի տասնամյակ է անցել, աչքիս առջևն է ու և
ամեն անգամ նրան միտ բերելիս փշաքաղվում եմ:

* * *

Զրուցում էինք: Ես ինչ որ բան էի պատմում՝ Արուսը
լսում էր: Մեկ էլ ինձ թվաց, որ իմ դիմաց ոչ թե ինքը
Արուսն է, այլ Սարյանի մատիտանկարը. գլխի նույն պահ-
վածքը, աչքերի ճիշտ նույն հայացքը, պարանոցի պլաստիկ
այն գիծը, որ քաշել է նկարչի ձեռքը: Հարցրի՝ հավանո՞ւմ է
իր դիմանկարը:

— Ակզբում չէ, հետո թուրքն այնքան ասացին, թե լավ
է, լավ է, որ սկսեց դուր գալ:

— Ընհանրապես Սարգյանի մատիտանկարների այդ շարքը ընտիր գործեր են:

— Ոչ բոլորը: Օրինակ Հասմիկը հաջողված չէ. նմանությունը բռնել է, իսկ բնավորությունը՝ ոչ: Միշտն լավ է, Բուրջալյանը նույնպես: Ամենալավը, իհարկե, Վահրամի նկարն է. կատարյալ գլուխգործոց:

* * *

1942-ին բեմադրվեց «Համլետը»: Վաղարշյանի խաղը Համլետի դերում բուռն վեճերի նյութ դարձավ: Հայկական թատերական ընկերությունը կազմակերպեց ներկայացման քննարկումը: Վեճը սուր բնույթ կրեց և տևեց երկու օր: Ելույթ ունեցա նաև ես: Քննարկման մասնակիցների մեծ մասը քննադատում էր Վաղարշյանի մեկնաբանությունը: Նույնը և ես: Դա թատերագիտական իմ առաջին ելույթն էր: Ասում էին, թե վատ չէ:

Քննարկմանը շատ մարդ կար, գլխավորապես թատերական աշխարհի մարդիկ: Բացի այդ՝ գրողներ, լրագրողներ, նկարիչներ: Կար նաև Արուստ:

Քննարկումից հետո մոտեցավ ինձ Արուստը, բռնեց ձեռքս ու ասաց.

— Բա ասում էիր՝ չեմ կարող:

Ու գնաց:

* * *

Երկու, թե երեք օր անց Արուստը դանգահարեց:

— Ես հիշաշար մարդ չեմ: Շնորհավորում եմ մոտաքր թատրոն:

Ես ինչ որ բան ասացի:

— Գրականությունը մի թող, բայց թատրոնով էլ զբաղվիր: Ես ասացի, թե զբաղվող շատ կա:

— Մեկիքսիից բացի ո՞վ է զբաղվում:

Հախումյանի և Թերզիբաշյանի անունները տվի:

— Նրանք մեկ-մեկ են գրում: Միայն Մելիքսեթն է մեզ հավատարիմ:

Ես ասացի, թե թատրոնով քիչ թե շատ լուրջ զբաղվելու համար շատ բան է հարկավոր իմանալ:

— Ինչ անենք: Ինչ որ չգիտես՝ ժամանակին կիմանաս: Եվ հանկարծ նրա աշխույժ ձայնը կտրուկ դարձավ:

— Ոչ մի առարկություն, ես մեծ եմ, դու՝ կրտսեր և իմ առաջարկը քննության ենթակա չէ:

Ասաց լուրջ և ապա լսեցի նրա ծիծաղը:

— Մի նվեր եմ պատրաստել քեզ համար՝ Հովհաննես Հովհաննիսյանի ձեռագիրը՝ «Նորայի» թարգմանությունը: Զէ որ Հովհաննիսյանով ես զբաղվում, կարող է պետք դալ:

— Շնորհակալություն:

— Ոչ մի շնորհակալություն. ընդունիր նվերս, որպես օրհնանք և մկրտություն:

Ես ջիմացա ինչ ասել:

— Հա՛, մի դիտողություն. ելույթդ երկար էր, այդ բոլորը կարելի էր ավելի սեղմ ասել: Հո չե՞ս նեղանում:

* * *

Ըստ մեր պայմանի, հաջորդ օրը թատրոն գնացի. Արուստ պետք է բերեր «Նորան»:

Հարցրի, թե ինչո՞ւ ելույթ չունեցավ, մի՞թե ասելու բան չունեի:

Նայեց ինձ և նրա աչքերի մեջ թախիժ նշմարեցի:

— Նախ ես էլ քննադատաբար եմ վերաբերում ներկայացմանը: Որքա՞ն է թիկապես ճիշտ է, որ դերասանը հանդես գա դերասանի դեմ: Միշտ էլ մտածել եմ, թե դա կարող է ճիշտ շրնկալվել, թեև հավատա, որ ընդհանրապես հասարակական կարծիքին գերի մնացողներից չեմ: Եվ հետո...

Ասաց ու կանգ առավ: Աչքերում եղած տրտմությունը խտացավ: Եվ ինձ թվաց, թե նա մի հուզում ապրեց, որը հարկավոր էր զսպել խոսքն ասելուց առաջ:

— Չնեղանաս, սիրելիս, բայց ես քննարկման երկու օրն էլ մի անախորժ զգացում ունեի: Բոլորդ էլ հետաքրքիր ու

բովանդակալից էիք խոսում, բայց ես բարոյապես ճնշված էի զգում ինձ. հեռվում պատերազմ է, երկրի գլխին սուր է կախվել, հազարավոր մարդիկ են զենքը ձեռին ընկնում, թշնամին շարժվում է առաջ, իսկ մենք, մի խումբ մարդիկ հավաքվել ինչո՞ւ ենք զբաղված՝ դերասանը ճիշտ է մեկնաբանել Շեքսպիրը, թե ոչ:

Համաձայն չէի դերասանուհու հետ, բայց ձայն շհանեցի: Հետագայում նրա ասածը մի քանի անգամ հիշել եմ: Մեկ այն ժամանակ, երբ գերմանացիները մոտեցել էին Կովկասի դարպասներին, իսկ կառավարութունը որոշեց Գիտությունների ակադեմիա հիմնել Հայաստանում: Մեկ էլ երկու տարի անց, երբ որոշվեց շեքսպիրյան համամիութենական փառատոներ և կոնֆերանսը գումարել Երևանում: Մի կողմից՝ պատերազմ, մյուս կողմից՝ մի շաբաթից ավելի մեր մայրաքաղաքը, նրա հասարակայնությունը, Մոսկվայից և ազգային մյուս հանրապետության ներկայացուցիչները, վերջապես՝ մամուլը Շեքսպիրով են զբաղված:

Սրանք բոլորը մեր ուժի, մեր արդարացիության վկայությունն էին: Եվ այնուամենայնիվ՝ հիմա էլ դերասանուհու ասածը մտաբերելիս, փշաքաղվում եմ, որովհետև, թեկուզ և սխալ, նա այն համոզման էր, թե ոչինչ բացարձակապես ոչինչ չպետք է մեր միտքը շեղի պատերազմից: Նրա հոբելյանը տեղի ունեցավ 1941-ի փետրվարին: Եթե հետաձգվեր ու պատերազմն արդեն սկսված լիներ, համոզված եմ, որ թույլ չէր տա, կասեր՝ «հիմա դրա ինչ ժամանակն է»։ Կրկնում եմ՝ թեկուզ և սխալ, բայց դրա մեջ մի խոր ազնվություն կա, քաղաքացիական պարտքի մի այնպիսի զգացում, որի առջև մարդ չի կարող չխոնարհվել:

* * *

Ո՞րն է իր սիրած դերը:

— Դժվար է ասել,— պատասխանեց,— այդ ո՞ր մայրը կարող է ասել, թե զավակներից որին ավելի է սիրում:

— Այնուամենայնիվ:

— Երևի Նորան: Շատ սիրեցի այդ աղջկան, թերևս այնքան, որ ինձ գտա նրա մեջ: Եղավ մի պահ, երբ ինձ թվում

էր, թե ինքս ինձ եմ խաղում ու ես, չեմ սիրում բեմում իսկական արցունքներ, հազիվ էի զսպում, որ լաց չլինեմ:

Մի պահ յուր մնաց:

— Սկզբում խաղում էի այնպես, առանց խորանալու: Հետո, քսանական թվականներին, մի խոր զգացողութուն իջավ վրաս: Ու ես լավ գիտեմ, որ հանդիսատեսն ինձ հետ ապրում է, ինձ հետ հուզվում՝ տխրում, ոգևորվում: Ավելի ուշ ավելի ճիշտ հասկացա, ավելի խորը: Իսկ հիմա, երբ նորից եմ անդրադառնում, ինձ թվում է, որ բոլորովին էլ լավ չէի խաղում, որ պարզապես չեմ հասկացել կերպարի բուն էությունը, որ կարելի էր հանդիսատեսին հոգեկան այնպիսի հարստութուն առաջարկել, մանավանդ երիտասարդ կանանց, աղջիկներին, որ նրանց կյանքի ճանապարհին հերոսուհիս միշտ նրանց հետ լիներ:

— Իսկ մի՞թե այդպես չէ. ես շատերից եմ լսել, որ իրենց թվացել է, թե նորա խաղալիս դուք իրենց կյանքն եք պատկերել:

Ժպտաց:

— Ես էլ եմ լսել:

— Ուրեմն ինչ:

— Ուրեմն այն, որ դերասանուհին տալիս է հանդիսատեսից: Հանդիսատեսը տարիների հետ պահում-պահպանում է երիտասարդ ժամանակվա բեմական տպավորութունները նույնությամբ, իսկ դերասանուհին որքան տարիք է առնում, այնքան անբավական է մնում իրենից, իր երիտասարդ տարիների արածից:

Մի փոքր դադարից հետո.

— Կարող եմ ավելի խիստ ձևակերպել միտքս, խիստ, գուցե նաև պարտդոսալ. որքան առաջացող տարիքն արտաքին անհամապատասխանութուն է առաջ բերում, դերասանուհին այնքան ավելի է հասնում կերպարի հոգեկան քմբռնման խորության:

Զգիտեի ինչ ասել:

— Զէի՞ր սպասում այնպիսի անկեղծութուն: Եթե ճիշտն ուզում ես իմանալ, ես հիմա, միայն հիմա՝ եմ հասկանում, թե ինչպես կարելի էր խաղալ նորան:

Վարպետի տանը մի հանդիպում էլ եղավ: Նա ուզեց իմանալ բանաստեղծի կարծիքը «Համլետի» մասին:

— Տեսե՞լ ես.

— Տեսել եմ:

— Նվ ինչ:

— Գեշ մոդեռն է:

Խոսք բացվեց Վաղարշյանի մասին:

Հարցրի, թե Արուստին ինչ կարծիքի է Վաղարշյանի մասին:

— Իհարկե, Հրաչյա չէ: Բայց լավ դերասան է ոչ այնքան տվյալներն ու հնարավորությունները, որքան տեսակն է դուր գալիս ինձ: Որքան շատ ունենանք այդպիսի դերասան՝ այնքան լավ մեր թատրոնի համար:

Հարցրի, թե Վաղարշյանի ո՞ր դերերն է առանձնապես գնահատում:

— Սքանչելի Տիխոն էր, չեմ պատկերացնում, որ մի ուրիշն ավելի լավ խաղա: Կամ Բելագուբով էր:

— Իսկ Բուլբուլովը, — հարցրի ես:

— Հոյակապ էր:

— «Պատվի համար»-ի մեջ լավ էր, — ասաց Վարպետը:

— Սուրե՞ն, իսկապես լավ էր: Վաղարշն ընտիր դերակատարումներ շատ ունի, ո՞րը հիշեմ:

Այս առիթով զրույցի շրջանակն ընդլայնվեց և խոսքն դարձավ մեր դերասանական ուժերին ընդհանրապես:

Վարպետը հարցրեց.

— Նրիտասարդների մեջ մի բա՞ն կա:

— Դժբախտաբար՝ ոչ: Ո՛չ Հրաչյա, ո՛չ Վաղարշ, ո՛չ Հասմիկ, ո՛չ էլ Օլգա: Զարմանալի բան. նայում ես և տեսնում, որ շնորհքով մարդիկ են, իսկ իրենց սեփական դեմքը չունեն: Բայց դրանք պետքական ուժեր են, թատրոնը չի կարող միայն աստղերից բաղկացած լինել: Տեսնենք, գուցե դեռ կգան, միայն թե վախենում եմ, որ շղթան կտրվի:

Մի օր Արուսիկն հանդիպեցի փողոցում և ճանապարհեցի մինչև տուն:

Հարցրի, թե խաղալիս ո՞ր դերասանի հետ է իր բեմական շփումն ավելի բնական ստացվում:

— Հրաշյայի նախ և առաջ. նախում ես աչքերին ու հավատում:

Հետաքրքիր էր իմանալ, թե այդ տեսակետից ինչ կարծիքի է Փափազյանի մասին:

— Վահրամ՝ը. դե, նրա հետ խաղացողը դերասան էլ չլինի՝ կդառնա:

* * *

Զրույցի մի պահի ասաց.

— Դերասանը մի նպատակ պետք է ունենա՝ մաքրագործել թատրոն եկած հանդիսատեսին:

* * *

Ինձ հետաքրքրում էր, թե ո՞րն է դերասանուհու ասելիքը թատրոնում:

— Դարերի ընթացքում կյանքը կեղծ պայմանականությունների շատ է ենթարկել մարդուն: Ու եթե դերասանը, ուրեմն և ես, բեմից մի բան ունի քարոզելու, ապա միայն՝ մարդ, բարձր կանգնիր պայմանականությունների ճնշումից և քեզ ազատագրված զգալով, կտիրանաս հոգու անկախություն:

* * *

Իմ ծանոթություն շրջանում Արուս Ոսկանյանը հիսունն անց էր: Ու թեև նրա արտաքին կերպարը արդեն այն չէր, ինչ տարիներ առաջ, բնավորությամբ, հոգեբանությամբ մնացել էր նույնը: Ծիշտ է, նրա ժպտուն դեմքի և մանա-

վանդ աչքերի մեջ նկատելի էր տրտմություն, բայց բոլորը գիտեին դրա պատճառները և չէին բացատրում առաջացող տարիքով: Բուռն ու անդադրուն, անհանգիստ ու որոնող, նա չէր հաշտվում այն մտքի հետ, թե ինքն այլևս երիտասարդ չէ և հետևապես չպետք է խաղա հերոսահիների դեր: Ոչ միայն չէր հաշտվում, այլև չէր հասկանում: Եվ նա, որ ընդհանրապես իրավունք ուներ մտածելու, թե թատրոնի ղեկավարներն աչառու են իր նկատմամբ, անարդարացի էր համարում, որ իրեն հասկացնում են, թե այլևս անցել է Ռաուտենդլայն, նորա կամ Մոննա Վաննա խաղալու իր ժամանակը: Եվ հազիվ թե նա հոժար լիներ խաղալու մայրական դերեր, եթե պատերազմը չպայթեր: Ես նկատի չունեմ ոչ Կրուչինինան, որ խաղաց պատերազմից առաջ, ոչ էլ Զեյնաբը, որով հանդես եկավ պատերազմը սկսվելուց հետո, քանի որ ամեն մի աչքի ընկնող դերասանուհի երիտասարդ հասակից տենչում է այդ դերերը կատարել: Երբ պատերազմի նախօրյակին նրան հանձնարարվեց արքայամոր դերը Դեմիրճյանի պատմական դրամայում, նա չէր կարողանում հասկանալ, թե ինչո՞ւ Վաղարշյանը պիտի խաղա պատանի թագավորի դերը, իսկ ինքը՝ նրա մոր, քանի որ իրենց տարիքի տարբերությունը մի հնգամյակից չի անցնում:

Պատերազմը շատ բան փոխեց: Շատերին փոխեց: Նաև Արուս Ոսկանյանին: Դերասանուհու հոգեկան դրաման իր տեղը զիջեց ժողովրդի պատմական փորձության ահեղ իրականությունից: Եթե թույլ տային՝ կգնար ռազմաճակատ: Եվ քանի որ հնարավոր չհամարվեց՝ նա հայրենասիրական բուռն գործունեություն ծավալեց: Երկու տարվա ընթացքում հինգհարյուր ելույթ է ունեցել, չհաշված այն օրերը, որ խաղացել է թատրոնում: Ուրեմն՝ գրեթե օր չի եղել, որ նա զբաղված չլինի: Եվ որ գլխավորն է՝ բեմ էր բարձանում խուպիս համոզված, թե իր, ինչպես մյուս դերասանների, ամեն մի ելույթը մոտեցնում է մեր հաղթանակի օրը:

Ահա այս հոգեբանություն մեջ էր, երբ թատրոնը բեմադրեց «Ռուս մարդիկ» պիեսը և Արուսին առաջարկվեց տարեց մի կնոջ՝ Մարիա Նիկոլաևնայի դերը: Հանձն առավ անտրտունը: Այլևս ոչ հարմար էր, ոչ էլ ժամանակ կար

մտածելու, թե մայրական այդ դերը խաղա՞, թե ոչ: Դա հերթական ներկայացում չէր նրա համար, այլ մասնակցութիւն պատերազմին, երբ վիճարկումը բացառված է և մտածում են միայն ռազմական առաջադրանքը հաջողութեամբ կատարելու մասին:

Առաջադրանքը կատարվեց գերազանց հաջողութեամբ:

Ես զանգահարեցի նրան: Երեխայի պես ուրախացավ: Նկատել եմ՝ որքան արվեստագետը մեծ է, այնքան ավելի սրտագին անմիջականութեամբ ասեմ, թե հրճվանքով է ընդունում գովեստի խոսքեր, անկախ նրանից, թե ով է ասողը:

* * *

Հիվանդանալուց մի շաբաթ առաջ հանդիպեցինք Վարպետի տանը: Շատ մարդ կար: Արուար, չգիտեմ ինչու, սեղանից հեռու էր նստել, առանձին: Մոտեցաւ: Հարցրի, թե ինչ է ուզում խաղալ:

— Ուզում էի,— ուղղեց նա ինձ:

— Ի՞նչ:

— Էլեկտրա:

— Հիմա չե՞ք ուզում:

— Հիմա դրա ժամանակը չէ, իսկ պատերազմից հետո ուշ կլինի: Ծիշտ չէ՞:

Ես ձայն չհանեցի: Կշտամբանքի պես մի բան շողաց նրա աչքերում:

— Եվ դու, Բրուտո՞ս:

* * *

Պատերազմը հաշտեցրեց մեզ մահ հասկացողութեան հետ: Ռազմաճակատից եկող մահվան բոթն անպակաս էր: Լուր էր հասնում, թե մի ամբողջ գունդ է ոչնչացվել: Այսպիսի միջնորոտում, բնական է, որ մահը ցավագին չէր ընկալվում: Անտարբերութիւն չէր դա: Մեկի մահը, թեկուզ և լիներ նշանավոր մարդ, չէր թողնում այնպիսի տպավորութիւն, ինչպես անցյալներում, քանի որ հեռու-հեռում

հազարավոր մարդիկ էին ոչնչանում: Եվ, այնուամենայնիվ, Արուս Ոսկանյանի մահվան լուրը ումբի պայթյունի նման եղավ: Անսպասելի էր ու նման ծանր հարվածի:

1943-ին էր:

Արուսի շողշողուն կերպարը չէր կապվում մահվան հետ: Նա ամբողջապես կյանք էր, վառվռուն մի բոց, որ հանկարծ հանգել էր:

Ով եղել է Արուս Ոսկանյանի թաղմանը՝ երբեք չի մոռանա այդ հուղարկավորությունը: Երևանը մինչ այդ հողին էր հանձնել այնպիսի մեծությունների, ինչպես Կոմիտասն ու Սպենդիարյանը, Շիրվանզադեն ու Աբելյանը և ոչ ոք չէր հիշում այդքան մարդ: Թատրոնի այգուց դուրս եկավ հուղարկավորների հոծ թափորը և թաղման կարգադրիչներն ուզեցին դադաղը տեղավորել կարմրով և սևով պատրաստված մեքենայի վրա: Հուղարկավորներն ընդդիմացան:

— Ժողովրդի դերասանուհին էր նա, թույլ տվեք, ուրեմն որ ժողովուրդն էլ թաղի նրան:

Ռազմիկ Ալավերդյանն էր ասողը, Երևանի Պուլիտեխնիկական ինստիտուտի ուսանողը (որը հետագայում նախագծեց ու կառուցեց Սունդուկյանի անվան թատրոնի նոր շենքը): Նա իր ուսանող ընկերների և ուրիշ երիտասարդների հետ տարավ դադաղը մինչև գերեզմանատուն: Ոչ թե ուսաբարձ, այլ ձեռքերի վրա, գլխից քարձր:

Եվ այդպես, թատրոնից մինչև քաղաքային պանթեոն՝ օրպես մեծագույն պատիվ:

Մանոթ էի, բայց մոտ չէի:

Չկար ներկայացում, որ նա խաղար ու ես չգնայի: Անտարբեր չէի դեպի նրա արվեստը: Հին սեր էր դա, կյանք առած իմ ուսանողական տարիներից: Գուցե դեր խաղացած լինի մի խոսակցություն, որ լսել էի Գրողների տանը: «Ամպրոպի» առաջին ներկայացումների օրերին էր: Հասմիկը կատարում էր Կաբանիխայի դերը, Արուս Ոսկանյանը՝ Կատերինայի: Մի քանի երիտասարդ գրողներ ոգևորված խոսում էին Արուս Ոսկանյանի մասին:

Դեմիրճյանը մի քանի քայլ այն կողմ նստած՝ գիրք էր կարդում:

— Իսկ Հասմիկը, — հարցրեց նա:

— Նա էլ լավ է, — պատասխանեց մեկը առանց խանդավառության:

— Հասմիկը ուրիշ բան է, — ասաց Դեմիրճյանը, մի պահ լռեց ու հետո ինչպես այդ վայել է մեծին, որ կամենում է ճիշտ ուղղություն տալ, նկատեց.

— Ուշադիր եղեք: Իսկական բախտ է այդպիսի դերասանուհի ունենալը: Ճրագով ման գաս՝ չես գտնի:

Ամրացավ իմ սերը: Եվ շատ ուրախացա, երբ ծանոթացա Հասմիկի հետ: Հակառակ իմ ցանկության՝ շփվել մոտիկից, լավ ճանաչել նրան՝ չեղավ: Մանոթությունը մնաց ծանոթություն: Հանդիպում սեղանի շուրջ, հարց ու պատասխան ընդհանուր զրուցի ժամանակ: Այսքան: Ոչ ավելի: Չեմ հիշում ոչ մի երկարատև խոսք ու զրույց միայն նրա հետ: Չեմ կարող բացատրել, թե ինչու, բայց երբ հանդիպում էի նրան, խոսակցությունը մի-երկու խոսքից այն կողմ չէր անցնում: Մի տեսակ՝ չէր ստացվում:

Պա շանդրադարձաւ իմ սիրո վրա: Ու մեր հանդիպումները, իսկական ու բախտավոր, անշուշտ ինձ համար, տեղի էին ունենում մեծ մասամբ թատրոնում, երբ նա բեմում էր, ես դահլիճում: Ամեն անգամ, երբ նա բեմ էր բարձրանում՝ ինձ թվում էի ավելի հարուստ, քան այն ակնկալանքը, որով մտել էի դահլիճ: Երբեք նրա խաղից անբավական չեմ հեռացել: Այդպիսի օր չեմ հիշում: Հասմիկի ամեն մի նոր խաղը նրա մեծության հաստատումն էր:



Հասմիկի կոլտուրան բարձր չէր. նա կարգին կրթություն չէր ստացել, առանձնապես կարդացած չէր, զարգացում չունէր, լեզուներ չգիտէր: Նա այն դերասաններից չէր, որ բեմական արվեստն ուսումնասիրում են դասագրքերով բայց այն եզակի արվեստագետներից էր, որի փորձի հիման վրա, սովորաբար, դասագրքեր են գրվում:

Ինձ զբաղեցնում, կարող եմ ասել տանջելու չափ մտահոգում էր մի հարց: Հասմիկը սիրված էր, ժողովրդականություն էլ ունէր: Այդ ճիշտ է: Բայց նրա ժողովրդականությունը այն չափերը չընդունեց, որին հասել էր, ասենք, Արուս Ոսկանյանը: Արուսը շողշողուն դերասանուհի էր: Այդ անկասկած է, և ես չեմ կամենում նրանց հակադրել: Ամեն մեկն իր տեղն ունի: Բայց այսքանը կասեմ, մեր երկրի շատ թատրոններում եմ եղել՝ ռուսական, ուկրաինական, վրացական, ադրբեջանական, հրեական: Արտասահմանում ես ներկայացումներ եմ տեսել՝ անգլիական, հունական, իտալական, ֆրանսիական, ռումինական: Արուսի նման դերասանուհիների հանդիպել եմ: Ոչ շատ, բայց հանդիպել եմ: Հանդիպել եմ նրանից ավելի զորեղ անհատականություն ունեցողների էլ: Իսկ Հասմիկի նման արտիստուհու, ինչ թաքցնեմ, չեմ տեսել: Ինձ համար Հասմիկը եզակի էր, բոլոր համեմատություններից դուրս: Եվ, այնուամենայնիվ, նրա շուրջը չկար պաշտամունք:

Ինչո՞ւ և ինչպե՞ս բացատրել այդ:

Նրանո՞վ արդյոք, որ մեկը հերոսուհի էր, մյուսը՝ տարիքն



առած մայր: Իհարկե, նաև այս: Երիտասարդության սրտին, անշուտ, ավելի մոտ էին նորան ու Դեզդեմոնան, քան Վիտտիխենն ու Կնիրտտեն: Երիտասարդությունը, մանավանդ աղջիկները, իրենց տեսնում ու գտնում էին, ինչ խոսք, Կատերինայի և ոչ թե Կաբանիխայի մեջ: Ուստի և երիտասարդության վրա թողած անմիջական հուզական տպավորությունը գերազանց Կաբանիխան չի կարող մրցել լավ Կատերինայի հետ: Իսկ թատերական պաշտամունքի հեղինակը երիտասարդությունն է:

Մտածել եմ և այն մասին, որ Հասմիկը չէր շուսվում Արուսի նման, չուներ նրա արտաքին փայլը, չուներ այն հրապույրը, որ ազդում է միանգամից, շլացնում ու տանում իր ետևից, ինչպես, սովորաբար, Արուսի դերակատարումները:

Ինձ միշտ էլ թվացել է, թե Հասմիկի արվեստի պարզությունն ու խորությունը ճիշտ եմ զգացել: Երբեք, սակայն, չեմ կարողացել միտքս արտահայտող մի սեղմ բանաձև գտնել:

Ինձ համար պարզ էր նրա խաղի բնականությունը: Այնքան էր բնական, որ հաճախ, Հասմիկի խաղը նայելիս, ինձ այնպես էր թվում, որ թատրոնում չեմ գտնվում, այլ ակամա մասնակից եմ մարդկային կյանքի մի սրտառուչ պատմության: Թվում էր, փողոցով անցնելիս հետաքրքրությունը գամել է ինձ անծանոթ մարդու բաց լուսամուտի առջև, ու ես, հակառակ իմ կամքի, վկա եմ մայրական խորակսկիծ մի վշտի:

Այդ՝ բնականությունը: Իսկ խորությունը:

Մի ռուս դերասանուհու մասին, եթե չեմ սխալվում՝ Նլանովայի, ասվել է, թե նրա ստեղծագործական ուղին հիշեցնում է ռուսական գետերի խաղաղ ընթացքը, որի խորքում թաքնված է դրսից աննշմարելի մի լարված կյանք: Մտածեցի, որ նույնն է նաև Հասմիկի արվեստը: Բայց, միաժամանակ, մտքովս անցավ, որ մեկի մասին ասվածն ընդհանուր առմամբ կարող է վերաբերել մի ուրիշին: Սա՝ միայն ընդհանուր ձևով: Եվ հետո, մտածում էի, որ վերոհիշյալ պատկերավոր համեմատությունը, որքան էլ դիպուկ, արտահայտում է Հասմիկի արվեստի մի կողմը՝ խորությունը:

ներ: Իսկ պարզութիւնը: Եվ ինչպես հաճախ է լինում՝ որոշողը գտնում է: Այդպես էլ ես: Մի օր, չեմ հիշում թե ինչ ներկայացում էր, Հասմիկի խաղի անմիջական տպավորութեամբ մտածեցի, որ նրա բեմական արվեստը իր պարզութեամբ ու խորութեամբ հիշեցնում է մեր վճիտ գետերը, որոնց հատակի քարերը պարզ երևում են. երբ նայում ես՝ նրանք այնքան մոտ են երևում, որ թվում է, թե ձեռքով կարող ես հասնել, բայց երբ փորձում ես՝ այնքան են խորը, որ ձեռքդ չի հասնում նրանց:

Այդպես է դասական արվեստը: Այդպիսին է, օրինակ, Հովհաննես Թումանյանի պոեզիան: Այնքան պարզ է, որ թվում է, թե դու էլ կարող ես այդպես գրել: Նույնը և Հասմիկի արվեստը: Բայց իսկապես՝ դա արվեստի այն բարձունքն է, որ քչերին է բխտավորվում նվաճել:

Հաճախ է պատահում, որ երբ ստացածդ տպավորութիւնները դեռ չեն բյուրեղացել, չես կարողանում նրանց ընդհանրացած սահմանումը տալ, և հանկարծ այն, ինչին դու հետո պիտի գայիր, արտահայտում է մի ուրիշը: Մի պահ գուցե տխրում ես, որ կանխվել ես, իսկ հետո ուրախանում ես, որ ուրիշն էլ է այդպես կարծում, հետևապես մտածում ես, որ տպավորութիւնդ առարկայական հիմք ունի: Ուրեմն ճիշտ ես: Այդպես եղավ և ինձ հետ:

Թոթովենցը Հասմիկի արվեստը բնորոշելիս գտավ մի համեմատութիւն, որ լավ է արտահայտում այն, ինչ մտածել ու զգացել եմ ես՝ ամեն անգամ Հասմիկին բեմի վրա տեսնելիս:

Ճիշտ է նկատված, որ Հասմիկը առաջին հայացքից չէր նշմարվում, նա հետզհետե, համառ և լայն աստիճանակա-նութեամբ էր համակում ու ենթարկում իր ազդեցութեանը: Այո՛, Հասմիկի արվեստն այնքան պարզ էր, որ առաջին հայացքից աննշմարելի էր, բայց և, միաժամանակ, այնքան խորն էր, որ նկատվելուց հետո երկար ժամանակ չէիր կարողանում ազատվել նրա ազդեցութիւնից:

Թոթովենցն իրավացի էր, երբ ասում էր, թե Հասմիկի արվեստը նման է բնութեան երևույթներին, ինչպես, օրինակ,

արեգակի ծագումը կամ մայրամուտը, ծաղկի բացվելը, դաշտի ծլարձակումը, մրգահասը...

Մեզանից ո՞վ չգիտե, թե որքան գեղեցիկ է արեածագը, բայց այդ ո՞վ է, որ ամեն առավոտ վեր է կենում բնության այդ հրաշալիքին ականատես լինելու: Նույնը և մայրամուտը: Տեղի է ունենում ամեն օր, կրկնվում յուրաքանչյուր երեկո, ուրեմն և որքան սքանչելի, նույնքան և (իհարկե՛ղ՝ դժբախտաբար) սովորական: Քի՞չ է պատահում, որ երկինքը շառագունած է լինում, ինչպես մի մեծ հրդեհ, բայց գնում ենք փողոցով, խոսք ու զրույցի բռնված, մի թեթև հայացք ենք նետում, ի միջի այլոց բացականչում «ի՛նչ գեղեցիկ է» ու անցնում, երբեմն չենք էլ նկատում:

Այդպես է նաև Հասմիկի արվեստը:

* * *

Հիմա հաճախ է խոսվում դերասանական ժամանակակից ոճի մասին: Այդ հասկացողությունը ճշտման կարիք ունի, բայց դա չէ հարցը, այլ այն, որ ինչ ըմբռնվում է դրա տակ՝ պարզություն, կյանքի հավաստիություն, հոգեբանական ստուգություն, զսպվածություն և խստություն-այս ամենը Հասմիկի մեջ կար: Եվ շատ վաղուց:

Հասմիկը ժողովներում ելույթ ունենալու սովորություն չունի: Ոչ էլ սիրում էր հրապարակային հայտարարություններ անել: Ասելիքը ասում էր բեմից: Ասում էր գերազանց: Գիտեր այդ թե ոչ՝ չեմ կարող ասել, ուներ ներքին համոզումներ, որոնցից շեղել նրան՝ հնարավոր չէր:

Մի օրինակ միայն:

Քսանական թվականների վերջերին Արմեն Գուլակյանը բեմադրում է «Պեպոն»: Երիտասարդ ռեժիսորը հափշտակված էր այն ժամանակվա մոդըր ուղղություններով: Իսկ դա, ամենից առաջ, նշանակում էր անվստահություն դասական հեղինակի նկատմամբ: Վերանայված էր տեքստը՝ կրճատումներ, հավելումներ, տեղաշարժեր: Բովանդակալի լրջությունը փոխարինված էր փայլփլուն հնարամտություններով: Ոչ թե կերպարի հոգեբանական բացահայտում, այլ վերաբեմոնք

դեպի նա: Մեղմ ասած՝ շեղում ռեալիստական ավանդներից: Եվ ո՞վ կարող էր ընդդիմանալ: Ռեժիսորի «բռնակալական տիրապետության» տարիներ էին թատրոններում: Ասված է՝ ուրեմն վերջ:

Մի անգամ, շատ տարիներ հետո, խոսք բացվեց Հասմի-միկի մասին, Գուլակյանը, հիշելով «Պեպոյի» բեմադրության ժամանակները, պատմեց, թե ինչպես մի օր, ցերեկով, երբ փորձերն արդեն փոխադրված էին բեմ, դերասանուհուն գտնում է մի դեկորի ծայրին նստած, արցունքն աչքերին: Հարցնում է, թե ինչ է պատահել: Մի այնպիսի ձայնով, ասես հարցը հարազատի կյանքի փրկության է վերաբերում, Հասմիկն ասում է, թե ինքը չի կարող հնազանդվել բեմադրողի նոր մտահղացմանը և խնդրում է թույլ տալ իրեն՝ խաղալու այնպես, ինչպես միշտ խաղացել է: Ռեժիսորն ասում է, որ թեև դա հակառակ է Սունդուկյանին վերանայելու իր, այսպես կոչված, «նորարարական» ծրագրերին, բայց ինքը այնքան էր սիրում նրան, որ չի կարող չզիջել, թեկուզ այն պատճառաբանությամբ, թե նահապետական Շուշանը «վերակառուցման» ենթակա չէ: Իսկ ուրիշները՝ նույնքան փորձված՝ հնազանդվեցին և հաշտվեցին «վերախմբագրված» Սունդուկյանի հետ: Ով տեսել է ներկայացումը, երևի հիշում է, որ Հասմիկի Շուշանը չէր մերվում բեմադրության ընդհանուր մթնոլորտին: Նույնիսկ օտարոտի էր թվում: Շատերն այդ դիտեցին իբրև անհարկի շեղում բեմադրության ոճից, տուրք պահպանողական ավանդներին: Իսկ գալիք ժամանակները հաստատեցին դերասանուհու պատմական իրավացիությունը:

* * *

1952-ին բոլորեց Հասմիկի մահվան հինգերորդ տարեդարձը: Այդ առթիվ թատերական ընկերությունը որոշեց երեկո կազմակերպել: Զեկուցումը հանձնարարվեց ինձ: Ես չբավականացա իմ տպավորություններով, ոչ էլ այն նյութերով, որ կարելի էր գտնել և գտա մեր մամուլի էջերում: Հարց ու փորձ էի անում դերասանուհու արվեստակից ընկեր-

ներին, թե ինչ են հիշում կամ ընդհանրապես ինչ հետաքրքիր բան կարող են ասել իրենց խաղընկերուհու մասին, որին բոլորն էլ շատ էին սիրում:

Զրույց ունեցա նաև Գուլակյանի հետ: Նա ի միջի այլոց ասաց.

— Հասմիկը դերը կենդանի էր պատկերացնում և տեքստը սկզբում նրան խանգարում էր:

Ռեժիսորի ասածը ես գրանցեցի, բայց շանդրադարձա, իսկ հետո մի քանի օր անց, երբ աչքի էի անցկացնում իմ գրառումները, ուշադրությունս կենտրոնացավ այս վկայության վրա: Գուլակյանի ասածը շատ հետաքրքիր թվաց: Հիշեցի, որ նման մի դիտողության հանդիպել եմ այն սբանչելի հոգվածոմ, որ գրել է Լևոն Քալանթարը Հասմիկի մասին: Իսկապես, այդպե՛ս լավ դեռ ոչ ոք չի գրել Հասմիկի մասին:

Ու միտքս հեռացավ Հասմիկից: Թող տարօրինակ չթվա՝ գնաց դեպի Ստանիսլավսկին: Վերհիշեցի Գորչակովի գրքի այն էջերը, ուր պատմվում է, թե ինչպես «սեղանի շուրջ» փորձերից հրաժարված վարպետը, դերապատրաստման մի նոր առաջարկ է անող, խաղալ նույն հոգեվիճակը, սակայն ոչ թե դրամատուրգի, այլ սեփական, ինքնահնար խոսքով: Ամրացնել հոգեկան զգացողությունը և հետո միայն անցնել հեղինակի տեքստին:

Ինչ որ կապ տեսա Ստանիսլավսկու մտահղացման նոր եղանակի և Հասմիկի փորձեկեքսի միջև: Երբ այս մտորումների մասին ասացի Գուլակյանին, նա մի պահ զարմացած նայեց ինձ:

— Ես չէի մտածել այդ մասին:

Նվազապահ հաստատելով ենթադրածիս ճշտությունը, ավելացրեց.

— Ոչ ոք, կրկնում եմ, ո՛չ ոք չգիտեր, թե Հասմիկը ինչ մեծ դերասանուհի էր:

Դերասանուհու մահվան օրից անցել էր հինգ տարի: Վաղարշյանը, որ այն կարծիքի էր, թե Հասմիկը իրոք լավ դերասանուհի է, բայց մենք չափազանցնում ենք նրա արժեքը, պատմեց հետևյալ դեպքը.

— 1933 թվականին էր: Զախավան մեր թատրոնում քեմադրում էր «Եգոր Բուլլըշովը»: Թե ինչպիսի ճշգրիտ դերաբաշխում էր կատարել՝ հայտնի է: Մեկանիայի դերը հանձնված էր Հասմիկին: Փորձերին Հասմիկը ոչ մի տպավորություն չէր թողնում: Զախավան հուսահատվեց: Զգիտեր ինչ անել: Մտածում էր մի ուրիշով փոխարինելու մասին: Բոլորս, որ շատ լավ գիտեինք Հասմիկին, խորհուրդ էինք տալիս ռեժիսորին հապճեպ հզրակացություններ չանել: Երբ վերջին փորձը եղավ՝ գրիմով ու զգեստներով, Հասմիկը իր տարերքի մեջ էր: Իսկ Զախավան անընդհատ կրկնում էր. — Замечательно! Это на грани гениальности.

* * *

Նոսում էինք չափի զգացման մասին: Բորբորվել էր վեճը՝ այն հարցի շուրջը՝ բնածին հատկություն է դա, թե ստացական: Վիճողներից Արաքսմանյանը բերեց Հասմիկի օրինակը: Նա հիշեցրեց «Արշալույսին» ներկայացման այն տեսարանը, երբ Հասմիկի Աննան իմանում է, որ Վահագնին սպանել են: Ոչ մի հառաչանք: Նստում էր խրճիթի կողքին քնկած գերանին: Լուռ նստում էր ու քարանում: Կամեցել են իմանալ, թե դերասանուհին հասկանալով է այդպես խաղում:

Հասմիկը պատասխանել է.

— Մեռելատանը ո՞ր սգավորն է քեզ վրա խիստ ազդում. նա՞, որ գլուխը ծեծելով, ձայնն աշխարհ գցելով իր հարազատի գովքն է անում, թե՞ նա, որ քարացած նստած է դադաղի մոտ և արցունքները հազիվ են երևում աչքերում:

* *

Ո՛չ հաջողությունը, ո՛չ էլ փառքը բարձրամտություն չառաջացրին Հասմիկի մեջ: Սունդուկյանի անվան թատրոնում, ուր նա քառորդ դարից ավելի գործեց, ոչ ոք չէր մտաբերում գեթ մի դեպք, որ նա խուսափեր խաղալուց, ձգտեր քիչ հանդես գալ:

Երբեք ուշացած չէր դա ներկայացման: Շտապողականու-

թյուն չկար նրա մեջ, թեև միշտ անհանգիստ էր լինում ներկայացումից առաջ, նույնիսկ հուզված, առանձնապես նոր բեմադրություն առաջին օրը: Գալիս էր բավական վաղ: Հանգիստ հանում էր վերարկուն, կարգավորում զարդասենյակը, ապա նոր միայն սկսում գրիմը: Շատ հանգիստ, խաղաղ, կարծես դա մի մեծ և հանդիսավոր արարողություն էր: Գրիմ անելիս ոչ ոքի հետ չէր սիրում խոսել, չէր սիրում, երբ իրեն որևէ բան էին ասում կամ հարց տալիս: Այդպիսով, նա, կարծես, կամաց-կամաց դուրս էր գալիս իր առօրյա մթնոլորտից և մտնում կերպարի մեջ: Նույնը և ներկայացումը վերջանալուց հետո, գրիմը հանելու ժամանակ: Չէր շտապում: Դարձյալ հանդիստ էր: Տպավորությունն այնպես էր, որ չի ուզում կամ չի կարողանում հեշտովյամբ հրաժարվել իր ստեղծած կերպարից, դուրս գալ այն մթնոլորտից, որի մեջ էր քիչ առաջ: Տպավորությունն այնպես էր, որ մի առանձին գորովանքով է վերաբերվում դեպի կերպարը, և որից ոչ թե հրաժարվում է, այլ ժամանակավորապես բաժանվում, մի տեսակ պահում նրան, որ հետո մի օր, նորից վերադառնա, կյանք տա նրան:

* * *

Հասմիկի համեսությունը բոլորին լավ հայտնի էր, բայց նա չէր քաշվում հետաքրքրվել, թե ի՞նչ տպավորություն է թողնում իր խաղը: Դա դերասանուհու սովորական փառասիրությունն էր, այլ իր արած գործի կարևորությունը: Նա հասկանում էր, թե ինչ է թատրոնը ժողովրդի կյանքում և իր հաջողությունները գնահատում էր հենց այդ իմաստով: Ես չեմ հիշում նրա որևէ անհաջողությունը: Բայց ճիշտ չի լինի մտածել, որ նա լեդհանրապես անհաջողություններ չի ունեցել: Ունեցել է, ինչպես բոլոր դերասանները: Եվ այդ անհաջողությունները շատ ծանր է ապրել: Ասում են, որ Օզոլի դերում («Դատավճիռ») առանձնապես հաջողակ չի եղել: Դերասանները պատմում են, թե ինչպես, ներկայացումից հետո, երբ բոլորը գնացել են, նա երկար մնացել է բեմում նստած, գլուխը ձեռքերի մեջ առած, շատ երկար ու դառն լաց է եղել:

Թատրոնում «հաթաբալայի» նոր բեմադրության պատ-
րաստման վերջին օրերն էին: Դա 1944-ին էր: Հասմիկը
համափերու առաջին դերակատարն էր: Բայց նա հիվանդանո-
ցումն էր և դրությունը բավական ծանր: Որոշված էր, որ
Աննիկ Մկրտումյանը կփոխարինի, իսկ Հասմիկի լավա-
նալուց հետո կխաղան փոխնիփոխ: Թատրոնի ղեկավարու-
թյունը Հասմիկից գաղտնի էր պահում առաջին ներկայաց-
ման օրը: Անկարելի չէր, որ հիվանդ վիճակում էլ գար խա-
ղալու, իսկ համափերու կատարումը պահանջում էր, բացի
երիտասարդական ավյունից, նաև աշխույժ պար: Դա կարող
էր կյանքին վտանգ սպառնալ: Այդ պատճառով բոլորը՝ և՛
դերասանները, և՛ բժիշկները զգուշացված էին, ամեն միջոց
ձեռք էր առնված, որ հիվանդ դերասանուհին ոչինչ չիմանա:
Բայց, ինչպես սովորաբար լինում է ալկոլիսի դեպքերում,
պատահմամբ նրան հայտնի է դառնում «հաթաբալայի»
անդրանիկ ներկայացման օրը:

Հասմիկը երեկոյան արդեն թատրոնումն էր, իր զարդա-
սենյակում: Բոլորն իրար են անցնում: Գուլակյանը, որ այն
ժամանակ թատրոնի գեղարվեստական ղեկավարն էր և
«հաթաբալայի» բեմադրող ռեժիսորը, զանգ է տալիս հի-
վանդանոց՝ գլխավոր բժշկին՝ պրոֆ. Մելիք Ադամյանին.

— Ինչո՞ւ եք թույլ տվել Հասմիկին թատրոն գալ:

Պրոֆեսորն ասում է.

— Հասմիկի համար խաղալը վտանգավոր է, շա՛տ
վտանգավոր, բայց հիվանդի հետ զրուցելիս համոզվեցի, որ
եթե թույլ չտամ՝ հետևանքը թերևս ավելի ծանր լինի: Գուցե
և ճակատագրական:

Թատրոնում բոլորը տարակուսանքի մեջ էին, թե ինչպե-
սեպ է խաղա, երբ հազիվ է ոտքի վրա մնում: Երբ համ-
փերու մուտքը մոտենում է, խնդրում է օգնել իրեն՝ հասնե-
լու մինչև բեմի մուտքը: Թե բեմը Հասմիկի համար ինչ
կախարդական ուժ ունեի, որ հիվանդ, ուրիշների օգնությամբ
հազիվ տեղ հասնելով՝ նա կրկնապատկված է զգացել իր
եռանդը բեմում՝ անհասկանալի է: Թատերասրահում եղած-

ներից ոչ ոքի մտքով չանցավ, թե իր մոտքով այդքան կյանք, այդքան աշխուժություն բեմ բերած դերասանուհին հիվանդանոցից է եկել:

Բատրոնում եղածներից ո՞վ չի հաստատի, որ Հասմիկն այդ գիշեր իր խաղընկերներից ոչ ոքի չգիշեց, և ոչ նույնիսկ իրեն: Նրա զվարթ, սրտագին ծիծաղը, կարկաչուն խոսքը, նրա պարը, որ լի էր կոլորիտով ու նազանքով, հետաքրքիր և նուրբ անցումները Մարքրիտի վիճակի կապակցությամբ, շողոքորթ ջերմությունը, որով թաքցնում էր սեփական շահի ճարպիկ հետապնդումը,— այս ամենը, ինչպես միշտ, այնպես էլ այդ երեկո, կենդանացրին ներկայացումը, համ ու բույր հաղորդեցին նրան:

* * *

Հասմիկը սիրված էր: Բայց այդ սիրո մեջ կար ինչ որ մի տարբեր բան, որ չենք նկատել ուրիշ անգամներ. կար մի մտերմական զգացում, ինչ-որ յուրահատուկ ջերմություն, որ վերացնում էր դերասանուհու և ժողովրդի միջև եղած տարածությունը և նրանց մոտեցնում իրար:

Դա հաստատում է 1947-ի մայիսի 26-ի ներկայացումը: Այդ օրը թատրոնում Մելիք Քոչարյանի «Հարազատ մարդիկ» պիեսն էր ներկայացվում: Հասմիկը, ինչպես հայտնի է, մոր դերն էր կատարում: Ներկայացումը նոր չէր: Հասմիկի խաղը տեսել էին շատերը և քննադատությունն էլ գնահատել էր բարձր: Այդ գիշեր էլ նա բուրրին հիացնում էր իր նուրբ խաղով:

Հասմիկի մոտքը հաճախ է ծափահարությամբ ընդունվել, ինչպես և նրա խաղը՝ ներկայացման վերջում: Սակայն այն. ինչ կատարվեց այդ օրը, գրեթե չեմ հիշում նրա բեմական կյանքի թեկուզ և վերջին քսան տարում, երբ նա ստեղծել էր իր լավագույն դերերից շատերը: Հասմիկն այդ գիշեր հանգիստ չունեի: Նրան ծափահարում էին անընդհատ, կանչում բեմ նորից ու նորից: Ծաղիկներ էին թափվում բեմ: Սեպտեմբերի Հասմիկը, նույնիսկ փոքր-ինչ շփոթված այդ ընդունելությունից, բայց և շոյված,— այդ երեկո էր նրա

խոնավացած աչքերից,— գլուխ էր տալիս: Մի-փոքր դադարից հետո որոտընդոստ ծափերը կրկին թնդացնում էին դահլիճը, և նորից երևում էր Հասմիկը, մի ձեռքը սեղմած կրծքին, մյուս ձեռքին մեկն այն ճերմակ ծաղիկներից, որ սփռել էին սիրելի դերասանուհու ոտքերի տակ...

Այդ օրվա մեծարանքն ու խանդավառությունը միայն այդ ներկայացմանը չէին վերաբերում, այլ Հասմիկին, նրա ստեղծագործությանն ընդհանրապես: Այդ օրվա հանդիսատեսները ժողովրդի երախտագիտությունն էին արտահայտում սիրելի և հարազատ դերասանուհուն, և թերևս հրաժեշտ էին տալիս՝ զգալով, որ դա Հասմիկի վերջին ներկայացումն է...

Այո, վերջին դերը վերջին անգամ:

Երկու օր է, որ հաճախ եմ հիշում Օլգա Գուլազյանին: Ավելի ճիշտ՝ միտքս նրա հետ է: Ում մասին էլ, որ մտածում եմ՝ Գուլազյանը մտապատկերիցս դուրս է մղում նրան և ինքը զբաղեցնում տեղը: Աչքիս առջև, միմյանց հաջորդելով, անցնում են նրա բեմական մարմնավորումները՝ Նատալիա և Սալոմե, նորից Սալոմե և էփեմիա, Օդուգալովա, Կուկուշ-կինա, Տատիկ:

Ու ես գրիչը ձեռս եմ առնում մտաբերելու մեր ծանոթության մանրամասնությունները:

Առաջին անգամ տեսել եմ Օլգա Գուլազյանին Դեզդեմոնալի դերում: Չեմ կարող ասել, թե ինչպես էր, քանի որ Օթելլոյի դերակատարը՝ Աբելյանը այնպես էր կլանել ինձ, որ ես, բացի նրանից, ոչ ոքի չէի տեսնում:

Հետո տեսա նրան «Համր կին» ներկայացման մեջ ու այլևս չմոռացա: Եվ ոչ թե մեկ, այլ հաճախ, պատահել է այնպես, որ թատրոն եմ գնացել միայն Գուլազյանին տեսնելու մղումով: Եվ այն տեղը, որ իբրև արվեստագետ նա գրավեց իմ մեջ, միայն իրեն է պատկանում, և հետագայում ուրիշ դերասաններից ստացած իմ տպավորությունները՝ ուժեղ, անգամ ցնցող, անկարող եղան տեղաշարժելու կամ նույնիսկ մի հյուլե խլելու նրանից:

Ինձ համար նա ոսկերչուհի էր, ժանյակների ասեղնագործող նուրբ արվեստագետ: Նա թեև առանձնապես կոթովթյուն չէր ստացել, բայց աշխարհ գալով՝ իր հետ բերել էր այն բոլորը, ինչ պետք էր մի իսկական և անկրկնելի արտիստուհու համար: Եվ իր բախտից՝ բնածինը մշակման էր ենթարկվել թատերական մի աշխարհում, որտեղ Սիրանուշն ու Աբելյանն էին ուսուցչապետեր:

Անձնական ծանոթությունս, որքան հիշում եմ, կապված



է նրա հուշերի գրքի տպագրության հետ: Բարեկամական հարաբերություններ հաստատվեցին: Ես հաճախ եմ նրա տանը եղել, մեկ-մեկ էլ ինքն է եկել, երբ, մանավանդ, հիվանդացել եմ ու անկողին ընկել: Համարյա թե չկար նոր-տարի, որ չլինեի իր տանը:

* * *

1941-ին թատրոնը պետք է մեկնեի Մոսկվա: Որոշված էր, թե ինչ բեմադրություններ են տարվելու: Դրանց մեջ էր նաև «Խաթաբալան», որտեղ նատալիայի դերը կատարում էր Գուլագյանը: Թե ինչպես էր խաղում, հայտնի բան է ու երևի հարկ չկա մի անգամ էլ անդրադառնալու դրա գնահատությանը:

Մոսկվայից որպես խորհրդատու հրավիրված էր թատերագետ Իոհան Ալթմանը՝ «Տեսար» ամսագրի խմբագիրը: Նա հերթով դիտում է ներկայացումները և ամեն մի ներկայացումից հետո հավաքում դերակատարներին, հայտնում իր տպավորությունները, դիտողություններ անում, խորհուրդներ տալիս:

Ամեն օր թատրոնում լինելով՝ նա բոլոր դերասաններին և դերասանուհիներին լավ ճանաչում էր:

«Խաթաբալա» ներկայացումից հետո ասում է, որ ինքը բոլոր դերակատարներին գիտե բացի Գուլագյանից, շատ է ուզում տեսնել, թե ով է և հետը ծանոթանալ:

Համարյա վաթսունին մոտեցող դերասանուհին, դժվարանալով է վեր կենում տեղից և ասում.

— Ես եմ:

Թատերագետը, որին բոլորս ճանաչում էինք իբրև կիրթ մարդու, այնքան շփոթվեց, որ չկարողացավ հիասթափությունը թաքցնել:

— Իսկ ես կարծում էի մի քսան, ամենաշատը՝ քսանհինգ տարեկան դերասանուհու կտեսնեմ:

Ալթմանը հետո ասում էր, թե ինքը շատ բան կտար, որ այդ խոսքերն ասած չլինեի: Դերասանները հանգստացնում էին նրան, ասում, որ Օլգան չափազանց գոհ է՝ համարելով դա իր համար բարձր գնահատություն:

Պատերազմի ժամանակ էր: Չեմ հիշում որ թվականը: Կարծեմ 1943-ը: Թատրոնում ներկայացվում էր «էլի մեկ զոհ»: Գուլազյանը Սալումե էր խաղում: Ավետ Ավետիսյանը՝ Սարգիս:

Դահլիճում, որ տեղավորում էր 700-ից ավելի մարդ, զբաղված էր ամենաշատը մի հիսուն ավոտ:

Դերասանները շտապում էին, շտապում էին բոլորը, նույնիսկ Ռուզան Վարդանյանը, որ հայտնի էր բարեխղճությամբ: Խոսք էին կրճատում, նույնիսկ տեսարան և խաղում էին անտրամադիր, որպես ակամա պարտականություն:

Չէին շտապում միայն երկուսը՝ Օրգան և Ավետը: Խաղում էին ինչպես պահանջվում է: Նրանց համար նշանակություն չունենր ո՛չ ժամանակը, ո՛չ էլ, մանավանդ այն, որ դահլիճը սակավամարդ էր: Նրանք խաղում էին այն ներշնչանքով, ինչպես եթե դահլիճը լեփ-լեցուն լիներ:

Սալումեն և Սարգիսը մի տեսարան ունեն: Թե ինչպես կատարեցին Օրգան և Ավետը այդ տեսարանը՝ երկու խոսքով ասելու չէ: Դա փայլուն խաղ էր: Դահլիճը ծափահարությամբ վարձահատույց եղավ իրեն պարզևած բարձրագույն հրճմանքի համար: Բայց ոչ միայն դրա համար: Հանդիսատեսն ընդգծում էր նաև իր հիացումը Գուլազյանով և Ավետիսյանով՝ ի հեճուկս տուն շտապող դերասանների:

Մի-երկու օր հետո հանդիպեցի դերասանուհուն և հաղորդեցի իմ տպավորությունը:

— Շուտ վերջացնենք, շուտ վերջացնենք, սա էր բոլորի բերանին: Չեմ հասկանում, մի՞թե եկածները մեղավոր էին և պիտի պատասխան տային չեկածների համար:

Հետո ավելացրեց.

— Չեմ հիշում մի դեպք, որ Աբելյանը ի միջի այլոց խաղար: Գնում էինք գյուղերը, որտեղ բեմ էլ չկար, թափատերն իրար կողքի դնելով բեմ էին սարքում, երկու սավանից վարագույր ստեղծում և էլի նա խաղում էր այն լրջությամբ, ինչպես Թիֆլիսի Արտիստական թատրոնում:

Բեմադրվեց «Անօփաղը»: Գուլազյանը փայլեց: Խաղում էր Օգուդալովա: Կուկուշկինայից հետո Օստրոսկու կերպարներին երկրորդ գլուխգործոցն էր ստեղծել դերասանուհին:

Մոսկվայից թատերագետներ եկան և հիացան Գուլազյանի խաղով: Բոլորն էլ այն միտքն էին հայտնում, թե Օլգա Նիկոլանան բացառիկ հաջողության է հասել, և նրա խաղը նայելիս մարդու ձեռքերը քոր են գալիս, պահանջ են զգում գրիչ առնելու և գրելու:

Գուլազյանը երեխայի նման յուրախացել էր ու շէր էլ փորձում թաքցնել:

* * *

Մի օր հարցրի Սաթենիկ Ադամյանի մասին: Հիացմունքով խոսեց՝ մարգարիտ էր, մարգարիտ: Նման շէր ոչ մեկին: Գնահատվեց, բայց հասկացող քիչ ունեցավ: Մեկը Օվի Սևումյանն էր: Ափսոս, շատ ավսոս, որ քիչ ապրեց:

* * *

Օլգայի հուշերի գիրքը հաջողութուն բերեց հեղինակին: Եվ նա գոհ էր բնականաբար:

Մի օր նրան հայտնեցի, թե իր գրքին բարձր գնահատական տվեց Ստեփան Զորյանը: Խիստ հաճելի էր լսել անվանի գրողի կարծիքը, մանավանդ որ նախապես ասել էի, թե Զորյանը դժվարահաճ է, հաճախ բոլորից ընդունված հեղինակությունների անգամ չի հավանում:

Թեև Զորյանը հայտնել էր ինձ, որ ինքը մտադիր է գրելու այդ գրքի մասին, բայց իրեն ոչինչ չասացի, մտածելով՝ իսկ եթե հանկարծ չգրի՞:

Անցավ մի երեք ամիս, Զորյանի գրախոսականը լույս

տեսավ: Անմիջապես տարա իրեն, համոզված չլինելով, թե նա հետևում է մեր պարբերական մամուլին: Երկու անգամ կարգաց և ասաց, որ իրեն ավելի լավ նվեր չէր կարելի անել:

* * *

1948-ին «Պեպոն» նորից բեմադրվեց: Գուլազյանը, ինչպես միշտ, փայլեց Եփիմիայի դերում: Սակայն մի բան կար, որի հետ շատ հանդիսականներ չէին հաշտվում. այս բեմադրության մեջ ավելի, քան նախորդ, գոեհկացված էին տանտիրուհու հարաբերություններն իր սպասավորի հետ: Հիմա չեմ հիշում, թե որերորդ ներկայացումն էր, նորից նայում էի և այդ օրը Օլգա Նիկոլակնային տուն ուղեկցեցի: Ծանապարհին իմ զարմանքը հայտնեցի, որ համաձայնել էր այդպիսի մեկնաբանությամբ բեմ բարձրանալ:

— Ծիշտ է, շատ ճիշտ, սկզբից էլ սրտովս չէր, բայց ինչ արած, ենթարկվեցի Գուլազյանի պահանջին: Մի-երկուսն էլ են ինձ նույնն ասել: Ես էլ եմ մտածել այդ մասին, բայց ընդդիմանալու ուժ չգտա մեջս: Վաղը գնալու եմ և խնդրելու Արմենին, որ փոխի:

Մի շաբաթ հետո նշանակված էր դարձյալ «Պեպոն»: Գնացի նայելու երկրորդ արարվածը միայն: Եվ շատ ուրախացա, որ գոեհիկ մի մանրամասնություն հանված էր:

* * *

Զեմ հիշում, թե ինչ երեկո էր Արվեստի աշխատողների տանը, Օլգա Գուլազյանին խնդրեցին մասնակցել:

— Եթե խոսք պետք է՝ սիրով կասեմ, բայց դերից հատված կատարել չեմ կարող:

Մի պահ հետո.

— Զեմ արեւ ու չեմ անի:

Եվ նա այդպես էլ չմասնակցեց երեկոյին: Մի տարի հետո, նույն տեղում կազմակերպվեց իրեն նվիրված երեկո. խնդրեցին հանդիսավոր մասից հետո մի-երկու հատված

իր ընտրությամբ կատարել՝ որ ներկայացումից կկամենա: Հրաժարվեց: Հետաքրքրվեցի, թե ինչն է հրաժարվելու պատճառը:

— Իմ հաջողության գաղտնիքը բնմը դահլիճից բաժանող տարածության մեջ է: Այստեղ բնմն ու դահլիճը իրար քիպ կպած են: Որքան էլ ձայնս զնգուն լինի, ծիծաղս էլ նույնը, հանդիսատեսից չեմ կարողանա թաքցնել թոշնած դեմքս, և շի ստացվելու բեմական ասյն իլյուզիան, որ առաջանում է ներկայացման ժամանակ: Էլ ինչ նատալիա՝ իր նազ ու տուզով:

* * *

Մի շրջան եկավ, որ մեր թատրոնները նյութական ծանր դրության մեջ ընկան: Պետությունից օժանդակություն չէին ստանում, իրենք իրենց էլ պահել չկարողացան: Սուենդուկյանի թատրոնն էլ մյուսների նման պարտքերի մեջ ընկավ: Այդ վիճակից թատրոնը հանելու համար սունդուկյանցիները հրավիրեցին Փափազյանին: Մի ամսվա խաղացանկ վերցրեց իր վրա, թատրոնը պարտքից դուրս բերեց, մի որոշ գումարով ապահովեց առաջիկա երկու թե երեք ամիսն ու մեկնեց:

Մի քանի օր էլ չկար, որ Փափազյանը մեկնել էր:

Թատրոնից մեքենայով տուն են վերադառնում մեր բեմի վարպետներից երեքը և սրանց հետ միասին՝ Օլգա Գուլազյանը: Դրա հաջորդ օրը վարորդն անգգուշություն է ունենում մի դերասանի պատմել մեքենայում տեղի ունեցած միջադեպը, որն անմիջապես տարածվում է թատրոնում:

Մեքենայում սկիզբ է առնում մի խոսակցություն, որի ժամանակ Փափազյանը մի լավ «մշակվում է»: Օլգա նիկոլաննան, որ նստած է լինում վարորդի կողքին, սկզբում լուռ լսում է, հետո տեսնելով, որ իրենց օգնության հասած Փափազյանի շուրջ սկսված անախորժ զրույցը վիրավորական բնույթ է ստանում, դիմում է մեքենավարին և խնդրում կանգնեցնել մեքենան:

— Չեք ամաչո՞ւմ, — դառնում է հետևի նստադասին:

նստած դերասաններին,— ինչեր եք ասում մի մարդու մասին, որ եկավ ու փրկեց բոլորիս. թե տղամարդ էիք՝ չթողնեիք, որ թատրոնն այս վիճակին հասներ: Ձեզ նման անաղուհաց մարդկանց հետ չեմ ուզում մի մեքենայով ճանապարհ գնալ:

Իջնում է մեքենայից ու մնացած ճանապարհը շարունակում ոտքով:

* * *

Մի օր ասաց.

— Հիմիկվա դերասանուհիները փորձերին հաճախում են անկանոն, ներկայացմանն ուշ են գալիս, վերջում էլ շտապում են...

Պատմեց, թե ինչպես մի օր ինքն ու Ռուզան Վարդանյանը, որին, ի դեպ, շատ սիրում էր ու գնահատում, գնացել են թատրոն փորձի:

— Գիշերն անձրև էր եկել, ամբողջ գիշերը: Ես ու Ռուզանը ճանապարհ ընկանք և ի՛նչ տեսներք՝ անձրևաշուրը փողոցները գետի նման բռնել է չափանք այգի և մնացինք շվարած, թե ինչպես պիտի հասներք թատրոն: Մտքներովս չանցավ, թե կարող է հենց այդ պատճառով մարդ եկած չլինի: Իրար նայեցինք, բոպիկացանք և այգուղու եզրերին դրված նստարաններին մեկ ելնելով, մեկ իջնելով, հասանք տեղ ու պարզվեց, որ ոչ ոք չի եկել: Բայց տեղ հասանք: Գալն ավելի հեշտ էր, քան ետ գնալը: Բայց ինչ արած, քողփողման, նույն ձևով, նստարանների վրա բարձրանալով և իջնելով՝ հասանք փողոց, հետո էլ՝ տուն:

* * *

Մի օր խոսեց երկու դերասանի մասին:

Հովհաննես Աբելյանը, Օլգա Նիկոլաևնայի ասելով, մի հաստաբուն կաղնի էր, որի հովանու տակ ապրում էին մյուս դերասանները: Մեծ արվեստագետ էր և լավ էլ մարդ, աղա մարդ:

Ասաց, որ իր վրա անջնջելի տպավորություն է գործել
Հովհաննես Զարիֆյանը: Մինչև դերասան դառնալը կոշկա-
կար է եղել, պետք էր տեսնել, թե ինչպիսի արքայազն էր
«Համլետում»: Ոչ մի դերասանի չի հաջողվել դերից-դեր
այդպես փոխվել, ինչպես Զարիֆյանին: Ո՞վ կմոռանա նրա
Տոկերամոն: Իսկ որպես մարդ ոչ ոք չէր հասնի, ոսկի հոգի
ունեիր:

Հարցրի Փափազյանի մասին:

— Փափազյանը հրաշք է, ինչպես հրաշք էր Սիրանուշը:
Չեմ հավատում, որ մեկ էլ Սիրանուշ կամ Փափազյան
աշխարհ գան, բայց ով իմանա, մեկ էլ տեսար... ո՞վ կսպա-
սեր, որ Աղամյանից հետո Փափազյան կդա:

* * *

Լույս էին տեսել «Թատերական դիմանկարները»: Երեք
դիմանկարներից մեկը նվիրված էր Օլգա Գուլազյանին:
Իհարկե, մի օրինակ տարա իրեն: Հաջորդ օրը զանգահարեց:

— Ճիշտ ես վարվել, որ մի-երկու տեղ էլ քննադատել ես:
Զարմացա, չէի սպասում, որ դերասանն այդպիսի խոսք
կասի:

Բացատրեց:

— Երբ քննադատություն կա, ընթերցողն ավելի է հավա-
տում գովեստին:

* * *

Մի օր էլ զանգահարեց «Սիրանուշի» առիթով և ասաց,
թե ինքը շնորհակալություն է հայտնում մեծ արտիստուհու
բոլոր խաղընկեր դերասանների անունից:

Գովեստի մի-երկու խոսք ասաց, ինչ որ ընդունված է
նման դեպքում ասել: Հետո ափսոսանք հայտնեց, որ չեմ
տեսել Սիրանուշի խաղը:

— Սիրանուշը մի ամբողջ դպրոց էր իր ժամանակվա դե-
րասանների համար: Նայիր և սովորիր: Խաղալ այնպես,
ինչպես նա էր խաղում, հնարավոր բան չէր: Եվ ոչ ոք չէր

համարձակվում, բոլորն էլ հասկանում էին, որ դրա համար պետք է Սիրանուշ լինել: Բայց շատ բան կարելի էր սովորել: Ու սովորում էին, ով ինչքան կարող էր:

* * *

1956-ին թատրոնը պետք է մեկնեի Մոսկվա՝ մասնակցելու հայ գրականության և արվեստի տասնօրյակին: Հայտնի էր, որ տասնօրյակից հետո մասնակիցներին տիտղոսներ են տրվելու և շքանշաններ: Օլգա Գուլազյանը համոզված էր, որ ինքը կստանա Սովետական Միության ժողովրդական արտիստուհու կոչում: Ուրիշներն էլ էին սպասում: Բայց շատացավ: Չստացավ նաև հետո, ու ամեն անգամ, երբ մեր թատրոնից մեկն ու մեկն արժանանում էր այդ բարձրագույն տիտղոսին, նրան թվում էր, թե իրեն հասնող փառքին մի ուրիշն է տիրացել:

Նս, և ոչ միայն ես, չէինք հասկանում, թե ինչու է դերասանուհին զրկվում մի պատվից, որին արժանի էր վաղուց և առաջիններից: Նպատակ ունենալով մեղմել արտիստուհու հոգում կուտակվող դառնությունը և ընդհանրապես կամենալով հանգստացնել, ասում էի, թե ինքը մեծ վաստակ ունի, արդեն համարվում է կլասիկ, որին հետևում են, որից ազդվում և սովորում են երիտասարդ դերասանուհիները, հետևապես ունի այդ կոչումը թե ոչ՝ նշանակություն չունի:

Վրդավմունքն այնքան մեծ էր, վիրավորանքն այնքան խոր, որ չէր հասկանում իմ ասածը, բարկանում էր, նույնիսկ կարծում, թե ես կասկածի եմ ենթարկում այդ կոչմանն իր արժանի լինելը: Նա գտնում էր, որ այդ հարցի շուրջ իր հետ զրուցելիս ես պետք է ոչ թե հանգստացնեմ իրեն, այլ միանամ իր դժգոհությանը, իր բողոքին և, որ գլխավորն է, հաստատեմ, որ եթե այսինչ կամ այնինչ խանգարողները չլինեին, անպայման կստանար:

Մինչև իր կյանքի վերջն էլ հույս ուներ, թե ուր որ է՝ ստանալու է: Մաշող մի վիշտ էր դա, որ հյուծեց նրան, անկողին գցեց: Ու նա, որ հեռու էր հավակնոտ լինելուց, համեստ էր շատ ավելի, քան իմ ճանաչած դերասաններից

որևէ մեկը, նա, որ քչով բավարարվող էր, մի սրտագին խոսքից ուրախացող և խանդավառվող, այս մի դեպքում չխաղաղվեց և մնաց դժգոհ ու բողոքող: Ավելին. նա մեղավոր համարեց բոլորին՝ և՛ հեռու մարդկանց, և՛ իր մտերիմներին, համոզված, որ շարվեց անհրաժեշտը՝ արդարությունը վերականգնելու համար:

* * *

«Ծառերը կանգնած են մահանում» բեմադրությունը, որտեղ նա Տատիկի դերն էր կատարում, Գուլագյանին բերեց մեծ հաջողություն:

Ոչ միայն դահլիճի բուռն ծափահարություն: Ոչ միայն հիացմունքի խոսքեր մամուլում: Այս բոլորի հետ միասին՝ նաև հեռախոսային զանգեր, շնորհավորանքներ: Շատ ուրախ էր ու մանրամասն հաղորդում էր, թե ով ինչ ասաց:

Ես հասկանում էի, որ այս ուրախության մեջ մի ինչ-որ տարբեր կողմ կար Օգուդալովայի ժամանակվա ուրախությունից: Ինձ թվում էր, որ այդ ուրախության մեջ կար ընդդիմացում առաջացող տարիներին: Նա համոզված էր, որ ինքը կարողանում է ստեղծագործել՝ նշանակում է դեռ չի պառավել: Ոչ թե ընդհանրապես: Դա նրան չէր հետաքրքրում: Այլ բեմի համար, թատրոնի համար:

* * *

Տատիկի դերը կատարելու հրավիրվեց Վերիկո Անջալարիձեն: Ինքը վրացերեն, մյուսները՝ հայերեն:

Առաջին արարվածից հետո բեմ եկան շատ դերասաններ և Օլգա Նիկողլանյան ողջունեց վրաց արտիստուհուն:

— Հիմա հանգիստ կնայեմ խաղը, — ասաց ու գնաց օթյակ:

Ներկայացումը վերջացավ: Օլգա Գուլագյանը շտապեց կուլիսները, խնդրելով իրեն մենակ շփողնել: Վերիկոյով հիացած երկրպագուները, որ շրջապատել էին նրան, տեսնելով զարդասենյակ մտնող Օլգա Գուլագյանին, անմիջապես մի կողմ քաշվեցին:

Օլգա նիկողաևնան մի-երկու խոսքով իր հիացմունքը հայտնեց և համբուրեց արվեստակից ընկերուհու ճակատը։ Վերիկոն բռնեց Օլգայի ձեռքը և ասաց.

— Եթե ձեզ տեսնելուց հետո ինձ հավանում են, ես ինձ հպարտ եմ զգում. իմ հայ բարեկամներն ասել են, թե դուք ի՞նչ հաջողության եք հասել այս դերում։

Եվ ծոռիկի գալով՝ համբուրեց Օլգա Գուլազյանի ձեռքը։

— Ապրես, որդի, թող ավելի բարձրից փայլի աստղդ։ Ասաց վրացիներն ու դուրս եկավ։

* * *

Հիվանդ էր Գնացել էի տեսության։ Հարցրի, բժիշկ կանչե՞լ են, թե չէ, ի՞նչ է հիվանդությունը։

— Ինձ ոչ մի բժիշկ չի օգնի։ Հավատա, եթե բեմ բարձրանամ՝ կլավանամ։

Լռեց մի պահ և հետո ավելացրեց.

— Ասում են՝ «հիվանդ ես» ու չեն թողնում։ Էսպես էլ բան կլինի. ես փորձ ունեմ, բեմն ինձ օգնում է, ինչպես ոչ մի դեղ։ Ոտս դնում եմ բեմ՝ տաքությունս էլ է անցնում, դողս էլ ու տուն եմ դառնում բոլորովին առողջացած։ Ասում եմ, ասում, չեն հավատում։ Տեսնում եմ, դու էլ չես հավատում։

* * *

«Բրուդրի ամբոցի» Տատիկը Օլգա Գուլազյանի վերջին դերն էր։ Խոսքը քիչ էր, թեև բեմում բավական շատ էր լինում։ Բեմադրող ռեժիսորը, հասկանալով, թե դարասանուհին ինչ դժվար կացության առաջ է կանգնած, առաջարկեց նրան սեղանի մոտ նստած լինել, մեծ մասամբ մեջքով, ուտելիս հատկապես, մանավանդ, որ ըստ պիեսի տատիկը ուտելու չափազանցված հակում ունի։ Սրա վրա էլ Օլգա Գուլազյանը կառուցեց դերի բնավորությունը՝ որկրամոլ։

Եվ զարմանալի, շատ զարմանալի տպավորություն. հանդիսատեսի ուշադրությունը կենտրոնացած էր Տատիկի վրա.

Թեև դրամատիկական գործողությունն առաջ մղելու կողմից նրա դերը մեծ չէր: Խոսքի պակասը հանդիսատեսը չէր զգում: Դերասանուհու մեջքը այնպես էր արտահայտում Տատիկի բնավորությունը, որ խոսքի կարիք չկար:

Օլգա Գուլազյանի վերջին հաղթանակներից էր սա: Դա մի ճակատամարտ էր, որ նա շահեց յոթանասուներեք տարեկան հասակում: Թե որքան էր աշխատել ու ինչպես, ինչ հայտնի չէ, փորձերին չեմ եղել, բեմադրող ռեժիսորին՝ Գրիգոր Մկրտչյանին, չեմ հարցրել, բայց ներկայացման ժամանակ նրա խաղն ուներ այն բնական թեթևությունը, որով նա միշտ է աչքի ընկել երիտասարդ տարիներին՝ ո՛չ մի ջանք, ո՛չ մի լարվածություն:

* * *

Թատրոնի նոր շենքի բացումն էր:

Դերասանական ամբողջ խումբը բեմի վրա էր: Կենտրոնում Օլգա Գուլազյանն էր, նրա երկու կողքից՝ Վահրամ Փափազյանն ու Մարտիրոս Սարյանը:

Շատերը խոսեցին: Խոսեցի նաև ես: Ու իմ խոսքում ես տվի նախ Սարյանի և Փափազյանի անունները, որպես հայ արվեստի հսկաների, որոնց ներկայությունն իսկ արդեն զարդարում է բացումը: Դահլիճում բուռն ծափահարություն բարձրացավ: Ու հետո տվի Գուլազյանի անունը: Նորից ծափահարություն: Եվ այլևս ոչ մի անուն:

Հանդիսավոր նիստից հետո մոտեցավ Օլգա Գուլազյանն ու ասաց, որ իր կյանքի երջանիկ օրերից է սա, գուցե ամենաբախտավորը:

Ու հետո բացատրեց.

— Առաջին անգամն է, որ հայ թատրոնն իր համար կառուցված շենք ունեցավ:

Ու հիշեց, թե ինչպես Գեորգ Տեր-Դավթյանը իր հոբելյանին, երբ իրեն խոսք են տվել, ասել է թե մի երազ ունի, այնքան ապրի, մինչև հայ թատրոնն իր շենքն ունենա ու ինքն էլ խաղա նրա բեմում:

Պատմեց ու հետո ավելացրեց, թե ինքն իրեն շատ

հպարտ էր զգում, որ ամբողջ երեկոյի ընթացքում նստած էր Սարյանի ու Փափաղյանի նման մեծությունների կողքին: Երբեք չի մտածել ու հիմա էլ չի կարծում, թե ինքն արժանի էր դրան:

Եվ ավելացրեց.

— Այդտեղ պետք է Սիրանուշը նստած լիներ:

* * *

Թեև ութսունն անց էր, բայց չէր պատկերացնում, որ այլևս բեմ չի բարձրանալու: Թատրոնից դուրս կյանք չունեիր:

Մի օր ասաց.

— Էլ ինչի՞ եմ ապրում...

* * *

Օլգայի տանն ապրում էր մի աղջիկ, որը տուն-տեղ չունեիր, ուրիշ քաղաքից էր եկել և դերասանուհին նրան տեղ էր տվել իր տանը:

Աղջիկը թատրոնի հուշարարն էր, ուրեմն՝ լավ տեղյակ թատրոնի անցուղարձին: Գուլագյանը չէր քնում և սպասում էր նրա գալուն՝ գիշերվա ինչ ժամ էլ լիներ: Եվ չէր թողնի քնել, մինչև չպատմեր, թե ինչ կա-չկա թատրոնում:

Ասում էր, թե ընդօրինակելու ընդունակություն ունի այդ աղջիկը, մեկ-մեկ օրվա ներկայացումից տեսարաններ է խաղում՝ դրամատիկ, կոմիկական, բավական հաջող վերարտադրումով ու ինքը առնում է թատրոնի կարոտը:

Հետո այդ աղջիկը քուն է մտնում, իսկ իր աչքերին քուն չի գալիս: Ինքը փակում է աչքերը և մտքով տեղափոխվում թատրոն և իր հայացքի առաջ գալիս անցնում են անցած-գնացած ժամանակները:

— Ինչ չէի տա, միայն թե հին օրերը վերադառնային՝ փառք, լավագույն դերակատարումներ, ամեն ինչ, ամեն ինչ կտայի, միայն թե նորից սկսվեր, միայն թե մի անգամ էլ ապրեի նույն կյանքը:

Նա ժամանակին գրառումներ չեմ արել և այժմ, ուշ գիշերին թղթին հանձնեցի այն, ինչ միտս եկավ:

Գրում եմ ու հիշում, որ վերջին տարին, քիչ էի լինում իր մոտ: Նվ նա գանգատովում էր:

— Մոռացել ես ինձ, ուրիշներն էլ են մոռացել, պառավիս մենակ եք թողել իր ցավերի հետ:

Այդ ուրիշներից մեկը Սարգիս Բայանդուրն էր, մյուսը Միքայել Ալեքսանդրյանը: Ուրիշ ուրիշներ էլ կան, անշուտ, բայց ես հիշում եմ այս երկուսին, որովհետև մի քանի անգամ նա մեզ միասին է հավաքել իր մոտ և կենցաղային, համարյա անլուծելի, խնդիրներ դրել մեր առջև: Ու նա զարմանում էր, որ մենք իրեն օգնելու համար գործնական քայլերի չենք դիմում:

Երևի խոսափելու մի պատճառն էլ դա էր: Ուրիշ պատճառներ էլ կային: Մարդ չուզենա, թե չէ միշտ էլ իրեն արդարացնող պատճառներ կգտնի: Իհարկե՝ անուշադիր գրտնովեցի: Գտնվեցինք: Ու բոլորիս հոգու վրա մի մեղք կա ծանրացած: Ու ես չգիտեմ, խոստովանությունն այս բերո՞ւմ է մեղքի քավում, արդյոք: Բայց գիտեմ և համոզված եմ, որ նրա մասին գրվող այս էջերը թերևս հիմք տան «մեղմացուցիչ դեպք հանցանացի»...

Մեղքը մնում է մեղք...

Մահը դժբախտություն լինելով, բերում է իր հետ կորցրած արժեքի դիտակցություն: Նվ դա էլ հենց մեծագույն սփռփանք է:

Ինձ հաճախ է զբաղեցրել մի միտք, ինչպես պատահեց, որ մի կիսագրագետ կին, ծխական դպրոցի երկու թե երեք դասարանի կրթություն հազիվ ստացած արվեստի բարձրերը հասավ: Ինչ խոսք՝ բնածին տաղանդի շնորհիվ: Բայց ոչ միայն. և անդադրում աշխատասիրության, իհարկե: Երևի այդքանը բավական չէր լինի, եթե օժտված չլիներ մի եզակի

ընդունակությամբ ևս, որը ևս անվանում եմ ուղենալ: Ոչ
թե կրավորական ցանկության մասին է խոսքը, այլ գործուն:
Ուղենալու կամք: Դա այն ընդունակությունն է, որ շատ
քչերին է վիճակվում: Այդ ընդունակության տերը միշտ մի
բանի հասնում է: Իսկ եթե ուղենալու ընդունակությանը
միանում է նաև բնությունից տրված ձիրքը, մարդը հասնում
է այնպիսի բարձրության, որի մասին երազել իսկ չէր կա-
րող:

Այդպիսի արվեստագիտուհի էր Օլգա Գուլազյանը:

Շատերը գիտեին նրան: Ավելի ճիշտ ո՞վ չգիտեր: Բայց եթե չիմանային էլ, ու նա անցներ փողոցով՝ անմիջապես ուշադրություն կդարձնեին: Մեծություններ կան, որոնց հանդիպելիս, եթե չիմանաս ով է՝ չես նկատի: Բայց երբ ասում են ով է՝ սկսում ես մեծությունը հաստատող նշաններ գտնել նրա մեջ: Նախապաշարման ուժն է դա: Եվ թվում է ինձ, թե դրա մեջ տարօրինակ բան չկա: Հրաշյա ներսիսյանը, սակայն, այնպիսի արտաքին ունեեր, որ եթե մարդ չիմանար էլ նրան, միևնույն է, անպայման ուշադրություն կդարձներ: Նա անմիջապես ջոկվում և տարբերվում էր շրջապատից: Նրա արտաքին ընդհանուր պատկերի և ամեն մի շարժման մեջ նշանակալիություն կար:

Հիմա էլ իմ աչքի առջևն է նա:

Քայլում է փողոցով՝ ձեռքերը մեջքին դարսած, գլուխը վեր, քայլը՝ հանգիստ: Հանգիստ ու հանդիսավոր: Եվ անկախ նրանից՝ Աբովյանով իջնում էր դեպի Թատրոն, թե հակառակը՝ բռնում Նորքի ճանապարհը, նա բարձրանում էր: Նա քայլում էր շրջապատից կտրված, վերացած: Ո՛ւր էր գնում, գուցե ինքն էլ չգիտեր, բայց բարձրանում էր, գնում էր դեպի վեր: Շուրջը երևանյան աշուն, վերը՝ անամպ կապտություն, իսկ ոտքերի տակ ծառից նոր ընկած, դեղնած, խշխշան տերևներ...

Միշտ այն տպավորության եմ եղել, թե նրա մեջ ապրում է միայնության մի թաքնված սեր: Եվ մեն-մենակ քայլելը կարծես իր կյանքի սիրելի պահերից էր: Մարդիկ ասես զգում էին այդ, և չնայած արտիստի պարզ ու հասարակ բնավորությանը, հաճախ մնում էին տարածություն վրա, ասես չկամենալով խանգարել, ընդհատել սկիզբ առած մի կյանք, որտեղ նա ամեն ինչ էր՝ մերթ իսկապես արքա, որին թվում

է, թե ամեն ինչ ենթակա է իրեն, մերթ իրեն չվստահող մի հուսահատ անձ, որը տանջվում է այն բանից, որ ոչ ոք չգիտե, թե ինչեր են անցնում իր մտքով: Ու այդ պահերին է, որ նա, այդ մեծ արտիստը, բացի իրենից ներում էր բոլորին՝ հանդիսատեսին, որ, սիրելով իրեն, քիչ արածը շատ է համարում, և արվեստակից ընկերոջը, որին հայտնի չէ «կամենալու» և «կարենալու» իրեն այնքան ծանոթ դրաման: Ներում է բոլորին, բոլորին նայում հաշտ աչքով, մերձավորի այն սիրով, որ, հայեցողությունից ավելի չլինելով՝ պարտադրում է լուռ մնալ, ձայն չհանել, թողնել նրանց երջանիկ ինքնախաբեկության մեջ:

Քիչ էր խոսում: Գուցե և զգում էր սիրտը բանալու պահանջ, դրան անսովոր մարդու կյանքում հազվագյուտ էին այն պահերը, երբ բացվում էր լիասիրտ:

Սա սիրել էմ նրան, թեև շատ մոտ չեմ եղել: Եվ ամեն մի հանդիպման, որ շատ չեն եղել, նա երևում էր ինձ, ճիշտ է, մի փոքր հակասական, երբեմն նույնիսկ խճճված, բայց իսկապես հետաքրքիր, անհամեմատ հարուստ նկարագրով, բան թվացել է մինչ այդ:

Նրբ արտիստն իսկապես մեծ է՝ մարդիկ հետաքրքրասեր են դառնում նրա կյանքի նկատմամբ, ուզում են իմանալ ամեն մի մանրամասնություն:

Հրաչյայի մասին պատմելը նրան ճանաչողների պարտքն է:

Արտիստի բնավորության բոլոր կողմերի կամ նրա հոգեկան աշխարհի ամբողջական, ավարտված պատկերը գծելու հավակնություն չունեմ ես: Սրանք բեկորներ են միայն:

Բացում եմ «Հրաչյա Ներսիսյան» թղթապանակը: Տարբեր չափի թղթերի վրա զանազան ժամանակ արված գրառումներ: Մեծ մասամբ մատիտագիր, շտապ գրված, որ չլինի թե մնան վաղվան ու մոռացվեն:

Սա հանում եմ առաջին պատահած թերթիկը ու կարդում...


1955-ի հոկտեմբերն էր: Ամսվա առաջին օրերը: Պետք է նշվեր Հրաչյա Ներսիսյանի ծննդյան 60-ամյակը: Որոշված էր թե երբ՝ նոյեմբերի 12-ին, իր ծննդյան ճիշտ օրը: Զեկու-

ցողի պարտավորվածութեամբ պետք է քնայի իր մոտ, կենսագրական մի քանի փաստ ճշտելու համար: Պայմանավորվեցինք հանդիպել:

Մենակ չէի: Ուղեկցեց ինձ Նշան Մուրադյանը, որը նրա մոտ հաճախ էր լինում: Ներկա էր նաև դերասանի ավագ որդին՝ Լևոնը: Սկզբում զրույցը տարբեր ու պատահական հարցերի շուրջն էր: Ես չէի խոսում, լուռ լսում էի, նայում Հրաչյային: Նայում էի ու մտածում, թե կնճիռներով պատած այս դեմքը գեղեցիկ է, թե ոչ: Զգիտեի: դժվարանում էի հարցիս պատասխան տալ: Բայց գիտեի, և հաստատ, որ այդ դեմքը հմայում էր ինձ: Ի՞նչ: Իսկ ո՞ւմ չի հմայել, չի ձգել դեպի իրեն: Երևի սխալված չեմ լինի, եթե ասեմ, որ ավելի հմայիչ դեմք չեմ տեսել: Միաժամանակ՝ արտահայտիչ: Գեղեցկության դասական ըմբռնումները խառնվում էին և ընկրկում մի ցանկություն առաջ՝ հասկանալ նրա արտաքինի «ձգողության», նրա հմայքի գաղտնիքը: Կնճիռներ... մի ուրիշի դեմքին ծերություն են վկայում, իսկ Հրաչյայի դեմագծերին նրանք հաղորդում էին կամք և ուժ: Դեմքի առնական արտահայտությունը մեղմում էր աչքերի կապույթյան արտահայտում էին մի ամբողջ կյանքի պատմություն:

Ասում են՝ աչքերը հոգու հայելին են: Եթե այդ ճիշտ է, ապա Ներսիսյանի աչքերը վկայում էին հոգեկան այն հարստությունը, որ ամեն անգամ բերում էր իր հետ արտիստը՝ բեմ ելնելիս:

Տարօրինակ երևույթ, որ ակամա մղում է դեպի պարադոքսալ մի միտք: Ներսիսյանի աչքերը կյանքում իրոք որ կապույտ էին, իսկ բեմում՝ ուրիշ: Կապույտ էին, երբ նա խաղում էր, անտարբեր լինելու շափ հանգիստ, իսկ բեմում նրա աչքերն այլ էին, համենայն դեպս՝ ոչ կապույտ: Դժվար էր որոշել գույնը: Կարելի՞ է նկարագրել այն գույնը, որ առնում է ծովը, երբ փոթորկված՝ զարկվում է ափերին: Այդ ի՞նչ գույն է՝ կապույտ՝ երբեք, կանաչ, ոչ միայն, գորշ՝ ամենեին: Ուրեմն՝ ի՞նչ գույն է. այնուամենայնիվ, գուցե և՛ մեկը, և՛ մյուսը: Եվ որովհետև Ներսիսյանը հաճախ էր բեմում փոթորկահույզ վիճակներ ապրում, ապա նրա



աչքերը ցոլում էին, ցողում էին, փայլում, գույն տալիս, գույն առնում, ասես նույնիսկ գունափոխ էին լինում, մեկ մռայլվում էին, ինչպես ահեղ ծովը գիշերով, մեկ՝ մաքրվում, դառնում ջինջ, ինչպես պայծառ առավոտ:

Խաղընկերները կհաստատեն, որ ամեն մի նոր դերում Ներսիսյանը նրանց նայել է բոլորովին այլ աչքերով: Փոխվել է ներքինը, ներքինի հետ փոխվել են և աչքերը:

Չեմ հիշում, թե որքան ժամանակ էր անցել, երբ վերջապես անդրադարձանք գալուս նպատակին: Եվ իմ կատարելիք առաջին իսկ ճշտումը աշխույժ ծիծաղի առիթ տվեց:

Պարզվեց, որ դեռևս մի քանի տարի կա Ներսիսյանի վաթսուև տարին լրանալուն: Մեջտեղ եկավ մի աղոթագիրք, լույս տեսած ավելի քան հարյուր տարի առաջ՝ 1849-ին, որի վրա ծնողների ձեռքով գրված էր՝ «Մնունդը Հրաչյայի», Տարին՝ 1898: Ամսաթիվն էլ կար, նույնիսկ ծննդյան օրը և ժամը՝ հինգշաբթի օրը, ժամը ճիշտ վեց և կեսին:

— Չգիտեմ, թե ինչպես է ստացվել, բայց անձնագրով արդեն վաթսուև տարեկան եմ:

Այնուհետև անդրադարձավ իր կյանքի պատմությանը, խոսում էր կցկտուր, հիշածն անմիջապես ասելով:

Պարզվեց, որ Դանիել Վարուժանն է եղել իրենց հարեվանը, և հաճախակի հյուր՝ նրանց տանը: Կոմիտասի հետ հեռավոր ազգակցական կապեր է ունեցել, մայրը հիվանդ ժամանակ խնամել է նրան:

— Իմ ծննդյան օրը ջինդենենիոյների տանը հարսանիք կար. երբ ես ծնվում եմ, ասում են, որ տղան քյանդրբապ պիտի լինի: Էդպես էլ եղավ:

Ասում էր ու ծիծաղում:

Խոսք բացվեց Սևումյանի մասին:

— Ուզում էր մի ամբողջ խումբ բերել Կովկաս: «Թագավորը» պատրաստեց: Հետո «Հո» երթասը: Մարկոս էի խաղում: Ուզում էր բեմադրել «Դատաստանը»:

Եվ հետո.

— Սևումյանի վերջին օրը մոտն եմ եղել: Նրա պատվերով գնացի Պերա և բերի Մեհրաբյանի կնոջը, որ տավիղ էր նվագում: Նա նվագում էր, իսկ Օվի Սևումյանը սուլում: Շատ լավ էր տուլում:

Հարցրի, թե երբ է սկսել իր բեմական կյանքը:

— Սկսել եմ որպես երգիչ: Պոլսում գործում էր Պենկլյան-նի օպերային թատրոնը: Նրա խմբում երգում էի: Լավ ձայն ունեի: Մի օր, չեմ հիշում ինչ ներկայացում էր, ինձ գտավ Ջանանը: Ջանանը, Տրդատ Նշանյանը և ուրիշները, հիմա չեմ հիշում, թե ովքեր, 1918-ին հայկական դրամատիկն էին ուզում կազմել: Ես էլ միացա նրանց: Պատրաստում էինք «Նամուսը»: Ինձ հանձնարարված էր հարբած հյուրերից մեկի դերը: Ահա այդ ներկայացման հետ է կապված առաջին հաջողությունս: Մի զավեշտական պատմություն է դա, որ առանց ծիծաղի չեմ կարողանում հիշել:

Մի պահ լուռ մնաց՝ շրթունքները փնջելով:

— Ներկայացման օրն էր: Հարսանիքի տեսարանը սկսված էր արդեն: Հագիս կովկասյան զգեստ էր՝ ճեմակ չերեքզկա, գլխիս էլ մի փափախ, թեք դրած, արծաթե դաշույնը գոտկիցս կախ: Մի երկու խոսք ունեի, այն էլ տեսարանի վերջում: Մինչ այդ ազատ էի, ինչ ուզում էի՝ այն էլ անում էի: Հայտարարվել էր, որ հարսանիքի տեսարանում լինելու են կովկասյան պարեր: Հրավիրված էին հատուկ պարողներ, եթե չեմ սխալվում՝ Կովկասից նոր եկած: Երաժշտությունն սկսվել էր, իսկ պարողները չկային: Ես այդ պահին բեմի ետևումն էի: Ջանանը փրփրած շափում էր կուլիսները, ետ ու առաջ էր գնում, չգիտեր ինչ աներ: Մեկ էլ մոտեցավ ինձ, թե՛ զնա պարի: Ասեցն ու բեմ հրելը մեկ եղավ: Ճիշտը որ ասեմ՝ բեմում հատկացա, թե ինչ էր նրա ուզածը: Բայց էլ ինչ, հակառակվելու տեղ չկար: Հենց որ հայտնվեցի, բեմում եղած հարսանեկան բազմությունը, որ մինչ այդ խռնված էր, ասպարեզ բացեց ու ինձ առավ իր շրջանակի մեջ: Երբեք կովկասյան պար պարած չկայի: Մի օր փորձին տեսել էի, այն էլ ի միջի այլոց: Իմ բախտից, հանդիսականներն էլ դրանից մի առանձին գաղափար չունեին: Ու ես պարեցի, երաժշտության տակտին ընտելանալու համար հանդարտ անցա մի շրջան, ապա թափ առած, սկսեցի մի արագ պտույտ: Թե ինչ էր իմ պարը, չգիտեմ,

բայց երբ, վերջացնելով, բեմից դուրս եկա, դահլիճում ծափահարութիւն ընկավ: Պահանջում էին կրկնել: Երաժշտութիւնը կրկնվեց: Ես նորից բեմ նետվեցի և այս անգամ քամու պես սուրացի բեմով: Նորից լսվեցին որոտընդոստ ծափեր: Ես գոհ էի: Գոհ էի ոչ թե պարիցս: Ձէ, այդքան հասկանում էի, իհարկե, գոհ էի պարիս հաջողութիւնից, որի համեմատ՝ տեսարանի վերջում որպէս հարթած հյուր ասածս մի քանի խոսքը՝ անգույն բան էր:

* * *

Հրաշյան մի դեպք էլ պատմեց իր կյանքից, որի բոլոր մանրամասնութիւնները չէ, որ հիշողութեանս մեջ մնացել են:

Առաջին պատերազմի օրերն էին: Թուրքիան Գերմանիայի հետ է ընդգեմ Ռուսաստանի, Անգլիայի և Ֆրանսիայի: Պոլսի շատ ուրիշ պատանիների հետ զորակոչվում է նաև Հրաշյան: Զինվորական կարգապահութիւնը խախտում է Հրաշյան և նետվում բանտ: Նա տաճկերենին տիրապետում էր մայրենի լեզվին հավասար: Ձեռնում է տաճիկ, բայց առաջին իսկ նամազի ժամանակ պարզվում է նրա ոչ-մահմեդական լինելը: Դանակոծութիւն: Գլավուրը դատապարտվում է մահվան: Բանտապահը, որ հայ է լինում (կարծեմ անունը Գրիգոր), զգուշացնում է Հրաշյային, թե նրա միակ փրկութիւնը գերմաներեն իմանալն է, որովհետեւ բանակի դեկավարութիւնը թարգմանի կարիք ունի: Հրաշյան ֆրանսերեն գիտեր, իսկ գերմաներեն ոչ: Մնում է մի ելք՝ կարճ ժամանակում տիրապետել գերմաներենին: Բանտապահը մի-երկու բառարան է տալիս և առաջարկում զբաղվել: Մի շաբաթ հետո, երբ նրա գերմանագիտութիւնը մի քանի բառից այն կողմ չէր անցնում, բանտից ուղարկվում է «Մշակներն-գեեռ-ինսպեկցիան» այսինքն՝ գնդացրային տեսչութիւն, որպէս թարգմանիչ: Ներկայանում է մայրորդ Բարեկային, որի մասին ամեն առիթով Հրաշյան արտահայտվում էր սիրով, և ահա թե ինչու:

Հրաշյան այնքան գիտեր գերմաներեն, որ կարող էր

Բարեկալիս զեկուցել, թե ինքը որպէս թարգմանիչ ներկայացել է հրամանատարութեանը: Բարեկալն ինչ-որ բան է ասում: Հրաչյան չի հասկանում, ուստի և ձայն չի հանում: Բարեկալն հարց է տալիս: Հրաչյան չի պատասխանում: Մայորը զարմացած նայում է նրան: Մի ուրիշ հարց էլ է տալիս: Դարձյալ լռութիւն: Մայորը բարկացած խոսում է: Հրաչյան ոչինչ չի հասկանում: Բարեկալի դեմքը զայրույթ է արտահայտում, ձայնը՝ սպառնանք: Հրաչյան մտածում է՝ իր վերջը եկավ, հիմա կկարգադրի գնդակահարել, իսկ ինքը բոլորովին երիտասարդ՝ կյանքը, հույսերը դեռ առջևում: Եվ ինքն էլ չի նկատում, թե ինչպէս լալիս է: Մայորը նայում է Հրաչյային և տեսնում երիտասարդին՝ զգաստ կանգնած, իսկ կապույտ ու խոշոր աչքերից արցունքները վազում են: Մայորը մեղմանում է: Զգիտեմ, չի հասկանում, թե ինչ է պատահել: Հետո կռահում է, որ դիմացինը գերմաներեն չի հասկանում: Խոսում է ֆրանսերեն: Հրաչյան պատասխանում է նրա հարցին, պատմում գլխին եկածը: Բարեկալն, բարի մի մարդ, զգացված Հրաչյայի պատմութիւնից, հովանավորում է և փրկում նրա կյանքը:

* * *

— Փորձել չեմ սիրում: Ոչ թե կարևորութիւն չեմ տալիս, այլ չեմ սիրում: Մի տեսակ՝ ամաչում եմ: Ինձ թվում է, թե վրա ծիծաղում են, ամեն ինչ այնպէս չեմ անում, ինչպէս պետք է, ինչպէս պահանջվում է: Ա՛յ, ներկայացումն ուրիշ է: Բեմական անտուրաժն է շուրջս, իսկ դիմացս՝ հասարակութիւնը, որին չեմ տեսնում: Իմ առաջ մութ-մութ է, և ես ինձ ազատ եմ զգում, տեր ու տնօրեն: Ինչ ուզում եմ՝ այն էլ անում եմ, «պոլնովլաստին խազլային եմ»: Հենց որ դահլիճը լուսավորվի, ես անմիջապէս կանգորանամ, այն չեմ լինի, ինչ եմ և այլն:

Ես հարցրի, թե ունի՞, արգյոք, հին ու նոր հասարակութեան զգացողութիւն: Միծաղեց:

— Ա՛յ, լսի՛ր՝ ինչ կասեմ քեզ: Ես Երևանում լավ չեմ խաղում: Օթելլո ես ասում: Իմ Օթելլոն Օթելլո չէ Երևանում:

Եթե ուզում ես տեսնել՝ հետո արի շրջան, Կիրովական կամ թեկուզ Արտաշատ, Աշտարակ։ Թիֆլիսում էլ լավ եմ խաղում։ Ախպեր, և ի՞նչ կա այստեղ անհասկանալի, մի՞թե կարելի է քսան տարի շարունակ նույն ձայնը լսել կամ միևնույն դեմքը տեսնել։ Ես չեմ ասում, թե խաղընկերներս վատ են խաղում, չգիտեմ, մի խոսքով՝ իմ գործը չէ։ Ես մի բան գիտեմ—չեմ կարող անընդհատ նույն ձայնը, նույն ինտոնացիան լսել։ Երեւի ես էլ նույնն եմ նրանց համար։ Չէ, ես նոր ձայն եմ ուզում։ Մի անգամ ինձ խնդրեցին Ստեփանակերտում խաղալ. շատ եմ գոհ խաղիցս։ Ես երբեք այդպես չեմ խաղացել. իմ ամենալավ Օթելլոն այդ գիշեր ծնվեց։

Չեմ հիշում այժմ, թե զրույցն ինչի շուրջն էր, երբ Հրաչյան ընդհատեց մեր խոսքը.

— Ես պետք է անպայման մի դեր խաղամ, որ կյանքիս իտոգը լինի։ Նոր դեր, այնպիսի դեր, որ ոչ ոք խաղացած չլինի, նորություն լինի, գոնե մեզ մոտ։

Ներկաներից մեկն ասաց, թե Հրաչյան իր հաշիվները փակել է դրամատիկական թատրոնի հետ, այնտեղ այլևս անելիք չունի, որ նրա ասպարեզը կինոն է, և այդ իր երազած դերն էլ պետք է կինոյում ստեղծել։

Զհամաձայնեց։

— Կինոյում ես հաջողություն ունեմ, ճիշտ է։ Բայց ինձ լավ չեմ զգում։ Դա իմ ասպարեզը չէ, ես այնտեղ դրուժյան տերը չեմ։ Ռեժիսոր կա, օպերատոր կա, որոնցից ազատվել չես կարող։ Իսկ թատրոնում ռեժիսորի իշխանութունը փորձի ժամանակ է, բարձրացա բեմ թե չէ՝ նրա իշխանությունը թոթափում եմ, և ես ազատ եմ։ Բեմում ինչ ուզում եմ, այն եմ անում։ Ասենք թե՝ արեցի մի բան, որ ռեժիսորի համար ընդունելի չէ, նրա սրտով չէ, ի՞նչ կարող է անել՝ ոչինչ։ Իսկ կինոյում այդպես չէ. թե մի շեղում կատարեցիր, ժապավենի այդ կտորն անմիջապես կկտրեն։

Հավաքվածներս անդրադարձանք այն հարցին, թե ի՞նչ դերեր է ուզում խաղալ։ Նա հիշեց Օշին Պայլը, ասաց, որ շեքսպիրյան շնչով է գրված։ Իմացել էր, որ ես Մոսկվայում նայել եմ Աստանդուվի Մատիաս Կլաուզենը։ Հարցնում էր,

Թե դերը կբռնի՞ իրեն, Թե չէ. մեր հանդիսականի համար հետաքրքիր կլինի, Թե ոչ:

Ես առաջի, որ իմ կարծիքով հետաքրքիր կլինի և նույնիսկ շատ: Լավ կանի, որ անպայման խաղա: Հետո անցանք ուրիշ հարցերի և չեմ հիշում, Թե ով, հարցրեց.

— Պատահականությունները բեմում դեր խաղո՞ւմ են, Թե ոչ:

— Այդպիսի դեպքեր կան, օրինակ՝ «Սեր և խարդավանքի» մեջ Ֆերդինանդ էի խաղում: Առաջին օրը, ներկայացումից անմիջապես առաջ, բեմ մտնելիս, հայելու մոտով էի անցնում. տեսա կնճիռներս և այլևս խաղալ չկարողացա, չէի հավատում, որ պատանի եմ: Եվ այդպես էլ չկարողացա լավ խաղալ: Խաղում էի, բայց միշտ անհաջող. ոչ ես էի գոհ, ոչ էլ հանդիսատեսը: Համոզեցի, որ դերը խաժակին տան:

* * *

Հարցրի, Թե հոբելյանի օրը խաղալո՞ւ է:

— Ոչ:

Զարմացա:

— Ի՞նչ պիտի խաղամ. «Պատվի համարից» մի կտոր, «Պաղտաստից», «Օթելլոյից» տեսարաններ: Է՛, ինչ պիտի ստացվի. կտոր խաղալ՞ը որն է: Չեմ սիրում. ոչ սկիզբ ունի, ոչ վերջ: Մեքենա հո չե՞մ: Մինչև դերիս մեջ մտնեմ, մինչև տաքանամ, տեսարանը պիտի վերջանա: Չէ՛, չեմ կարող: Մի ուրիշ պատճառ էլ կա. այնպիսի օր է այդ, որ ես պիտի ուզեմ լավ խաղալ, անպայման լավ, իսկ երբ ուզում եմ լավ խաղալ՝ վատ եմ խաղում, ինչքան շատ եմ ուզում լավ խաղալ, այնքան ավելի վատ եմ խաղում: Նկատել եմ, միշտ այդպես է:

* * *

Հոբելյանը այդպես էլ չկայացավ: Զկայացավ, որովհետև Հրաչյան հանկարծ հրաժարվել էր:

— Հոբելյան չեմ ուզում:

Հանդիպեցի իրեն և հայտնեցի դժգոհությունս: Միծաղեց:
— Քեզ համար էլ լավ է. ազատվեցիր զեկուցում գրելու
հոգսից:

Ասացի, որ զեկուցումն արդեն գրել եմ:

— Ի՞նչ ես ասում: Ափսո՛ս: Իմանայի՛ չէի հրաժարվի,—
կատակի տվեց:— Գիտես ինչ, ճիշտն ասեմ քեզ, ինձ համար
դժվար է, շատ դժվար հոբելյարի վիճակում լինել, նստել
բազկաթոռին և ժամերով գովեստներ լսել: Բոլորն էլ իրար
եման:

Զկայացած հոբելյանից մնաց մի հիշատակ: Թատրոնի
հրատարակած ալբոմը՝ «Հրաշյա ներսիսյան», որ լույս տե-
սավ իմ առաջարանով, իսկ դա ոչ այլ ինչ էր, քան հոբելյա-
նի համար պատրաստածս զեկուցման համառոտ շարա-
դրանքը:

Ալբոմը վաճառվեց թատրոնում նոյեմբերի 12-ին, ճիշտ
այն օրը, երբ նշանակված էր հոբելյանը: Նույն երեկո էլ
տպառվեց: Մեկի փոխարեն շատերը գնում էին երկու, երեք,
ոմանք նույնիսկ հինգական օրինակ՝ իրենց բարեկամներին
ու մտերիմներին նվիրելու համար:

* * *

Հրաշյան սիրում էր կարդալ: Կարդում էր ոչ միայն հայե-
րեն և ռուսերեն: Կարդում էր նաև ֆրանսերեն, անգլերեն:
Եվ դա նրան առավելություն էր տալիս շատերի նկատմամբ:
Սովորություն չունեի կարդացած գրքերից խոսելու: Դա էր
պատճառը, որ շրջապատի աչքում կարդացած մարդու հա-
մարում չունեի: Այն ժամանակ, երբ զարգացած արվեստա-
գետի համբավ վայելող մեր դերասաններից մի քանիսը
Հեմինգուեյից ոչինչ չէին կարդացել, Հրաշյան ծանոթ էր նրա
շատ երկերին, ուներ իր սեփական ու ընդհանուր մտայնու-
թյանը չհամընկնող կարծիքը նրա մասին:

Նուսափում էր խոսել, արտահայտվել, մանավանդ ելույթ
ունենալ, և այդ պատճառով շատերն այն կարծիքին էին, թե
նրա ստեղծագործությունը մտքի հենակետեր չունի: Սխալ
տպավորություն: Երբ խոսում էր՝ տպավորություն չէր գոր-

ծում: Բայց երբ փորձում էիր խորանալ, թե նրա անկազմակերպ խոսքի ետևը ինչեր են թաքնված, տեսնում էիր մտքի երբեմն այնպիսի խորություն, որով հաճախ չեն փալկել իրենց մտքով Հրաչյայից առավել համարված դերասանները:

Այդպես է. հաճախ ենք արտաքին շփանիշներով դեկավաթում՝ մեկին և մյուսին գնահատելիս, փոխանակ խորանալու նրանց էություն մեջ: Խորապես համոզված եմ, որ յուրաքանչյուր միտք կարող է խամբել, եթե իր տարերքի մեջ չէ, և ընդհակառակը, փայլատակել, եթե գտել է արտահայտվելու հարազատ ասպարեզը: Որ զրուցելիս Մարտիրոս Սարյանը բավական հետաքրքիր է, երբեմն նույնիսկ իմաստուն, այդ ճիշտ է, բայց ի՞նչ թոխչ է կատարում նրա միտքը, երբ ձեռքն է առնում վրձինը: Ի՞նչ համեմատություն: Եվ ի՞նչ տպավորության պետք է լինեինք, եթե նրան ճանաչեինք միայն զրուցյաներով ու երբեք տեսած չլինեինք իր կտավները, այսինքն այն, ինչ նրա մտքի ճշմարիտ դրսևորումներն են:

Նույնը և Հրաչյան:

Կյանքում կարծես անտարբեր, մի կողմ քաշված, ավելի դիտող, քան արտահայտվող, ընդհանրապես սակավախոս, նա բեմում լեզու էր առնում, ուժ ստանում և արտահայտվում էր, իր խոսքն ասում շատ ավելի ազդեցիկ, քան շատ և շատ գիտուններ:

Արտիստ էր ոչ թե զբաղմունքով, այլ էությունով: Բեմը նրա տարերքն էր, այն հարազատ միջավայրը, ուր նա ուժեղ էր, երբեմն՝ ամենակարող:

* * *

1944-ին էր: Ամիսը չեմ հիշում: Արմեն Գուլակյանը նշանակվեց Սունդուկյանի անվան թատրոնի գեղարվեստական ղեկավար և, միաժամանակ, դիրեկտոր: Զանգահարեցի, թե հետը խոսելիք ունեմ: Գնացի: Ասացի, որ թեև պատվիրակ չեմ, բայց ասածս թող ընդունի որպես մեր մտավորականության մի բավական լայն շրջանի ցանկություն:

Գուլակյանը լրջացավ:

Ասացի, թե լսել ենք, որ Հրաշյան ցանկություն ունի Արքա լիք խաղալու: Ես եկել եմ իմ և այդ ընկերների անունից խնդրելու, որ դերասանի ցանկությունը անկատար չմնա: Նախ՝ դա իր վաղուցվա իղձն է, երկրորդ՝ հավատում ենք, որ իսկապես լավ լիր կլինի: Իսկ ինչքա՞ն ժամանակ է, որ մի կարգին դերում չենք տեսել նրան: Եվ երրորդ՝ ճիշտն ասած, լավ կլինի, որ հայ բեմը դուրս գա միայն «Համլետ» և «Օթելլո» ներկայացնելու կախարդական շրջանակից:

Գուլակյանը քթի տակ ծիծաղեց: Զարմացած նայեցի իրեն:

— Զի խաղա: Նրա ամեն ասածին այդքան նշանակություն մի տվեք, խոսք է, էլի:

Առարկելու փորձ արի:

— Երանի դուք ճիշտ լինելք, ես սխալ, բայց ես նրան ավելի լավ եմ ճանաչում: Երկար տարիներ եմ ճանաչում: Կասի, ինչի՞ չէ, բայց կանի՞: Իսկ եթե նա իրոք ցանկանա՝ ո՞վ դեմ կլինի: Միայն թե անի:

Մեր խոսակցությունն ընդհատեց հեռախոսի զանգը: Երբ վերջացրեց՝ դարձավ ինձ.

— Վաղը երեկոյան ազատ եք, հա՞, կարո՞ղ եք թատրոն գալ: Ես ձեռ ներկայությամբ կանեմ այդ առաջարկը:

Մյուս օրը պայմանավորված ժամին գնացի թատրոն: Անցա դիրեկտորի առանձնասենյակը: Գուլակյանը քարտուղարուհուն հանձնարարեց կանչել Հրաշյային: Նա ներս մտավ, բարև տվեց ու, ըստ երևույթին, ոչ առանձնապես սովոր այդպիսի կանչերի, «հը, ի՞նչ կա» հարցն աչքերի մեջ՝ նայեց Գուլակյանին:

Վերջինս գրասեղանի գզրոցից հանեց մի գիրք ու մեկնեց Հրաշյային:

— Ի՞նչ է:

— Նայիր:

Հրաշյան բացեց գիրքը. անվանաթերթի վրա, հին ուղղագրությամբ, գրված էր՝ «Արքա լիր»:

Հրաշյան տարակուսած նայեց Գուլակյանին:

— Բեմադրելու ենք, — ասաց Գուլակյանը, — դու էլ լիր ես խաղալու: Տար ու աչքի անցրու: Տես ինչ կասես:

Հրաշյան ձեռքով գիրքը հրեց դեպի Գուլակյանը:

— Էդքան մեծ դեր պատրաստելու գլուխ շունեմ:
Հետո դարձավ ինձ.

— Կարծում են հեշտ է, էլի:
Հետո նորից դառնալով Գուլակյանին.

— Լիր արքա: Կատա՞կ է, ինչ է: Ես ո՞ւր, Լիրն ո՞ւր:
Ձանգահարեցին: Գուլակյանը վերցրեց հեռախոսափողը:

— Ես հետո կգամ, Արմեն,— ասաց ու արագ քայլերով
դուրս գնաց:

Գուլակյանը նայեց ինձ:

— Տեսա՞ք: Որ ասում էի՝ չէիք հավատում: Գլուխն առավ
ու փախավ: Այդ մարդը ամենաօթովածն է. բայց և ամենա-
ծուլը: Բնավորությամբ թեև սարսափելի անկազմակերպ՝
պատասխանատվության ուժեղ զգացում ունի: Երբեմն հի-
վանդագին չափերի հասնող: Հեշտությամբ բեռան տակ չի
մտնում: Եթե այլևս չիտսեմ՝ չի էլ հարցնի, թե ինչ եղավ Լի-
րը: Բայց եթե ես ասեմ, մի ուրիշն էլ, կտկսի հավատալ, որ
իրենից Լիր դուրս կգա և կխաղա: Երեխայի պես մարդ է: Ա-
մեն մի նոր դերի առաջ կանգնում է ինչպես անփորձ սկսնակ:

* * *

Բեմադրվեց Տոլստոյի «Կենդանի դիակը», Հրաչյան այդ
բեմադրությանը մասնակից էր իշխան Աբրեզկովի դերով,
բայց ոչ Պրոտասովի: Տարօրինակ է, բայց այդպես էր:
Պրոտասով խաղում էին Վաղարշյանն ու Ջանիբեկյանը:

Անցան օրեր և հանկարծ հայտնի դարձավ, որ Ներսիս-
յանը գնացել է Գուլակյանի մոտ և խնդրել՝ թույլ տալ իրեն
Պրոտասով խաղալու: Այդ դերասանի ցանկությունը իր
համար պարտադիր համարելով՝ Գուլակյանը տվել է համա-
ձայնությունը և անմիջապես փորձեր նշանակել:

Առաջին ներկայացման օրը թատրոն էի գնացել գործով,
բայց ոչ ներկայացում նայելու մտադրությամբ: Բայց չկա-
րողացա հաղթահարել ինձ համակած ցանկությունը՝ նայել
գոնե մի-երկու տեսարան: Մտա դահլիճ և զրավեցի պատա-
հած առաջին թափուր աթոռը: Եվ... մնացի մինչև ներկայաց-

ման վերջը: Հրաշյան այդ օրը բուռն էր, անկեղծ, հուզիչ: Ամբողջ գիշերը նրա խաղի տպավորության տակ էի:

Մյուս օրը նորից գնացի ներկայացման: Ճիշտն ասած՝ մի երկյուղ կար սրտիս մեջ. չլինի՞ թե հանկարծ երեկվա հաջողությունը մի երջանիկ բոցավառում էր, որ կրկնվել չէր կարող: Ներկայացումը սկսվեց, և Հրաշյան նույնքան անկեղծ, ինչպես երեկ՝ հիասթափվեց, սիրեց ու կարոտեց, տանջվեց ու տառապեց, մինչև հասավ իր գահավեժ խորտակման օրը: Նույնն էր, ինչ երեկ, բայց դա կրկնություն չէր: Նույնն էր միայն շրջանակը: Ապրումն այնքան անմիջական էր, որ ինձ թվում էր, թե առաջին անգամ եմ նայում:

Մի օր որդուն՝ Լևոնին հարցրի, թե այդ ի՞նչպես պատահեց, որ ուզեց խաղալ: Ասաց, որ հոր այդ ցանկությունը իր համար էլ անապեղելի է եղել: Հրաշյան ասել է, թե ինքը պիեսի ընթերցանությունը գնացել է ուշացած, երբ մտել է փորձասրահ՝ բոլորը իրեն են նայել: Ընթերցումը շարունակվել է: Պանդոկի տեսարանից դերասանների մեծ մասը շրջվել է դեպի Հրաշյան: Արտիստի հոգու մեջ կասկած է ընկել, թե իր մեջ տեսնում են Պրոտասովին: Իսկ ինչո՞ւ ոչ,— անցել է իր մտքով, բայց ձայն չի հանել: Ոչ ոքի ոչինչ չի ասել, և փորձերին միշտ մտածել է, որ եթե ինքը Պրոտասով լիներ, ի՞նչ կաներ, ինչպե՞ս կաներ: Ամառը՝ Ստեփանավանի անտառներում կարդում, մտածում է կերպարի շուրջը և պատրաստում դերն այնքան, որ հիմք ունենա բեմադրող ռեժիսորին ներկայանալ և խնդրել:

Մի տարի էլ չէր անցել, որ Լենինգրադից եկավ Փափազյանը: Նա նույնպես ցանկություն հայտնեց Պրոտասով խաղալու: Եվ խաղաց: Տարբեր էր, քան առաջին երեքը: Ակամա մրցությունն անխուսափելի էր: Եվ ուրիշ կերպ չէր կարող լինել, քանի որ մի դերը չորս կատարող ունեւ: Եթե շասենք ամենքի, համենայն դեպս շատերի կարծիքն այն էր, որ լավագույնը Հրաշյայի Պրոտասովն էր: Ես այդպես էլ չիմացա. թե ինչ կարծիքի էին Վաղարշյանն ու Զանիբեկյանը, իսկ Փափազյանը ի լուր բոլորի՝ ընդունեց կրտսեր ընկերոջ գերազանցությունն այդ դերում:

Զեմ կարող ասել, Հրաշյայի համար միևնույն էր, թե ինչ է գրվում ու ասվում իր մասին: Կողքից գոնե տպավորությունըն աշնպես էր, թե անտարբեր է մնում ինչպես քննադատության, աշնպես էլ գովեստի նկատմամբ: Ես, ոչ էլ իմ ընկերներից որեւէ մեկը չենք հիշում, որ նա, ուրիշների նման, գնահատություն հայցի կամ մարտնչող դիրք բռնի քննադատության դեմ:

Ահա հիշողության մեջ մնացած միակ դեպքը:

«Նույն հարկի տակ» բեմադրության քննարկումն էր: Արտահայտվեցի նաև ես: Ես, ինչպես նաև ուրիշները, հիացած էի Բաբկեն Ներսիսյանի դերակատարմամբ: Բարձր գնահատելով նրա խաղը՝ ես վերջացրի խոսքս այսպես. «Այն հանգամանքը, որ Բաբկենի ազգանունը նույնպես Ներսիսյան է, հետևանք է, իհարկե, պատահական զուգադիպության, բայց ես հույս ունեմ, որ կգա ժամանակ, երբ մի Ներսիսյանը կփոխարինի մյուսին և այն ժամանակ մարդիկ երկու արտիստների նույն ազգանունը կրելու մեջ որոշակի իմաստ կդնեն»:

Հրաշյային, որ ներկա չէր քննարկմանը, իմ խոսքը աղավաղված էին հայտնել: Մյուս օրը թատրոնում հանդիպեց ինձ:

— Էդ ի՞նչ ես ասել:

— Ի՞նչ:

— Թե մի Ներսիսյանն արդեն հեշ, մյուս Ներսիսյանն է Ներսիսյան:

Զհասկացա՝ կատակո՞ւմ է, թե լուրջ է ասում, բայց ես չէի կամենա անտեղի վշտացրած լինել: Եթե ասում է, թեկուզ կատակով, նշանակում է մի կասկած, գուցե և շնչին չափի, բուն է դրել մեջը: Ու հարկ համարեցի բացատրել, թե ինչ եմ ասել:

— Это можно: Ինչո՞ւ չէ, ինչո՞ւ չէ:

Վաղարշյանը, որ մոտեցել էր մեր զրույցի կեսից, զվարթ կատակի շեշտով ասաց.

— Դու լավ հոգեբան ես, բայց զարմանում եմ, թե ինչ-

պեւ ընկար սրա ծուղակը: Մի՞թե չհասկացար, որ ճիշտ հակառակն է. ասածդ իր սրտովն է, բայց ուզում է, ոչ թե երկրորդ մարդուց, այլ քեզանից լսել և համոզվել, որ դա այդպես է:

Հրաշյան ժպտաց և ժխտելու մի անեռանդ փորձ արեց:

* * *

Մի օր որդուն հարցրի՝ հայրը թատերական ռեցենզիաներ կարդո՞ւմ է, թե ոչ: Լեռնն ասաց թե՝ խնդրում է բարձրաձայն կարդալ և երբ իմանում է, որ քննադատի կարծիքը դրական է, ձեռքը թափ է տալիս, չի հետաքրքրվում և հակառակը՝ հետաքրքրվում է, երբ քննադատում են, դիտողություն են անում:

Զէր արտահայտվում, բայց ինձ թվում էր, թե նա մի ներքին դրամա ուներ: Շոյված իր անվան շուրջ եղած սիրուց՝ դժգոհ էր իրենից: Նրան այնպես էր երևում, թե ինքն ավելի քիչ է արել, քան կարող էր: Այդ պատճառով հաճախ զարմանում էր, թե ինչու են իրենով այդքան հիանում: Զէ՞ որ գիտեր, թե ինչ է իր մտքովն անցնում և լավ էր հասկանում, թե որքան նվազ է իր արածը մտքովն անցածի համեմատ: Եվ այդ պատճառով նրա համար տարօրինակ էր, որ մարդիկ կարող են այդքան քշով բավարարվել: Ըստ իս, դրա համար էլ առանձնապես ուշադիր էր դեպի քննադատական դիտողությունը: Թերևս կամենում էր անբավարարվածության հիմնավորումը գտնել և նոր մղումների առիթ ստանալ:

* * *

Մի անգամ հարցրի, թե ինքն ինչ կարծիքի է իր Պաղտասար աղբոր մասին.

— Ոչ բարձր:

Գիտեի, որ կեղծ համեստությունը հատուկ չէ նրան և ուղեցի հասկանալ, թե ի՞նչն է նրա անբավականության պատճառը: Հարցրի, թե այդ դեպքում ի՞նչպես բացատրել քննադատության հիացական վերաբերմունքը և՛ այստեղ, և՛ Մոսկվայում:

— Զգիտեմ: Հավանում են նրանք, ովքեր ավելի լավը չեն տեսել: Օրինակ՝ Խաչանյանը հրաշալի էր: Նա էլ էն չէր, թեև նրանից լավը չեմ տեսել: Ծիշտոն ասեմ՝ իմ պատկերացրած, իմ երևակայության Պաղտասարը դեռ չեմ տեսել:

Մի օր էլ, անդրադառնալով Պաղտասարին, ասաց, որ ինքը շատ է սիրում Աճեմյանին և բարձր է գնահատում նրա տաղանդը, բայց այս բեմադրության մեջ մի հակասություն կա իրենց միջև: Կերպարն ինքը կառուցում է ընդհանրացուններով, իսկ ռեժիսորը դետալավորում է, և ստացվում է ռճական անհարիրություն: Ասում էր, թե իրեն շատ է նյարդայնացնում Օգսենի լիմոն գողանալու տեսարանը:

* * *

Ընկերներով հավաքված զրուցում էինք: Հրաչյան ավելի լսում էր, քան խոսում: Իսկ երբեմն էլ մտքով առանձնանում էր, հեռանում մեղանից և հետո նորից վերադառնում զրույցին: Զեմ հիշում հիմա, թե խոսակցությունը ինչի շուրջն էր, երբ ասաց.

— Գիշերը մինչև մանկական գիրք չառնեմ ձեռս, մի քանի էջ չկարդամ, քուն չի գա աչքերիս:

— Ինչի՞, — հարցրեց ընկերներից մեկը, չթաքցնելով իր հեգնական վերաբերմունքը նրա ասածի վերաբերմամբ: Հրաչյան չզգաց այդ, բայց շփոթված, որ իրենից բացատրություն են պահանջում, նկատեց.

— Զգիտեմ, ինքս էլ չգիտեմ: Պարզապես սովորություն է, ինչ ասեմ:

Մի պահ լռելուց հետո, կարծես բացատրությունը գտնելով, ուրախ-ուրախ վրա բերեց.

— Երևի օրվա տպավորություններից ուղեղս հոգնում է և ազատվելու վարիք եմ գտնում:

Ասաց, նայեց մեղ, ասես մեր աչքերի մեջ կամենալով ստուգել, թե իր տված բացատրությունը որքան է համոզիչ: Ոչ ոք ձայն չհանեց:

— Օրվա ադմկոտ տպավորություններից:

Առանձնապես շեշտեց ադմկոտ բառը:

Սա նկատեցի, որ երբ մարդ մանկական գիրք է կարդում՝

երևի մանկական անհոգութիւնն է գալիս վրան, անհոգ, թեթեւ։
— Ճիշտ է,— ասաց Հրաչյան,— ես էլ նույնն էի ուզում ասել։

* * *

1958-ին էր։ Բաբկեն Ներսիսյանը բնակարան էր ստացել։ Այդ առթիվ հավաքվել էին նրա տանը, մեծ մասամբ թատրոնի մարդիկ։ Չեմ հիշում, թե ով, բաժակը բարձրացրեց և առաջարկեց խմել Հրաչյայի կենացը։ Կենացի առթիվ, ինչպես ընդունված է մեզանում, արտահայտվեցին մի քանիսը և ամենքն էլ հիացած խոսեցին նրա արվեստի մասին։ Դրանցից մեկը նրան կշտամբեց շատ խմելու համար։ Եթե չխմի՝ ամեն ինչ լավ կլինի։ Շատերն արձագանքեցին՝ «Ճիշտ է»։

Տեսնելով, որ այլևս խոսող չկա՝ Հրաչյան կանգնեց։

Բոլորը լուռ սպասում էին, թե ընդհանրապես խոսելու սովորութիւնն չունեցող Հրաչյան ինչ է ասելու։

— Շնորհակալ եմ,— ասաց նա և նկատելի էր, որ հուզված է։— Շատ եմ շնորհակալ ձեր խոսքերի համար,— ասաց ու շուրթերը հավաքեց և աչքերն առաստաղին նետեց։— Գիտե՞ք ինչ, շատ եմ ցավում, երբ խմելու մասին են խոսում։ Հասկանում եմ, ամենքն էլ իմ լավն են ուզում։ Ընկերներ են, բարեկամներ, իմ մասին են մտածում։ Բայց մի բան կա, որ չեն հասկանում։ Չեն հասկանում, որ ես չեմ կարող չխմել։

Բոլորի դեմքին հիասթափութիւնն երևաց։ Նրա աչքից դա չվրիպեց։

— Բացատրեմ, բացատրեմ միտքս։

Մի պահ լռեց, հետո շարունակեց։

— Ես վախկոտ եմ։ Այո՛, այո՛, մի զարմանաք, ես վախկոտ մարդ եմ։ Եթե չխմեմ՝ խաղալ չեմ կարող։ Ես բեմ եմ մտնում՝ իմ թշնամին դահլիճն է, վախենում եմ նրանից, ծնկներս ծալվում են, ձեռքերս ու ոտքերս կապ են ընկնում։ Չգիտեմ ինչ անել։ Որ խմած եմ լինում՝ ինձ նրանից ուժեղ եմ զգում ու հաղթում եմ։ Այո՛, այո՛, հաղթում եմ։ Որ չխմեմ՝ կխեղճանամ նրա առաջ, կտապալվեմ։

Դադար:

— Խմածս էլ ինչ է, մի հարյուր գրամ օղի: Եղածը մի բան չի, բայց տրամադրություն է ստեղծում, ուժ տալիս:

Լոեց, նայեց չորս կողմը և սեղանակիցներին ոչ ոքի դեմքին հավանություն արտահայտություն չնկատեց:

— Ձէ, մեկ է, ինձ չեք հասկանա:

Ու դատարկեց իր առջև դրված օղու գավաթը:

* * *

Հայ գրականության և արվեստի տասնօրյակին Լեոն Քալանթարը բեմադրել էր «Օթելլոն»: Դերակատարը Փափազյանն էր: Տասնօրյակից հետո, արդեն Երևանում, բավականին ժամանակ անց, թատրոնի ղեկավարությունը տեսնելով, որ մի քանի այլ պիեսներ հանդիսատես չեն բերում և լավ իմանալով՝ Հրաչյայի ժողովրդականությունը՝ խնդրեց նրան ևս հանդես գալ Օթելլոյի դերով, որպեսզի Փափազյանի համար նախատեսված ներկայացումներից բացի, լրացուցիչ ներկայացումներ նշանակվեն և ունենան ապահոված մուտք, դիմել էին Հրաչյային, — իսկ նրան համոզելը դժվար չէր, — համաձայնել էր:

Նշանակված էր առաջին ներկայացումը: Ձէի գնացել, բայց երկրորդ օրը մտա թատրոն: Տեսնեմ, դիրեկտորի սենյակում, գրասենյանի կողքին, Հրաչյան չու՞ռ նստած է: Մոտեցա, բարեկեցի և ուզեցի արդարանալ, որ երեկ չէի կարողացել գալ իր խաղը դիտելու:

— Շատ էլ լավ ես արել, որ չես եկել:

Զարմացա, թե ի՞նչ է նշանակում իր ասածը:

— Վատ խաղացի, ուղղակի տապալվեցի:

Ես հայտնեցի, որ ընկերներս հակառակն են ասում, նույնիսկ իր խաղի մասին մտադիր են հատուկ գրել:

— Մի հավատա: Ինձ սիրում են, և ուրիշ ոչինչ: Ես ճիշտ եմ ասում, ճիշտ, երեկ իմ կյանքի ամենաձախորդ օրերից մեկն էր:

Խնդրեցի բացատրել, թե այդ ինչպես է պատահել, որ նրա նման արտիստը տապալվել է: Ձէ՞ որ առաջին անգամը չի

խաղում այդ դերը, երկար տարիներ խաղացել է, ճանաչվել ու գնահատվել:

— Լսիր, ասեմ քեզ: Ներկայացման օրը ցերեկը, փորձից որ զնում էի տուն, մեր տղաները շրջապատեցին ինձ, թե՛ «Հրաչ Ներսեսովիչ, դժվար օր է քեզ համար: Փափազյանի Օթելլոն մեջտեղն է: Ուզում ես, չես ուզում՝ մրցության պես բան է ստացվում: Ուժերդ հավաքիր, որ ծանր բեռ բարձրացնես: Տես՝ չլինի թե խմես: Գոնե այսօր մի խմիր, էլի: Գիտես, չէ՞, հանդիսատեսը քեզ ինչպես է սիրում: Տես որ էդ սերը գետնով չտաս»: Այնքան ասին, որ ես, վախկոտս, ավելի վախեցա: Մտածեցի, ինչ պիտի անեմ: Ու, ճիշտն ասած, անիծում էի էն օրը, որ համաձայնություն տվի մտնել «Օթելլոյի» նոր բեմադրության մեջ: Ու չիմեցի: Զխմեցի, որ իբր թե խելքս գլխիս լինի: Երեկոյան Օթելլոյի զգեստները հագած մտա բեմ, դահլիճը այնպիսի բուռն ծափահարություն բնորոշեց, որ իսկի էդպիսի բան չեմ էլ հիշում: Եվ դա ավելի ծանրացրեց վիճակս: Նրանք ծափ էին տալիս, իսկ ես մտածում էի՝ սրանք ի՞նչ հույսեր են կապում ինձ հետ ու ես ո՞նց եմ դուրս գալու էդ բոլորի տակից: Վախս կրկնապատկեց: Ու ես մի կերպ խաղացի: Ծիշտ է, դահլիճը վերջում էլ շատ ծափ տվեց, բայց դե ես գիտեմ՝ կարողացա խաղալ, թե չէ:

Հետո, երբ բավական օրեր էին անցել, նա գանգատվում էր, ասում, որ ինքը՝ իր փափուկ բնավորության պատճառով, բայց ըստ էության իր կամքին հակառակ, մտել էր մի բեմադրության մեջ, որը ինքը չի ընդունում: Այդ բեմադրության մեջ, իր ասելով, նրան ամեն ինչ ջղայնացնում էր, ամեն բան խանգարում: Զրավազանի տեսարանը, ուր Դեզդեմոնան, ռեժիսորի ցուցումով, ջուր է ցայտում Օթելլոյի երեսին, ինքը պետք է հրճվալի դեմք ընդունի, մինչդեռ դա նրան կեղծ է թվում: Եվ այդ, ինչպես ասում էր, ինքը ճակատագրական եղավ: Նա չի կարծում, թե Դեզդեմոնան այդպես կարտահայտի իր սերն Օթելլոյի նկատմամբ: Այդ պատճառով երկու գործողություն նյարդային վիճակ է ապրել, անբնական հոգեբանության մեջ գտնվել: Ասում էր, որ իրեն խանգարում է նաև ձեավորումը, թույլ չի տալիս ազատ

1959-ին էր, ո՛չ ամիսն եմ հիշում, ո՛չ օրը: Հրաշյա ներսիսյանի և Ավետ Ավետիսյանի հանդիպումն էր Նոր Արեշի Կուլտուրայի համալսարանի ունկնդիրների հետ: Ես պետք է ներկայացնեի նրանց: Առաջ Ավետիսյանի մասին խոսեցի, հետո Ներսիսյանի: Իմ միտքն այն էր, որ քաղցր պատառը մնա վերջում: Եվ սխալվեցի: Ավետի մասին այն-քան երկար խոսեցի, որ Հրաշյայի համար այլեւս ներքին եռանդ չմնաց: Մի տեսակ՝ սպառվեցի: Եվ Հրաշյային նվիրված խոսքս կցկտուր ստացվեց:

Ընդմիջում հայտարարվեց, որից հետո պետք է դեղարվեստական մաս լիներ՝ Ավետի մասնակցությամբ: Ես ու Հրաշյան նստած զրուցում էինք: Ինքը ոչ մի ձայն չհանեց խոսքիս մասին, իսկ ես նրա առաջ արդարանալու պահանջ էի զգում: Փորձ արի բացատրել:

— Նշանակություն մի տա, ջանք՝: Ինչ է, ես նույնը չեմ, մի օր լավ եմ խաղում, մի օր չէ: Մարդ չի կարող միշտ լավ խոսել:

Ուզում էի հասկանալ, թե որքանով է անկեղծ, իրո՞ք նշանակություն չի տալիս, թե՞ ինձ է ուզում հանգստացնել:

— Գիտե՞ս ինչ,— բացականչեց ուրախացած ձայնով,— ընդունենք, որ դու իսկապես մեղք ունես: Շատ լավ: Արի քեզ մի առաջարկ անեմ: Ուզո՞ւմ ես մեղքդ քավել:

Ասաց ու լուռ նայեց ինձ: Հայացքի մեջ անվստահություն կար: Ու տպավորությունն այնպես էր, թե ինքն է մեղք գործել ու չգիտե՞ ասի՞, թե ոչ:

— Հիշո՞ւմ ես մեր խոսակցությունը Մատիաս Կլաուզենի մասին: Թատրոնի Գեղարվեստական խորհրդի անդամ ես: Հարց բարձրացրու՝ Հաուպտմանի պիեսը բեմադրելու մասին: Ես էլ կխաղամ:

Հայացքիս մեջ, ինչպես երևում է, թերահավատություն կար:

— Էդպես մի նայիր: Կխաղամ, անպայման կխաղամ: Զե՞ս հավատում: Ահա պիեսը, տես՝ գրպանումս է:

Գրականից հանեց «Մայրամուտից առաջը» և դրեց սեղանին:

— Հիմի հավատո՞ւմ ես: Հենց որ ազատ ըուպե եմ ունենում՝ կարդում եմ մեկ մի տեղից, մեկ ուրիշ տեղից:

Մի պահ լռեց:

— Եթե առաջ խաղայի՝ երևի չստացվեր: Հիմի ես ավելի եմ զգում կերպարը, անգամ տեսնում եմ:

Եվ նրա կապույտ աչքերը մտերմիկ փայլ առան, մեկն այն շողերից, որից մարդու սիրտն է ջերմանում:

— Երբ լույսն իջնում է վրաս՝ ես տեսնում եմ կապույտ երկիրքը և քեզ, կարմիր շուշանները և քեզ, ռսկյա աստղերը և քեզ, արևը և քեզ: Ամեն տեղ, ամեն ինչի մեջ քեզ: Քե՛զ, քե՛զ, օ՛, իմ Ինկեն:

Ասում էր ու այն երջանիկ հայացքը, որով փայլում էին աչքերը, առիթ էին տալիս մտածելու, թե հեռվում, երևակայության ստեղծած կապույտ ոլորտներում ինչ-որ դեմք է տեսնում՝ մտերիմ ու սիրելի...

— Ես եմ թարգմանել: Մի կտոր, այնպե՛ս, ինձ համար: Հիմի հավատո՞ւմ ես, որ կխաղամ: Կխաղամ և լավ կխաղամ: Այսպիսի ինքնավստահություն կարծեմ երբեք չեմ ունեցել: Այդ էլ զուցե նրա համար, որ Մատիաս Կլաուզենը՝ ես եմ և Ինկենը՝ իմ կյանքի երազը: Նրանք, որ չեղան իմ կյանքում: Նրանք, որ կարող էին լինել ու չեղան...

Եվ այս զրույցը դեռ կշարունակվեր, երևի, դեռ կխոսեր (խսկ դա նրա հետ հաճախ չէր պատահում), եթե Ավետը ներս չմտներ և իր պարտքը չհամարեր հայտնել մեզ այն բուռն ընդունելության մասին, որ դահլիճը ցույց էր տվել իրեն:

* * *

Հաուպտմանի դրամայի բեմադրության խնդիրն ուշացավ և ի վերջո մնաց անկատար: Նրա նախասիրած դերը ուրիշներն էլ ցանկացան խաղալ: Օրինակ՝ Փափազյանը, երբ իմացավ դրա մասին, ասաց.

— Ինչու չէ, թող նա էլ խաղա:

Բայց հետո, երբ մի երկուսն էլ ցանկություն հայտնեցին՝ տխրեց, տրտնջաց։ Նրան մրցակցությունը չէր զբաղեցնում։ Նա գիտեր, որ ինքը չի լինի այնպես, ինչպես մյուսներն են և նրանք էլ չեն լինի այն, ինչ կլինի ինքը։ Բայց նա համոզված էր, որ դա նրանց ներքին պահանջը չէ։ Կարծում էր, որ պարզապես մի լավ դեր էլ խաղալու արտաքին ցանկություն է դա։ Նրա ոգևորությունն իջավ, այլևս նախկին ոգևորությունը չկար, կլինի՝ լավ, չէ՝ ոչինչ։ Խուսափում էր դրա մասին խոսել և եթե, այնուամենայնիվ, անդրադառնում էր, ապա խոսում էր որպես անկատար մնացած փափագի մասին։

Մի օր, չեմ հիշում, թե ինչպես, նորից խոսք բացվեց դրա շուրջը, և նա ասաց, թե ինչպես է ինքը պատկերացնում՝ մեկ այն տեսարանը, երբ վրդովված պահին Մատիասը զարկում և պատռում է պատից կախված նկարը՝ կնոջ դիմանկարը։ Եվ մեկ էլ վերջում՝ մահը։ Հիմա էլ իմ հայացքի առջև են նրա աչքերը։ Առաջին դեպքում՝ նա նայում էր ինձ և թվում էր, թե աչքերը շանթ ու որոտ են արձակում, երկրորդ դեպքում՝ նրա աչքերը մեղմացան՝ ինչպես երկինքն անձրևից հետո։ Եվ մի այնպիսի տաքուկ փայլ առան, այնպիսի սիրով նայեցին, որ ես ոչ մի կասկած չունեի, որ այդ պահին նա ինձ չի տեսնում, այլ ինկենին, իր կյանքի երազին, նրան, որին տեսնելու երջանկությունն այնքան էր մեծ, որ դրանից հետո դժվար չէ այլևս այս աշխարհի հետ հաշիվները փակել։

* * *

Փափազյանի հոբելյանն էր։ Մենդյան յոթանասուն տարին։ Հոբելյանական երեկոյից հետո թատերական ընկերությունը ընթրիք տվեց։ Հրավիրված էին այլ հանրապետություններից եկած հյուրերը՝ գրողներ, ռեժիսորներ, դերասաններ։

Շատերն էին իրենց պարտքը համարում բաժակ բարձրացնել և խմել հոբելյարի կենացը, մեծարանքի խոսքեր ասել։ Հրաշյան լուռ էր և ամեն մի խոսքի վրա մի զավաթ օղի էր խմում։ Բավական գինովցած էր նա և այլևս իր

հարեանների հետ կատակներ չէր անում: Բոլորին լավ հայտնի էր, որ Հրաչյան կենացներ առաջարկելու սովորութիւն չունի, որ նա միայն սուսուփուս միանում է առաջարկվող կենացներին ու խմում: Եվ մեկը կատակով, բայց այնպէս, որ նա լսի, ասաց, թե Հրաչյան խոսք է խնդրում:

Թամադան դարձավ Հրաչյային.

— А почему нет,— ասաց ու ոտքի կանգնեց: Պըղտորված աչքերով նայեց շուրջը և թեև ուսերեն, որ հշուրերը նույնպես հասկանան, բայց ավելի մեզ, քան նրանց՝ ասաց.

— Ասում են, որ ես լավ դերասան եմ: Այնքան շատ են ասում, որ ես էլ եմ հավատում, որ լավ դերասան եմ: Բայց ես ուզում եմ, որ մարդիկ իմանան, բոլորն իմանան, եթե ես դերասան եմ դարձել՝ ապա Փափազյանի շնորհիվ, այն մարդու, որ իմ առաջին և միակ ուսուցիչն է եղել և մինչև հիմա էլ մնում է այդպիսին: Ու ես...

Դարձավ ինձ.

— Ինչպե՞ս են ասում ուսերեն ականածութիւն:

Մինչև ես կասեի, նա վրա բերեց.

— Да, благоговение,— ասաց ու շարունակեց,— ես հիմա էլ, ինչպէս նաև քառասուն տարի սրանից առաջ, գլուխս խոնարհում եմ մեծ վարպետի առաջ:

* * *

Պետք է ճանապարհովի Անգլիա: Մեկնելուցս մի օր առաջ գնացի Հրաչյային տեսութիւն: Մի քանի ամիս է, ինչ հիվանդ էր: Երկար ժամանակ մոտը չէի եղել:

Դեմքի գույնը, ինչպէս և արտահայտութիւնը, հիվանդագին էր: Շնչում էր ծանր: Աչքերը խամրած էին: Ասես ներսիսյանինը չէին: Եվ այդ պատճառով էլ երբեմն թվում էր ինձ, թե անկողնում պառկածը Հրաչյան չէ: Ճնշող էր թվում այն հակասութիւնը, որ կար նրա արտաքինի թողած տպավորութիւն և անկասկած հավատի միջև, թե միառժամանակ հետո ինքը, իսպառ ապաքինված, կրկին բեմ է բարձրանալու:

Լսել էր, որ ծրագրվում է Սունդուկյանի անվան թատրոնի արտասահմանյան շրջագայությունը դեպի արաբական երկրներ: Ասում էր, թե բավական է ինչքան պառկած մնաց, այս է, ուր որ է՝ ոտքի կկանգնի: Շատ բեմագրություններ արդեն խաղալի են: Պետք է փորձեր անել, կարգի բերել, մաքրել, հղկել:

Խոսում էր, ու թեև մարած աչքերի մեջ փայլի ոչ մի շողակ չկար՝ ձայնը համոզված հավատով էր հնչում: Եվ այնքան հաստատ, որ ես, ինչպես և հետս եղած մյուս ընկերները, թեև գիտեինք, որ մեր առջև պառկած է դատապարտված Հրաչյան, մի պահ վարակվեցինք նրա լավատեսությամբ:

Ասացի, թե վաղը թռչում եմ Մոսկվա, այնտեղից էլ Անգլիա:

Ձայն շհանեց, բարձրացրեց գլուխը, ուշադիր նայեց ինձ: Շրթունքները ժպտում էին, իսկ աչքերը ոչինչ չէին ասում: Ինձ թվաց, թե ես կոահեցի միտքը, «առողջ լինեի՝ ես էլ գայի»:

Հառաչեց:

* * *

Երբ վերադարձա՝ ուզում էի գնալ Հրաչյային տեսություն: Ասում էին, որ շատ է փոխվել, անճանաչելի դարձել: Ու ամեն անգամ մի պատրվակ գտնելով՝ այցելությունս հետաձգում էի: Մի օր էլ գնացի: 'Իա նոյեմբերի 5-ին էր, աշխատանքից հետո, ճաշի կողմը: Ինձ հետ էր Լևոն Հախվերդյանը: Տանեցիներն ասացին, թե քնած է, բայց կարճ ժամանակից կարթնանա, խնդրեցին սպասել: Ու մինչ կարթնանար՝ Լևոնը, Հրաչյայի որդին, զգուշացրեց, որ հայրը երբեմն չի ճանաչում, թե ով է եկել իր մոտ: Հետո ասացին, թե շատ երազներ է տեսնում և հաճախ արթնանում է դրանց ուժեղ ազդեցության տակ ու սկսում է խոսել տեսածից: Զգուշացրին նաև, որ խոսելիս մեկ-մեկ միտքը խառնվում է, ասածի կապը կորցնում է, անցնում նախորդի հետ ոչ մի առնչություն չունեցող նյութի:

Քառորդ ժամ էլ չէր անցել, որ արթնացավ: Անցանք նրա պառկած սենյակը: Հակառակ արված նախազգուշացման, անմիջապես ճանաչեց ինձ, Լևոնին էլ, տվեց մեր անունները: Եվ ընդհանրապես այդ հանդիպմանը նրա միտքը և հիշողությունը գործում էին բավական հստակ:

Ի՞նչ ուժ պահեց ինձ, գամեց նստածս տեղին, որ ես չճշացի ու դուրս չփախա, չեմ կարող ասել: Իսկապես շատ էր փոխվել: Ուռել էր սաստիկ: Աչքերը հազիվ էին երևում: Եվ աչքերի շուրջը ինչ-որ արնաշերտեր կային: Ձայնի մեջ ոչ մի եռանդ: Աչքերիս առաջ մահը դեգերում էր նրա գրեթե անկասկածաբար: Հետևում էի նրան, չգիտեի ինչ անել: Ահագին ճիգ էի անում, որ հանկարծ չմատնեմ ինձ պաշարած խորին հուսահատությունը:

— Վատ եմ:

Գանգատվեց, ասաց, թե այսօր ավելի, քան ուրիշ օրեր՝ օդի պակաս է զգում: Խնդրեց, որ դուռ և լուսամուտ բանան:

Հետաքրքրվեց, թե Անգլիայում եղածս ժամանակ ինչ քաղաքներ եմ տեսել: Հետաքրքրվեց, թե, արդյոք, եղե՞լ եմ Ստրատֆորդում: Ասացի, որ այցելել եմ այն տունը, որտեղ ծնվել է Շեքսպիրը: Երբ ասացի, թե տան երկրորդ հարկում՝ լուսամուտի ապակու վրա բազմաթիվ այցելուների թողել են իրենց անունները՝ հետաքրքրվեց, թե ո՞վքեր: Նախ՝ դերասանների անուններ տվի.

— Իրվինգ, Էլլեն Թերի:

Կրկեց այդ անունները, ինչպես մի խուլ արձագանք:

— Վալտեր Սկոտտ:

Ժպտաց:

— Կարլայլ:

Գլխով հաստատող շարժում արեց:

Մի պահ լռեց, հետո կարծես մի տանջալի խոստովանություն անելով՝ ասաց.

— Առողջությունս հետ դաժան վարվեցի:

Լևոնը հարցրեց, թե ի՞նչ նկատի ունի, արդյոք այն, որ շատ է խմել:

— Ո՛չ միայն այդ:

Մյուս Լեոնը կամեցավ իսկույն նյութը փոխել, և ասաց թե հայրիկի հետ որոշել են նոր տարուն մի լավ քեֆ անել, հետո մի ամսով մեկնել Վառնա, ուր նա մի-երկու տարի առաջ եղել էր Դավիթ Մալյանի հետ:

Ես զարմացա, թե ինչո՞ւ անպայման Վառնա: Ասացի, որ երեք ժամի շափ եղել եմ և ինձ վրա առանձին տպավորություն չի թողել:

— Օղբ մեղմ է, փափուկ: Իսկ ծովափը շատ գեղեցիկ է: Լեոնը, որ նույնպես եղել էր Վառնայում՝ ավելացրեց.

— Եվ սիրուն աղջիկներ:

— Աղջիկների գլուխ չունեի:

Ուղեցի կատակի տալ.

— Ինչքա՞ն էիր որ:

— Վաթսուն: Բայց հարցը տարիքը չէ: Մազերս են ճերմակ, էլ ի՞նչ աղջիկներ:

Պետք էր ստեղծված զվարթ մթնոլորտը պահպանել: Ու ես ասացի.

— Իմ մազերն էլ արդեն ճերմակել են, ուրեմն ի՞նչ, ես էլ քո օրինակի՞ն հետևեմ:

Մի պահ նայեց գլխիս, կարծես ուզում էր ստուգել, իսկապե՞ս ճերմակել եմ, թե ոչ, ապա մի կարճ լուսթյունից հետո պատասխանեց.

— Не удобо.

Հախվերդյանը ասաց՝ գիտե՞, արդյոք, որ Աճեմյանը սցենար է պատրաստել՝ «Պաղտասար աղբարը» նկարահանելու համար: Ասաց՝ այո, բայց թերահավատ ձայնով:

Խոսք բացվեց իր ծննդյան օրվա մասին: Յոթ օր հետո, նոյեմբերի 12-ին, ծննդյան օրն է: Ասացի, որ կգանք՝ Խնդրեց՝ անպայման: Հետո ավելացրեց, թե որոշել է այդ օրը կոստյում հագնել, նստել սեղանատանը և հյուրեր ընդունել: Ծննդյան օրը նշելու է կյանքում առաջին անգամ:

Ասաց, թե դեմ չէ նաև հոբելյանին:

Հիշեցի, որ մի քանի օր առաջ թղթերիս մեջ գտել եմ այն շնորհակալական խոսքը, որով ինքը պիտի հանդես գալ հոբելյանական երեկոյին: Ժպտաց: Ասացի, թե զուր է հրա-

ժարվել, պատկերացնում եմ, թե ի՞նչ լավ կանցներ հոբելյանը:

— Այն ժամանակ ուրիշ էր, հիմի ուրիշ: Հիմի ուզում եմ, թող լինի, ինչո՞ւ չէ: Պետք է նշել, պետք է տեսնել ինչ է արված, տեսնել, թե ինչ է մնում դեռ անելու: Ուզում եմ, այո՛, ուզում եմ:

* * *

Հաջորդ օրը, ցերեկվա ժամը մեկը կլիներ, երբ քաղաքում լուր տարածվեց, թե Հրաչյան չկա այլևս:

Մեր զնալուց հետո՝ երեկոյան վատ է դարձել: Ես և Հախվերդյանը եղանք նրա վերջին այցելուները: Առավոտյան արթնացել է և չի կարողացել խոսել, միայն մի անգամ տվել է աղջկա անունը, և այլևս ոչ մի խոսք:

Ես հանձն չեմ առնում նկարագրել թաղման թափորը: Դժվար է, իմ ուժերից վեր:

Դազադը դրված էր թատրոնում: Ժողովուրդ էր, որ զալիս էր վերջին տեսություն: Տպավորությունն այնպես էր, որ ամբողջ քաղաքն այդտեղ է, թատրոնի այգում:

Երբ դազադը դուրս էին բերում, հնչեց Առնո Բաբաջանյանի երաժշտությունը, գրված «Իմ սիրտը լեռներումն է» բեմադրության համար: Ոչ մի այլ նվագ այդպես չէր հնչի: Զուգահեռները շատ էին: Այդ երաժաշտությունը բոլորին տանում էր դեպի նրա կյանքի օրերը, վերջին դերը՝ Մեք-Գրեգորը... Եվ մանավանդ որ մտածված անսիրտության դադադին էր նետված Մեք-Գրեգորի բեմադրեստը և նրա շեփորը:

Սրտամորմոք, ողբերգականորեն վեհացնող տեսարան:

Թատրոնի դռները արդեն փակ էին: Ով ներս չէր ընկել՝ աղմկում էր, բախում դռները, սպառնում ջարդել: Ուշացողը չէր հաշտվում, որ ուշ է եկել: Բոլորը մտածում էին, թե իրենք իրավունք ունեն բոլորի նման՝ լինել դադադի կողքին: Եվ իրավացի էին: Իսկ դռները փակ էին ու դուրս մնացած բազմության թիվը անցնում էր մի քանի տասնյակ հազարից: Մարդիկ լցվել էին թատրոնի այգին, Շահումյանի հրապարակը, շրջակա փողոցները, և չգիտեին, որ դադադն

արդեն դուրս են բերել թատրոնի ետևի մուտքից: Մյուս օրն ասացին, թե այդում հղած ժողովուրդը, այդ լուրն ասնելով, վրդովվել է՝ ումի՞ց են փախցնում իրենց դերասանին, ինչե՞ր ասես չեն ասել, չիմանալով, որ ետևի մուտքից են դուրս բերել, որ չլինի՞ թե հանկարծ զոհեր լինեն...

* * *

Գերեզմանոցից տուն դարձանք և, մեր ժողովրդական սովորովթյան համաձայն, սեղան նստեցինք: Բացի մեզանից, սեղանի շուրջը տեղ էին գրավել Վրաստանից և Ադրբեյջանից եկած հյուրերը: Այդ թվում և Ադրբեյջանի ժողովրդական դերասան Մարդանովը, որ ճանաչում էր Հրաչյային Պոլսից, նրա պատանեկան տարիներից: Այստեղ էր և Ակակի խորավան, որի սերը դեպի Հրաչյան ու ակնածանքը նրա արվեստի նկատմամբ, վաղուց հայտնի է: Շատերը խոսք ասացին: Խոսեցին և հյուրերը: Խոսք ասաց և խորավան: Վավիկ Վարդանյանը, որ նստած էր գիմնաս՝ հեռացավ սեղանից և մի կարճ ժամանակից վերադարձավ ու գրավեց իր տեղը: Զեռքին մի մեծ ծրար կար: Սեղանը մոտենում էր իր ավարտին, երբ նա բարձրացավ տեղից ու դարձավ խորավային: Հուզված էր, դեմքը գունատ:

— Դուք Հրաչյայի լավ բարեկամն էիք: Եվ այսօր, երբ մեր ժողովուրդը սուգի մեջ է՝ դուք մեզ հետ եք: Ես տանից հիմա բերի մի լուսանկար, որ տամ ձեզ՝ իբր հիշատակ: Այստեղ երեք հոգի են լուսանկարված, որոնցից մեկը, ավա՛ղ, արդեն չկա:

Եվ լուսանկարը, ձեռքից-ձեռք անցնելով, հասավ խորավային: Լուսանկարված էին բեմի երեք գործիչներ՝ Հրաչյան, խորավան և ինքը՝ Վավիկը:

Խորավան նայեց լուսանկարին և աչքերից արցունքներ հոսեցին: Ոտքի կանգնեց: Մի ձեռքով բռնել էր լուսանկարը, մյուսով սրբում էր թարթիչներից կախված արցունքի կաթիլները: Գինու բաժակը ձեռքն առավ: Ուզում էր խոսք ասել, բայց հուզմունքը չոքել էր կոկորդին ու ճնշում էր: Եվ, մի կերպ հաղթահարելով հուզմունքը, կարողացավ այսքան միայն ասել.

— Да здравствует жизнь!

Հավաքում եմ գրածս թերթերը՝ թղթապանակի մեջ ամփոփելու համար: Եվ հանկարծ այնտեղ՝ թղթապանակում, գտնում եմ մի թերթիկ, որ առաջ չէի նկատել, թվագրված է «25 հոկտեմբերի, 1955 թ.»։ Կարդում եմ.

«Մի մեքենագրուհի, որին թելադրում էի Ներսիսյանի հոբելյանական երեկոյի համար գրածս զեկուցումը, պատմեց հետևյալը.

— Մեր հարևան բաղում ապրում է մի երիտասարդ, որը իրեն խմելու է տվել: Կռվարար, անկարգ տղա է, միշտ հայհոյանքը բերանին: Հրաշյա Ներսիսյանի երկրպագուներից է: Նրա ոչ մի նոր խաղը բաց չի թողնում: Նույն գերակատարումը նայում է մի քանի անգամ: Եվ միշտ պատմում է իր տպավորություններն այնպիսի ոգևորությամբ, ասես առաջին անգամ է տեսել: Եվ ամեն անգամ Հրաշյայի խաղը նայելուց հետո մի տեսակ «մաքրվում է», կարգի է ընկնում, չի խմում, կռվի չի բռնվում, չի հայհոյում, տանը կամ դուրսը որևէ գործ է անում, եթե բակից ջուր ենք բերում՝ գալիս է դույլը ձեռքներինցս վերցնում...»:

Մեքենագրուհին, որ պատմել էր այս, նույնպես չկա: Բժիշկները չհասկացան նրա հիվանդությունը, և այն օրերին, երբ նոր էր լրանալու նրա կյանքի քառասուն տարին՝ զնաց:

Կարդում եմ թերթիկն ու տխրությամբ մտածում, որ չկա դերասանի բազմահազար երկրպագուներից այս մեկն էլ: Զկա և ինքը՝ Հրաշյան: Բայց կյանքը կա: Մարդիկ երախտապարտ սրտով կհիշեն Հրաշյա Ներսիսյանին, հպարտությամբ կտան նրա անունը: Զէ՞ որ նա իր արվեստով այնքան մարդկային էր, այնքան հրճվանք էր բերում մարդկանց: Բայց ավելի ևս նրա համար, որ Հրաշյայի արվեստի ազդեցությամբ «մաքրագործվում» էին հոգիները՝ դառնում ավելի լավ, ավելի բարի, ավելի հարուստ:

ԵՐԿՈՒ ԵՂԵԼՈՒԹՅՈՒՆ

Դեպքը, որի մասին պետք է պատմեմ, տեղի է ունեցել զնացքում: Մոսկվայից Երևան էի վերադառնում: Իմ բախտից կուպեում ոչ ոք չկար: Հոգնած էի, մտածեցի, լավ է, կհան-

գըստանում, իսկ երբ դիմացդ ուղեկից կա՝ ուզես չուզես պետք է հարմարվես նրան, ծանոթանաս, զրուցես: Բայց ուրախությունս երկարատև չեղավ: Մյուս առավոտ աչքս բացի և տեսնեմ դիմացս նստած է մի աղջիկ՝ եղնիկի աչքերով: Ես աչքերս հպծպացրի: Նա ժպտուն հայացքով նայեց: Ըստ երևույթին հասկացավ, որ ես ստուգում եմ՝ երազո՞ւմս եմ, տեսի՞լք է իմ առաջ, թե իրականություն:

Տեղի ունեցավ առաջին ծանոթությունը: Գնացքում մարդ կարճ ժամանակում իմանում է այնքան, ինչքան չի իմանա այլ պայմաններում, մի քանի օրվա ընթացքում:

Աղջկա անունը Նատաշա էր, ազգանունը՝ Բիրյուկովա: Ծնողներին կորցրել է Հայրենական պատերազմի ժամանակ: Մեծացել է մորաքրոջ մոտ: Միտք է ունեցել կինոգերասանուհի դառնալ, բայց ավարտել է **Խարկովի Բժշկական** ինստիտուտը և այնտեղ էլ աշխատում է հիմա: Իր տարեկան արձակուրդն է, գնում է Ռոստով՝ մորաքրոջ մոտ:

Հենց որ իմացավ Երևանից եմ, հարցրեց.

— Ճի՞շտ է, որ հայերը լավ դերասաններ ունեն:

Եվ չսպասելով պատասխանիս, ասաց, թե ինքը Խարկովում տեսել է մի հայկական կինոնկար, որից չի երևում, թե այդպես է:

— Ոչինչ չունեմ, փորձված դերասաններ են, իրենց գործի մեջ վարժ մարդիկ, գիտեն, թե ինչ է հարկավոր և անում են,— փորձում էր հիմնավորել իր անբավականությունը:— Բայց ես նրանց չհավատացի: Իրենք էլ, իմ կարծիքով, չէին հավատում ոչ իրենց ասածին, ոչ էլ արածին: Դրանից հետո,— շարունակում է իր խոսքը Նատաշան,— ես այլևս հայկական նկարներ չէի նայում: Յուրյն էին տալիս «Ջանգեզուրը»: Զէի ուզում գնալ, ընկերուհիներս ուժով տարան: Եվ ի՞նչ լավ արին: Նկարը ոչինչ, վատը չէր, բայց մի դերասան էր խաղում, որին տեսնելը ինչ ասես արժեք: Ես շատ եմ սիրում խաղական նկարները: Բայց այդպիսի դերասանի չեմ հանդիպել ո՛չ այնտեղ, ո՛չ էլ մեր մյուս նկարներում:

Մի պահ կանդ առավ:

— Ես հավատացի նրան: Հավատացի, ինչպես ինձ: Ու այդ գիշեր չքնեցի: Անընդհատ իմ աչքի առջև նրա պատկերն

էր: Իսկ մյուս օրը ընկերուհիներին ու հիվանդներին նրա մասին էի պատմում: Ինչպես սիրահարվածը՝ պահանջ էի զգում նրանից խոսելու:

— Ազգանունը չե՞ր հիշում:

— Ինչպես չէ:

Ասաց ու պայուսակից հանեց ծոցատետրը, թերթեց, գտավ որոնած էջը:

— Հրաշյա Ներսիսյան:

Ցույց տվեց ինձ ծոցատետրը, որ տեսնեմ՝ ճիշտ է գրել, թե չէ:

Մի քանի մանրամասնություններ պատմեցի Հրաշյայի կյանքից: Լսում էր հետաքրքրությամբ, նույնիսկ լարված, որ չլինի, թե հանկարծ ասածիցս մի բան բաց թողնի: Հետո խնդրում էր կանգ առնել ու շտապ-շտապ նշումներ էր անում ծոցատետրում և ապա նրա մասին անվերջ լսելու պատրաստակամությամբ աչքերը հառում վրաս: Ու ես պատմում էի ինչ որ գիտեի:

— Ի՞նչ լավ եղավ, որ հանդիպեցի ձեզ, — ասաց Նատաշան ու շնորհակալ աչքերով նայեց ինձ:

Մի կարճ ժամանակ հետո ժպտաց:

— Գիտեմ, որ ծիծաղելու եք, բայց քանի որ խոսք է բացվել, ուզում եմ մի խոստովանություն անել:

Մի պահ կանգ առավ: Ինձ թվաց, թե տատանվում է՝ ասե՞լ, թե չէ, բայց քանի որ սկսել էր, ինքն էլ համարձակ աղջիկ, չկամեցավ նահանջել:

— Ես ամուսնացած չեմ: Եվ գիտե՞ք ինչու: Ձեր այդ Ներսիսյանի պատճառով: Հիմա դուք կմտածեք, թե ինչ կապ կարող է լինել Ներսիսյանի և իմ ամուսնության միջև: Բայց կա և շատ սերտ:

Ասաց ու ծիծաղեց:

— Փեսացուներ շատ եմ ունեցել: Բայց ինձ դուր չեն եկել և միշտ քշել եմ նրանց ինձանից: Վերջապես մեկն ինձ դուր եկավ: Մի ամիս ամեն երեկո հանդիպում էինք, գնում էինք կինո, համերգ: Ավելի հաճախ՝ թափառում էինք քաղաքի խուլ փողոցներով: Ես երջանիկ էի, նա նույնպես: Որոշված էր՝ պետք է ամուսնանայինք: Այդ ժամանակ էր,

որ տեսա Հրաշյա Ներսիսյանին՝ կինոնկարում: Եվ մի ներքին որոշում հասունացավ մեջս՝ իմ ամուսինը պետք է այնպիսին լինի, ինչպեսին նա է: Իսկ իմ փեսացուի մեջ ոչինչ չկար նրանից: Եվ նա՝ իմ փեսացուն, պատկերացնում եք, այլևս ինձ դուր չէր գալիս: Խեղճ տղա: Խնդրում եմ ասածս չհամարեք կանացի կամակորուժյուն: Ծիշտ այդպես է եղել, ինչպես պատմում եմ: Ու ես ասացի նրան, որ միտքս փոխել եմ: Ինչքան ուզեց իմանալ պատճառը՝ չասացի: Նույնը և աղջիկներին, որ ասում էին, թե բախտը կանգնել է իմ առջև, իսկ ես նազ ու տուզ եմ անում: Չասացի, գիտեի, որ չեն հասկանա, կծիծաղեն վրաս: Բայց այդպես էր: Դրանից անցել է երկու տարի և չեմ զոջում արածիս համար. սպասում եմ ու հավատում, որ կգա նա՝ իմ փեսացուն, նա, որ նման կլինի նրան:

Ոչինչ չասացի:

— Դուք ծանոթ եք հետը:

— Այո:

— Ինչ բախտավոր եք: Երբ հասնեք Երևան՝ բարևեք նրան: Ասացեք, որ Նատաշա Բիրյուկովան, Խարկովում ապրող մի բժշկուհի, իր երկրպագուն է:

Ես լուռ էի:

— Լավ:

Հայացքս փախցրի նրանից:

Նա դեմքը մոտեցրեց ինձ, գտավ իմ աչքերը և վախվորած արտահայտությամբ նայեց ուղիղ աչքերիս մեջ: Ոչինչ ասել պետք չէր: Նա ամեն ինչ հասկացավ: Լուռ ետ կեցավ, և մեջքով պինդ սեղմվեց թիկնակին: Ներքին այրողից էր, թե ինչ, մի պահ շառագունեց, հետո գունատվեց, դարձավ ճեպ-ճերմակ: Եվ արցունքները, խոշոր կաթիլներ, վազեցին: Լուռ էր: Ես էլ ոչ մի ձայն չէի հանում:

Ոչ մի վշտահար անվերջ լաց չի լինում: Այդպես էլ Նատաշան: Նա մի հոգոց հանեց և թաշկինակի ծայրով սրբեց աչքերի թարթիչներին կախված վերջին արցունքը ու մի շնորհակալ արտահայտությամբ նայեց ինձ, երևի նրա համար, որ լուռ մնացի, չխանգարեցի իրեն լալ: Եվ այլևս ոչինչ չխոսեց հետո: Ավելի շատ պատուհանից դուրս էր նա-

յում, իր տխուր հայացքը բնությանը հառած, իսկ երբ այդ զբաղմունքից հոգնած շրջվում էր իմ կողմը, ապա խռովկան արտահայտությամբ մենում էր զլխահակ, ասես անհարկի վշտացրած լինեի նրան:

Մյուս օրը Ռոստով հասանք: Նա վերցրեց իր փոքրիկ ճամպրուկը, դանդաղաքայլ առաջացավ, դռան մոտ շրջվեց իմ կողմը, խուլ և անտարբեր ձայնով ասաց.

— Ի՞նչ լավ կլիներ, եթե չհանդիպեի ձեզ:

Արդեն ուշ գիշեր էր, բայց ես քնած չէի: Հայացքիս առաջ նորից կանգնած էր նատաշա Բիրյուկովան, ոչ թե արցունքն աչքերին, ոչ էլ խռովկան, այլ այն նատաշան, ոչ փութկոտ սիրով զրի էր առնում իր ծոցատետրի մեջ Հրաչյայի մասին իմ ամեն մի պատմածը: Ես մտածում էի, թե ինչ երջանկություն է, երբ քեզանից հեռու, ինչ-որ տեղ կա մի սիրտ, որ բաբախում է քեզ համար, չափանիշ համարում քեզ իր կյանքի հակասական ճանապարհին:

* * *

Կես տարի էր անցել Հրաչյայի մահից: Մի քանի քնկերներով, որոնց մեջ նաև Լևոն Ներսիսյանը, գնացինք գերեզմանատուն: Գիշեր էր: Ժամն էլ բավական ուշ: Երբ տեղ հասանք՝ տեսանք երեք մարդ նստել են թարմ ծաղիկներով զարդարված հողաթմբի կողքին: Այս երեքն էին բերել ծաղիկները, թե ուրիշ երեք այցելու՝ դժվար էր որոշել: Բայց որ սրանք գինու շշով էին եկել և մի սրտագին խոսակցություն սկսել՝ կասկածից վեր էր: Սկզբում մեզ վրա ուշադրություն չդարձրին, բայց հետո, երբ տեսան, որ անցանք և կանգնեցինք հողաթմբի մյուս կողմում՝ անբավական նայեցին միմյանց և ապա իրենց դժկամ հայացքները ուղղեցին մեզ: Հասկացանք, որ մեր գալով խանդավոց նրանց կյանքի նվիրական պահերից մեկը: Վաղիմ Մելիքեթյանն ուզեց փրկել դրությունը և դառնալով նրանց, բայց մատնացույց անելով Լևոնին, ասաց.

— Հրաչյա Ներսիսյանի որդին է:

Երեքն էլ կերպարանափոխ եղան: Անմիջապես ոտքի

կանգնեցին: Լեոնի մեջ գտան արտիստին, որի սերը գիշեր-վա ուշ ժամին բերել էր նրանց այստեղ: Ինձ թվաց, թե նրանք անհարմար զգացին իրենց մտերմական անկեղծու-թյան համար այդ պահին, և այն, որ իրավունք էին վերա-պահել «գու»-ով դիմել մեծ մարդու հիշատակին: Մեկը ճա-կատին թափված մազերը ետ մղեց, մյուսը շապկի բաց կոճակները կոճկեց: Ու նրանցից մեկը, մոտեցավ Լեոնին, **զրկեց ու ասաց.**

— Դու բախտավոր ես:

Լեոնը ձայն չհանեց:

— Դու բախտավոր ես, որ քո ցավը քո ցավը չէ միայն: Բոլորինս է, ամբողջ ժողովրդինը:

Այլևս ոչ մի խոսք չասացին: Թողին ու հեռացան: Ուրբեր էին՝ այդպես էլ չիմացանք: Եվ ինչ կարևոր է:

Այդ գիշեր երկար ժամանակ քուն չեկավ աչքերիս: Ես Հրաչյայի մասին չէի մտածում: Ոչ էլ նրա որդու: Մտածում էի այն երեքի մասին: Մտածում էի այն մասին, որ ժողո-վուրդը ժողովուրդ է ոչ միայն ներկայում, ոչ միայն ապագայի ձգտումով, այլև հիշողությամբ, որը մի խնամքոտ իմաստու-թյամբ անցյալից ջոկում և պահպանում է այն, ինչ նրա հետ է այսօր և նրա հետ կլինի վաղը՝ դալիքի շմին:

1925 թվական: Թիֆլիս: Թատրոնով տարված պատանի էի, որ առաջին անգամ Փափազյանին տեսա բեմում. Օթելլոյի դերն էր կատարում: Այդ տարի Աբելյանն էլ եկավ: Նա էլ Օթելլո խաղաց: Աբելյանի խաղում կար մի բան, որ քնկավ սրտիս խորքերը և մնաց մինչև օրս: Ինչ վերաբերում է Փափազյանին, որ իր արվեստով գերել էր հանդիսատեսին, ինձ համար բեմի գերագույն մակարդակը եղավ, ու եթե մի երկու տարի անց դիմում տվի և ընդունվեցի «Հայարտան» դրամատիկական սուուդիան՝ «մեղքը» Փափազյանինն էր:

Փափազյանը մեզ դաս էր տալիս՝ դերասանի վարպետություն: Տեեք դա մի ամբողջ տարի: Չկար ներկայացում, այն էլ Փափազյանի մասնակցությամբ, որ բաց թողնեի՝ Օթելլո, Համլետ, Արեհներին, Ղարա, Դոն-ժուան, Ժորժ, Քին:

Երկու տարի տեեք իմ հափշտակությունը. թատրոնը թողի, բայց Փափազյանը ինձ համար մնաց Փափազյան: Տեսել եմ նրա բազմաթիվ խաղերը և՛ այն դեպքում, երբ նա «գլուխ է պահել» և՛ այն դեպքում, երբ, թող որ հնաոճ հնչի, աստվածային է եղել...

Իմ բարեկամությունը Փափազյանի հետ սկսվեց հայրենական պատերազմի տարիներին:

1944-ին Երևանում կազմակերպվեց շեքսպիրյան փառատոն: Փափազյանը չկար: Մի օր մեր անվանի դերասաններից մեկին հարցրի, թե ինչո՞ւ Փափազյանը հրավիրված չէր: Եվ այդպես խոսք բացվեց Փափազյանի մասին: Անվանի դերասանը մի արտառոց միտք հայտնեց. բնությունը, — ասաց նա, — Փափազյանին տվել է ամեն ինչ և այնպիսի չափերով, ինչպես ոչ ոքի, բացի մտքից: Նրա խաղերում միտք չկա: Ես վեճի բռնվեցի: Եվ այդ օրը, վեճի տպավորության տակ,



մտածեցի գրել Փափազյանի Օթելլոյի մասին ու ցույց տալ, թե նրա միտքը ինչպիսի հազվագյուտ խորք ունի: Փափազյանին նամակ գրեցի, հարցնելով, թե երբ է մտադիր գալ, որ միտք ունեմ անդրադառնալ նրա Օթելլոյին: Ուղարկեցի նրան «Համլետի» մասին գրած իմ հոդվածը: Ստացա ընդարձակ պատասխան:

Ի՞նչ փոթորկալի արկածների միջով ասես, որ չի անցել Փափազյանի կյանքը: Լրջությունը կյանքի անխորշ հաճույքներից ներդաշնակելու դժվար կենսաձևին տիրացած՝ աշխարհի որ անկյունում ասես, որ չի եղել: Եվ ամենուրեք Փափազյանի անունը շրջապատվել է խոսք ու զրույցով նրա տարածված հռչակից, դասական գեղեցկությունից, նրա շուրջը հյուսված բազում առասպելներից: Երիտասարդությունը շտապել է ծանոթանալ, նրա ինքնագիր մակագրությունը խնդրել գրքի կամ լուսանկարի վրա, կարծես այնքան շռայլությամբ նրան բաժին ընկած անմահությունից մաս «մուրալով»: Արկածախնդիր կյանքի բոլոր վտանգներից նա անցել է անվտանգ. սեր տվել, սեր առել, սեր առել՝ անսեր թողել: Այսպես նա հասել է իր փառքի կատարներին՝ վայելելով կյանքը, ինչպես մի ճշմարիտ արվեստագետ...

Ահա այդ նույն Փափազյանը ինքնահոգժար մնաց պաշարված լենինգրադում: Նա կարող էր ավելի շուտ գալ: Բայց նա չլքեց պաշարված քաղաքը պատերազմի նույնիսկ ամենաահեղ օրերին, թեև շատ ուրիշ հռչակավոր դեմքերի հետ՝ նրան ևս առաջարկեցին մեկնել: Թշնամու գնդակների տարափի տակ շրջում էր զորամասից զորամաս, զրուցում ռազմիկների հետ, նրանց համար ոգի և արիություն բերող խոսքեր գտնում Շեքսպիրից և իր սրտից:

Փափազյանը մեզ մոտ եկավ պատերազմից հետո միայն: Նստած եմ Փափազյանի դիմաց: Զրուցում ենք:

Սա նույն Փափազյանը չէ, որին մենք տեսել ենք տարիներ առաջ: Պատերազմը գրել է իր կնիքը. սիրելի վայրերի ավերում, հռչակավոր կոթողների կործանում, ուբալկոծություն ահ, նույնիսկ հարազատի կորուստ... Փոխվել է նա: Առաջ էլ խելք էր նրա հայացքը, բայց միշտ էլ մի անհոգ, ավելի շուտ՝ չարաճճի զվարթությամբ քողարկված: Այժմ

անհոգությունը տեղի է տվել մի փոքր կարծես հոգնած արտահայտության՝ մտքի և հոգու այն շտեմնված լարումից, որ նա ապրել էր այդ տարիներին:

* * *

1945-ին Փափազյանը անցել էր Բաքու, մտադիր էր դնալ Բերլիսի, իսկ այժմ եկել էր Երևան: Բաքվից հեռագիր էր ուղարկել և խնդրել թատրոնի ղեկավարություն համաձայնությունը՝ հանդես գալու մի քանի ներկայացումով: Մերժել էին: Եվ Փափազյանը Երևան եկավ որպես կոնցերտանտ: Հայֆիլհարմոնիայի Փոքր դահլիճում հանդես եկավ: Օթելլոյից, Մակբեթից, Համլետից, Լիրից մենախոսություններ էր կարդում, ինչպես նաև բանաստեղծություններ Պեշկեթաշյանից ու Տերյանից:

Կավ հիշում եմ. հազին սև ֆրակ կար: Շատ էր նիհարել: Դեմքը գունատ էր, հայացքը թախիժով լի և գլուխն էլ մի կեթե օրորվում էր:

Կատարում էր, իհարկե, լավ, բայց դա մեր իմացած Փափազյանը չէր: Անտրամադիր էր, և այնպիսի տպավորություն էր ստացվում, թե պարտք է կատարում:

Առաջին համերգի ընդմիջմանը շտապեցի իր մոտ: Այնտեղ էր և Հրաչյա Ներսիսյանը, որը, ի տարբերություն մեր մյուս աչքի ընկնող դերասանների փալլուն բացակայության, շտապել էր ներկա լինել:

Տեսնելով, որ կողմնակի մարդ չկա մեր կողքին, Հրաչյան, որ Փափազյանին համարում էր իր ուսուցիչը, հաղթահարելով անհարմարության զգացումը՝ ասաց.

— էս ի՞նչ ես անում, վարպետ, մի քիչ ցույց տուր, ինչպես առաջ: Ինչի՞ ես թողնում, որ ժողովուրդը տխրի, ու դահլիճում ցուրտ լինի:

Փափազյանը ժպտաց: Եվ այդ ժպտի մեջ կար մի այնպիսի դառնություն, որ ես երբեք չէի տեսել նրա դեմքին ոչ միայն այդ պահին, այլև դրանից հետո: Սևեռեց հայացքը ընկերոջ աչքերին և մի այնպիսի շեշտված, ազդու արտահայ-

տությամբ, որ սա իրեն վատ զգաց, մտածելով. թե երևի վշտացրեց նրան:

Փափազյանը ձեռքը դրեց Հրաչյայի ուսին:

— Ուրեմն էս նստած, երրորդ կարգում: Շատ լավ: Քեզ համար մի կտոր կկարդամ, միայն մի կտոր: Ավելին չպահանջես, այսօր չեմ կարող, ուժիցս վեր է: Այդ էլ կկարդամ քեզ համար, հասկանում ես, միայն քեզ համար, որ տեսնես, թե Վահրամդ ինչի է ընդունակ, այն Վահրամը, որի առաջ, սրիկանե՛ր, պինդ փակել եք թատրոնի դռները:

Հրաչյան վիրավորվեց: Եվ իրավունք ուներ: Իսկ Փափազյանն էլ այդ ասելիս, իհարկե, նկատի չունեի նրան, բայց առիթ էր որոնում հոգու դառնությունն արտահայտելու:

— Գիտեմ, գիտեմ, սիրելի՛ս:

Ու պինդ գրկեց Հրաչյային, սեղմեց կրծքին, համբուրեց և դարձավ հեռվում կանգնած մի մարդու ու կարգադրեց երրորդ զանգը տալ:

Մտանք դահլիճ: Հրաչյայի կողքին ազատ աթոռ կար. նստեցի նրա մոտ: Բեմ եկավ Փափազյանը և սկսեց կարդալ այնպես, ինչպես առաջին բաժնում: Հրաչյան շուտ եկավ իմ կողմը, նայեց ինձ դարմացած, ուսերը վեր բարձրացնելով: Փափազյանը, որ այդ ժամանակ լիրից մի հատված էր կարդում, որսաց ընկերոջ այդ հայցքը և ժպտաց: Այս անգամ նրա ժպտի մեջ չարաճճի գոհունակություն կար, ասես ուրախ էր, որ բարեկամին ջղայնացնում է:

Համերգը մոտենում է վախճանին: Իսկ Փափազյանը շարունակում է նույն ձևով: Հրաչյան նստած է ճնշված: Հայտարարվեց վերջին համարը՝ մենախոսություն Մակբեթից: Նա կարդաց այն կտորը, երբ Մակբեթը...

Երկու խոսք էլ չէր ասել, որ ամբողջ դահլիճը լարվեց: Մարդիկ շունչները պահած հետևում էին Փափազյանին: Նկարագրել հանձն չեմ առնի: Բայց չեմ կարող նրա կատարումից մի պահ չարձանագրել. դեմքի մի այտը՝ աջը, կանգ առավ, քարացավ, իսկ մյուսը ջղային ցնցում էր ապրում, մկանները դողում էին, իսկ աչքը ասես ծովել էր, կարծես ջանք էր թափում խոռոչից դուրս գալու: Սահմկեցուցիչ մի պատկեր էր դա: Նայում էիր ու սարսափում: Տանջահար մի

ոճրագործ էր մեր աչքի առաջ: Երկու մարդ կռվում էին նրա մեջ: Ոճրագործը հաղթեց: Եվ երբ նա բարձրացրեց այ ձեռք՝ երևակայական դաշույնը բռնած՝ մարդիկ տեսան այդ դաշույնը: Այո՛, տեսան: Ու թեև լավ գիտեի, որ նրա ձեռին ոչինչ չկար, ոչ ոք ինձ չի կարող համոզել, թե նրա ձեռին այդ պահին, լույսի տակ շողացող դաշույն չկար:

Երբ մենախոսությունն ավարտվեց, դահլիճը թնդաց որոտալի ծափերից, իսկ ինքը, լուռ ու գունատ, գլխահակ կանգնել էր իրենով հիացած հասարակության առջև:

Երբ տոն էինք գալիս, Հրաչյան լուռ էր: Երևում էր, որ տեսածի տպավորության տակ էր: Եվ հանկարծ կցկտուր ասաց.

— Հրաչք էր: Չեմ հավատում, թե մի ուրիշ դերասան էլ դրան ընդունակ լինի:

Կարճ լռությունից հետո.

— Եթե աչքովս չտեսնեի, ուրիշները պատմեին՝ չէի հավատա:

* * *

Փափագյանը մի օր ասում էր, թե ինչ կցանկանար իրադալ: Հիշեց Սիրանո դը Բերժերակը, էդիպը, Թիմոն Աթենացին:

— Իմ ամենամեծ երազը մնում է Թիմոն Աթենացին: Ասում են Ադամյանը շատ է մտածել խաղալու մասին: Դա իմ վաղուցվա երազն է: Ինձ հետ և իմ մեջ մեծանում, հասունանում է այդ պահանջը:

Հարցրի՝ իսկ Արքա Լի՞ր:

— Արքա Լի՞ր, դա արդեն պատրաստ կերպար է, կենինգրադում խաղացել եմ, մնում է աշխատել հայերեն տեքստի վրա:

Հարցրի, թե ինչպես ընդունվեց կենինգրադում նրա Լիրը, Փափագյանը նայեց իմ կողմը, ժպտաց՝ և խուսափելով հարցի պատասխանը տալուց՝ ասաց.

— Ես Լիրի կերպարի շուրջը շատ էի խորհել, տարիներ անընդհատ զբաղվել, բայց գտածս ըմբռնումը կենդանու-

Թյուն առավ միայն վերջին ժամանակները: Ես մի աղջիկ ունեմ, որին անչափ սիրում եմ: Թատրոնին է նվիրել իրեն և կարծես ոչ-անհույս: Աղջիկս աննկատելի մեծացավ, բայց ես կորցրի նրան պատերազմի ժամանակ: Ես այդ զգացի առանձնապես կնոջս մահից հետո, ինչպես երևում է՝ նա էր մեզ իրար բերողն ու կապողը: Մեծացավ, ինքնուրույն սկսեց մտածել: Մի տեսակ իր բախտին հանձնվեց: Կյանքի հանգամանքները դասավորվեցին այնպես, որ ես նրան ղեկավարել չկարողացա, հայրական իրավունքներս կորան ու ես զգացի, որ աղջիկս ձեռիցս գնում է: Ու ես, մի տեսակ շոշափեցի Լիրին, զգացի նրա հոգեբանությունը: Աղջկաս կապակցությամբ ունեցած ապրումներս օգնեցին կծիկի միջից գտնելու այն թելը, որը քաշելով՝ կարելի էր զգալ, հասկանալ Լիրին:

* * *

Մի անգամ էլ անդրադարձավ «Սիրանո դը Բերժերակ» խաղալու մտքին:

«Սիրանոն» զգույշ պետք է խաղալ, Ռոստանը խոր հեղինակ չէ, բայց փայլ ունի, սրամտություն, կենսախնդություն: Շատ կուղեի Սիրանո խաղալ: Սիրանոյի թարգմանությունն ունեմ, որ կատարել եմ վաղուց և խաղացել: Հիմա կշտկեմ, նորից աչքի կանցկացնեմ:

* * *

Վերջապես, Փափազյանին իրավունք տրվեց Սունդուկյանի անվան Թատրոնում հանդես գալու: Չորս ներկայացում էր տալու, երկու անգամ Օթելլո, նույնքան էլ Համլետ:

Առաջին ներկայացումը նշանակված էր 1946-ի հունվարի 19-ին:

Ժողովուրդն անհամբեր էր տեսնելու նրա խաղը: Բոլորն անխտիր, և՛ նրանք, որ մի ժամանակ տեսել էին, և՛ նրանք, որ առաջին անգամն էին տեսնելու: Թատրոն էին շտապում ամենքը: Ուլքեր տեսել էին՝ ճշմարիտ արվեստի գերազույն

հանույքը մի անգամ էլ զգալու, իսկ ովքեր չէին տեսել՝ լսածով գայթակղված, սրտատրոփ սպասում էին վարագույրի բարձրանալուն՝ հազվագյուտ խաղ տեսնելու նախահանույքն ապրելով։ Դժվար է նույնիսկ որոշել, թե ով էր ավելի անհամբեր, նա՞, որ տեսել էր, այն էլ մի քանի անգամ, թե նա, որ առաջին անգամ էր դիտելու։

Վերջապես՝ վարագույրը բացվեց։ Ներս են մտնում Յագոն և Ռոդրիգոն։ Մի փոքր իրար հետ զրուցելուց հետո, աղմուկով ձայն են տալիս Բրաբանցիոյին. կեսգիշերին արթնացնելով ծերունուն, հայտնում են նրա աղջկա՝ Դեզդեմոնայի փախուստը և ամուսնությունը Օթելլոյի հետ։ Պատկերը վերջացավ, կանաչ թավիշն վարագույրներն իրար եկան։ Մի փոքր հետո, վարագույրի մեջտեղի ծալքը ետ գնաց, երևաց Յագոն, ճանապարհ տալով Օթելլո-Փափագյանին։

Ահա և վերջապես Օթելլո-Փափագյանը բեմի վրա իր բոլոր շքեղությամբ՝ փառահեղ զլուխը լայն ուսերին, կանգնած հաստատ ու հպարտ։

Թատրոնը դղրդում է ծափերի որոտից։ Ծաղկեփնջեր են բեմ թռչում։ Փափագյանը բռնում է ծաղկեփնջերից մեկը, գոտկատեղից հանում կեռ դաշույնը, մի վարժ հարվածով կիսում ու ետ նետում դեպի հասարակությունը։ Յրիվ եկած ծաղիկները դահլիճով մեկ շաղ եկած՝ ընկնում են այս ու այն կողմ։ Եվ այս ամենը այնպես հանգիստ, այնքան զեղեցիկ ու ձոխ, որ կարծես դերի մի մասը լիներ։ Ճիշտ է, ծափերի մի նոր թնդյուն է բարձրանում, բայց և արտիստի մի շարժումը բավական է, որ թատերասրահը նորից ենթարկվի իրեն և այնուհետև մինչև ներկայացման վերջը, բոլորին պահի իր զորեղ հմայքի տակ։

* * *

Իմ այն հարցին, թե պատերազմը դեր խաղացե՞լ է, արդյոք, իր անձնավորած կերպարների ըմբռնման մեջ։

— Արտիստը կյանքից է, հետևաբար, այնպիսի խոշոր իրադարձությունը, ինչպես պատերազմն է, չէր կարող աննշմար անցնել, միայն թե երևի շատ դժվար է ասել, ի՞նչ

ինչի՜ ազդեցության տակ ի՞նչը ինչպես եղավ: Այդ ազդեցությունները կուտակումներ են, հոգեկան կուտակումներ, որոնք քո գիտակցության, թերևս, ավելի ճիշտ լինի ասել, ենթագիտակցության մեջ շերտ առ շերտ հավաքվում և մի օր հանկարծ զգալ են տալիս իրենց այնպես, որ դու ինքդ էլ կոժվարանաս ասել, թե սա այսպես եղավ, որովհետև կյանքում այսինչ ժամանակ վկա եմ եղել այս բանին:

Լեոն:

— Կարող եմ ասել միայն, որ ոչ մի տպավորություն չուր չի անցնում՝ մի տեղ, որևէ կերպ արտահայտվում է: Մի փոքր հետո.

— Ինչ վերաբերում է պատերազմին, ապա իմ ամենամեծ զգացումը, որը և, անշուշտ, դեր է խաղացել, մարդու կորուստ է: Մարդկանց կորուստը՝ յուրաքանչյուր ուստօր օր, այն էլ այդպիսի չափերով, բարձրացրեց իմ աչքում մարդու արժեքը:

Կանգ առավ:

— Պատմեմ ձեզ մի դեպք, իմ խմբով գնում եմ Կրոնշտադտ՝ զորամասում ներկայացում տալու: Ես ու երեք զերասանուհի նստեցինք մարդատար մեքենա, իսկ դերասանները, — ի՞նչ լավ տղաներ էին, եթե միայն տեսած լինեիք դրանց, — բեռնատար մեքենան բարձրացան և տեղավորվեցին դեկորների արանքում: Ճանապահ՝ սառած նեպյի վրայով էր: Մեր մեքենան շուտ հասավ տեղ: Անցավ բավական ժամանակ, իսկ բեռնատարը չկա ու չկա: Մի ժամ էլ անցավ: Մեքենավարը թե՛ «Գնամ, տեսնեմ ինչ են եղել»: Մի վատ զգացում մեջս խոսեց ու ես էլ միացա: Մի երեք թե չորս կիլոմետր գնացինք և ի՞նչ տեսնենք՝ սառույցը ճեղքվել է, մեքենան սուզվել է գետը, բոլորին տանելով իր հետ: Կարող է մի այդպիսի դեպք ինչ-որ բան չփոխել մարդուն երստում, բայց ե՞րբ և ի՞նչ՝ դժվար է ասել:

* * *

Խնդրեցի, որ պատմի աշխարհահռչակ ողբերգակ Այրա Օլրիշի դաշույնի մասին, որ այժմ իր մոտ է:

— Երևի գիտեք, որ Օլրիշը թաղված է Կալուգայում:

Օլրիջի մահից հետո տանտիրուհին, կարծեմ Ֆյոկլա Անտոնովնա, նրա դաշույնն ուրիշ իրերի հետ ծախում է իվանով-կազեկուկուն. սա գործ է ածում Օթելլո խաղալիս, բայց մի օր էլ թղթախաղի մեջ տարվում է Մամոնտ-Դալսկուն։ Երկար ժամանակ մնում է նրա մոտ, մինչև որ սա էլ իր հերթին, դարձյալ թղթախաղի մեջ, տարվում է Ադելհայմին։ Մի յոթ-ութ տարի առաջ, ռուսական քաղաքներից մեկում, տարբեր թատրոններում ես և Ադելհայմը պետք է հանդես գայինք միևնույն դերում։ Թե՛ նրա, թե՛ իմ բոլոր տոմսերը սպառված էին։ Ներկայացումից մի փոքր առաջ Ադելհայմից նամակ ստացա, որով հայտնում էր, թե ծեղ է ու հիվանդ և խնդրում է իր տեղը խաղալ։ Ես նրա խնդրքը չմերժեցի։ Եվ ի պատասխան՝ նա Օլրիջի այս դաշույնը նվիրեց ինձ։

Պատմեց այս բոլորը, հետո շատ հասարակ ավելացրեց.

— Դաշույնի վրա գրված է Օլրիջի անունը. եթե տեսնեք Օլրիջի լուսանակարն Օթելլոյի դերում՝ այդ դաշույնն է վրան։

* * *

Սուրճին փոխարինեց ծխախոտը։ Փափազյանը գրպանից հանեց մի արծաթյա պորտսիգար, որի կենտրոնում առյուծ էր նկարած արևի և նրա ճառագայթների ֆոնին։ Իսկ նկարի շուրջը ինչ-որ բան էր գրված։

Տեսնելով իմ հետաքրքրությունը, Փափազյանն ասաց.

— Ստացել եմ Իրան եղած ժամանակս, գնացել էի, ինչպես երևի գիտեք, կազմակերպելու նրանց ազգային թատրոնը։ Իրանում գոյություն ունի մեր կարմիր խաչի նման ընկերություն՝ Շիր-խորշիդ։ Խնդրեցին, որ ելույթ ունենամ իրենց ակումբում։ Խոստացա, բայց հետո նույն օրը կնոջիցս հեռագիր ստացա, որ մայրս ծանր հիվանդ է։ Այնպես կոտրվեցի, որ հրաժարվեցի գնալ։ Այդ երեկո ինձ մոտ եկան ընկերության ղեկավարները և ասացին, թե իմ հրաժարականը պատիվ է բերում ինձ որպես ծնողացի որդու։ Եվ ինձ պարգևեցին այս պորտսիգարը, որի վրա մակագրված է՝ «Հիշատակ Իրանի մայրերից, որոնք թող քեզ հաբազատ մայր լինեն»։

Աննկատելի, չեմ հիշում, թե ինչպես, մեջտեղ եկավ Դանթեի «Դոփքի» ուսական շքեղ հրատարակությունը: Փափազյանը սիրով ձեռքն առավ, թերթեց մի քանի էջ, ապա աջը մնաց բացված գրքի վրա, աչքերը փակեց, զուխը մի փոքր ետ գցեց, և խտալերեն հատվածներ կարդաց... Հետո հանկարծ կանգ առավ:

— Լենինգրադում բավական հարուստ գրադարան ունեմ մի շարք լեզուներով, կան հազվագյուտ գրքեր: Պատերազմի ժամանակ շատ թանկագին գրքեր եմ ձեռք բերել. ձյունի վրա ընկած շքեղ հրատարակված գրքեր եմ հավաքել, տարել տուն: Շատ ուրիշ հազվագյուտ իրեր էլ կան մոտս... Հավաքել եմ տարիների ընթացքում՝ կնոջս հետ:

Այս խոսքի վրա հանեց ծոցատետրը, որի մեջ չորացած ծաղկի թերթ էր դրված... Կարոտով նայեց...

— Սա իմ ծաղկանոցից է: Պարտեզից զատ մի փոքրիկ ավազան ունեմ, ի՞նչ հավեր ունեմ, ի՞նչ աքլորներ... ինչ արի, որ մի հնդկահավ ապրեցնեմ՝ չեղավ, չդիմացավ, մի լավ կով ունեմ... Ինձ հյուր եկեք, դժգոհ չեք մնա...

Մի հավաքույթի ժամանակ Փափազյանին հարց տվին, թե ինչպես է իր դերը պատրաստում:

— Ինչպե՞ս եմ ուսումնասիրում պիեսը և կերպարը: Գարդում եմ մեկ անգամ, խորհում, ապա կարդում նորից՝ ստուգում տպավորություններս, մեծ ուշադրություն դարձնում խաղացվելիք կերպարի վիճակներին ու խոսքերին: Կերպարն ուսումնասիրում եմ և պատկերացնում նրան ամենատարբեր վիճակներով. օրինակ՝ Օթելլոն. ի՞նչ կլինեք Օթելլոյի հետ, եթե նա չհանդիպեր Դեզդեմոնային, ի՞նչ կլինեք, եթե նա ամուսնանար իր ցեղակից կնոջ հետ, ինչո՞ւ նա սիրեց և սիրվեց Դեզդեմոնայից, ի՞նչ կլինեք Օթելլոն, եթե ապրեք մեզ հետ, հագնվեք, դիցուք, ինձ նման: Դրանք

բոլորը ճշտում և հղկում են կերպարի մասին ունեցած մտապատկերը, բացում նրա բոլոր, ամենափոքր անկյուններն անգամ: Արտիստը պետք է ուսումնասիրի անգամ կենցաղային ամենափոքր մանրուքները: Ես այդպես եմ վարվել իմ Օթելլոյի հետ: Երբ խաղում եմ Օթելլոն կամ Կորնելի և այլ կերպար, ամբողջ ներկայացման ընթացքում, այդ թվում և ընդմիջումների ժամանակ, կերպարն իմ մեջ ապրում է, պահում եմ նրան իր զարգացման վիճակում: Զգում եմ նրա աճի պրոցեսը: Մի քանի հազար անգամ խաղացել եմ Օթելլոն և ամեն անգամ իմ մեջ առավել կամ պակաս ճշտությամբ ծնվել և վախճանվել է Օթելլոն, քանի որ ներկայացումն սկսվելիս ամեն անգամ հղանում եմ այդ կերպարը:

Արտիստը պետք է իր մտապատկերում ունենա խաղացվելիք կերպարի բարձրագույն և կատարելագույն պատկերը, որին պետք է շարունակ ձգտի, բայց չկարողանա հասնել: Եթե նա կարողացավ հասնել և նույնանալ նրա հետ՝ ստեղծագործությունը դադարում է: Եթե ես համոզվեմ, որ հասել եմ իմ Օթելլոյին, նշանակում է Փափազյան չկա, չկա ստեղծագործող, բայց միշտ, իմ ամբողջ կյանքում, նպատակ եմ դրել հասնել նրան, ամբողջ կյանքումս ընկել եմ այդ շանորդու հետևից և չեմ հասել: Երբեմն ինձ թվացել է, թե ահա հասնում եմ, անգամ բռնել եմ նրա փեշերից, բայց նա հեռացել է, փախել է հեռու և եղել ավելի բարձր, ավելի կատարյալ, քան իմ անձնավորումն է:

* * *

Փափազյանի հանդիպումն էր Երևանի թատերական ինստիտուտի ուսանողության հետ:

— Իմ փորձիկ բարեկամներս, գիտցեք, որ բնությունը ամենամեծ դպրոցն է մարդու համար: Ձեզ հարկավոր է հաճախ քաղաքից դուրս գալ շրջելու դաշտերում կամ լեռներում: Բնության մեջ ապրել՝ այդ նշանակում է նրբացնել, բարձրացնել ճաշակը, հոգու թափը, ֆիզիկապես թարմանալ: Ափսոս այստեղ չունեք գազանախոս (ձայներ՝ «ունենք, ունենք»), ունե՞ք, շատ լավ: Առյուծը ձեզ օրինակ: Գնա-

ցեք դազանանոց. այնտեղ, համոզված եմ, որ կա առյուծ: Եթե այդ առյուծը նոր եմ բերել՝ ապա մի քանի օրից կտեսնեք, որ խեղճ առյուծը «կատու» է դարձել: Իհարկե, եթե նրան մասական մի քանի անգամ դուրս չբերեն դաշտ կամ անտառ, բաց չթողնեն ազատության մեջ, որ շրջի, ցատկի, մի հատ էլ եղջերու որսա, էլ ի՞նչ առյուծ է: Օգտվեցեք կյանքից: Այն, ինչ որ չի տա ձեզ ոչ մի ուսուցիչ և ոչ մի ինստիտուտ՝ կտա կյանքը, կյանքի դպրոցը: Իսկական արվեստագետը պետք է ուսումնասիրի մարդուն, նրա բնավորությունը, իսկ որքան մարդ կա աշխարհում, այնքան էլ բնավորություն:

Թատերական երիտասարդությունն իր խոսքն ասելիս, շեշտեց:

— Կարդացեք շատ և, գլխավորն է, ճանապարհորդեցեք, գոնե ամառային երկամսյա արձակուրդներին դուրս եկեք քաղաքից: Ձեր վարած նույնանման կյանքը առավոտը վեր կենալ, նույն տեղը նստել, թեյել, նույն փողոցով գնալ թատրոն, հետո նորից տուն, և այսպես շարունակ,— այս միօրինակ ձևով վարած կյանքը առաջ կբերի ձեր ստեղծագործական թափի մակարդում, թմրածություն:

* * *

Փափազյանը երիտասարդներին խորհուրդ տվեց.

— Սիրեք ձեր գործը, եթե չեք սիրում՝ թողեք: Միայն սիրով, աշխատասիրությամբ ու նվիրվածությամբ է, որ աշխատանքի արդյունքը՝ սերմը, լավ պտուղ է տալիս:

* * *

1951-ի փետրվարին էր: Օրը չեմ հիշում: Այդ օրվա գրառումը չեմ կատարել և մնում է դիմել հիշողության օգնության:

Այն ժամանակ արվեստի ինստիտուտը դեռ չէր ստեղծված, կար արվեստի պատմության և տեսության սեկտոր, որի ղեկավարն էր Մարտիրոս Սարյանը:

Փափազյանը հրավիրված էր Սունդուկյանի թատրոն՝

հյուրախաղերի: Աշխատակիցները ցանկություն էին հայտնել կազմակերպել մի հանդիպում արտիստի հետ: Փափազյանը չմերժեց ու եկավ:

Հավաքույթը բացեց Մարտիրոս Սերգեևիչը: Հավաքվածների անունից ողջունեցի ես: Նախ՝ մի երկու խոսք ասացի, թե ինչքան ենք սիրում իր արվեստը և հաճախ կարոտի մի խոր զգացում ենք ապրում, որովհետև մեզ հետ չէ, Երևանում չէ: Եվ լավ ու ճիշտ չի լինի՞, եթե մշտապես ապրի Երևանում: Հետո ասացի, որ Սունդուկյանի թատրոնում հիմա ներկայացվում է «Դիմակահանդես» ու Երևանի մտավորականությունը շատ մեծ ցանկություն ունի տեսնելու նրան այդ դերում, մանավանդ որ բոլորը լսել են, թե այդ դերը ժամանակին խաղացել է Թբիլիսիում և այլն, և այլն:

Իմ խոսքից հետո Փափազյանը հարցրեց, թե հավաքվածներին ի՞նչ հարցեր են հետաքրքրում: Ձեմ հիշում, թե ով, բայց ներկաների անունից մեկը խնդրեց պատմել Օթեկոյի մասին:

Եվ նա պատմեց: Բավական երկար ու հետաքրքիր, մանավանդ նրանց համար, ովքեր չէին կարդացել կամ կարդացել ու մոռացել էին արտիստի «*110 театрам мира*» գրքի համապատասխան էջերը: Այդ ամբողջ պատմությունը մագնիտաֆոնային ժապավենի վրա գրի առնվեց ու, եթե պահպանվել է, արժե թերևս հրատարակել:

Այնուհետև նա պատասխանեց Երևանում չմնալու կշտամբանքին: Ասաց, որ շորս կողմից դրա մասին է լսում: Այդ կապակցությամբ այն միտքը հայտնեց, թե անցյալի համեմատությամբ փոխվել են մարդկային, ուրեմն և ժողովուրդների հարաբերությունները, մեր երկրում մի նոր իմաստ է ստացել այդ հարաբերությունների ըմբռնումը, և դրա համար էլ ինքը գտնում է, որ մեկ է, թե ինքը որտեղ է ապրում, բայց մեկ չէ, թե ի՞նչ է անում: Որտեղ էլ որ լինի՞ ինքը մարդկային մեծ դադափարներին ծառայում է, որպես հայ ժողովրդի ներկայացուցիչ: Հիշեց, որ ինքը վերջերս եղել է Ուլան-Բատորում և այնտեղ ասել են, թե շատ ժամանակներ առաջ մեր նախնիները գնացել ու կոտորել են հայ ժողովրդին, իսկ հիմա նրանց տաղանդավոր զավակը Շեքս-

պիրի լույսն է բերել մեզ: Եվ ճիշտ է այն, ինչ հիմա է տեղի ունենում և ոչ թե այն, ինչ մեր հեռավոր պապերն են արել:

Այնուհետև ասաց, թե Երևանում ինքը հանդիպել է կանանց այնպիսի գեղեցիկ աչքերով, ինչպես ոչ մի տեղ: Եվ միշտ ինքը, որտեղ էլ եղել է, կարոտել է այդ աչքերը: Իսկ հիմա տեսնում է, որ տղաների աչքերն էլ գեղեցիկ են, որ գեղատես մի սերունդ է աճում Հայաստանում: Ի վերջո գալու է, իհարկե, անպայման գալու է:

Վերջում անդրադարձավ Արբենին խաղալու առաջարկին և խոստացավ հաջորդ գալուն պես, երևի ապրիլին կամ մայիսին, իրականացնել անպայման: Միաժամանակ ասաց, թե ինքն էլ է այդ մասին մտածել, ուրիշներն էլ են ասել և հիմա ինքը ծանոթանում է պիեսի նոր թարգմանությունը:

Մարտիրոս Սարյանը խնդրեց արտիստին իր մենախոսու-թյուններից մեկն ու մեկն ասել, որը կամենում է, մանա-վանդ որ գրի է առնվելու, որպեսզի մնա և իր բացակա ժամանակը գոնե ժապավենի միջոցով լսենք ու իրենից մեր կարոտն առնենք:

Փափազյանն ասաց, թե ինքը սիրով կբավարարի ներկա գտնվողների խնդրանքը, բայց քանի իր խոսքը «մնալու» մասին է, ապա իր ձայնը հոգնած է և չէր կամենա, որ ինքը «մնա» այդ հոգնած ձայնով: Ինքը սիրով կգա վաղը, մյուս օրը, երբ ուզեն և կգրանցվի թարմ վիճակում:

Բոլորը գտան, որ ճիշտ է ասում, ոչ ոք չէր կասկածում, որ կգա անպայման, դրա համար էլ համաձայնեցին, բայց այդ էլ եղավ մեր սխալը: Փափազյանը խոստացավ ու չե-կավ:

Սակայն մի ուրիշ խոստում, որ նա այդ օրը տվեց և, իհարկե, ավելի կարևոր, կատարեց: Հուլիսի 6-ին նա բեմ բարձրացավ Արբենինի դերով:

Հավաքույթի վերջում լուսանկարվեցինք: Աչքիս առջևն է այդ լուսանկարը: Ինքը Փափազյանը չկա արդեն, չկան նրա հետ նկարվածներից Ռուբեն Աղաբաբյանը, էդվարդ Խոճիկը և Վարդան Սամվելյանը: Նաև ուրիշներ: Նայում եմ լուսանկարին ու տեսնում ընկերներիս բոլորովին երիտա-սարդ: Քսան տարի է անցել այդ օրից:

1948-ին մի կարգադրութիւն ստացվեց, որը տեւց մի քանի տարի, ապա վերանայվեց կառավարութեան կողմից: Թատրոնները ինքնապահ քաղաքականութեան պետք է անցնեին. եթէ լավ թատրոն է՝ պետք է կարողանա ինքն իրեն պահել: Այս էր սկզբունքը: Շատ թատրոններ պարտքերի տակ ընկան. դերասանները փորձեր էին անում, ներկայացումներ տալիս, իսկ աշխատավարձ չէին ստանում: Սունդուկյանի թատրոնը իր աշխատակիցներին մի քանի ամսվա աշխատավարձ էր պարտք: Բանը հասավ այնտեղ, որ թատրոնը ստիպված էր մեծ հայելիներն ու գորգերը ծախել: Դերասաններ կրճատվեցին: Բայց դա էլ չօգնեց: Այսպես շարունակվել չէր կարող. թատրոնն «այլովում» էր: Հեռագրեցին Փափազյանին և խնդրեցին, որ օգնութեան հասնի: Արտիստը, որ այդ ժամանակները գլխավորում էր ռուսական շրջիկ մի թատերախումբ, ամեն ինչ թողեց ու եկավ: Երկու անգամ եկավ. մեկ՝ ձմռանը և մնաց շուրջ 15 օր և մեկ էլ՝ զարնան վերջին և այս անգամ մնաց մի ամսի չափ... Մի օր Համլետ, մյուս օրը՝ Օթելլո: Երկրորդ գալուն խաղաց նաև Արքեմին: Բոլոր ներկայացումներին դահլիճը՝ միշտ լեփ-լեցուն էր: Երկու անգամն էլ ցանկութիւն ունեցողների թիվը ավելի մեծ էր, քան դահլիճը կարող էր տեղավորել: Եվ շատերն էին, որ, տոմս ձեռք չբերելով, վերադառնում էին տուն մի թանկագին բան կորցրածի զգացումով:

Ասում են նրա ներկայացումները մեկ միլիոնից ավելի ռուբլու եկամուտ են բերել: Թատրոնը ոչ միայն մարեց իր պարտքերը, այլև դերասաններին առաջիկա երեք ամսվա աշխատավարձով ապահովեց:

Փափազյանն այդ ժամանակ 60 տարեկան էր

Մի քանի հոգով մոտեն էինք: Այսպես խոսեց.

— Հորս շատ եմ սիրել, մորս նույնպես: Թե ինչքան եմ նրանց պարտական՝ հասկանալի է ձեզ առանց իմ բացատրելու, բայց հավատացնում եմ, սիրելի բարեկամներ, երբ

իմ հասցեի՞նք գովեստի խոսքեր եմ լսում՝ ես նրանց չեմ հիշում, այլ ուսուցիչներին՝ Պոլսում և Վենետիկում: Նրանք սովորեցրին ինձ սիրել մեր լեզուն, մեր պատմությունը: Ու եթե երիտասարդական տարիներիս փառքի ձգտելով վազել եմ դուրս, հեռուները, դեպի աշխարհի շորս կողմը, ապա հետո, երբ հասուն գիտակցությունն է իջել վրաս, որոնել եմ հայրենիքս, որոնել իմ տունը, իմ ճրագը, դրա համար նույնպես պարտական եմ ուսուցիչներինս, ուսուցիչներինս՝ որոնց պատկերը, ահա, հիմա էլ պահում եմ մտքիս առջև:

* *

Խոսեց Աղամյանի մասին:

— Խորիկոփուլո, հույն կոմպոզիտոր, Աղամյանի հետ նույն օրը հրավիրված է եղել Պոլսո վարժարաններից մեկը: Աղամյանը այդ երեկո կտորներ է կարդացել «Համլետից», «Դարբինների գործադուլը»:

Կոմպոզիտորին խնդրել են, որ մի երկու խոսքով իր տպավորությունը հայտնի Աղամյանից, որը, իրեն վատ զգալով, ներողություն էր խնդրել ու մեկնել տուն: Կոմպոզիտորը մի միտք է հայտնել, որը գրեթե նույնությամբ հետագայում լսել եմ Նեմիրովիչ-Դանշենկոյից:

— Աշխարհում չեմ տեսել մի ուրիշ դերասան,— ասել է հույն կոմպոզիտորը,— որ կարողանա իր ներքինը, ուրախություն լինի, թե տխրություն, իր ներքին աշխարհը, մի խոսքով, պատկերացնել կարենա հասկանալի կերպով, առանց լեզվի օգնության: Աղամյանի արածը լեզու էր առանց լեզու լինելու:

Նույնանման բան ինձ ասել է նաև Սիրանուշը, որին շատ եմ հարցուփորձ արել Աղամյանից:

— Կարելի էր նրա խոսքերը չհասկանալ,— ասում էր Սիրանուշը,— որովհետև կյանքի վերջին ժամանակները նրա ձայնը խռպոտ էր, բայց նա ինչ կարիք ուներ ձայնի. երբ դեմքը, շարժումը արտահայտում էին ներքին ապրումը: Քանի ձայնը մարում էր, այնքան ավելի ուժեղանում էր նրա անխոս արվեստի ուժը:

1949-ին Սունդուկյանի թատրոնը բեմադրեց «Դիմակահանդես»։ Արբենինի դերը կատարում էր Վաղարշյանը։ Փափազյանը դեռ չէր փոխադրվել Երևան, բայց տարին մեկ անգամ, անպայման գալիս էր։ 1951-ին երկու անգամ եկավ, մեկ տարվա սկզբին, մեկ էլ վերջում։ Երկրորդ այցին ցանկություն հայտնեց Արբենին խաղալու։ Այդ դերը նա մարմնավորել էր անցյալում, 1917-ին Թիֆլիսում, հետո Պոլսում, վերջապես՝ նորից Թիֆլիսում 1927-ին։ Այս վերջին կատարումը տեսել էի ես, այն էլ մի քանի անգամ։ Ըստ որում խաղում էր իր թարգմանությունը։ Գուլակյանը, որ այդ ժամանակ թատրոնի միանձնյա ղեկավարն էր, համաձայնեց։

Վաղարշյանի Արբենինը թեև ինձ թվում էր վիճելի, բայց մամուլի էջերում գնահատվեց բարձր։ Հանդիսատեսների մեծ մասը նույն կարծիքի էր։ Եվ շատերն էին կասկածում՝ Փափազյանը հաջողություն կունենա՞, մանավանդ որ մեկ և կես թատերաշրջան ներկայացվել էր այդ բեմադրությունը և հանդիսատես հասարակայնության հիմնական զանգվածը այդ դերում նայել էր Վաղարշյանին։

Արբենինի դերով Փափազյանը բեմ բարձրացավ հուլիսի 6-ին։ Նա հանդիսատեսին առաջարկեց իր մեկնաբանությունը, շատ ավելի բարդ, քան Վաղարշյանի պատկերած Արբենինն էր, հակասական մի կերպար։ Եվ հանդիսատեսն ընդունեց, հիացավ ու խանդավառվեց։ Դրվատող հոդվածներ լույս տեսան մամուլում։

Վաղարշյանը որոշեց նայել Փափազյանի խաղը, մանավանդ, որ այդ դերում չէր տեսել երբեք։ Ես այդ օրը թատրոնում էի։ Ընդմիջումներին ինքը ոչինչ չէր ասում, ես էլ չէի հարցնում։ Եթե խոսում էր, ապա մի այլ նյութի շուրջը։ Երբ ներկայացումը վերջացավ, հարցրի, թե ինչ տպավորություն է։

— Փայլուն է խաղում և այդպես էլ պետք էր սպասել, բայց ինչ է խաղում, լավ չեմ հասկանում։ Ա՛յ, նրա Օթելլոն ուրիշ բան է։

Գուլակյանը, դառնալով ինձ, բայց բոտ էության կամենալով պատասխանել Վաղարշյանին, ասաց.

— Ձե՞ս կարծում, որ Արբենինը գերազանցում է Օթելլոյին:

Վաղարշյանը ոչ մի ձայն չհանեց:

Հանդիսատեսների մեջ կային այնպիսիները, որ Փափազյանին տեսնելուց հետո էլ, գերադասությունը տալիս էին Վաղարշյանին, բայց մեծ մասը, մանավանդ երիտասարդությունը, հիացած էր Փափազյանով:

Առաջին ներկայացման օրը երիտասարդների մի սովոր խումբ հավաքվել էր Փափազյանի ապրած հյուրանոցի առաջ (այժմյան «Երևան», այն ժամանակ «Խնտուրխտ») և ծափերով ու գոչումներով դուրս էր կանչում արտիստին, որին ուղեկցել էր թատրոնից մինչև հյուրանոց, և չէր կամենում հեռանալ: Երիտասարդությունը չհանգստացավ մինչև նա չերևաց:

Իսկ վերջին ներկայացման օրը երիտասարդությունը «Կոմունարների այգում» ծաղիկ չէր թողել, պոկել ու բերել էր թատրոն և վերջին արարից հետո նետում էին բեմ, ոգևորված կանչեր արձակում և չհոռացան թատրոնի շեմից, մինչև Փափազյանը դուրս չեկավ, և առաջին օրվա պես ծափահարություններով ուղեկցեցին մինչև հյուրանոց:

* * *

1951—1952 թատերաշրջանի սկզբներին բեմադրվեց Տոլստոյի «Կենդանի դիակը»: Որպես Պրոտասովներ հանդես եկան նախ՝ Վաղարշյանը, հետո՝ Զանիբեկյանը: Հրաշյա ներսիսյանը մարմնավորում էր իշխան Աբրեզկովի կերպարը: Շատերս էինք զարմացած, թե ինչո՞ւ Պրոտասովի դերը նրան չի տրված: Միառժամանակ անց ներսիսյանը, առաջին անգամ իր կյանքում, թատրոնի ղեկավարությանը դիմեց, խնդրելով իրեն ևս Պրոտասով խաղալու հնարավորություն տալ: Գուլակյանը համաձայնեց: Թատերաշրջանի վերջում հյուրախաղերի եկած Փափազյանը ցանկություն հայտնեց նույն դերը խաղալու: Գուլակյանն ընդառաջ գնաց:

Հանձն չեմ առնում գնահատելու Փափազյանի խաղն ընդհանրապես, բայց բեմական մի մանրամասն մեխվեց հիշողությանս մեջ:

Գնչունների տեսարանն է: Կարենինը նամակ է բերել Պրոտասովին Լիզայից այն պահին, երբ նա, շրջապատված գնչուններով, զվարճանում է:

Դավիթ Մալյանը, որ Կարենինի դերը կատարում էր կերպարի բուն թափանցումով, տվեց նամակը և մի կողմ քաշվեց: Եվ այն ժամանակ, երբ Պրոտասովի դերակատարներին մեկը կարդացած նամակը ծալում և դնում էր գրպանը, մյուսը՝ ճմլում և գետին նետում, Փափազյանը կարդալուց հետո նամակի թերթերը պարզեց դեպի մոմակալի բոցը և այրեց, առանց նայելու: Այսինքն՝ հետադարձ ճանապարհ չկա, այրված են բոլոր կամուրջները:

* * *

Փափազյանը նոր էր վերադարձել Թիբեթիսիում տված հյուրախաղային ներկայացումներից, վերադարձել էր լավ տրամադրությամբ: Երկար ժամանակ այնտեղ չէր եղել և գտել էր լավ ընդունելություն: Մի քանի օր անց եղա Թիբեթիսիում, ուր մնացի մի շաբաթի չափ: Պատմում էին, որ տասներկու օր իրար հտեից, առանց հոգնելու և իր հասակի համար զարմանալի թափով և ավլունով խաղացել է Օթելլոյի դերը: Ասում էին, որ առանձնապես լավ է խաղացել երրորդ ներկայացմանը: Իրեն նվիրված երեկոյին կտորներ է կարդացել Կորրադոյից, Ուրիելից, Համլետից, Լիրից, Մակբեթից, Արքեմինից: Եվ իբր այն մի հատվածը, որ խաղացել է Կորրադոյից, այնքան լավ է եղել, ինչպես երբեք:

Ահա այդ օրերին էր, որ մի կանուխ առավոտ Փափազյանը Երևանից զանգահարեց Մարտին Քարամյանին, բանաստեղծ ընկերոջս, որի տանը իջևանել էի ես: Արտիստը սիրով էր պատմում այն աջակցության մասին, որ ընկերս Թիբեթիսիում ցույց էր տվել իրեն:

Այստեղ եղած վերջին օրերին Փափազյանը հեռուստատեսությունից հատվածներ է կատարել Օթելլոյից, որպես

Դեզդեմոնա՝ խաղընկեր ունենալով դերասանուհի Թոիձեին։
Եվ որովհետև չէր հասցրել իր հոնորարն ստանալ, մի հանձ-
նարարական էր թողել ընկերոջս, որ նեղութիւն քաշի,
ստանա և ուղարկի իրեն։

Զանգահարելով ընկերոջս, սովորական սիրալիր հարցու-
փորձից հետո, թե ինչպես են տանեցիք և այլն, խնդրեց, որ
իր հոնորարից կոշիկներ գնի Հայկազի համար։ Հայկազը
թատրոնի հուշարարն է, երկար տարիներ Փափազյանի
խաղերին հուշարարութիւն է արել, և արտիստը, իր հուշերի
երկրորդ գրքում, սիրով հիշում է նրան։

Այդ երեկո ընկերոջս հետ գնացինք թատրոն։ Փափազյանը
պատվիրել էր ոչինչ չստել Հայկազին և իր անունից նվիրել
այդ կոշիկներն անակնկալ մի պահի։ Դրա համար պետք էր
Հայկազին տեսնել և որևէ պատրվակի տակ իմանալ նրա
ոտքի համարը։

Ընկերս, ինչպես հատուկ է բարի մարդկանց, իհարկե,
չդիմացավ և Հայկազին ասաց, թե վարպետն իրեն ինչ է
պատվիրել հեռախոսով։

Հայկազի, ինչպես և ներկա եղող դերասանների ուրախու-
թյանը չափ չկար։

Երբ աչքս ընկավ Հայկազի հնամաշ կոշիկներին, հաս-
կացա, որ Փափազյանը այդ վճիռը կայացրել է այստեղ,
բայց դրա մասին հիշել է նրան հասնելուց հետո։

* * *

1952 թվական։ Սիրանուշի մահվան 30-ամյակին նվիր-
ված երեկոն է։ Զեկուցումից հետո ելույթ ունեցան Դերենիկ
Դեմիրճյանը, Վաղարշ Վաղարշյանը։ Խոսեց նաև Փափազ-
յանը։ Բեմի վրա դրված էր Սուրեն Ստեփանյանի «Սիրա-
նուշ» կիսանդրին։ Փափազյանը խոսելիս շոշվել էր դեպի
նա։

— Մեծ էր որպես աշխարհ և պարզ էր որպես ճշմար-
տութիւնը։ Դա էր պատճառը, որ նրա շուրջը շատ քիչ էին
վեճեր լինում։ Համենայն դեպս, ներկայացման ժամանակ
նա այնքան համոզիչ էր, որ ոչ ոք այլ կերպ չէր մտածում,
քան նա։

Պոլսից որ եկա՝ ընկա նրա ազդեցության տակ: Նա չէր խաղում, չէր ներկայացնում, նա դառնում էր Մեդեա, Համլետ՝ թե՛ արտաքին, թե՛ ներքին կերպով: Ես չեմ տեսել մի ուրիշ դերասան, որը կարողանար այդպես երջանիկ ձևով միավորել միտքը, հույզը և տեխնիկան: Նա ոչ միայն ինքն էր խաղում, այլև իր խաղով լուսավորում, գեղեցկացնում էր իր խաղընկերներին: Նրա ամենամեծ հատկությունը ներքին ուժն էր, ոգին: Դրա համար էլ դժվար է ասել, թե ինչն էր նրա մեջ ուժեղ՝ ձա՞յնը, որ իսկապես հազվագյուտ էր, դիմախա՞ղը, որ այլևս ոչ ոքի մեջ չեմ տեսել, թե մի ուրիշ բան, երեխ, ավելի ճիշտ, այդ բոլորը միասին:

Ասում են նման էր Սառա Բեռնարին. ոչ ոքի նման չէր նա և չէր էլ կարելի նրան ընդօրինակել: Այդպիսի փորձեր եղան, բայց անհաջող. Մեդեան մի օր մի կերպ էր խաղում, մի ուրիշ անգամ՝ այլ կերպ: Ամեն անգամ նրա խաղը նոր ծնունդ էր, կրկնություն չկար:

* * *

Մի օր նորից խոսեց Սիրանուշի մասին:

— Եթե Սիրանուշը իր լավ ժամանակը Ֆրանսիա գնար՝ ոչինչ կլինեին նրա առաջ փարիզյան բեմի աստղերը, դերասանուհիները: Թիֆլիսը պատրաստ էր օգնելու, որ գնա, բայց չգնաց: Չունեի այդ ձգտումը. տարօրինակ բան էր՝ Ալեքսանդրապոլ կգնար, Փարիզ չէր գնա:

* * *

Իմ տպավորությամբ, Փափազյանն ապրում էր կյանքի և մարդկային փոխհարաբերությունների բոլորովին այլ չափանիշներով, քան ընդունված պայմանավորվածությունն է այսօրվա հասարակության մեջ վաղ ժամանակներից ի վեր:

Այսպես, օրինակ, նրա բազմաթիվ երկրպագուներից մեկը ներկայանում է արտիստին և հայտնում իր բարձր հրճվանքը նրա խաղի նկատմամբ:

Ուտել-խմելու սեր չունեցող Փափազյանը հանկարծ կարող էր ձեռքը դնել իր երկրպագուի ուսին և ամենայն լըր-

ջությամբ և ամենայն անկեղծությամբ հարցնել, թե ինչու իրեն բոլորը հրավիրում են իրենց տուն, իսկ ինքը՝ ոչ:

Երկրպագուն, որի մտքով անգամ չէր անցնի, թե Փափազյանը կարող է իրենց տանը լինել, ուրախությունից գլուխը կորցրած, տեղն ու տեղը հրավիրում է արտիստին, պայմանավորվելով, որ կիրակի օրը, ժամը 4-ին մեքենայով կգա նրա հետևից:

Երկրպագուն պատրաստություն է տեսնում, հրավիրում է մոտ մարդկանց, խնդրում, որ այդ օրն անպայման իր տանը լինեն:

Եվ ահա վրա է հասնում կիրակի օրը, ժամը չորսին երկրպագուն տաքսիով ճանապարհվում է Կիևյան փողոց, որտեղ ապրում էր ողբերգակը և Փափազյանը... սառը ջուր է լցնում իրմով ոգևորվածի գլխին. հայտնում է, որ ինքը իրեն լավ չի զգում և չի կարող գալ: Ու երկրպագուն տուն է դառնում կոտորված սրտով և հիասթափ անում Փափազյանին սպասող հյուրերին:

Ես չէի կամենա, որ Փափազյանի մասին սրա և այլ նման դեպքերի կապակցությամբ հեշտ մի վճիռ կայացվեր: Ինձ թվում է, որ սա այնքան էլ պարզ բան չէ: Որ Փափազյանն անկեղծ տրամադարված էր ճաշի գնալու, ճիշտ է, և ենթակա չէ ոչ մի կասկածի, գոնե ինձ համար, որպես նրան քիչ թե շատ լավ ճանաչողի: Բայց որ նա չի գնացել ոչ այնքան իսկապես տկար լինելու, որքան այն պատճառով, որ հյուրընկալվելու ցանկությունը չկար այլևս իր մեջ, սա էլ ճիշտ է:

Մի խոսքով՝ մտածելու բան է սա, և խորանալու դեպքում գուցե հանգենք այն մտքին, որ Փափազյանը ապրում էր հոգեկան անկախ մի կյանքով, ստեղծելով փոխհարաբերությունների մի շափանիշ, ըմբռնելի և ընդունելի իր, բայց ոչ շրջապատի՝ մեզ համար:

* * *

Փափազյանը միառժամանակ հյուրանոցում ապրելուց հետո երկսենյականոց բնակարան ստացավ Կիևյան փողոցում և Անահիտ Դատյանի հետ տեղափոխվեց: Նրա բնակարանը

գտնվում էր Կիւլյան փողոցի ձախ մայթին և մի սենյակի լուսամուտը բացվում էր փողոցի վրա: Պատուհանի ուղիղ դեմ-դիմացում բնակելի նոր շենքի կառույց էր սկսված:

Զարմանալի սեր ուներ պատուհանի մոտ կանգնելու և նայելու նոր շենքի բարձրացող պատին: Այդ անհանգիստ մարդը երբեմն մի ժամից ավելի մեխվում էր տեղում և հիացած հետևում, թե ինչպես է քարը քարի վրա դրվում:

Մի օր ասաց.

— Երևանը ինչ էր՝ ինչ դարձավ:

Մի ուրիշ անգամ.

— Ո՛ւր հասավ Երևանը:

Գնացի՛ տանը չէր: Հարցրի Անահիտին, թե ուր է, տա-
րավ ինձ դեպի լուսամուտը, տեսնեմ Փափազյանը կառույ-
վող շենքի վրա է: Մոտիկից հետևում է որմնադիր բանվոր-
ների աշխատանքին, զրուցում հետները: Մի փոքր հետո
վերադարձավ:

— Դու հո գիտես, որ մեր երկրի որ ժայրն ասես, հասել
եմ, քաղաք չկա, որ ոտք դրած չլինեմ, և ոչ մի տեղ շինա-
րարությունը այսպիսի ծավալ չունի: Նայում եմ ու հոգիս
փառավորվում է: Հասկանում եմ, որ դա իր պատճառներն
ունի. դավառական Երևանը մայրաքաղաք դարձավ: Եթե իր
ապրած կյանքով մայրաքաղաք էր, իր արտաքին տեսքով էլ
պետք է այդպիսին դառնար և դրա համար ժամանակ էր
պետք: Բայց կա մի ուրիշ և ավելի կարևոր բան՝ մեր ժողո-
վրդի կառուցող ոգին:

Մի օր էլ ասաց, թե գնալու է և քաղաքային իշխանու-
թյուններից խնդրելու, որ իրեն մի երկու սենյակ տրամադրեն
դիմացի կառուցվող շենքում:

— Այնքան նայեցի՛ որ կապվեցի այդ տան հետ, հա-
րազատացավ, իմը դարձավ:

Եվ իսկապես, միառժամանակ հետո տեղափոխվեց դի-
մացի շենքը, թեև նոր բնակարանը հնի համեմատությամբ
առանձնապես ոչ մի առավելութուն չուներ:

Տարիներ հետո մեր կառավարությունը որոշեց Փափազ-
յանին բնակարանային ավելի լավ պայմանների մեջ պահել՝
Կիւլյանից տեղափոխել Մոսկովյան (Թումանյանի Տուն-

թանգարանի կողքին կառուցվող բնակելի շենքը) և տրամադրել երեք սենյակ:

Ստացավ բնակարանի օրդերը, պարզ էր արդեն, թե որ հարկում էր ապրելու և որ բնակարանում, բայց մահն ավելի վաղ հասավ, քան կավարտվեր շենքի կառուցումը:

* * *

Փափազյանը խնդրեց, որ իր հուշերի խմբագրութունն ինձ հանձնարարվի: Մի օր հարցրեց.

— Շա՞տ ժամանակ պետք կլինի խմբագրելու համար:

— Մի կես տարի:

Զարմացավ. մի՞թե խմբագրելու համար ավելի ժամանակ է պետք, քան գրելու:

— Գիրքը ես մի տարում գրեցի:

Բացատրեցի, որ, զբաղված լինելով, չեմ կարող միայն դրա վրա աշխատել:

Կարծես հասկացավ:

Հինգ օր էր անցել, որ զանգահարեց ու հարցրեց՝ վերջացրե՞լ եմ, թե ոչ:

Մի շաբաթ էլ չէր անցել, որ գիշերվա կեսին, ժամը երեքը կլինեի, զանգահարեց, թե ո՞ր էջին եմ հասել:

Ու այսպես անվերջ:

* * *

Երբ «Հետադարձի» առաջին գիրքը լույս տեսավ, Փափազյանը խիստ շոյված էր զգում՝ իրեն, մանավանդ որ ընթերցողները նամակներով ու հեռախոսային զանգերով հայտնում էին իրենց անվերջ հիացմունքը: Փափազյանը չափազանցնելով իմ, որպես խմբագրի, կատարած աշխատանքն իր ձեռագրի վրա, մի օր հարցրեց.

— Ի՞նչ նվեր անեմ քեզ:

— Ոչ մի նվեր: Վերջապես՝ հոնորար եմ ստացել դրա համար:

Նվերի միտքը մտել էր գլուխը և դուրս չէր գալիս: Երբ

մի անգամ էլ անդրադարձավ, խնդրեցի, որ իբրև հիշատակ տա ինձ Նեմիրովիչ-Դանչենկոյի կարճ բնութագրականը:

Խորամանկ նայեց աչքերիս, ժպտաց: Ինձ թվաց, թե ներքին մի տատանում ապրեց, բայց ոչինչ չասաց:

Նեմիրովիչ-Դանչենկոյի գրությունը ինձ մոտ է, սրբությամբ պահվում է իմ թղթերի մեջ և, ճիշտն ասած, ստիպված եղա ավելի վաղ մեջտեղ բերել, քան մտադիր էի:

Աշոտ Արզումանյանի «Բարեկամություն» գրքի առաջին հրատարակության մեջ Փափազյանը ներկայացված էր ոչ իր արժանիքի համապատասխան: Վրդովված խոսակցություն ունեցա հեղինակի հետ, մեղադրելով նրան սրա-նրա ազդեցությամբ գործելու համար: Արդարացավ, ասաց, թե նյութ չի ունեցել իր ձեռքի տակ: Իմանալով, որ պատրաստվում է գրքի երկրորդ հրատարակությունը, տրամադրեցի բոլորովին անհայտ այդ փաստաթուղթը, մտածելով, թե գուցե դրանով կարելի կլինի Փափազյանի գնահատությունը գրքում մոտեցնել իրականությանը:

* * *

1956-ին «Հետադարձ հայացքի» առաջին գիրքը լույս տեսավ: Ոչ Փափազյանը որպես հեղինակ, ոչ էլ ես, որպես գրքի խմբագիր, չէինք կասկածում, որ գիրքը հաջողություն է ունենալու: Բայց այն, ինչ տեղի ունեցավ, անսպասելի էր երկուսիս համար էլ: Ոչ միայն ընթերցող լայն հասարակայնությունը, այլև գրական-գեղարվեստական շրջանները Փափազյանի գիրքը դիտեցին որպես գրական մեծ երևույթ: Ստեփան Զորյանը, Գուրգեն Մահարին. Մկրտիչ Արմենը, Հրաչյա Հովհաննիսյանը և ուրիշներ ոգևորված էին գրքով: Սակայն գիրքն ուներ նաև հակառակորդներ, ինչպես գրողների, այնպես էլ մանավանդ, թատրոնի մարդկանց միջ:

Մեկը զարմանում էր, որ բոլորը հիացած էին գրքի լեզվով ու ոճով: Նա ասում էր, թե բավական է թերթել Պոլսո մամուլը՝ համոզվելու համար, որ տասական թվականների ամեն մի լրագրող այդպես էր գրում:

Մի հին դերասան գիրքը կարդալուց հետո հայտարարել

էր, թե գրքում եղած մտքերը իրենն են, որ ինքն է ժամանակին արտահայտել դրանք երիտասարդ Փափազյանի հետ ունեցած զրույցների ժամանակ:

Մեկ ուրիշը այն միտքն էր հայտնել, թե դա Փափազյանի գրածը չէ, որ իբր մի ուրիշն է գրում, բայց լույս է տեսնում նրա անունով: Սկսեցին նույնիսկ այդ ուրիշին որոնել: Ասում էին, թե լենինականցի մի կին կա, նա է գրում Փափազյանի համար, ոմանք էլ ասում էին, թե այդ կինը դերասանուհի Անահիտ Դատյանն է, որի հետ Փափազյանը հետագայում ամուսնացավ: Կային մարդիկ, որ կասկած էին հայտնել, թե գուցե խմբագիրն է գրել, այսինքն ես, մանավանդ շատերին էր հայտնի իմ և դերասանի բարեկամությունը: Անհեթեթ մի բան: Գիրքը խմբագրելիս բավական կրճատումներ եմ արել ու երբ հարկը պահանջել է կրճատված երկու հատվածները միավորել մի կամ երկու նախադասությունամբ, անհնար դժվարություն առջև եմ կանգնել միշտ, որպեսզի կարողանամ հարազատ մնալ նրա ոճական մտածողությանը և, խոստովանություն լինի, մեծ մասամբ չի հաջողվել ինձ դա, իսկ եթե հաջողվել է, ապա նվազ չափով միայն:

Փափազյանին հասնում էին այդ լուրերը, բայց նա չէր վրդովվում, ու եթե վիրավորվում էլ էր, ապա ցույց չէր տալիս, հանգիստ մի ժպիտով, ներողամիտ կամ մեծահոգի արտահայտություններ փակում էր զրույցը.

— Բան է, ասում են, ինչ եք այդքան նշանակություն տալիս,— և խոսակցության նյութը փոխում էր, մի ուրիշ բանի մասին խոսում:

Մի անգամ ասացին նրան, թե այսինչը մի քանի փաստագրական հակասություն է գտել Փափազյանի գրքում, Ուալդի, մեկ էլ մի ուրիշի մահը հետաձգել է մի քանի տարով... և շար ժպիտով նկատել է, թե ուրեմն շատ էլ չի կարելի վստահել նրա պատմածի իսկությունը: Դուր չեկավ նրան այդ: Մոռյալ ու ծանր լոռություն գամեց օդում: Կախեց գլուխը, մի պահ տարուբերեց:

— Չար են մարդիկ...

Ասաց, իսկ մյուս օրը մի երկու էջ տվեց ինձ ու խընդ-

րեց տեղադրել երկրորդ գրքում, որ այդ ժամանակ խմբագրում էի:

— Այս էլ իմ պատասխանը գրական հաշվապահներին: Թեև անուն չէր տվել, բայց հասկացողը կհասկանար:

Ու երբ տարիներ անց խնդրեցին նրան նույն մարդու մասին հոդված գրել, ոչ միայն չհրաժարվեց, այլև շուտով եղավ գովեստների մեջ:

Սրբ զարմանքս հայտնեցի, ասաց.

— Դա էլ պատժելու մի ձև է:

* * *

Փափազյանի հանդիպումն էր միլիցիայի աշխատողների հետ: Արտիստին ողջունեցին սրտալի խոսքերով: Եվ բոլորն էլ, հավաքույթի նախագահից սկսած, շնորհակալություն էին հայտնում, որ իրենց խնդիրքը չի մերժել ու եկել է:

Իր ելույթում Փափազյանը բողոքեց: Եվ դա սեթեկեթանք չէր, այլ անկեղծ մի պոռթկում:

— Ինչի՞ եք շնորհակալություն հայտնում: Հայտնի չէ, թե այս հանդիպման համար ով ում պետք է շնորհակալություն հայտնի: Դերասանը, ինչպես նաև գրողը, կոմպոզիտորը ժողովրդի ձայնն է: Եթե դուք չլինեք՝ ես էլ չեմ լինի: Ես ձեզ եմ արտահայտում: Ես ձեզնով կամ: Որտեղ էլ լինեմ՝ ձեզնով եմ հպարտ, ձեզնով եմ հարուստ, ձեզնով եմ կյանքին կապված: Իմ խաղի մեջ ձեր զգացմունքն է ապրում ձեր միտքն է ճառագայթում: Ինչի՞ է նման զինվորն առանց զորավարի: Արտիստներս, այդ ես լինեմ, թե իմ արվեստակից ընկերները՝ զինվորներ ենք: Զորավարը դուք եք, ժողովուրդը: Ինչ հրամայեք՝ այն էլ անելու ենք: Դուք եք մեզ ուղղություն տվողը, դուք եք ճշտում մեր քայլը, ղեկավարում մեր շարժումը: Ինչ խոսք կարող է լինել խնդրանքի մասին, կարգադրել եք՝ եկել եմ:

Մի պահ լռեց, հետո շարունակեց.

— Մի նուրբ կողմ էլ ունի մեր այս հանդիպումը, որի մասին չեմ կարող թեկուզ մի խոսքով չհիշատակել: Փոքր ժամանակս ենիշերի եմ տեսել, երիտասարդ տարիներս՝ ժան-

դարմ: Երկուսն էլ սարսափելի հիշողութիւններ են թողել մեջս: Եւ հիմա, եկեք-տեսեք, թե ինչքա՛ն են փոխվել ժամանակները, կյանքի պայմանները, որ միլիցիան կանչել է արտիստին իր մոտ, թե արի մի քիչ զրուցենք: Եւ ինչի՞ մասին՝ արվեստի: Լսված կամ տեսնված բա՛ն է սա մի ուրիշ երկրում:

Հավաքվածները ծափ տվին:

— Ես այստեղից երջանկացած եմ գնում, որ եկել-հասել ենք մի այսպիսի օրվա:

Նորից ծափահարութիւն:

— Մի՞թե պարզ չէ, որ եթե շնորհակալության խոսք պիտի ասվի՝ ուրեմն ես եմ ասելու, և ոչ թե դուք:

Ծափահարությամբ կրկին ընդհատվեց արտիստի խոսքը:

— Հա՛, մեկ էլ մի ցանկութիւն: Ես գիտեմ, որ ձեր աշխատանքը շատ է ու ծանր: Ես փափագում եմ այն օրը, երբ դուք աշխատավարձ կստանաք ոչինչ՝ չանելու համար: Ա՛յ, դա կլինի օր: Ես հավատում եմ դրան ու սպասում:

* * *

Մի օր հարցրի, թե իր տեսած հայ դերասաններից ո՞րն է իր վրա ամենաուժեղ տպավորութիւնը գործել:

— Սիրանուշը:

— Այդ հայտնի է,— ասացի ես,— և՛ գրել ես, և՛ շատ անգամ ասել. խոսքս դերասանների մասին է և ոչ դերասանուհիների:

— Զարիֆյանը:

Պատասխանեց անմիջապես, նայեց ինձ և ապա վրա բերեց.

— Եթե հանդիպեիր կյանքում, երբեք չէիր մտածի, թե մի բան արժե, բայց բավական է բեմ բարձրանար, որ դառնար հրաշագործութիւն: Աստված էր մատը դրել նրա ճակատին և ասել՝ թատրոնի համար եմ լույս աշխարհ բերել քեզ, գնա ու գործիր: Նրա հետ երևի ոչ ոք համեմատվել չէր կարող: Բայց նա չդարձավ այն, ինչ աստված էր նախատեսել նրա համար: Խանգարեցին, շեղեցին: Կինը լավ դեր չխա-

ղաց: Օ՛հ, կանա՛յք, կանա՛յք: Բայց ով աչք ուներ, մի քիչ էլ խղճմիտ սիրտ, չէր կարող չընդունել, որ մեր ընկերը ավելի լայն հորիզոնների համար էր ծնված, քան հայ բեմը միայն:

* * *

Նոր էի վերադարձել Մոսկվայից, ուր տեսել էի Պոլ Սկոֆիլդին՝ Համլետի դերում: Հետաքրքրվեց, թե ինչպես էր: Ասացի, նույնիսկ մի քանի մանրամասնություններ պատմեցի: Ոչ մի ձայն չհանեց, լսեց լուռ և չգիտեմ թե ինչու մտահոգ: Աչքիս նույնիսկ տխուր երևաց:

Տիրող լուսթյունը խախտելու համար ասացի, թե շատ Համլետներ եմ տեսել, բայց ամենալավերի խաղը նայելուց հետո էլ, նույնիսկ միշտ մի ինչ-որ չգոհացված զգացումով եմ վերադարձել թատրոնից:

Նայեց ու ասաց.

— Զի եղել ու չի էլ լինի այդպիսի Համլետ, որի խաղից մարդ, եթե, իհարկե, «Համլետը» խորապես ծանոթ է նրան, լիակատար բավարարում ստանա:

Մի-փոքր հետո բացատրեց իր միտքը.

— Համլետ շատ լավ խաղալու համար դերասանը պետք է երեսնամյա երիտասարդի արտաքին ունենա, բայց յոթանասուն տարեկանի խելք: Եվ քանի որ այդ երկուսի ներկայությունը միաժամանակ անկարելի է, երբ մեկը կա, մյուսը չկա, և ճիշտ հակառակը, ապա հնարավոր չէ խաղալ ինչպես պետք է: Բոլորն էլ, ամենահանճարեղ ողբերգականներն էլ խաղացել են մոտավորապես:

* * *

Մի անգամ էլ նույն մտքին անդրադարձավ:

— Աշխարհում ոչ մի դերասան չի խաղացել Համլետն այնպես, որ դահլիճում բոլորը գոհ մնան, ասեն, որ «ա՛յ՛ սա է իսկական շեքսպիրյան Համլետը»: Ինչքան էլ հավանել են, այնուամենայնիվ, միշտ էլ թատրոնից հեռացել են ինչ-որ

վերապահությամբ: Համլետը երիտասարդ է, ուրեմն նրա դերակատարը նույնպես պետք է երիտասարդ լինի, լավ կառուցված, գեղեցիկ: Բայց դրա հետ միասին՝ Համլետը հասկանալու համար մարդ պետք է շատ ապրած լինի, շատ էլ տեսած ու լսած, ուրեմն տարիք առած պետք է լինի: Բայց՝ եթե վաթսուներեկական տարեկանը բարձրանա բեմ, ինչքան էլ տաղանդավոր, ո՞վ կհավատա, թե դա Համլետ է: Մի պահ լռելուց հետո.

— Ուրեմն երիտասարդը չի կարող խաղալ, որովհետև մեծի խելք չունի. մեծն էլ թեև խելք ունի՝ չի կարող խաղալ, որովհետև երիտասարդ չէ: Ահա և քեզ հավիտենապես անլուծելի խնդիր:

* * *

«Համլետի» մեջ մի այսպիսի տեսարան կա. Պոլոնիոսը, երբ Առաջին դերասանը Հեկուբի մենախոսությունն է ասում, ընդհատում է նրան՝ «մեկ տեսեք, ինչպես գույներ թռել է, աչքերը լցվել են», — Փափազյան-Համլետը այստեղ մի խաղ ուներ, որ շատ անգամ եմ տեսել և միշտ էլ հիացած մնացել:

Փափազյան-Համլետը, որ բազկաթուղի մեջ ընկղմված լսում էր Առաջին դերասանի մենախոսությունը, Պոլոնիոսի խոսքերից հետո ելնում էր ոտքի ու դանդաղ, իրեն հատուկ արքայական քայլերով մոտենում պապանձված դերասանին, մեկնում աջ ձեռքը դեպի նրա արտասովալի աչքերը, մատով արցունքի մի կաթիլ վերցնում, փոխադրում ձախ ձեռքի ափն ու երկա՛ր-երկա՛ր նայում, և երևի այդտեղ, այդ պահին էլ նրա մտքով անցնում էր. «— Հեկուբը նրա ի՞նչն է կամ նա՛ Հեկուբի»: Ուզեցի իմանալ, իրավացի՞ եմ, թե ոչ:

— Ես էլ եմ սիրում այդ տեսարանը, դու ճիշտ ես հասկացել. ես՝ Համլետս, իսկապես այդ ժամանակ եմ մտածում, թե «Հեկուբը նրա ի՞նչն է», և ապա, դերասանների գնալուց հետո, անդրադառնում այդ մտքին:

Հետաքրքրվեցի, թե ինչպե՞ս և ե՞րբ է մտահղացել ձեռք գեղեցիկ և իմաստով խոր այդ մանրամասնը:

— Դա երկար պատմություն է:

հնդրեցի պատմել:

— Առաջին դերասանի դերը կատարողներից ոչ մեկն ինձ չի գոհացրել մինչև հիմա: Չեմ հանդիպել մեկին, որ իսկական լինի, հոգով խաղա և արտաքնապես էլ համապատասխան լինի: Մեծ մասամբ դրանք հղել են միջին շնորհքի, գորշ անհատականությամբ դերասաններ, որոնք կարողացել են ձևակերպել երկի խոսքերը, և միայն:

Իտալիայում, երբ դեռ սովորում էի, մի ամառ մասնակից հղա Մաձձինիի գլխավորած շրջիկ թատերախմբի ներկայացումներին: Բոլոնիա քաղաքում, որպես ուսանող, փոքրիկ, հաճախ էլ անխոս դերեր էի կատարում: Համլետի դերակատարության ժամանակ խաղում էի այն պատանուն, որ Համլետի պահանջով ֆլեյտա է բերում:

Մի այսպիսի դեպք պատահեց:

Բազետտի անունով մի դերասան, որ խաղում էր Առաջին դերասանի դերը, ամեն անգամ իր մենախոսությունն ասելիս լաց էր լինում իսկական արցունքով: Խաղընկերները ծիծաղում էին, մանավանդ որ ինքը՝ դերասանը, վտիտ արտաքինով մի խեղճ մարդ էր, և լավ դերասանների պակասի պատճառով էր միայն, որ նրան էր հանձնարարվում այդ դերը: Այնպես որ, իսկական արցունքն անհամապատասխան էր այդ մարդու արտաքինին: Մի օր հարցրի նրան, թե ի՞նչն է պատճառը, որ այդպես լաց է լինում:

Պատասխանն ինձ ապշեցրեց:

Տեսնելով իմ հետաքրքրությունը, — նա տարիքով ինձնից մեծ էր, — սիրտը բացեց.

— Իմ կյանքի միակ երազը Համլետ խաղալն է հղել, բայց արտաքինիս պատճառով չեմ խաղում: Լավ եմ հասկանում էությունը, բայց բեմականորեն ձևակերպել չեմ կարող:

Շատ անկեղծանալով՝ ասաց, թե մեր մահատրոն, որ խաղում է, իրեն չի գոհացնում: Եվ վրա բերեց.

— Ես լաց եմ լինում նրա համար, որ չեմ խաղում, այս մեկ. որ վարպետս՝ Մաձձինին, վատ է խաղում. այս էլ երկու. և, վերջապես, որ ես, բնության տված արտաքին

խղճուկ տվյալներովս անկարող եմ խաղալ, թեև հոգով զգում եմ դերը:

Ես հասկացա այդ թշվառ մարդու վիճակը: Այդ հասկացել էր նաև մեր մասնատրոն: Եվ երբ մյուս ընկերները ծաղրում էին նրան, Մաձձինիին մի օր սաստեց՝ ասելով.

— Մեծագույն դժբախտություն է դերը հոգեպես ըմբռնել, բայց չկարենալ անձնավորել տվյալների պակասության պատճառով: Փոխանակ ծաղրելու՝ օգտվեցեք նրա սեփական տրագեդիայից:

Այդ խոսքը մնաց իմ մեջ:

Տարիներ անցան և ես շատ անգամ խաղացի Համլետի դերը: Ահա այդ բազում երեկոներից մի օր՝ Հյուսիսային Կովկասում, Արմավիր քաղաքում, Բաղդասարյան ազգանունով մի դերասան, որ հետո խելագարվեց, նույնպես ցանկություն ուներ Համլետ խաղալու: Իհարկե, չէր կարող: Եվ նույն պատճառով, ինչ խաղացի Բազետտին: Բայց մի երեկո, Առաջին դերասանի դերը կատարելիս, նա բոլորիս շշկեցրեց իսկական արցունքներով: Եվ Համլետի դերը խաղալիս, տեսնելով նրան, հիշեցի Մաձձինիի ասածը: Չկարողանալով նրան զատել մյուս դերակատարների քմծիծաղից, բայց և կամենալով արդարացնել նրան ամենքի առաջ, ձեռս երկարեցի ու վերցրի նրա աչքից արցունքի մի կաթիլ: Լուռ խաղալով՝ անդրադարձա այդ արցունքի խոր նշանակությանը, մոռնջ կերպով տալով բացատրությունը՝ դերասանի ներքին հոգեկան հուզմունքը և այդ հուզմունքը արտաքինապես արտահայտել չկարենալու դրաման: Ինձ շրջապատող սիրող-դերասանները հասկացան այդ: Եվ զգացվեցին: Հասկացավ և ինքը՝ դերասանը: Հասկացավ նաև հանդիսատեսը և դահլիճում խոսեց մի խորազգաց լռություն:

Բայց, ի տարբերություն Բազետտի, Բաղդասարյանը հրաժարվեց այդ դերից: Եվ հետագա ներկայացումներին, կուլիսներում նստած, սովահար մարդու պես, նայում էր, թե ինչպես եմ անում այն, ինչ ինքը կկամենար, շատ կկամենար անել, բայց չէր կարող, և խոր հառաչանքով արցունք էր թափում, մինչև որ խելագարվեց:

Դրանից հետո այստեղ և ուրիշ տեղեր, երբ դերասանները

խաղում էին այդ դերը, նրանց մեջ փնտրում էի այդ իսկական արցունքը: Եվ գտնելով՝ չէի կարողանում նույնն անել: Եթե կրկնում էի, զգում էի, որ կեղծ է ստացվում, որ հանդիսատեսին չի հասնում, չի ապրեցնում նրան: Երբ հանկարծ, լենինականում, մի տասնհինգ տարի սրանից առաջ, թե ավելի վաղ, միտս չէ,— դե դու գիտես, որ թվերը ես լավ չեմ հիշում,— վարդան Թերզիբաշյանը, որ կատարում էր Առաջին դերասանի դերը, մի գիշեր այնպես զգացված արտասանեց Հեկտորի պատմությունը, որ արցունքներ երևացին աչքերին, ծիծաղի առիթ տալով իր խաղընկերներին, ճիշտ այնպես, ինչպես Բոլոնիայում Բազետտին, Բաղդասարյանը՝ Արմավիրում: Ես, կորցրածը գտնողի երջանկովյամբ, կրկնեցի այն, ինչ անում էի միշտ իսկական արցունքի ժամանակ: Անսպասելիորեն ինձ համար կրկնվեց նույն բանը թե՛ ինձ շրջապատող դերասանների, թե՛ հանդիսատեսի, թե՛ դերակատարի մոտ:

Հետագայում եկա այն եզրակացության, որ Առաջին դերասանն արտասովի թե չէ, միևնույն է, պիտի ստիպեմ ինձ հավատալ, որ նա արտասովում է, պիտի ստիպեմ ինձ նրա աչքերին արցունքներ տեսնել:

Հոգեկան երկվություն շնորհիվ՝ որ ես, բեմի վրա կերպար լինելով, մնում եմ այդ կերպարի կառավարողը, կարողացա օգտվել այդ դրությունից՝ հոգևոր դերի հարստացման և նրա բարդացման:

* * *

Զարմանալի մի սովորություն:

Ներկայացումից հետո Փափազյանը երկար ժամանակ չէր կարողանում քնել: Եվ, ըստ երևույթին, լիցքաթափվելու համար, գիշերվա ուշ պահին մի չարաճճի խաղ էր խաղում մոտ բնկերների գլխին:

Մի օր, ուշ գիշեր էր, երևի ժամը երկուսն արդեն անց կլինեք, լավեց հեռախոսի զանգ: Ով կարող է լինել այդպես անժամանակ: Վերցրի լսափողը: Կանացի անձանոթ մի ձայն, ներկայանալով որպես բուժքույր, խուճապահար հայտնեց, թե

Արտաշատից, ներկայացումից հետո, մեքենան, որով Փափազյանը վերադառնում էր քաղաք, վթարի է ենթարկվել: Վարպետի վիճակը ծանր է և խնդրում է տեսնել իրեն, շատ կարևոր բան ունի ասելու: Ես ու տիկինս՝ Նելլին, շտապ նետվում ենք փողոց և մեր դռների մոտ հանդիպում Արփենիկ հալանյանին, որին նույն ձայնը հաղորդել էր նույն լուրը:

Ճանապարհին հանդիպում ենք Վավիկ Վարդանյանին և Դավիթ Մալյանին, իրենց կանանց հետ վերադառնում էին ինչ-որ կերուխումից: Հայտնում եմ լուրը. Վավիկը միացավ մեզ, իսկ Դավիթը Պերճանույշի և Կիրայի հետ շտապեց տուն, առողջապահության մինիստրի հետ հեռախոսով կապվելու համար:

Գնացինք երրորդ հիվանդանոց: Չկա: Անցանք երկրորդ հիվանդանոցը, դարձյալ չկա: Շարունակեցինք ճանապարհը. առաջին հիվանդանոցում էլ չկա: Եվ այսպես, քաղաքի բոլոր հիվանդանոցները շրջելուց հետո հուսահատ ու ջարդված վերադարձանք տուն: Ժամը չորսից անց է: Նորից զանգ, նորից կանացի նույն ձայնը հայտնում է, որ Փափազյանին է հանձնում լսափողը:

— Բարեկա՛մս, ներիր ինձ, բայց հավատացի, որ սիրում ես ինձ:

Ու բարձր ծիծաղ: Հաջորդում են միմյանց նույնատիպ զանգեր բոլոր նրանց, որոնց ուշ ժամին ոտքի էր հանել արտիստը: Իսկ առավոտյան պարզվեց, որ ներկայացումից հետո մի քանի հոգով վերադարձել են Երևան և տուն զնալու փոխարեն «խուժել» են Անիկ Մկրտումյանի բնակարանը, իսկ տանտիրուհին ինձ և ուրիշներին ներկայացել է որպես բուժքույր:

* *

Մի օր ասաց.

— Շատ բանի եմ հասել, բայց մի փափազ մնացել է մեջս: Հիսուն տարի ծառայել եմ Շեքսպիրին, ուր գնացել՝ տարել եմ հետս ու ներկայացրել նրան մեր հայ լեզվով, մեր հին լեզվով, որ խստաշունչ է, ինչպես մեր երկինքը կայծա-

կի զարկի պահին, քնքուշ է ու ջերմ, ինչպես մեր երկինքը
երևանյան աշնան օրերին: Ո՛ւր ասես, որ չեմ եղել, ո՛ւր ասես
ոտ չեմ դրել: Ու հավատա, ամեն տեղ էլ մեր ժողովրդի պա-
տիվը բարձր եմ պահել: Բայց մի տեղ, որ պատանի հասա-
կիս եմ եղել՝ Շեքսպիրի հայրենիքն է: Ուզում եմ հիմի գնալ,
երբ ուժ եմ զգում մկանունքիս մեջ: Ուզում եմ հիմի գնալ,
երբ մեջքիս պետականացած ժողովուրդ է կանգնած: Ասում
եմ գնամ, լոնդոնցիների շնքից բռնեմ, գնեմ տակա ու դառ-
նամ տուն, էլ ետ չնայեմ:

* * *

Մտա հյուրանոց փափազյանին տեսնելու: Գործ ունիի,
հիմա չեմ հիշում, թե ինչ: Հուզված էր, կարծես նույնիսկ
վրդովված: Ետ ու առաջ էր անում: Հետաքրքրվեցի, թե ինչ
է պատահել: Ասաց, որ եղել է գերեզմանատանը և շատ վըշ-
տացել է, տեսնելով իր սիրելի ընկերոջ՝ Արուս Ոսկանյանի
շիրիմն այդպես անշուք վիճակում: Վճռելով իր ծախքով զար-
դարել նրա շիրիմը, զանդահարել է Արուսի մորը, հայտնել իր
ցանկությունը և խնդրել տեսակցություն՝ դրա շուրջը խորհր-
դակցելու համար:

— Երբ վերահասու եղա, որ արժանավայել Արաքսի-հա-
նըմը մտադիր է թաղվել իմ Արուսյակի կողքին և որ ինչ-
ինչ պաշտոնական թույլտվություն էլ ունի ձեռքին, իր այդ
ցանկությունն ապահովող՝ ես բարվոք համարեցի հրաժարվել
իմ ծրագրից և Արուսյակիս շիրիմը կանգնեցնել իմ սրտում,
ուր ո՛չ ոքի հնարավոր չլինի մտածել իսկ հանգչելու նրա
կողքին:

* * *

Մի օր հարցուփորձ էի անում թաշկինակի տեսարանի
վերջին լուսաբանությունից: Ուզում էի իմանալ, թե որտե՛ղ և
ինչպե՛ս է հղացել այդ միտքը: Այդ առթիվ պատմեց Տուգա-
նովի ոգևորությունը այդ տեսարանով՝ Բաքվում, 1945-ին:
Ես ակամա անդրադարձա այն իրողությանը, որ ահա քանի՜
ժամանակ է, երևի մի քանի տասնամյակ, որ դերասանի խա-

դի մեծարման ու գնահատության այդ կարգի դրսևորումներ չեն լինում: Եվ մտածում էի աստուածանքով՝ չլինի՞ թե Փափափազյանն այն վերջին ողբերգական է, որ իր հետ տանում է ռոմանտիկ հանդիսատեսին, որպիսին, Փափազյանի պատմածով, եղել է Տուզանովը, Բաքվի ռուսական թատրոնի նշանավոր ռեժիսորը:

Նայեց աչքերիս և չկռահելով, թե ինչի մասին եմ մտածում, կարծեց, թե չեմ հավատում ասածին, ժպտաց, որի մեջ վիրավորված մարդու դառնություն կար:

— Բոլորդ էլ այդպես եք, չեք հավատում, նույնիսկ դու, որ բարեկամս ես:

Մի փոքր հետո.

— Ոչ ոքի չէի պատմել, առաջին անգամ քեզ ասացի, և հավատացիր: Կարող ես ժամենին հարցնել, իրեն՝ Տուզանովին:

Ես, իհարկե, ոչ ժամենին հարցրի, ոչ էլ Տուզանովին հարմար գտա հարցում անել նամակով: Անցավ բավական ժամանակ, երևի մի երկու թե երեք տարի և հանկարծ մի օր, նույնը, ինչ պատմել էր Փափազյանը, պատմեց ռեժիսոր Արտաշես Հովսեփյանը, որ այն տարիներին, աշխատելով Բաքվի հայկական թատրոնում, ներկա է եղել այդ դեպքին:

Գնացել էի Լենինական՝ թատրոնում զեկուցում տալու: Արտաշես Հովսեփյանը, որ այդ թատրոնի դիրեկտորն էր և գլխավոր ռեժիսորը, մի քանի դերասանների ներկայությամբ գանգատվեց Փափազյանից. խոստացել է ներկայացումների գալ, սա էլ հայտարարություններ է փակցրել, տոմսեր վաճառել ոչ միայն քաղաքում, այլև գյուղերում, իսկ Փափազյանը, Լենինական գալու փոխարեն, ճանապարհվել է Ստեփանակերտ:

Գանգատն իրավացի էր և ես Փափազյանին արդարացրեցի ոչ մի պատճառաբանություն չկարողանալով գտնել՝ ասացի, թե ճիշտ է, լավ չի արել, բայց նրան պետք է ընդունել այնպես, ինչպես որ կա:

Հովսեփյանը, ենթադրելով, թե ես այն տպավորության եմ, թե ինքը դրա հիման վրա կասկածի է ենթարկում Փա-

փազյանի մեծությունը, հարցրեց, թե ես գաղափար ունե՞մ, թե ով է Տուգանովը և, դրական պատասխան ստանալով, ասաց.

— Դե որ այդպես է՝ լսեցեք, ես ձեզ մի դեպք պատմեմ Փափազյանի կյանքից, որ դժվար թե լսած լինեք:

Տեսնելով, պատրաստվում ենք լսելու՝ նա անշտապ մի շարժումով թարմացրեց ծխախոտի կրակը և պատմեց հետևյալը, որ նույնն էր, ինչ-որ հայտնի էր ինձ Փափազյանի պատմածից:

— 1945 թվականն էր: Փափազյանը Երևան այցելելու ճանապարհին կանգ էր առել Բաքվում՝ ներկայացումներ տալու համար: Բաքվի հասարակությունը կարոտել էր Փափազյանին: Ես շատ եմ տեսել Փափազյանի Օթելլոն, բայց ինչպես նա խաղաց այդ օրը՝ երևակայությունից դուրս բան էր: Երբեք նրան այդպես չէի տեսել, ոչ էլ կարող էր մտքովս անցնել այն բոլորը, ինչ որ նա արեց: Առանձնապես տպավորիչ էր թաշկինակի տեսարանը: Առաջին ներկայացումից հետո լուրը տարածվեց քաղաքում և բոլորն ուզում էին տեսնել նրա խաղը: Ե՛վ ուսանել, և՛ ադրբեջանցիներ, և՛ հրեաներ: Եթե ասեմ, որ պատրաստ էին թատրոնի դռները ջարդել, միայն թե դահլիճ ընկնեն, հավատացե՞ք, որ չեմ չափազանցնում:

Հովսեփյանը մի պահ կանգ առավ:

— Լուրը հասել էր Տուգանովին, և նա էլ, բոլորի նման, որոշել էր նայել Փափազյանի խաղը, մանավանդ՝ երկար տարիներ նրա Օթելլոն տեսնելու առիթ չէր ունեցել: Չեմ հիշում թե Փափազյանի որերորդ ներկայացումն էր, որ Տուգանովը եկավ թատրոն: Թե ի՞նչ է Տուգանովը՝ ինքներդ լավ գիտեք, ի՞նչ ասեմ: Ներկայացումից առաջ չգնաց կուլիսները՝ Փափազյանին տեսնելու:

Երրորդ զանգը տրվեց: Նա դահլիճ մտավ բոլորի հետ: Առաջին և երկրորդ արարներից հետո, ընդմիջումներին՝ Տուգանովը եկավ իմ առանձնասենյակը, խոսեց զանազան հարցերից, բայց ոչ մի խոսք Փափազյանի ու նրա խաղի մասին: Ինքը ոչինչ չէր ասում, մենք էլ, թեև շատ էինք հետաքրքրվում, սիրտ չէինք անում հարցնել: Երրորդ արարից հետո չե-

րեաց մեր սենյակում, Ենթադրելով, որ գնացել է Փափազ-
յանի մոտ՝ շտապեցի կուլիսները: Շատ մարդ կար այնտեղ,
ով ասես, բացի Տուգանովից: Մտա դահլիճ. այստեղ էլ շէր:
Կասկած ընկավ սիրտս, չլինի՞ թե չի հավանել ու թողել-հե-
ռացի է: Շտապեցի հանդերձապահի մոտ. ասաց, որ այո, հենց
որ վարագույրը փակվել է, եկել է վերարկուն վերցրել ու գնա-
ցել: Ասես սառը ջուր լցրին գլխիս: Տարակուսած ետ դարձա և
միակ բանը, որ կարողացա մտածել՝ այն էր, թե ինչ լավ եղավ,
որ Փափազյանին չէի ասել, թե Տուգանովը եկել է ու նայում
է ներկայացումը: Երբ ներկայացումը վերջացավ, անցա կու-
լիսները, և հիմա չեմ հիշում, թե քանի անգամ, համենայն
դեպս շատ-շատ էր դա, դահլիճն իր ծափով ու կանչերով
Փափազյանին բեմ էր վերադարձրել: Այժմ, ինչպես միշտ,
մարդիկ, որոնց մատչելի էին կուլիսները, մարդիկ, որ երբեք
չէին եղել կուլիսներում, մի մեծ բազմությամբ շրջապատել
էին Փափազյան-Օթելլոյին, որն իր փառահեղ ու հաղթ հասա-
կով կենտրոնում կանգնած, ժպտում էր մեկ սրան, մեկ մյու-
սին, կարճ պատասխաններ էր տալիս իրեն ուղղված հարցե-
րին, ստորագրություն դնում իրեն պարզված լուսանկարների
ու ծրագրերի վրա: Ահա այդ ժամանակ էր, որ կուլիս մտավ
Տուգանովը, երջանիկ մի ժպիտ դեմքին՝ կանգնեց դռների
մոտ:

— Տուգանովը...

Ասացին նրան ճանաչող մարդիկ ու իրենց պաշարումից ա-
զատեցին Փափազյանին: Սրանց օրինակին հետևեցին և նը-
րանք, որ չգիտեին, թե ով է ներս մտած ծերունին: Փափազ-
յանը, տեսնելով Տուգանովին, բացականչեց.

— Ալեքսանդր Ալեքսանդրովի՛չ, — ու ձեռքերը պարզած՝
քայլեց դեպի նա:

Տուգանովը ձեռքի հրամայական շարժումով կանգնեցրեց
նրան: Փափազյանը քարացավ տեղում: Տուգանովը, թատե-
րական այդ մեծ հեղինակությունը, որ տարիքով էլ մեծ էր
նրանից, ծունկի եկավ և այն մի քանի քայլը, որ իրեն բաժա-
նում էր Փափազյանից, ծնկաչոք անցավ, մոտեցավ ար-
տիստին, վերցրեց Օթելլոյի զգեստի քղանցքը, մոտեցրեց

շուրթերին և ապա գլուխը բարձրացնելով ի լուր բոլոր ներկաների՝ ասաց.

— Այս գիշեր ես համոզվեցի, որ դու աշխարհի ամենամեծ արտիստն ես:

Փափաղյանը բարձրացրեց նրան, և երկար ժամանակ ողջագործած մնացին՝ ներկա գտնվողների խանդավառված ծափերի ու կանչերի աղմուկի տակ:

Երբ շրջապատը հանդարտվեց և Օթելլոն իր սև բազուկներից ազատեց Տուգանովին, նա ձեռքը տարավ ծոցադրպանը և ալյտեղից հանեց Փափաղյանի լուսանկարը, 1913 թե 1914 թվականի մի նկար, որի վրա Պոլսից Թիֆլիս եկած Փափաղյանի մականգրությունը կար: Ահա թե ինչու էր երրորդ արարից հետո Տուգանովը տուն շտապել: Եվ խնդրեց, որ Փափաղյանը նույն նկարի վրա, երեսուն և ավելի տարիներ հետո, նոր մականգրության արժանացնի ջահել օրերի այս հազվագյուտ հիշատակը:

* * *

Փափաղյանը չէր սիրում սեղան նստել, քեֆ անել: Նա ուներ օրվա իր կարգն ու կանոնը, որին հետևելը տասնամյակների ընթացքում նրան հեռու է պահել հիվանդանալու վտանգներից: Երկու բան միայն կարող էին խախտել այդ կարգըն ու կանոնը՝ թատրոնը և կանայք: Խմել չէր սիրում. կոնյակը և գինին շատ շուտ էին ազդում վրան:

Մի անգամ հարցրի, թե մի՞թե ինքը չի մասնակցել այն սեղաններին, որ բացվել են ներկայացումներից հետո, երբ ինքը ռուսական շրջիկ խմբի գլուխն անցած մի քաղաքից մյուսն է գնացել:

— Մեծ մասամբ խուսափել եմ: Եթե հնարավոր չի եղել, մի կես ժամ նստել եմ պատշաճը պահելու համար, հետո, երբ խաղընկերներս արդեն գինովցած էին լինում, աննկատ հեռացել եմ մտել անկողին: Նրանք նստում էին մինչև ուշ գիշեր: Դե՛, նրանց, ինչ, դժվարն իմն էր, վաղը ներկայացման ծանուցյուն պետք է վրաս առնեի:

— Իսկ կանա՞յք...

Ծիծաղեց:

— Անունս է դուրս եկել և շատ էլ մի հավատա:
Ժպտաց:

— Գիտես ինչ, բարեկամս, կինն այնպիսի արարած է, ուրիշ անկարելի է չսիրել:

* * *

Աբովյան փողոցումն էր, Հյուրանոցի մուտքի մոտ: Փափազյանն էր, նկարիչ Նաչատուր Եսայանը և ես: Այն օրերին էր, երբ Փափազյանը պատրաստում էր «Ուրիշ Ակոստայի» նոր բեմադրությունը՝ իր մասնակցությամբ: Բոլորս էլ այն համոզման էինք, որ նա եթե կամենում է՝ պետք է բեմադրի և ոչ թե խաղա: Իրեն դժվարանում էինք ասել, բայց ակնարկում էինք, երբեմն մոլթ, երբեմն բավական թափանցիկ: Փափազյանը կամ չէր հասկանում, կամ էլ չհասկանալու էր տալիս: Իսկ եթե հասկանում էր՝ դիմադրում էր ինչքան ուժ ուներ, նեղ դրությունից դուրս գալու մի սրամիտ ելք գտնելով: Եսայանը հարցրեց.

— Քանի՞ տարեկան է Ուրիշը:

Նկարիչն այդ լավ գիտեր, բայց նրա նպատակն այլ էր: Փափազյանը հասկացավ.

— Ուրիշը տարիք չունի. նա փիլիսոփա է:

* * *

Լենինականի թատրոնի շքամուտքի առաջ, ծառաստվերում կանգնած զրուցում էր երիտասարդ և ավագ դերասանների մի ոչ մեծ խումբ: Փափազյանն էլ էր նրանց հետ:

Մի մուրացիկ մոտեցավ և հերթով ձեռքը պարզեց բոլորին: Մի տարեց դերասան բացեց փողաքսակը ու երբ տեսավ, որ մի ուրբիանոց է ձեռքին, թղթադրամը նորից տեղը դրեց, և երկար որոնելուց հետո, գտավ մի քսան կոպեկանոց: Մուրացիկը մոտեցավ Փափազյանին. նա ձեռքը տարավ գրպանը, շարունակելով խոսքը, և ավելի, որպես նախատինք տարեց ընկերոջ, քան օգնություն, արտիստիկ անփութությամբ մուրացիկի բռան մեջ դրեց մի տասը ուրբիանոց:

Խոստացա երեկոյան լինել իր մոտ: Տեսնեմ՝ գահավորակին նստած է մի ծեր հոգևորական, Փափազյանն էլ արտակարգ ուրախ է. ծանոթացրեց: Պարզվեց, որ դա Հայր-Բողոքյանն է, միակը, որ դերասանի ուսուցիչներից և դաստիարակներից ողջ է մնացել: Բողոքյանին Փափազյանը հանդիպել էր Վենետիկում ուսանելիս: Պատմության դասատուն է եղել: Հիսունմեկ տարվա անջատումից հետո կրկին հանդիպել են: Բողոքյանը, որ ութսունը լրացրել ու վաղուց առաջ է անցել, խարխլած մի ծերուկ է, այնքան դալկադեմ, որ թվում է, թե արյունը սառել է մեջը: Ժպտում է մանկական մի արտահայտությամբ: Բայց հիշողությունը լավ է, և ուսուցիչ ու աշակերտ մեկիկ-մեկիկ հիշում են վարժարանցիներին, թե ով ուր է և ինչ ճակատագիր ունեցավ:

Երբ ներկայացրին ինձ՝ ասաց.

— Ինձի համար մեծ ուրախություն է ձեզի հետ ծանոթանալը. ամեն մեկ նոր անձ իմ կյանքում հույս է, որ տակավին կշարունակվի կյանքս:

Հիշեցին հայր-Ղազիկյանին:

— Ան ալ Պարտիզակից էր, ինչպես ես,— դարձավ ինձ,— մեր գյուղը տասներկու հազար բնակիչ ուներ, երբ թուրքերը վրա կուտան, հայր-Ղազիկյանը իր ձեռագրերը կթաղե հողին մեջ ու նոր կլքե գյուղը:

1956-ին պետք է տեղի ունենար հայ արվեստի և գրականության տասնօրյակը Մոսկվայում: Փափազյանը մեծ ցանկություն ուներ մասնակցելու, հույսեր կապելով, թե վերջապես, կստանա դերասանի համար բարձրագույն տիտղոսը մեր երկրում՝ «Սովետական Միության ժողովրդական արտիստ»:

Թատրոնում կային մարդիկ, այն էլ բավական ազդեցիկ դեմքեր, որոնք դեմ էին Սունդուկյանի անվան թատրոնի կազմի մեջ Փափազյանին տեղ տալուն:

Այդ հարցը մի քանի անգամ քննության առարկա դարձավ թատրոնի գեղարվեստական խորհրդում: Լինելով այդ խորհրդ-

դի անդամ, ես ու մի քանի ուրիշ ընկերներ պաշտպանում էինք Փափազյանի շահերը: Հակառակորդները ասում էին, թե Փափազյանի արվեստը իր բնույթով ոչ մի ընդհանուր բան չունի սովետական ցինիների դերասանական արվեստի հետ: Պաշտպաններս առարկում էինք, ասելով, թե Սովետականի թատրոնի դերասանները մի միասնական ոճի դերասաններ չեն, հետեապես եղած առարկությունը արհեստական է, որով կամենում են կասեցնել մասնակցությունը մի դերասանի, որով, թվում էր, պետք է հպարտ լինի թատրոնը:

Փափազյանը գեղարվեստական խորհրդի անդամ չէր և չէր մասնակցում նիստերին: Վեճերը բավական կրքոտ էին, երբեմն էլ ընդունում էին անձնական վիրավորանքի բնույթ:

Հարցը որոշվեց հօգուտ Փափազյանի:

Մոսկվա տարվող խաղացանկում կար «Օթելլո», բեմադրիլու էր Լևոն Քալանթարը, որի կարծիքով զլխավոր դերը պետք է կատարեր Գեղամ Հարությունյանը: Դերը տրվեց Փափազյանին:

Տեղի ունեցավ ներկայացման հանձնումը: Փափազյանն այն չէր: Ոչ այնքան այն պատճառով, որ տարիք էր առել, որքան այն, որ ենթարկվել էր բեմադրող ռեժիսորի մեկնաբանությանը, կորցրել իրենը և ռեժիսորի առաջարկած նորն էլ, որ գոնե ինձ խիստ վիճելի էր թվում, չէր բյուրեղացի:

Ներկայացման գիշերը քնել չկարողացա և հասկացա, որ չեմ հանգստանա, մինչև մի նամակ չգրեմ իրեն՝ Փափազյանին և չհայտնեմ իմ հուսահատ տպավորությունը: Նամակը երկար ստացվեց: Փափազյանը ոչինչ չասաց նամակը ստանալու մասին, բայց հանդիպելիս խուսափեց ինձանից: Ներկայացման քննարկմանը ելույթ ունեցա գրածս նամակի ոգով: Ինքը ներկա չէր, բայց նրան հայտնել էին, թե ով ինչ է ասել: Սառնություն մտավ մեր հարաբերությունների մեջ: Նա չէր ուզում հասկանալ, որ ես չէի կամենում, որ նա այդպես ներկայանա իրենով մի ժամանակ հիացած Մոսկվային, այդ պարտությունը համարելով շատ թանկ հատուցում՝ բարձրագույն տիտղոս ստանալու պատվի դիմաց:

Փափազյանը հիշալար չէր: Եվ այդ սառնությունը հազիվ մի ամիս տևեց: Մի երեկո զանգ տվեց, խնդրեց անպայման

անցնել իր մոտ մի կարևոր գործով: Ինչպես այդ, այնպես էլ մեր մյուս հանգիպումներին դրա մասին խոսք չէինք բացում: Երբ մեկնում էր Մոսկվա, ճանապարհելիս բարեմաղթեցի հաջողութուն: Մոսկովյան մամուլը նրան գովել էր և նա, իհարկե, գիտեր այդ, մասնագետների նեղ շրջանը դժգոհ էր մնացել, որից, բարեբախտաբար, նա տեղյակ չէր: Ու երբ վերադարձավ, միայն մի խոսք ասաց.

— Իզուր էիր անհանգստանում. ամեն ինչ կարգին էր:

Ասաց և գրկեց ինձ ու համբուրեց: Բայց ես գիտեի, որ բնավ էլ ամեն ինչ կարգին չէ:

* * *

Մոսկովյան տասնօրյակից մեր արվեստագետները վերադարձան: Ոչ ոքի հայտնի չէր, թե ով ինչ կոչում է ստանալու, ինչ շքանշան կամ մեդալ: Բոլորն էլ անհամբեր էին: Վերջապես հրապարակվեց տեղական որոշումը կոչումների մասին: Միառժամանակ հետո հայտնի դարձավ նաև, թե Միութենական Գերագույն սովետը ում ինչ շքանշան է շնորհել: Անցնում էին օրեր և այդպես էլ հայտնի չէր, թե Սովետական Միության ժողովրդական արտիստի կոչման քանի՞ հոգի են արժանանալու և ովքե՞ր են լինելու դրանք: Պարզ էր, որ չորսից կամ հինգից չէր անցնելու քանակը, իսկ թե ովքեր էին լինելու՝ առատ ենթադրությունների տեղիք էր տալիս և հավակնորդների ցանկը տասից անցնում էր:

Ամեն օր սպասվում էր ու ես խմբագրությունում աշխատող ընկերոջս՝ Ժիրայր Հակոբյանին, խնդրեցի, որ իմանալուն պես հեռախոսով հայտնի ինձ: Բոլորը սպասում էին: Սպասում էր նաև Փափազյանը: Երեկոյան ժամը 9-ը կլիներ, որ ընկերս զանգահարեց. ստացողների հնգյակում կար նաև Փափազյանի անունը: Զանգահարեցի թատրոն, արդեն գիտեին: Հարցրի, թե Փափազյանին հայտնե՞լ են: Պարզվեց, որ ոչ, որովհետև այդ ժամանակ նոր էր ստացել բնակարանը և հեռախոս չուներ: Իմ տանն էին այդ պահին արվեստի մի խումբ մարդիկ, որոնց մեջ՝ Բաբկեն Ներսիսյանը: Առաջարկեցի գնալ Կիևյան փողոց և շնորհավորել արտիստին:

Անահիտը դուռը բացեց և զարմացած մնաց, որ այդքան

շատ մարդ, առանց իմաց տալու, եկել են իրենց տուն, իսկ Փափազյանը սեղանի մոտ նստած պասյանս էր բացում:

— Շնորհավորո՞ւմ ենք...

Գոչեցինք ու բոլորս վրա ընկանք ողջագուրվելու:

— Իսկ ի՞նչ է եղել որ:

— Դու այսօրվանից ու այս ժամից Սովետական Միության ժողովրդական արտիստ ես:

— Զի կարող պատահել:

Զէր հավատում: Սկսեցինք հավատացնել, ասացինք նաև. թե էլ ով է ստացել: Կարծես սկսեց հավատալ, բայց մի տարակուսանք կար մեջը: Մեկ էլ դռան զանգ ու սենյակ մտավ բեմի հնագույն բանվոր Կոստանը՝ շնորհավորանքը շուրթերին:

Հավատաց:

Նոր միայն փաթաթվեց ամեն մեկիս, շնորհակալություն հայտնեց բարի լուրով զալու համար ու խնդրեց Անահիտին սեղան պատրաստել:

Հետզհետե բնակարանը լցվեց ծանոթ և անծանոթ մարդկանցով: Երբ զվարթ մթնոլորտ էր տիրում և Փափազյանի ուրախությանը չափ չկար, իմ մտքով մի բան անցավ:

Այս արտիստը, որ իր տեսակի մեջ եզակի էր, ոչ միայն իր հզոր արվեստով, այլև լայն ժողովրդականությունը, թվում է թե կարող էր այդ կոչումը ստանալ Կաշալովի և Մոսկվինի հետ միաժամանակ, մի խոսքով՝ ոչ թե հիմա, այլ սրանից մի քսան տարի առաջ:

Եվ մի՞թե, մտածում էի ես, այսքան ուշացումով ստանալու դեպքում էլ, այդ մեծ արտիստը պետք է ապրումներ, կասկածներ ունենար՝ կստանա՞, թե ոչ:

Մի ուրախ պահի հարցրի:

— Վահրամ Գամբրովիչ, մենք որ եկանք, թուղթ էիր բացում. ճիշտն ասա, մտածո՞ւմ էիր՝ «եթե բացվեց՝ կստանամ, եթե ոչ՝ ոչ»:

— Ինչ թաքցնեմ, մտքինս դա էր:

* * *

1958-ի հունվարի 6-ին լրացավ Փափազյանի 70 տարին: Նա, որ այդ օրը որպես կանոն անպայման բեմ էր բարձրանում, ցանկություն հայտնեց այս անգամ Արբենին խաղալու:

Արտիստի երկրպագուները, տեսնելով, որ նրա հոբելյանի շուրջը ոչ մի խոսք չկա, ոչ մի պատրաստութիւն չի տեսնվում, խոսքերը մեկ արած, շնորհավորական հեռագրեր ուղարկեցին տան ու Բատրոնի հասցեով: Հեռագրերը բավական շատ էին ստացվել և դա խիստ հուզել էր Փափաղյանին: Իսկ անվանի դերասաններից մեկը, սրտնեղելով, ասաց.

— Եթե այսպես պետք է լիներ, զգուշացնէիք՝ մեզանից մեկն ու մեկը բեմ կբարձրանար և կողջուներ նրան ծննդյան օրվա առթիւ:

— Շատ լավ կլիներ. իսկ ինչո՞ւ չեք մտածել, — հարցրեց ներկա գտնվող դերասաններից մեկը:

— Օրը չգիտեինք:

— Այդ ինչպե՞ս է, որ այսքան մարդ գիտեր, իսկ դուք չեք իմացել:

Այս «վեճը» շարունակվում էր, իսկ Փափաղյանը անտեղյակ դրանից, սիրո խելացնոր խոստովանության դառը պահեր էր ապրում բեմում և հանդիսատեսն իր ծափերով ու կանչերով շնորհակալութիւն էր հայտնում ոչ միայն այսօրվա խաղի, այլև դերասանին ընդհանրապես՝ տարիներ շարունակ գեղեցկի զգացողութիւնն իր մեջ հաստատ պահելու և խորացնելու համար:

* * *

— 1959-ին, մի տարվա ուշացումով Փափաղյանի ծննդյան 70-ամյակը նշվեց: Իր վերջին խոսքում, ի միջի այլոց, ասաց.

— Շնորհակալ եմ ամենքից՝ իրենց լավ խոսքերի համար: Մի բան լավ չէին անում միայն, որ ասում էին, թե յոթանասուն տարեկան եմ դարձել: Ինչի՞ եք այդպիսի անհարմար բաներով հետաքրքրվում, Ես ձեզ, սիրելի հանդիսատեսներ, որ եկել եք այս գիշեր ինձ պատվելու, հարցնո՞ւմ եմ, թե դուք ինչքա՞ն եք դարձել: Ես այնպիսի տպավորութիւն ստացա, թե այդ բոլորն ասում են նրա համար, որ տանը նստեմ ու այլևս դորժ չանեմ: Չեղած բան է, չեմ կարող: Կնի՞կ եմ, ինչ է, որ ձեռքերս ծալեմ ու նստեմ: Չեմ զգում տարիքս, ուրեմն՝ այդքան չեմ: Ես դեռ շատ բան ունեմ անելու, իսկ թե որտե՞ղ ու

ինչպե՛ս կանեմ՝ չգիտեմ, գիտեմ միայն, որ ուր էլ լինի՝
կլինի միայն այս տախտակամածի վրա՝ բեմում:

Եվ այնուհետև.

— Ես մի նեւտ եմ, որի աղեղը քո ձեռին է, իմ ժողովուրդ:
Եվ դու ես արձակել ինձ միջոցի մեջ: Ես հիմա էլ սլացքի մեջ
եմ, թռչում եմ, գնում եմ: Թե քո արձակած նետը ե՛րբ և
որտե՛ղ է ժայռի հանդիպելու ու խորտակվելու՝ այդ իմ իմա-
նալու բանը չէ:

* * *

Հոբելյանին անդրադարձավ Անգլիա գնալու փափագին:
'Իարձավ դեպի կառավարութեան ներկայացուցիչները, դեպի
ժողովուրդը և խնդրեց օգնել, ուղարկել իրեն Լոնդոն՝ այնտեղ
խաղալու համար:

— Կգնամ՝ տարիքիս հիսունը այստեղ թողած, ու կվերա-
դառնամ, հավատացե՛ք ինձ, ինչպես մի քսան տարեկան:

Հետո.

— Իմ միակ ցանկությունն է հիմա այդ. մինչև չկատար-
վի՝ չեմ մեռնի:

* * *

Սունդուկյանի թատրոնը բեմադրեց Ուիլյամ Սարոյանի
«Իմ սիրտը լեռներում է» պիեսը: Մեք-Գրեգորի դերը կա-
տարում էր Հրաչյա Ներսիսյանը: Մի քանի ներկայացումից
հետո Փափազյանը ցանկություն հայտնեց խաղալու նույն
դերը: Փոխնիփոխ էին խաղում: Փափազյանի առաջին ներ-
կայացման օրը թատրոնումն էի: Այդ օրը տեղի ունեցավ
մի բան, որ հետո կրկնվում էր բոլոր ներկայացումներին:

Մեք-Գրեգոր-Փափազյանի վերջին տեսարանն էր: Մեկ
հիշողության թելը կորցնելով, մեկ վերագտնելով մտքի
պայծառությունը, բայց միշտ հոգեկան մեծ հուզումով հա մի
խառը մենախոսություն էր կարդում Լիրից և Համլետից: Փա-
փազյանը մի-փսքը շեղվելով հեղինակից՝ հավելում էր
շեքսպիրյան ուրիշ հատվածներ էլ: Այսինքն՝ մտնում էր իր
իսկական տարերքի մեջ:

Այդ մենախոսությունից հետո Մեք-Գրեգորը վախճանվում է:

Բեն-Ալեքսանդրն ասում է.

— Այս մարդը մեր ժամանակի շեքսպիրյան ամենամեծ դերասանն էր:

Բեն-Ալեքսանդրի այս խոսքերը խլացան ծափահարությունների տարափում:

Հրաշյային, որ թվում է, թե Փափազյանից ավելի հաջող էր այդ դերում, չէին ծափահարում այստեղ:

Փափազյան-Մեք-Գրեգորին տեսել եմ մի քանի անգամ և միշտ նույն տեղում դահլիճը ծափերով էր լցվում

* * *

Միլիցիայի ակումբում Փափազյանի հանդիպումն էր: Զեկուցումից հետո միլիցիոներները ողջունեցին նրան: Վերջում ինքը շնորհակալության խոսք ասաց: Ի միջի այլոց նկատեց նաև հետևյալը.

— Ինչ լավ հայերենով էին խոսում այս ամբիոնից ինձ ողջունողները: Այն ընկերը, որ առանց թղթի կտորի խոսեց այդքան գեղեցիկ, նույնպե՞ս միլիցիայի աշխատող է:

Դահլիճում նստածներն ասացին, թե այո, խոսողը միլիցիոներ է:

— Անցյալ օրը, — շարունակեց իր խոսքը Փափազյանը, — գնացել էի փոստ՝ մի ծրար արտասահման ուղարկելու: Կողքիս կանգնած էր մի կին, երիտասարդ, հայ տիկին՝ մանչուկի ձեռքից բռնած: Եվ պատկերացնո՞ւմ եք, այդ գեղեցիկ, հրապույրով լի կինը իր մանչուկի հետ խոսում էր մի այնպիսի անճոռնի հայերենով, որ զարհուրեցի: Քանի որ ձեր մեջ այդքան լավ հայերեն իմացողներ կան, ապա աղերսագրին խնդրում եմ ձեզ, չե՞ք կարող, արդյոք, մեր լեզուն այդպես անխնա աղավաղողներին, անճոռնի հայերենով խոսողներին կալանքի տակ առնել:

Դահլիճում ուրախ ծիծաղ բարձրացավ:

— Մի՛ ծիծաղեք, լուրջ եմ ասում: Մի՞թե կարծում եք, որ դրանց հասցրած վնասը նվազ է գրպանահատի հանցանքից:

«Ուրիշ Ակոստա» ներկայացումից հետո մի անժամնոթ ծերունի մոտեցավ Փափազյանին, ներողություն խնդրեց ուշ ժամին անհամբարացնելու համար և հարցրեց՝ թե ինչո՞ւ չի թողնում բեմը, չէ՞ որ հենց ինքը իր զրքում ասում է, թե դերասանը պետք է թողնի բեմը ավելի վաղ, քան բեմը կթողնի նրան:

Անմիջապես չպատասխանեց: Զննական հայացքով նայեց ծերուկի աչքերին և ուզեց հասկանալ, թե իր հոգնած պահին ուզում է իր հոգու հետ խաղա՞լ, թե պարզասիրտ հետաքրքրության արդյունք է այդ հարցումը: Իսկ ծերունին նայում էր նրան այն անկեղծ սրտաբացությամբ, որ մարդուն կաշառում է անմիջապես:

— Քանի տարեկա՞ն ես:

Հարցրեց Փափազյանը:

— 67:

— Կին ունի՞ս:

— Այո:

— Առաջվա պես սիրո՞ւն է, երիտասա՞րդ, հրապուրի՞չ: Մերուկը շվարած նայում էր Փափազյանին և չէր հասկանում, թե այդ բոլորն ինչ կապ ունի իր հարցի հետ:

— Դե՛, թող էլի, փնչի՞ չես թողնում: Չես կարողանում, այնպես չէ՞:

Լռեց:

— Այդպես էլ ես, սիրելի՛ս: Տեսնում եմ, հասկանում եմ, ուզում եմ, բայց չեմ կարողանում:

* *

Լևոն Քալանթարը, հետո նաև ուրիշները, նախատեց ինձ «Հետադարձի» այն էջի համար, որ Արշավիր Շահխաթունուն է նվիրված:

Մի օր Փափազյանին ասացի, թե այդ մի էջը դժգոհությունների շատ առիթ է տվել:

— Դու ես մեղավոր:

Զարմացա:

— Ինչպե՞ս թե:

— Շատ էլ գրեւ էի՝ ջնջելի: Հենց սկզբից քեզ քարթրւանժ տվի, ասացի՝ ինչ ուզում ես արա: Դու էլ արի՛ր, շատ էջեր ու տողեր կրճատել ես, մի ձայն հանե՞լ եմ, չէ՛: Չեմ հասկանում՝ ինչպե՞ս եղավ, որ այդ էջը թողիր:

Ես պատմեցի լսածս. Լոս-Անջելոսի օրիորդաց վարժարանը երեկո է կազմակերպում և դիմում է Շահխաթունուն, խնդրում մասնակցել: Դերասանը, որ դամված էր անկողնուն, ուղարկում է մի նամակ, որ գրել էր թատրոնի մասին:

Փափաղյանը լսում էր ուշադիր, կարեկցանքով լի:

Ասացի նաև, որ իր նամակում խոսել է այն մասին, թե հայ թատրոնը անկում է ապրում, թեև նա շատ մեծ դեր ունի ազգահաստատման գործում լեզվապահպանման տեսակետից: Բայց վերջում ասել է, թե անկարելի է անկումը մի թատրոնի, որ աշխարհին տվել է երեք այնպիսի հսկա, ինչպե՞ս Ադամյանը, Սիրանուշը և Փափաղյանը:

— Ծի՛շտ...

Հազիվ բացականչեց Փափաղյանը և այլևս չկարողացավ շարունակել խոսքը, ձայնը խեղդվեց կոկորդում:

— 1932-ին, որ Փարիզ էի, առաջին ներկայացման՝ Օթելլո, ֆրանսերեն, ֆրանսիացի դերասանների հետ, «Օդեոն» թատրոնում ինքը հետևեց հագնվելուս, իր ձեռքով դիմահարդարեց ինձ, կողքիս մնաց կուլիսներում մինչև առաջին մուտքս ու ասաց. «Քեզ տեսնեմ, Հայաստանը թող աչքիդ առաջ լինի»:

* * *

Մի երեկո զանգահարեց.

— Չե՞ս կարող գալ ինձ մոտ:

— Ի՞նչ կա:

— Անհետաձգելի գործ:

— Իսկ եթե վաղը երեկոյան գամ:

— Անկարելի է:

— Վաղը ցերեկով գամ:

— Անկարելի է:

— Վահրամ Գամբրովիչ, հողված եմ գրում, վաղը առավոտյան պետք է հանձնեմ:

— Գիշերը կգրես, արի անպայման, իմ գործն անհետաճրգելի է. ուզում եմ խորհրդակցել հետդ:

Գնացի:

Սկզբում բարե-աստծու բարին, հետո քեֆ ու հալ, վերջապես հազար ու մի հարց, բայց ոչ մի խոսք այն գործից, որի համար կանչել է:

Արդեն ժամը ուշ է, շուտով գիշերվա 12-ը կլինի: Վեր եմ կենում, բայց էլի չի ասում, թե ինչու է ինձ կանչել: Ստիպում է նստել:

— Հա՛, գիտես ինչի՞ մասին էի ուզում հետդ խոսել: Ասա խնդրեմ. ի՞նչ պիտի լինի մեր թատրոնի վիճակը:

Ու սկսվեց մի զրույց, որ կարող էր ե՛ւ վաղը տեղի ունենալ, ե՛ւ մյուս օրը, ե՛ւ մի ամիս հետո:

Նստեցինք մինչև գիշերվա ժամը երեքը:

* * *

Երեկոյան դեմ ճանապարհվեցի Փափազյանի մոտ: Հայելու առաջ կանգնած փողկապն էր կապում: Այնտեղ էր նաև Արման Կոթիկյանը:

Հետաքրքրվեցի, թե ուր են պատրաստվում գնալու:

— Կոնսերվատորիա, հանդիպման: Չե՞ս գա մեզ հետ:

Գնացի: Կոթիկյանը ներկայացրեց դերասանին այնպես, ինչպես այդ արվում է սովորաբար, բայց մի մանրամասնություն կար նրա խոսքի մեջ, ըստ իս այնքան կարևոր, որ անհրաժեշտ է պահպանել ու ես տուն գալուց հետո գրի առա:

Կոթիկյանը, կամենալով Փափազյանին ներկայացնել առավելապես օտարների գնահատությունից, պատմեց 1932-ի փարիզյան հյուրախաղերից մի դրվագ:

Փափազյանը պետք է բեմ բարձրանար Օթելլոյի դերում Ֆրանսերեն՝ «Ատելյե» թատրոնի դերասանների ընկերակցությամբ:

Փափազյանը, ինչպես պատմեց Կոթիկյանը, խնդրում է վերջինիս իր հետ թատրոն գալ փորձերի:

— Առաջին օրը ռեժիսորը (անունը չեմ հիշում) ներկայացնում է Փափազյանին «Օթելլո» ներկայացման մեջ զբաղված դերասաններին: Փափազյանը նեղվում էր և իմ տպավորությամբ մի փոքր էլ վախեցածի նման էր: Ռեժիսորը իր բեմադրության գլխավոր սկզբունքները բացատրելուց հետո անցավ միզանսյեններին: Ու թեև նա հայ ողբերգակին առաջարկեց սրբագրել, փոփոխել, եթե ուզում է, որ իրեն հարմար լինի խաղալ, բայց հայ դերասանը լուռ լսում էր: Մյուս փորձին սկսեցին հարցեր տալ, իսկ երրորդ օրը բոլորը նստած էին, բացի Փափազյանից: Չկար առաջին օրվա կաշկանդվածությունը, արտիստն իրեն ազատ էր զգում և բացատրում էր, թե ինչ է ուզում ինքը: Զորորորդ օրը վիճակները բոլորովին փոխվել էին. դրության տերը արդեն Փափազյանն էր: Ուշագիր լսում էին նրան, հետաքրքրված և, ճիշտն ասած՝ ինձ համար էլ նորություն էր ընկերոջս պաշարի այդպիսի մեծ չափը և մանավանդ ինքնատիպ մեկնությունները կերպարների ու նրանց միջև եղած փոխհարաբերությունների: Այլևս ոչ մի կասկած չունեին ֆրանսսացի արվեստակիր ընկերները, որ Փափազյանի խաղը գրավելու է Փարիզի դժվարահաճ հանդիսատեսին:

Դրանից հետո Կոթիկյանը պատմեց առաջին ներկայացման թողած տպավորությունը, մեջբերեց ֆրանսիական մամուլի բարձր գնահատությունը և այլն:

* * *

Լուր հասավ ինձ, որ Փափազյանը սրտի ուժեղ նոսրաց է ունեցել ու պառկել է: Դա 1965-ի հունվարի 16-ին էր:

Շտապեցի մոտը:

— Չեմ հասկանում ինչ է պատահել, որ այսօր այնքան մարդ եկավ ու գնաց, ինչպես ոչ մի օր:

Դադար:

— Չլինի լուրջ հիվանդ եմ ու ես ոչինչ չգիտեմ:

Առանձնացա Անահիտի հետ, իմանալու, թե բժիշկներն ինչ են ասել:

— Ասացին, որ ինֆարկտ է— շնչաց Անահիտը:— Եվ զգուշացրին ինձ, որ հիվանդը պառկած է մնալու բավական երկար, մի տարի, գուցե նույնիսկ ավելի, պառկած ժամանակն էլ չպետք է շարժվի:

Մի փոքր հետո.

— Եվ պատկերացնում ես, բժիշկների գնալուց մի ժամ էլ չէր անցել, որ Վահրամա սրտնեղեց պառկելուց, վերմակը թափով նետեց մի կողմ և ընդոստ քայլերով մոտեցավ պատուհանին ու երկար դիտում էր փողոցի շարժումը:

Փափազյանը երկար պառկեց, երևի մի տարի, նույնիսկ ավելի:

1966-ի մարտի 5-ին տեղի պիտի ունենար թատրոնի բացումը:

Թատերասրահը լեփլեցուն էր: Շատ մարդ կար նաև բեմում, իսկ թատրոնի դերասանները գրեթե բոլորն էլ եկել էին: Դեռ վարագույրը չէր բացվել, որ հայտնվեց Փափազյանը՝ լավ հագնված, գեղեցիկ ինչպես միշտ: Բոլորը մնացին զարմացած, մանավանդ որ ամենքին հայտնի էր, որ բժիշկներն արգելել էին նրան տանից դուրս գալ:

— Ինչպե՞ս կարող էի տանը մնալ այսպիսի երանևի մի օր:

Ժպտաց:

— Վերջապե՛ս, վերջապե՛ս:

Զհասկացանք, թե ինչի մասին է խոսքը:

— Հայ դերասանի երազանքը կատարված է: Հայ դերասանը միշտ էլ երազել է իր թատրոնն ունենալ և չի ունեցել: Սա առաջին անգամն է:

— Ինչպես թե առաջին անգամը, — զարմացավ ներկա գտնվող դերասաններից մեկը:

— Սկզբում դաշնակցականների պառլամենտի շենքը տրամադրվեց թատրոնին: Հետո՝ հին բոլշևիկների ակումբը: Ճի՞շտ է: Այդ շենքերից ոչ մեկը չի կառուցվել որպես թատերական շենք, որպես մեր մայր թատրոնի շենք, սա առաջինն է: Եվ լավն է:

Ասաց ու նայեց շուրջը:

Բոլորին հրավիրեցին գրավելու իրենց տեղերը: Մարտի-

րոս Սարյանը և Վահրամ Փափազյանը Օլգա Գուլազյանին առան իրենց մեղսեղն ու նստեցին նախագահությունում:

Վարագույրը բացվեց:

Եվ ամեն անգամ, երբ ճառախոսներից որևէ մեկը տալիս էր Փափազյանի անունը, դահլիճը թնդում էր ծափերից:

Երբ հանդիսավոր մասը վերջացավ և վարագույրը փակվեց, բեմում եղած մարդիկ ցրվեցին, Փափազյանը մնացել էր իր տեղում նստած: Տխուր էր: Մոտեցա իրեն:

— Տեսնես խաղալո՞ւ եմ այս բեմում: Այդ բախտին էլ կարժանանա՞մ, թե...

* * *

Գնացել էի Լենինգրադ, Օլգինո՝ Փափազյանին այցելության: Թեև հունիսի վերջերն էին, բայց գիշեր-ցերեկ անձրև էր գալիս:

— Ձե՞ս նյարդայնանում այս անվերջանալի անձրևից, այս խոնավությունից:

— Երևակայիր, որ ոչ, սիրում եմ անձրևը, մտաբերում եմ Տերյանին, միալարությունը հանգստացնում է ինձ, խաղաղություն է բերում հոգուս:

Մի փոքր հետո.

— Թիֆլիսի հայ դերասանները Ռոստով են եկել ներկայացումներ տալու և «այրվել» են: Երեկ հեռախոսով կապվեցին, թե արի, մեղ հանի էս նեղ վիճակից:

— Գնալո՞ւ ես:

— Երևի ոչ, բժիշկների հետ խորհուրդ արի: Ասին, թե վիճակս այնպես է, որ կարող եմ գնալ ու խաղալ, բայց հայտնի չէ, թե հետո ինչ կլինի: Ասում են՝ հազիվ ենք ոտքի կանգնեցրել:

— Բժիշկները ճիշտ են ասում:

— Ես էլ գիտեմ, որ ճիշտ են ասում, բայց տղաները մեղք են, ես էլ որ օգնության չհասնեմ, ով է նրանց ձեռք բռնելու:

Երրորդ օրն է, որ Լենինգրադում եմ: Անձրևները շարունակվում են: Առավոտ է: Փափաղջանն ու ես սեղանի շուրջ նստած՝ զրուցում ենք: Սենյակում երևում է Ժաննան:

— Մայրդ ո՞ւր է:

— Փայտ են բերել ձմեռվա համար:

— էդ լավ է, բայց մեղք ենք, մի ժամ է նստած սպասում ենք, թե նախաճաշ կտաք: Կանչիր մորդ:

Եկավ Մարիան:

— Փայտ են բերել, պա՛պ, մի ամբողջ բեռնատար մեքենա: Չմեռը վառելիքով ապահովված ենք:

— Որտեղի՞ց են բերել:

— Թատրոնից:

— Որտեղի՞ց:

— Թատրոնից:

— Չեմ հասկանում,— զարմացավ Փափաղջանը:

— Դեկորներ են:

— Դեկորներ:

Ապշեց Փափաղջանը:

— Եվ դու մտադիր ես ձմեռը դրանք վառարան գցել ու այրե՞լ:

— Այո, ի՞նչ կա որ:

Խիղճդ էլ հանգիստ կլինի՞:

— Իսկ ինչո՞ւ չէ:

— Լսիր, դու դերասանուհի ես, հասկանո՞ւմ ես, դերասանուհի, որ խաղացել է այդ դեկորներով շրջապատված, ծիծաղել ու լացել և հանկարծ, դեկորներն այդ, որ քեզ կյանք են տվել բեմում, պետք է քո իսկ ձեռքով այրվեն:

— Հայրի՛կ, դրանք հին դեկորներ են, այլևս անգործածելի: Ես չվառեմ, մի ուրիշն է վառելու, ի՞նչ տարբերություն:

— Թող ուրիշը վառի, բայց ոչ Փափաղջանի աղջիկը, ոչ դերասանուհին:

— Չեմ հասկանում:

Չարմանում էր Մարիան:

— Այո՛, չես էլ հասկանա, որովհետեւ դուք դերասաններ չեք, այլ թատրոնում ծառայողներ:

Մի պահ լռելուց հետո.

— Եթե ուզում ես, որ ես տանը մնամ, ապա անմիջապես մարդ կանչիր և հետ բեռնիր փայտը, թող տանեն նրան, ով կարգադրել է վառելիք դարձնել դեկորը: Արա այդ, եթե չես ուզում, հիվանդ տեղովս վեր կենամ ու ջահնամվեմ այստեղից:

Մարիան մի հոգոց հանեց, բայց խոստացավ հոր ասածի պես վարվել ու դուրս գնաց:

Փափազյանը կարծես հանգստացավ: Բայց մեկ-մեկ նորից էր հուզվում:

— Ինչ չէի տեսել, այն էլ տեսա:

Կամ՝

— Պատկերացնո՞ւմ ես, Փափազյանի տանը դեկորներ են վառում, երևակայելու բա՞ն է, դու ասա:

* * *

Հետաքրքրվեցի՜ նոր գրքով, որը դեռ չգիտեր, թե ինչպես է կոչելու, մի-երկու վերնագիր առաջարկեցի— «Իմ Օթելլոն», «Օթելլոն և ես», «Օթելլոն, ես և ուրիշները»: Ասաց, թե կմըտածի: Շատ չի մնացել, երեւի հազիվ մի ամսվա աշխատանք, և գիրքը պատրաստ կլինի:

— Այդ գիրքն էլ որ լույս աշխարհ տեսնի, կարող եմ հանգիստ աչքերս գոցել:

Ու կարծես պատկերացրեց իրեն այդ վիճակում, գլուխը ետ գցեց, աչքերը փակեց: Գունատ-գունատ էր: Մի պահ, հազիվ մի-երկու վայրկյան, այդպես մնաց, հետո իր ասածից սոսկահար, բացեց աչքերը, շուրջը նայեց, տեղից պոկվեց և, ասես իրական դրուժյունը ստուգած լինելու համար, քայլեց սենյակում ետ ու առաջ: Եվ արագ, կարծես վանելով մահվան միտքը, որպեսզի թույլ չտա ժամանակ անցնելու, խոսեց այն մասին, թե այդ գիրքն ավարտելուց հետո ինչ է ծրագրում անել՝ նովելների մի ամբողջ շարք, մեծ վեպ:

Ամեն անգամ հանդիպելիս խոսք է բացվում այն գրքի մասին, որ նվիրված է լինելու Օթելլոյին: Կամ ես էի հետաքրքրվում ընթացքով, կամ ինքն էր անդրադառնում դրան, պատմում, ասում թե ուր է հասել:

Մի օր պատմեց, թե ինչպես է մտադիր ավարտել:

Երբ գիրքը լույս տեսնելուց հետո ծանոթացա՝ տեսա, որ հեղինակի միտքը մի այլ վերջվածքի վրա է կանգ առել: Շատ ցավեցի և որոշեցի, գոնե հիշողությամբ, վերականգնել նրա պատմածը:

Կարդուջին, իտալական բանաստեղծ, մի օր այցելում է Թոմազո Սալվինիին: Այն ժամանակ պետք է որ ութսունը անց լիներ: Մեր էր արդեն և վաղուց այլևս բեմ չէր բարձրանում: Գարնան առաջին օրերն էին: Բանաստեղծը ողբերգակին գտնում է իր տան պատշգամբում, բազկաթոռում ընկնամրված, մի գիրք ձեռին:

— Այդ ի՞նչ եք կարդում մասնատրո:

— «Օթելլո»:

— Շեքսպիրի՞:

— Հապա էլ ո՞ւմ:

Բանաստեղծը տարակուսած նայում է դերասանին:

— Երկար տարիներ Օթելլո խաղալուց, այս դերով աշխարհով մեկ փառավորվելուց հետո, ամբողջ պիեսը համարյա անգիր իմանալուց հետո մի՞թե դուք կարող էիք պահանջ դրալ նորից անդրադառնալու ողբերգությունը:

— Այո՛, իհարկե: Կարդում եմ և տեսնում, որ նոր, միայն հիմա եմ հասկանում, թե ինչպե՛ս պետք է Օթելլոյի դերը խաղալ:

Փափագյանի եզրակացությունը.

— Գրեցի գիրքս, գրեցի հիսուն տարի Օթելլո խաղալուց հետո, երեք հազարից ավելի անգամ այդ դերով բեմ բարձրանալուց հետո և, ճիշտ ու ճիշտ Սալվինիի նման, միայն հիմա, հիմա՛ հասկացա, թե ինչպես կարելի է խաղալ:

Մի անգամ էլ անդրադարձավ Անգլիա գնալու իր ցանկությանը:

— Թող պետությունը զինվորագրի ինձ և մեջքիս սուր կապած ուղարկի Անգլիա՝ մեծ բանաստեղծի հայրենիքը:

* * *

Խոսք բացեցի դերասանական ներկա ուժերի մասին. կամենում էի իմանալ, թե ում մասին ինչ կարծիքի է:

— Երիտասարդներից ամենաշնորհալին Ֆրունզիկն է: Եթե զլխին մարդ լինի՝ շատ առաջ կգնա: Բնությունը նրան տվել է ավելի, քան մեկ ուրիշի: Ստացականը քիչ է: Բացի այդ, միօրինակության վտանգի առաջ է կանգնած, մեկ էլ չգիտի, թե որտեղ կանգ առնի: Իսկ ընդհանրապես առատորեն օժտված է:

Մի փոքր հետո.

— Լավն են Վարդուհին և Մետաքսյան: Շատ հեռուները գնալ չեն կարող, բայց համակրելի են իրենց տարբերությամբ: Մետաքսյան փայլով է վերցնում, Վարդուհին ներքինով, առաջինը տեխնիկապես ավելի վարժ է, քան երկրորդը, բայց սա էլ գերազանցում է նրան գեղարվեստական հոտառությամբ: Մետաքսյայի սահմանը նինան է, Վարդուհունը՝ Զոհին: Երկուսին էլ սիրում եմ, միայն թե և՛ մեկը, և՛ մյուսը պետք է ավելի մոտենան խոսքի բնական հնչմունքին:

Հարցրի Բաբկեն Ներսիսյանի մասին:

— Ամենաարտիստիկն է մյուս բոլոր դերասաններից, և՛ արտաքին տվյալներն են լավ, և՛ ներքինը, բայց ցավալի է, որ, չնայած հաջողությանը, չհասավ այն բարձրության, որի վրա պետք է լիներ հիմա:

Ես ասացի, թե դեռ ժամանակ կա, գուցե կհասնի:

— Զէ՛, սիրելի՛ս, կյանքը ցույց է տվել, որ տաղանդավոր դերասանը իր գլուխգործոցները ստեղծում է մինչև քառասուն տարեկանը, իսկ նա, կարծեմ, բավական անց է այդ տարիքից:

Մի օր անդրադարձավ Դոն-ժուանի իր կատարմանը:
 Հայտնեցի իմ ապավորութիւնը:
 Լսեց ու ապա նկատեց.

— Հավատա խոսքիս, որ եթե չլինէր Արմենյանը, հազիվ
 թէ իմ Դոն-ժուանը լինէր այն, ինչ եղավ: Շատ եմ պարտա-
 կան նրան: Գիտե՞ս, ընդհանրապես այդ գործչին չկարողա-
 ցանք գնահատել: Եվ չեմ հասկանում, թե ինչո՞ւ. թերեւ
 պատճառը բնավորութիւնն է, բայց մի՞թե մենք մի այնպիսի
 անլուսավոր ժամանակներում ենք ապրում, որ չկարողացանք
 գործչի վաստակը տարբերել մարդու բնավորութեան գծերից:

Խոսք բացվեց Հայկական թատերական ընկերութեան կից
 բացվող դրամատիկական ստուդիայի մասին:

— Ստուդիան իր կյանքը պետք է Մոլիերով սկսի. առանց
 Մոլիերի նոր թատրոնի հիմք դնել չի կարելի. երիտասարդ
 դերասանը շատ բան կարող է սովորել Մոլիերից: «Ագահը»
 հռչակապ գործ է:

Հակոբ Սիրունին եկել էր Երևան: Փափագ ունէր տեսնել
 իր վաղեմի ընկերներին ու ծանոթներին: Դրանցից մեկը Փա-
 փազյանն էր, որի հետ սովորել էր Մուրադ-Ռաֆայելյան
 վարժարանում:

Ես հանձն առա Սիրունուն ուղեկցել Փափազյանի տուն.
 ճանապարհին հարցրի՝ ճի՞շտ է, որ Փափազյանը ինչպես
 ինքն է հավատացնում, մի երկու տարով ավելի մեծ պիտի
 լինի, քան իր հայտնի դառած տարիքը:

— Ոչ:— Ասաց նա,— շփոթում է: Ինձնից երկու տա-
 րով է մեծ, ես 1890-ին եմ ծնվել, նա երկու տարի առաջ:

Հանդիպելիս գրկախառնվեցին: Մի պահ կարծես միմ-
 յանց բան չունեին ասելու, բայց այդպես էր թվում առաջին

հայացքից։ Սկսվեց զրույցը։ Նրանց միտքը թռավ գնաց հե-
ռունները։ Նկատի ունենալով ներկայությունս, անցան այն-
պիսի խոսակցության, որ ինձ էլ հետաքրքիր լինեի։ Տեսնե-
լով, որ դա հարկադրական մի բան է երկուսի համար, ես
ներողություն խնդրեցի, թե շտապ գործ ունեմ ու հեռացա,
որ իրենց մայրամուտին մոտեցող երկու հին ընկերներ՝ միտք
մտքի տան, հիշեն անցածն ու գնացածը, մի պահ վերա-
դառնան դեպի իրենց մտերմությունն ու միատեղ արկածնե-
րը, որոնց ոչ ոք վկա չի եղել այն ժամանակ ու չպիտի էլ
լինի հիմա, երբ դրանց վրայից տարիներ են գլորվել ու ան-
ցել։

Երբ հրաժեշտ տվի՝ երկուսի աչքերի մեջ շնորհակալ մի
հայացք էր նստած։

* * *

Սունդուկյանի անվան թատրոնում բեմադրվեց Կրոնինի
վեպի փոխադրությունը՝ «Բրոուզիի ամրոցը»։ Բրոուզիի դերը
հանձնվեց Գուրգեն Զանիբեկյանին։

Փափազյանը դիմում է թատրոնի դիրեկտոր Ժիրայր Հա-
կոբյանին ու ցանկություն հայտնում Բրոուզիի դերը խաղա-
լու։ Դիրեկտորը չի կարողանում միանգամից մերժել, բայց
մտածում է, որ Փափազյանն այլևս Փափազյան չէ, որ նրա
համար դժվար կլինի նոր դեր սովորել, այն էլ այդքան մեծ,
և մանավանդ որ Զանիբեկյանն էլ հաջողություն ունեի, ար-
ժե՞ր, որ նրա համբավի վրա ստվեր ընկներ։

Մի քանի օր հետո Փափազյանը նորից է դիմում։ Նույն
անորոշ պատասխանը։ Եվ այսպես մի-երկու անգամ էլ։ Մի
օր Փափազյանը պահանջում է իրեն կտրուկ պատասխան
տալ՝ այո կամ ոչ։ Թատրոնի դիրեկտորը պարզաբանում է
իր միտքը։

— Լսիր, յավրո՛ւմ,— ասում է արտիստը, հազիվ զսպե-
լով վրդովմունքը,— ես Փափազյանն եմ։ Հասկանո՞ւմ ես՝
Փափազյանը։ Ու եթե դիմում եմ քեզ, ապա նրա համար մի-
այն, որ ընդունված կարգը պահպանեմ։ Իսկ թե խաղա՞մ
պիտի, թե չէ, արածս սխալ է, թե ճիշտ, այդ իմ որոշելու

բանն է: Կան մարդիկ, որ իրենց արածի պատասխանատուն իրենք են, միայն իրենք: Ես այդ մարդկանցից եմ:

Ասում է, չսպասելով պատասխանի ու թողնում-դնում է:

Մյուս օրը թաղքոնում հայտարարվում է, որ Փափազյանը պետք է մուտք գործի «Բրոուդեյի ամրոցը» ներկայացման մեջ, որպես Բրոուդեյի գերակատար:

* * *

Մի օր հարցրի.

— Բոլորը խոսում են քո գեղեցկությունից: Ես էլ նրանց հետ: Ուզում եմ իմանալ քո կարծիքը. քո ժամանակվա դերասանների մեջ կա՞ր մի ուրիշը, որին քեզնից գեղեցիկ համարեիր:

— Կար, Շահխաթունին. սրա գեղեցկության մեջ մի կըրակ կար, որ ես հրեք չեմ ունեցել:

* * *

1965-ին սկսեց թելադրել «Համլետը՝ ինչպես տեսա» գիրքը: Սկզբում թելադրում էր կնոջը՝ Անահիտին: Երբ սա անկողին ընկավ, ասպարեզ եկավ մի ուրիշ Անահիտ, Մանվելյան ազգանունով, և շարունակեց գրել վարպետի թելադրածը:

Այդ տարվա հոկտեմբերին էր, որ մի օր Փափազյանն ասաց, թե ինքը դրամի կարիք ունի և չի՞ կարող, արդյոք, արվեստի ինստիտուտը օգնել իրեն, ինքը պատրաստ է որևէ բան գրել:

— Ինչու չէ, իսկ ի՞նչ կգրես:

— «Դոն-ժուան»:

— Կարելի է, անշուշտ, բայց ինչպե՞ս ձևակերպենք: Եթե դեմ չես՝ գրի «Արքա Լիր»: Նախ դա ինձ հիմք կտա ձևակերպել քեզ շեքսպիրագիտական կենտրոնի աշխատակից: Հետո քեզ համար էլ լավ կլինի՝ «Օթելլոն» լույս է տեսել, հիմա գրում ես «Համլետը»: «Լիրն» էլ որ գրես՝ կստացվի շեքսպիրյան տրիլոգիա:

Փափազյանը ոգևորվեց:

— Լավ ես ասում, երբվանի՞ց փող կտաս:

— Հենց այս ամսից: Համլետը վերջացնելուն շա՞տ է մընացել:

— Կեսի վրա եմ. բայց դա ի՞նչ կապ ունի:

— Մեկը վերջացրու, որ մյուսը սկսես:

— Զարմանալի մարդ ես. ես քեզ ասում եմ, որ մեկը մյուսին չի խանգարի: Դու կարո՞ղ ես ինձ մի խելքը գլխին աղջիկ տալ՝ զրադետ ու պատրաստված. կարո՞ղ ես, ուրեմն՝ շատ լավ: Երեկոյան կթելադրեմ «Համլետը», ցերեկով՝ «Լիրը»:

Ուղարկեցի ինստիտուտի աշխատակիցներին՝ մեկին: Մի քանի օր թելադրեց և ասաց, թե հարմար չէ: Ուղարկեցի ուրիշին, սրան էլ չհավանեց: Ուղարկեցի, վերջապես, իմ ասպիրանտին՝ Անելկա Գրիգորյանին: Գոհ մնաց և սրան թելադրեց մինչև վերջ:

* * *

Փափագյալներ մի օր ասաց.

— Ես չեմ ուզում մեռնել, երևի ոչ ոք էլ չի ուզում մեռնել: Բոլոր ասողները, թե իրենց համար մեկ է, վաղը կմեռնեն, թե մի քանի տարի հետո՝ անկեղծ չեն: Ոչ ոք չի ուզում այս աշխարհից հոժարակամ գնալ: Նկատված է, որ իրենց վրա ձեռք բարձրացնողները վերջին պահին զղջում են, խնդրում են փրկել...

Եվ միտքը շարունակեց այսպես.

— Բայց եթե մեռնել, ապա միայն այնպես, ինչպես այդ պատահեց Համբարձումի հետ:

Խոսքը Խաչանյանի մասին է, որին շատ էր սիրում և որը մահացել է «Երկիր հայրենի» ներկայացման ժամանակ, բեմազգեստը հագին, դիմահարդարված բեմ մտնելուց մի քանի րոպե առաջ:

Հիշում էր նաև Ռուզան Վարդանյանի մահը, բայց ամենից ավելի «տպավորություն» էր թողել նրա վրա Միքայել Թավրիզյանի մահը, մահ նվազախումբը ղեկավարելիս, պուլտի մոտ, բռն շարժման պահին, երբ աջ ձեռքը մեկնվել էր դեպի վեր՝ հնչյունի հետևից...

— Մարդ պետք է այդպես մեռնի: Ես շատ բան կտայի բեմում՝ խաղի ժամանակ մեռնելու համար:

Ես նրան ասացի, որ Մարի Նվարդը մահացել է բեմում:

Մարգարիտ Գոթյեի դերը կատարելիս: Եվ հետաքրքիրն այն է, որ հերոսուհու մահը գուգադիպել է դերասանուհու մահ-վան:

— Ի՞նչ ես ասում. չգիտեի:

Եվ տարբեր օրեր նա ինձ պատմել էր տալիս նույնը ուրիշների ներկայությամբ, նաև այն պահին, երբ միայն ես ու ինքն էինք միայն:

* * *

Եվ մի օր՝ Փափազյանի խաղի ժամանակ հիշեցի մեր այս զրույցը:

1967-ի դեկտեմբերի 14-ին էր: «Իմ սիրտը լեռներում է» ներկայացումն էր: Խաղում էր Մեք-Գրեգոր, որը, ինչպես հայտնի է, մեռնում է: Երբ նա մահացավ, Վարդերեսյան-Ջոնին մոտեցավ և մի փոքր բարձրացրեց ձեռքը, որն ընկավ այնպես անկյանք, որ շատերը թատերասրահում, այդ թվում նաև ես, կարծեցինք, թե Փափազյանն իսկապես մահացել է: Իսկ ներկայացումը շարունակվում էր: Երբ Բեն-Ալեքսանդր—Բաբկեն ներսիսյանն ասաց. «Այս մարդը մեր ժամանակի շեքսպիրյան ամենամեծ դերասանն էր», բարձրացավ այնպիսի ծափահարություն, ինչպես երբեք չէր եղել: Մեք-Գրեգորին շալակեցին ու տարան: Կյանքի ոչ մի նշույլ չկար: Այդպես միայն դիակն է լինում:

Վարդերեսյանի խաղում վախեցած շփոթ կար: Ու եթե դա համընկնում և համապատասխանում էր այդ պահի բեմական ապրումին ըստ պիեսի, ապա Արուս Ասրյանը հետագայում ասում էր, որ ինքը հավատացել է, թե տեղի է ունեցել ամենասարսափելին և խաղում էր, հազիվ զսպելով արցունքները և զարմացած էր, թե ինչու վարագոյթը չեն փակում:

Երբ ներկայացումը վերջացավ և ծափահարությունների վրա Փափազյանը բեմ եկավ, հանդիսատեսը «ազատ շունչ» քաշեց և ապա ուրախացած, որ դերասանին հաջողվել է իրեն խաբկանքի մեջ պահել, որոտընդոստ ծափահարությունը միացան ցնծադին կանչերը՝ «բռավո՛ւ»:

Դա Փափազյանի վերջին ներկայացումն էր Սունդուկյանի անվան թատրոնում...

Սունդուկյանի անվան թատրոնի հետ Փափազյանը մեկնել էր Բեյրութ: Նրա կնոջ՝ Անահիտի, առողջական վիճակը ծանրացավ և նրան հարկավոր եղավ տեղավորել հիվանդանոցում: Բժշկական միջամտություններն անզոր եղան և նա մահացավ դեկտեմբերի 30-ին, ժամը 4-ին, ճիշտ այն օրը, երբ մի ժամ հետո, այսինքն՝ ժամը 5-ին, սունդուկյանցիներով լի սավառնակը վարէջք կատարեց Նրեան օդանավակայանում: Դիմավորողները ճանապարհին, մինչև տուն հասնելը, նախապատրաստել էին Փափազյանին, ասելով, թե Անահիտի վիճակը ծանր է: Փափազյանը տնից զանգահարում է հիվանդանոց՝ Անահիտի առողջական դրությունն իմանալու և այնտեղից անզորաբար հայտնում են իսկությունը:

Զանգահարեց իսաղառուր Եսայանը և, մոտավորապես ժամը 10-ին զնացինք Փափազյանի տուն: Մենակ էր, նրա մոտ միայն Հարություն էր, մի երիտասարդ, որի խնամքին էր թողել Փափազյանը հիվանդ Անահիտին և որը ոչինչ չէր խնայել Անահիտին ոտքի կանգնեցնելու համար: Մի փոքր հետո եկավ նաև Բոստանջյանը, որ Փափազյանների տանու բժիշկն էր:

Թաղումը նշանակվեց հունվարի 3-ին: Նկատի ունենալով, որ Փափազյանը մի տարվա շափ տառապել էր սրտի հիվանդությունից և բժիշկները ակամա էին համաձայնել, որ նա արտասահման ճանապարհվի, ընկերների մի խումբ հարմար գտավ արգելել դերասանին մասնակցելու թաղմանը: Մտածում էինք, թե մի բան էլ նրան կարող է պատահել, մանավանդ բոլորին լավ հայտնի էր, թե նա ինչպես ծանր է տանում նույնիսկ օտար մարդու, էլ ուր մնաց հարազատի թաղումը: Որոշվեց, որ կմնա տանը և մի երկու հոգի էլ նրա հետ, իսկ հուղարկավորությունը տեղի կունենա ժամը 3-ին, անատոմիկումից:

Փափազյանի հետ մնացել էր Անահիտի բարեկամներից մեկը, որի անունը չեմ հիշում, դերասան Աշոտ Ներսիսյանն ու ես:

Շրջապատել էինք ճաշարանի կլոր սեղանը: Փափազյանը

նստած էր մեջքով դեպի պահարանը, որի վրա ժամացույց էր դրված:

Խուսափում էինք հանգուցյալի մասին խոսելուց: Ինքն էլ չէր խոսում: Տարբեր հարցեր, զանազան խնդիրներ. տպավորությունն այնպես էր, որ ոչինչ չի պատահել:

Հանկարծ Փափազյանը երկու ձեռքով-գլուխը բռնեց ու հառաչեց.

— Տարա՛ն, տարա՛ն...

Զհասկացանք:

Ի՞նչ տարան, ո՞ւր տարան:

— Անահիտին, գերեզմանատուն, հողին պահ տալու:

Աչքս ընկավ ժամացույցին: Ժամը երեքն էր: Ոչ իմ թե-
վին, ոչ էլ մյուս ներկաների, ժամացույց չկար: Բայց նա
զղաց. թեև խոսում էր մեզ հետ, իսկ հոգով այնտեղ էր,
հուղարկավոր բազմության մեջ: Ու երբ գլուխը բարձրացրեց,
նրա աչքերը խոնավ-խոնավ էին:

* * *

1965-ի գարնանն էր: «Լիրը» ավարտելու վրա էր, երբ մի
երեկո անախորժ խոսակցություն տեղի ունեցավ իմ և նրա
միջև Անահիտ Մանվելյանի ներկայությամբ:

Հետաքրքրվեցի, թե «Լիրը» երբ է հանձնելու ինստիտու-
տին զարմացավ, թե ինստիտուտն ի՞նչ կապ ունի «Լիրի»
հետ: Հիշեցրի մեր պայմանավորվածությունը:

Պարզվեց, որ նա այդ գիրքը խոստացել է «Հայաստան»
հրատարակչությանը, նույնիսկ պայմանագիր է կնքել և կան-
խավձար ստացել:

Իհարկե՝ վերջիվերջո ինձ համար պետք է միևնույն լի-
նեք, թե ո՞վ է հրատարակելու՝ Ակադեմիա՞ն, թե «Հայաս-
տանը»: Կարևորն այն էր, որ նա գրեր ու գիրքն էլ լույս տես-
ներ: Այդպես հմ մտածում հիմա, բայց այն ժամանակ, ճիշ-
տըն ասած, ոչ միայն զարմացած էի, այլև վրդովված: Եվ
ինձ,— թող խոստովանություն լինի,— թույլ տվի մի երկու
կոպիտ արտահայտություն: Նա էլ չհամբերեց և վերավորեց

ինձ: Ու մենք գոտվեցինք: Մի ամիս, նույնիսկ ավելի, ո՛չ նա էր զանգ տալիս, ո՛չ ես: Բայց հետո, երբ հաշտվեցինք, խընդրեց դրան այլևս չանդրադառնալ:

* * *

1968-ի հունվարի 6-ին, այսինքն իր ծննդյան օրը, Փափազյանը բեմ էր բարձրանալու Մեք-Գրեգորի դերով: Թեև ներկայացումը հայտարարվեց, բայց տեղի չունեցավ. Փափազյանն իրեն վատ էր զգացել ու հրաժարվել էր խաղալուց:

Այդ օրը, երեկոյան ժամին Փափազյանին նվիրված ռադիոհաղորդում էր կազմակերպված: Թատերագետ Լևոն Խաչվանի բնութագրական խոսքին հաջորդեց Փափազյանի ելույթը, որի համար օգտագործել էին վաղուցվա գրառումներից. Համլետից մի հատված, Օթելլոյից, Լիրից և հետո՝ Սիամանթոյի «Թաղումը»:

Անեկա Գրիգորյանը, որ այդ ժամին մոտն էր եղել, ասում էր, թե Փափազյանը նստած գահավորակի ժայրին լքում էր իր ձայնն ու լաց լինում...

■ ■ ■

Իր պարտքը մարելու նպատակով, հանձնեց «Լիր արքայի» իր թարգմանության սկզբում մեքենագիր, հետո նաև ձեռագիր օրինակը: Երևի մի օր կհրապարակվի դա և հետաքրքիր նյութ կտա արտիստի կյանքի և գործի ուսումնասիրությանը զբաղվողներին:

Թարգմանությունը մեծ մասամբ արել է ռուսական խումբերի հետ կատարած իր թատերական շրջապտույտների ժամանակ:

Մեկ-մեկ ձեռագիրը թերթում եմ ես: Բաց էջերից մեկում կա մի այսպիսի խոստովանություն.

«Ժամը առավոտյան չորսն է,— գրում է Փափազյանը: — Արխանգելսկում եմ: Գիշերը խաղացի 219-րդ ներկայացումը՝ «Լիր արքա»՝ վերջին տասն ամսվա ընթացքում: Քունը չոքել է կոպերիս. լույսը բացվում է, իսկ սիրտս խավար

է։ Արվեստը գնում է անել ճանապարհով դեպի անդունդ։ Մի քանի տարուց՝ մի մարդ չի մնա, որ կարողանա այս տխրանալի գործը մարմնավորել, անձնավորել։ Այսօր քառասունչորս տարի է, որ մաքառում եմ հանուն մեծ արվեստի, հոգնել եմ, բայց ինձ այրող հրդեհը չի ուզում հանգնել, չընայած որ ո՛չ քաղաք, ո՛չ երկիր, ո՛չ ցեղ և ո՛չ ազգ չմնաց երկրի երեսին, որ այդ կրակից տաքացրած շինեին իրենց սրտերը։ Իմ բարի, անուշ, համեստ ժողովուրդ, ուր էլ որ աչքերս փակեմ, վերցրու ինձ ու ծոցումդ պահիր»։

Այս գրել է նա 1951-ի օգոստոսի 15-ին ու հետո էլ ավելացրել՝ «փոքր բան է մարդը, և նրա աշխարհը՝ ոչինչ»։

Տեսնես ով է դառնացրել նրան այդ օրը և ինչի համար, որ արտիստը մտառանջ գիշեր է անցկացրել, ընկնելով մռայլ հուսահատության մեջ։

* * *

Հիվանդության օրերն էին։ Այցի գնացի։ Այնտեղ էր Արփեհիկ Խաչանյանը։ Մի փոքր զրույցից հետո հարցրի, թե հիշո՞ւմ է, արդյոք, Նինային։

— Որտեղի՞ց գիտես այդ անունը։

Ձարմացավ Փափազյանը։

Ու պատմեց հետևյալը.

— Վրացուհի էր, մի չքնաղ աղջիկ, ավելի գեղեցիկ արարած երեխան տեսել։ Ասես նկար լինեիր՝ աչքերը, շրթունքները, ժապավենակապ հոնքերը, հիմա էլ հայացքիս առջևն է։ Նոր էի եկել Թիֆլիս, երիտասարդ տղա էի, ինչպես ասում էին՝ բավական հետաքրքիր։ Մանրթացա այդ աղջկա հետ, մի քիչ ֆրանսերեն գիտեր, խոսեցինք մինչև ուշ գիշեր։ Ինչի՞ մասին, հիմա չեմ հիշում, իսկ ինչի՞ մասին չեն խոսում սիրահարվածները։

Անցան օրեր։

Մի օր ինձ կանչեցին նրա հայրը և մայրը։ Մի գեշ նախազգացումով մտա նրանց տուն։ Նինան չկար, նրա ծնողները տխուր էին ու մտահոգ։ Ջբաղեցրի ինձ առաջարկված աթոռը և անհամբեր էի լսելու, թե ինչու են կանչել։

Հայրը նստած էր թթվադեմ, իսկ մոր աչքերին արցունք կար:

— Նինային բա՛ն է պատահել:— Չհամբերեցի ես:

— Երիտասարդ,— ասաց հայրը,— այստեղ օտար մարդ չկա, մենք Նինայի ծնողներն ենք, սա էլ նրա մորեղբայրն է: Բոլորս էլ հարազատ մարդիկ ենք, կարող ենք անկեղծ բացատրվել:

Մի վայրկյան լռություն:

— Մեզ հայտնի է քո և Նինայի մտերմությունը: Ես ու մայրը կամենում էինք իմանալ, թե քո մտադրությունը լո՞ւրջ է:

— Միանգամայն:

Բավական կտրուկ եղավ պատասխանս:

— Մի նեղանա, որդի՛,— մեղմ վրա բերեց հայրը:— Դեռ ասան մարդ ես, ի՞նչ իմանանք: Գուցե էնպես ժամանակ ես անցկացնում: Դու էլ լավ գիտես, որ դերասանները մի քիչ ուրիշ տեսակ ժողովուրդ են:

Ասացի, որ իմ մտադրությունները լուրջ են և կարող են միանգամայն հանգիստ լինել: Պետք է ամուսնանամ և շատ շուտով:

— Դա մեզ հայտնի է: Նինան ասել է, և դրա համար էլ քեզ խնդրեցինք նեղություն քաշել ու գալ,

Նորից լռություն:

— Իսկ դուք դե՞մ եք:— Անհամբեր հարցրի ես:

— Չէ, դեմ չենք, որդիս: Բայց մի բան կա, որ դու պետք է իմանաս և նոր միայն որոշես՝ ամուսնանա՞մ, թե ոչ:

Լարվեցի:

— Քեզ հայտնի՞ է, որ Նինան հիվանդ է: Շատ ծանր ու վտանգավոր. թոքախտ ունի:

Ես ապշահար եղա:

— Գիտեի՞ր:

— Ոչ:

— Նինան չի՞ ասել քեզ.

— Չի ասել:

— Իսկ հիմի՞ ինչ ես ասում, հիմի, երբ գիտես, որ հիվանդ է, այն էլ, ինչպես բժիշկներն են ասում՝ անհույս: Հիմի՞ էլ որոշմանդ վրա ես մնում:

— Իմ վճիռը վճիռ է: Ես Նինային սիրում եմ այնպես, ինչպես որ կա:

Ես անկեղծ էի, միանգամայն անկեղծ. բայց հուզված էի մինչև հոգուս խորքը:

— Կեցցե՛ս, որդի, հալալ լինի մեր աղջիկը քեզ: Բայց ես չէի ուզի, որ դու միանգամից որոշում ընդունեիր. լավ կլիներ մտածեիր, երկար մտածեիր: Ամուսնություն, քնտանիք, երեխաներ. կատակ բան չէ:

— Մտածելու ոչինչ չունեմ, որոշումս որոշում է, — պոռթկացի ես:

— Լսիր ինձ, երիտասարդ:

Միջամտեց մորեղբայրը, որ մինչ այդ լուռ նստած լսում էր: Դա կիրթ արտաքինով մի մարդ էր:

— Որ դու ուզում ես ամուսնանալ հիվանդ աղջկա հետ՝ քեզ պատիվ է բերում, բայց մտածիր, ճիշտ ես վարվում: Դու դերասան ես: Ես չեմ տեսել քեզ, բայց ասում են, որ քո ապագայի հետ մեծ հույսեր են կապում: Եթե այդպես է, դու մենակդ իրավունք ունի՛ս, արդյոք, տնօրինելու այդ հարցը: Կարծում եմ, որ ոչ. Դու այլևս քեզ չես պատկանում, այլ բեմին, թատրոնին, ուստի հասարակությունն է քո տերը: Հասարակության շահերը պահանջում են, որ դու առողջ լինես, երկար ապրես: Իսկ այնպես, ինչպես դու ես որոշել՝ կյանքդ վտանգի տակ ես դնում:

Ես չէի հաշտվում Նինայից հրաժարվելու մտքի հետ, չէի պատկերացնում ոչ իմ կյանքը առանց իրեն, ոչ էլ նրանը՝ առանց ինձ: Ես զիտեի, թե Նինայից հրաժարվելը ինչ հարված կլինի նրա համար: Ու մերժելով՝ մերժում էի ինձ տրվող խորհուրդը: Բայց խոսակցությանը խառնվեցին նախ հայրը, ապա նաև մայրը:

Ես համառում էի:

Դռների մեջ երևաց Նինան: Դուռնատ էր, աչքերը վառվում էին: Ես ընդառաջ ելա նրան, և նա հագիվ շշնջաց, թե մեծերը ճիշտ են ասում ու ինքն էլ նրանց նման է մտածում:

Ամբողջ գիշերը չքնեցի:

Մյուս օրը ժամադրություն նշանակեցի Նինային: Եկավ: Աչքիս ավելի նիհարած երևաց, ավելի գունատ:

— Մենք, — ասաց նա, — այլևս չպետք է հանդիպենք: Հանդիպումները բորբոքում են զգացմունքները: Ավելի լավ է միմյանցից հեռու լինենք: Այդպես ավելի շուտ կմոռանանք: Իրար:

Ասաց շշուկով, ու զգացի, որ ինքն էլ չի հավատում իր ասածին, թե ես մոռանալու եմ իրեն կամ ինքը՝ ինձ:

— Դու պետք է ներես ինձ, — շարունակեց նա, — ներե՛ս, որ ես քեզ ոչինչ չէի ասել հիվանդությանս մասին: Վախենում էի, շա՛տ էի վախենում:

Շնչաց ու մթան մեջ անէացավ: Ասես կար ու չկար:

Ինձ համար դժվար էր առանց Նինայի, բայց այլևս նրան չտեսա: Անցա խանութի մոտով, հաճախ իբր պատահմամբ հայտնվում էի նրանց տան առաջ, չկար ու չկար: հետո իմացա, որ անկողին էր ընկել, տարել էին Աբասթու-ման:

Վեց ամիս հետո նա այլևս չկար: Երբ իմացա՝ մազերս էի փետում: Ոչինչ աչքիս չէր երևում, ո՛չ բեմ, ո՛չ մարդիկ, ո՛չ հասարակություն, ո՛չ հաջողություն: Ինձ զգում էի հանցավոր, մի գեղեցիկ էակի խորտակման պատճառ:

Գտա քոջը, խնդրեցի՝ տարավ ինձ գերեզմանատուն: Երկար կանգնեցի հողաթմբի առաջ:

Ու դրանից հետո աշխարհ անցա, շատ գերեզմանատներ ոտք դրի, ու ամեն անգամ երբ հանդիպում էի տասնութ-տասնինը տարեկան մի աղջկա գերեզմանի՝ ծաղիկ էի դնում, մի հատիկ ծաղիկ, ճերմակ վարդ, ճերմակ մեխակ, շուշան, ի նշան այն մաքրության, որի պատկերն ինձ համար Նինան էր:

Տարիներ անցան ու երբ ես խաղացի Արբենին, Նինային գրկելիս հիշում էի ի՛մ Նինային, իմ լա՛վ, իմ ամենագեղեցի՛կ ու ամմոռանալի՛ Նինային:

Ես այդպիսի գեղեցիկ աղջիկ չեմ տեսել: Հիմա էլ աչքիս առջևն են նրա վառվող աչքերը, գունատ այտերը, կիսաբաց շրթունքները, երջանկության ու բախտի, սպասումի թրթիռը վրան...

Ահա և ամբողջը, սիրելի՛ս:

Լռեց: Գլուխը կախ գցեց: Եվ մի փոքր հետո.

— Ինչո՞ւ քրքրեցիր սիրտս: Ո՛վ է տվել քեզ իրավունք

մտնելու հոգուս խորքերը, բացելու գաղտնարանների դռները
և տեսնելու, թե ո՞վ կա այնտեղ կամ ի՞նչ կա այնտեղ:

Նորից լռություն:

— Նինայի հիշողությունը մի հոգեկան հայտնություն էր
ինձ համար, միայն ինձ հայտնի, մանավանդ, որ այլևս չկա
մեր սիրո վիճաններից գեթ մեկը:

Լոնց, հետո ավելացրեց.

— Պատմեցի ու աղքատացա...

* * *

Մի օր Փափազյանը հայտնվում է Գրականության և ար-
վեստի թանգարանի թատերական բաժնում: Աշխատակից-
ներն անմիջապես շրջապատում են նրան: Մի փոքր հետո
Փափազյանն ասում է, թե եկել է խնդրելու, որ մի կարճ ժա-
մանակով Օթելլոյի իր խալաթը տան իրեն:

— Թանգարանից ոչինչ դուրս չի տրվում:

— Ընդամենը մի շաբաթով, — խնդրում է Փափազյանը:

— Ընկեր Մելիքսեթյանին ասե՞լ եք:

— Խե՞նթ եմ, ինչ է, ես նրան լավ գիտեմ: Մի բան, որ ըն-
կավ ձեռք, էլ ետ կտա՞: Դե՛, դուք ավելի գթասիրտ եք, քան նա:

— Առանց նրա թույլտվության չենք կարող տալ:

— Այդ ճիշտ է: Բայց եթե նրա թույլտվությունը լինի, էլ
ինչո՞ւ էի ձեզ այսքան խնդրելու:

Փափազյանի ասածը տրամաբանական է թվում, և այն, որ
մեծ ողբերգակը դիմում է անմիջապես իրենց՝ շոյում է նը-
րանց ինքնասիրությունը: Փափազյանը նկատում է այդ:

— Նա չի էլ իմանա: Արտաշատում պետք է Օթելլո խա-
ղամ: Մի շաբաթից կբերեմ, տեղը կդնեք:

Աշխատակիցները մի փոքր էլ դիմադրում են, բայց, ի
վերջո, տալիս են խալաթը, շանդրադառնալով այն բանին,
որ Փափազյանը վաղուց է, ինչ Օթելլոյի դերով այլևս բեմ չի
բարձրանում:

Մի ամիս է անցնում: Փափազյանը չի բերում խալաթը:
Ամիսներ են անցնում, բայց Փափազյանը ո՛չ գալիս է, ո՛չ էլ
մի ուրիշի հետ ուղարկում: Թանգարանի աշխատակիցներն

անհանգստանում են: Զանգահարում են արտիստին և խընդ-
րում խալաթը բերել: Խոստանում է, բայց չի բերում: Նորից
են զանգահարում, նորից է խոստանում: Եվ այս անգամ էլ
խոստումը մնում է խոստում: Եվ հասկանալով, որ սխալ են
կատարել, խալաթը երբեք ետ չեն ստանա, աշխատակիցները
Մելիքսեթյանին հայտնում են այդ մասին, սպասելով, թե
հիմա դիրեկտորը կպայթի իրենց մեղավոր գլխին: Մելիք-
սեթյանը, ի զարմանա աշխատակիցների, հանգիստ լսում է,
մի-երկու հարց տալիս, կշտամբող ոչ մի խոսք չի ասում և
լուռ հեռանում է: Աշխատակիցների համար անսպասելի էր
իրենց դիրեկտորի պահվածքը:

Մյուս օրը Մելիքսեթյանը նորից է հայտնվում թատերա-
կան բաժնում, հավաքում է իր շուրջը «մեղավոր» աշխատա-
կիցներին:

— Այլևս չզանգահարեք Փափաղյանին խալաթի համար:
Բոլորը զարմացած նայում են դիրեկտորին:

— Կարիք չկա:

Նկատում են, որ Մելիքսեթյանի աչքերը թախծոտ են:

— Փափաղյանը, ինչպես գիտեք, վաղուց արդեն չի խա-
ղում: Ու եթե խալաթը վերցրել է, ապա նրա համար, որ վեր-
հիշի, վերապրի իր երբեմնի փառքը: Մի ըոպե անգամ չեմ
կասկածում, որ նա տանը այդ խալաթով է միշտ: Դա ոչ
միայն պատրանք է, որ նա ստեղծում է իր համար, այլ հո-
գեբանական մի ջանք՝ չբաժանվելու Օթելլոյից, որի դերը, հա-
զարավոր անգամներ խաղալով, դարձել է նրա երկրորդ եսը:
Մի մեղադրեք և հասկացեք արտիստին: Հարգենք նրա այդ
«թուլությունը»:

Երբ Փափաղյանին թաղում էին, նրա դագաղի վրա ան-
փուլթ նետված էր այդ խալաթը:

* * *

Մի զրույցի ժամանակ մի միտք հայտնեց, հիմա չեմ
հիշում, թե ինչ:

— Հետաքրքրի՞ր է:

Խոստովանություն լինի՝ միտքն այդ մի առանձին տպա-

վորութիւն չէր գործել, բայց հաստատեցի, որ հետաքրքիր է նրա հետ ունեցած իմ խիստ անկեղծ փոխհարաբերութեան հակառակ, ինքս էլ չհասկացա, թե ինչու այդպես ասացի։ Երեւ նրա համար, որ չվշտացնեմ։

— Արժե՞ գրի առնել։

Նահանջելու տեղ չկար։

— Իհարկե՞ արժե։

Ասացի, թեև համոզված չէի։

Մի ժամ էր անցել, թե մի փոքր ավելի, եկավ Անահիտ Մանվելյանը և նա նորից դարձավ ինձ.

— Ուրեմն՝ ասում ես արժե։

Զսպասելով խոսքիս՝ քարտուղարուհուն առաջարկեց թուղթ և գրիչ վերցնել։

Ու թելադրեց...

Եվ ի՞նչ. այն միտքը, որ ինձ մի բանն չէր թվում, թելադրելու պահին ընդարձակվեց, խորացավ և առկայծելով, մի այնպիսի կենդանութիւն և փայլ ստացավ, որ մտածում էի թե ինչպիսի սխալ գործած կլինեի, եթե, անկեղծ գտնվելով, արգելք հանդիսանայի մի փայլուն մտքի աշխարհ գալուն։

Հաճախ եմ անդրադարձել այդ դեպքին, պատմել ուրիշներին։ Գտել եմ, որ պատմածս դեպքը հետաքրքիր է անպայման։ Ու եթե գրի առա ու թղթին հանձնեցի, ապա այն պատճառով, որ հոգեբանների ուշադրութիւնը հրավիրեմ այն բանի վրա, թե ամեն մարդ երևի ունի իր ստեղծագործական տարերքը, որի մթնոլորտում նրա միտքը լարվածութեան գեղազույն չափերի է հասնում։

Ուրեմն՝ Փափազյանի համար խոսքն ու գրույցը մի վիճակ էր և բոլորովին այլ՝ թելադրելու պահը։

* * *

Մտադիր էի մեկնել Լենինգրադ՝ Օլգինո, Փափազյանի ամառանոցը։ Նայելու էի, թե արտիստի գրադարանում Շեքսպիրի հետ կապված ինչ գրքեր կան, որ նա խոստացել էր նվիրել Երեւանի շեքսպիրյան գրադարանին։

— Զեռագիր նյութե՞ր էլ ես հավաքում,— հարցրեց նա.

— Ինչպես չէ:

— Ուրեմն, լսիր, բարեկամս. գրքերը ներքեումն են, առաջին հարկում, պահարաններում, գրակալների վրա, իսկ երկրորդ հարկի միջանցքում դրված է մի սնդուկ, ուր շատ բան կա՝ աֆիշներ, ծրագրեր, պիեսներ: Ուշագիր եղիր և կըզդտես մի տետր՝ «Թիմոն Աթենացու» թարգմանությունը: Ես եմ թարգմանել երիտասարդ տարիներես: Կարծում եմ, որ քեզ կգբաղեցնի:

— Ե՞րբ ես թարգմանել:

— Թվականը չեմ հիշում: Պետք է որ տասական թվականներին արած լինեմ, մինչև հեղափոխությունը:

Լոեց:

— Գուցե վրան գրված լինի. նայիր:

Մեկնեցի լենինգրադ, բավական թվով գրքեր գտա՝ ֆրանսերեն, ռուսերեն և իտալերեն: Գտա նաև Շեքսպիրին նվիրված մի ձեռագիր, ընդամենը մի քանի էջ, սկսված, բայց չավարտված, իսկ «Թիմոն Աթենացու» ձեռագիրը չգտա:

Երբ վերադարձա՝ շատ ցավեց չգտնելուս համար:

— Անահիտ,— դարձավ կնոջը,— դու տեսել ես այդ ձեռագիրը, այնպես չէ՞:

— Տեսել եմ,— արձագանքեց անկողնում հիվանդ պառկած Անահիտը:— Տետրի շապիկի վրա կարմիր թանաքով գրված է՝ «Թիմոն Աթենացի»:

Մինչև հիմա էլ այդ ձեռագիրը չի գտնվել:

* * *

Կիրակի օր էր: Ցերեկվա ժամերից մեկը: Զրուցում էինք՝ Իոան զանգ լավեց և մի փոքր անց եկավ տիկին Ֆրանսուազը, որը Անահիտի մահից հետո մի-երկու ամսի չափ խնամեց հիվանդ Փափազյանին:

— Երկու միլիցոներ են եկել:

Ձայնի մեջ տագնապ կար:

— Ներս հրավիրիր:

Միլիցիոներները սենյակ մտան:

— Ո՞վ է տանտերը:

— Ես:

— Քաղսովետի որոշումը խախտված է...

Փափազյանը շփոթեց խոսքը վերջացնել:

— Նստե՛ք, նստե՛ք: Դործի մասին հետո: Ֆրանսուա՛ղ, ղահվե մը պատրաստե ընկեր միլիցիոներներին համար:

— Աշխատանքի ժամանակ չի թուլատրվում, ընկե՛ր:

— Գիտեմ, սիրելիս, բայց որ ասում եմ՝ նստեք, ուրեմն նստեք:

Փափազյանն այդ բոլորն ասաց առարկություն չվերցնող ձայնով: Միլիցիոներները ենթարկվեցին:

— Է՛հ, ինչպե՞ս եք, ամուսնացա՞ծ եք, ամուրի՞:

Մի փոքր անհարմար զգալով պաշտոնական պարտականությունների կատարման պահին մասնավոր զեղում ունենալու համար, միլիցիոներները ասացին, որ ամուսնացած են:

Ֆրանսուազը սուրճ բերեց: Միլիցիոներները ըմպում էին սուրճը և պատասխանում Փափազյանի հարցերին, թե քանի՞ երեխա ունեն, որտե՞ղ են ծնվել, ծնողները կա՞ն թե չէ:

Միլիցիոներները սուրճի դատարկ գավաթներն իրենցից մի փոքր հեռացրին: Փափազյանը դա ընդունեց որպես նշան այն բանի, որ ժամանակն է մտերմական զրուցից անցնելու իրենց այցի պաշտոնական կողմին: Եվ նա ժպիտը դեմքին խնդրեց բացատրել, թե քաղխորհրդի այդ ինչ որոշում է խախտվել և ինչ կապ ունի դա իր հետ:

Բացատրությունն անմիջապես տրվեց: Փողոցին նայող պատշգամբում լվացք է կախված:

— Է՛հ, չի՞ կարելի:

— Ոչ: Դրա մասին քաղսովետը հատուկ որոշում է կայացրել:

— Մեղավորը Ֆրանսուազն է: Ֆրանսուա՛ղ, — կանչեց նա:

Դռների մեջ երևաց Ֆրանսուազը՝ մեղավոր արտահայտությամբ:

Միլիցիոներներին դեմքերը նորից խստացան:

— Մենք չենք եկել պարզելու, թե ով է մեղավորը, — ասաց մեկը:

— Եկել ենք տուգանելու, — վրա բերեց մյուսը:

— Տուգանելո՞ւ:

Զարմացաւ Փափազյանը:

Կողքս նստած միլիցիոների ականջին շշնջացի, թե ով է իրենց դիմաց նստածը, բայց ոչ մի ազդեցութիւն չունեցաւ դա, մանավանդ որ առանձնապէս տրամադիր չէին լսելու, թե ինչ եմ ասում:

— Օրենքի առաջ պատասխանատու են բոլորը:

— Ծիշո է:— Հաստատեց Փափազյանը և անմիջապէս հարցրեց.

— Տուգանքի չափը:

— Երեք ուրբի:

— Միայն այդքա՞ն:

— Այո, երեք ուրբի:

Փափազյանը մի երեքանոց դրեց սեղանին:

— Այդպէս չի կարելի,— ասաց միլիցիոները:

— Էլ ի՞նչ կա:

— Պետք է ակտ կազմենք:

Միլիցիոները սեղանին դրեց մի հարցաթերթիկ, գրիչը ձեռքն առաւ ու հարցրեց.

— Ազգանո՞ւնը:

Փափազյանի հոնքերը վեր թռան:

— Փափազյան:

— Անո՞ւնը:

Փափազյանը զարմանքից սառեց. մի՞թե իրեն չեն ճանաչում: Հետո նա համարեց, որ դա ընդունված ձևական մի արարողութիւն է, ոչ մի կապ չունի ճանաչել-չճանաչելու հետ, և, իրեն զսպելով ասաց՝ «Վահրամ», բայց երբ պատասխանին հետեւեց միլիցիոների նոր հարցը՝ «Ինչո՞վ եք զբաղվում», համբերութիւնը հատավ:

— Բավական է,— գոռաց սաստիկ գունատված և ձեռքըն ալնալիս ուժով զարկեց սեղանին, որ միլիցիոներները նստած տեղից վեր թռան:

— Դո՛ւրս, անմիջապէ՛ս դուրս: Վերցրեք ձեր երեք ուրբ-լին և չբժեք:

Միլիցիոներները շտապեցին դեպի դուռը: Ծա ուղեկցում էի և բացատրում, թե ով է Փափազյանը: Փափազյանը իմ ետևից գոռաց.

— Ասա նրանց, որ ես Գերագույն սովետի դեպուտատ եմ:

Այս որ լսեցին միլիցիոներները, շրջվեցին, ներողութուն խնդրեցին և այն է՝ ուզում էին երեք ռուբլիանոցը սեղանին դնել, բայց վերավորված Փափազյանը նորից զոռաց.

— Դուք չէի՞ք ասում, որ օրենքի առաջ բոլորը պատասխանատու են:

Միլիցիոներները շվարած կանգ առան:

Երեկոյան մոտոն էի և նա զղջում էր, որ միլիցիոներների հետ այդպես պահեց իրեն:

* * *

Սովոր մեծարանքի ու հիացումի, սովոր, որ մարդիկ պիտի գոհանան բեմից տվածով և կյանքում իրենից ոչինչ չպահանջեն, վերջին ամիսներին ապրեց մենակության դրաման: Այլևս չէր խաղում ու եթե խաղում էր, այլևս այն չէր, ինչ մի ժամանակ: Փափազյանը զգում էր ինչ է կատարվում, բայց չհասկանալու էր տալիս: Ու չէր դիմանում: Նրան տեսնում էինք տխուր ու թախծոտ, հուսահատ, երբեմն՝ ծառս եղած՝ պատրաստ՝ թողնելու և փախչելու: Բայց ո՞ւր. երևի չենինգրադ. այնտեղ էին աղջիկն ու թոռը: Եվ գնում էր: Գնում էր երբեմն երկու ամսով, երբեմն, իր հայտարարությամբ՝ հավիտյան, այլևս երբեք Երևան չդառնալու հաստատ որոշմամբ: Անցնում էր մեկ, ամենաշատը երկու ամիս. չէր դիմանում, հայրենի հողը ձգում էր, Երևանի կարոտը մաշում էր, ու վերադառնում էր: Վերադառնում էր ու ասում, թե ինքըն էլ չի հասկանում, թե ի՞նչ է կատարվում իր հետ:

* * *

Երբ մի անգամ էլ տրտնջաց, որ իրեն հիվանդատես չեն դալիս, ես, իմ կարծիքով բավական նուրբ, հասկացրի, թե այդպիսի այցերը փոխադարձ են լինում, ինքը ուշադիր չի եղել ուրիշների նկատմամբ, հիմա էլ այդ ուրիշներն են անուշադիր:

— Նախ, սխալվում ես, ո՞ւմ նկատմամբ ուշադիր չեմ ե-

Այո, քեֆի, ուրախության սեր չեմ ունեցել, խուսափել
էի ճիշտ է, բայց այդ ով է հիվանդ եղել, որ չեմ ան-
հա տացել: Ինչքան հիվանդացել ես՝ եկել եմ, ժիրայրը
հիվանդ է՝ ամեն օր զանգ եմ տալիս, հետաքրքրվում ու
խորհուրդներ տալիս: Արմանը անկողին ընկավ, գնացի
տես: Թյան, դու հո լավ գիտես, որ ես նրանից վշտանալու,
վիրավորվելու պատճառներ բավական ունեմ:

Լ էջ: Ծա էլ ոչ մի ձայն չհանեցի:

Երկրորդը, սիրելիս, դու մոռանում ես իմ պրոֆեսիան.
ես լուսն, վաթսուոն տարի մարդկանց հետ եմ եղել: Իմ գոր-
ծը նախապես է. ինձ հետ լաց են եղել, ինձ հետ ծի-
ծաղ: Երիտաշխ հավակնոտ մտքիս համար, բայց այդպես
է. լուսնակություն ունի, թե ես մարդկանց տանը նրանց
ուրախամ տխուր պահին եղել եմ, թե ոչ. կարևորն այն է,
որ մարդկանց հոգին առանց ինձ չեմ թողել և միշտ աշխա-
տեմ: Բարձրացնել նրանց հոգին: Դա էլ իրավունք է տա-
լիս ինձ պահանջողի դերում լինել:

"Ի օր, երբ հիվանդ էր ու մենակ՝ հեկեկաց, լաց եղավ
սխալի պես: Աչքերից արցունքները վազում էին:

— Այս ի՞նչ փուչ բան է եղել աշխարհ ասվածը:

* * *

Հիվանդության օրերին նրան միշտ տեսնում էի Օթելլոյի
խալաթի մեջ փաթաթված և ձեռքին էլ մեծ, երկարուկ թաղ-
բահն էր, որ գործածում էր ներկայացման ժամանակ, երրորդ
արարում:

* * *

Զանգահարեց Գևորգ էմինը և լսափողը հանձնեց բժշկու-
հի Գալստյանին: Բժշկուհին ասաց, թե Փափազյանի առող-
ջական վիճակը վատ է, և որովհետև ինքը ճիշտ պատկերա-
ցում չունի իր դրության մասին, որոշել է մեկնել Լենինգրադ:
Բժշկուհին խնդրում էր, որ գնամ Փափազյանի մոտ, համո-
զեմ, որ չգնա: Ասում էր, թե դա պետք է անել անհապաղ,

որովհետեւ կարող է նույնիսկ ճանապարհին, ինքնաթիռում տեղի ունենալ աղետը:

Սիրտ չարի մենակ գնալ: Հեռախոսով կապվեցի հաշա-տուր Նաայանի հետ, որ միասին գնանք:

Խաչիկը Փափազյանին չէր տեսել մի քանի ամիս:

Խաչիկը և Փափազյանը նստեցին թախտին, միմյանց մոտ, իսկ ես նրանց դիմացը: Նկարիչը Փափազյանին գտավ չափազանց փոխված: Խիստ ազդված՝ գլուխը ետ գցել, աչքերից արցունքներ էին վազում:

Համոզել չկարողացանք: Նույնիսկ բարկացավ, թե ի՞նչ պես մենք, իրեն մոտիկից ճանաչող երկու մարդ, չենք հասկանում, որ ինքը չի կարող մնալ այստեղ, որ պետք է անպայման, գոնե մեկ ամսով մեկնի, տեսնի աղջկան, տեսնի թոռանը, քայլի իր ամառանոցի պարտեզում, գոնե մի-երկու րոպե կանգնի Թինայի հողաթմբի առջև, հիշի անցածը... իսկ ինչքա՞ն շատ բան է կապված Լենինգրադի հետ: Վերջապես, այցի կգան իրեն Լենինգրադի ընկերները, նրանք մենակ չեն թողնի իրեն:

Ասաց ու գլուխը դրեց խաչիկի ուսին և լաց եղավ:

Հասկացանք, որ անկարելի է համոզել: Իմանալով, որ նա վաղը չէ մյուս օրվա համար արդեն տոմս է վեցրել, ասացինք, թե կգանք ճանապարհելու:

— Այդ լավ է, իհարկե, բայց որ վաղը երեկոյան զաք, մի-երկու ժամ դեսից-դենից զրուցենք՝ ավելի լավ կլինի:

Ու հետո ավելացրեց.

— Бог знает, что ждёт меня.

— Ну, Ваграмчик, скажешь? — ասաց խաչիկը մտերմաբար և միաժամանակ նորից գլուխը ետ գցեց՝ հուզմունքը չմատնելու համար:

* * *

Ինչպես խոստացել էինք խաչիկին ու ես, գնացինք: Ճա-նապարհին նկարիչն ասաց, թե ինքը մի կես ժամ ունի, ոչ ավելի, և խնդրեց այնպես անել, որ Փափազյանի մոտից շուտ դուրս գանք: Խոստացա: Գնացինք կես ժամով, բայց մնացինք երեք ժամից ավելի:

Ընդունեց անտրամադիր, մռայլագեմ, նույնիսկ մի շար բան կար հայացքի մեջ:

— Ի՞նչ եք աշխարհը խառնել իրար, ի՞նչ եք մարդկանց ոտի հանել իմ դեմ: Ի՞նչ է պատահել, ո՞վ ասաց, թե ես հիվանդ եմ, հասկացեք, ես հիվանդ չեմ և շատ լավ եմ զգում ինձ:

Պարզվեց, որ այդ օրը նրա մոտ, բացի բժիշկների մի խմբից, եղել են կուլտուրայի միջնադարի Կամո Ուղումյանը և Սունդուկյանի անվան թատրոնի դերեկտոր Մխիթար Դավթյանը, և բոլորն էլ խոսքները մեկ են արել՝ համոզել, որ չմեկնի:

— Ի՞նչ է, վախենում եք, որ մեռնե՞մ: Մեռնում եմ, մեռնեմ: Իսկ թե որտե՞ղ կմեռնեմ, դա իմ որոշելու բանն է, և ոչ ձեր: Հասկացա՞ք: Հասկացա՞ք, թե չէ:

Երբ խաղաղվեց, անցանք հազար ու մի հարյուր, ղխավորապես թատրոնի շուրջ: Եվ այդպես այլևս շանդրադարձանք ոչ իր հիվանդությունը, ոչ էլ մեկնելուն: Ինչի մասին էլ խոսում էինք՝ միշտ վերադառնում էինք «Լիր արքային», իր այն դերերին, որ խաղացել է Լենինգրադում, հետո՝ իր ռուսական շրջիկ խմբի հետ:

Անտիճանաբար արամադրությունը փոխվեց, և հիմա մի քնքշություն էր իջել վրան, որ առաջ երբեք չէի նկատել:

Ինձնից խոսք առավ, որ անպայման այցի գնամ իրեն Լենինգրադ:

— Քեզ համար էլ լավ կլինի, մի փոքր կհանգստանաս, կցրվես, կզրուցենք:

Խաչիկն ասաց.

— Վահրամ, ես քեզ լավ գիտեմ, հիմա փախչում ես Երևանից, երևի իսկապես այստեղ մնալ չես կարող: Կհասնես Լենինգրադ, կանցնի մի օր, մի շաբաթ, ամենաշատը տասն օր, և չես դիմանա, կվերադառնաս, կուզենաս գալ: Դու այլևս չես կարող ապրել առանց Երևանի:

Քթի տակ ծիծաղեց:

— Ծիշտ է: Հենց դրա համար էլ ուզում եմ, որ Ռուբենը գա, Երևանի կարոտը նրանից առնեմ, մինչև կարոտս քաշի ինձ դեպի Երևան:

— Կգաս, չէ՞:

Ասաց ու նայեց իմ կողմը, ուղիղ աչքերիս մեջ: Ու թող
զարմանալի չերեա, եթե ասեմ, որ ինձ թվաց, թե տեսնում
եմ մահվան ստվերը նրա հայացքի մեջ, ճակատին դրոշմված:

— Ես քեզ նամակ կգրեմ:

* * *

Այդպես էլ շահողվեց Փափազյանին համոզել, որ Լենին-
գրադ չգնա: «Դեռ» մտել էր մեջը և առաջվա պես նորից տե-
ղահան էր անում, մղում դեպի հեռուները:

Ճանապարհեցինք մարտի 28-ին:

Օդանավակայանում քիչ մարդ կար: Խաչատուր Եսայանն
էր, Մխիթար Դավթյանը, Արփենիկ Խաչանյանը իր քրոջ՝ Գո-
հարիկի հետ, Փափազյանի քարտուղարուհին՝ Անահիտ Ման-
վելյանը, դերասաններից Մամիկոն Մանուկյանը և Անատոլի
Խորզոմյանը:

Փափազյանին ուղեկցում էր մի երիտասարդ բժշկուհի՝ Նո-
րա Այվազյան, որը ճանապարհին օգնություն էր ցույց տա-
լու, եթե պահանջվեր և, բացի այդ, Լենինգրադի բժշկական
շրջաններին ներկայացնելու էր հիվանդի վիճակը:

Թվում էր, թե վերջին անգամն ենք տեսնում...

Ինքնաթիռն օդ բարձրացավ, ինչպես միշտ: Եվ ինչպես չի
լինում ամեն անգամ, տուն դարձանք կոտրված սրտով:

Երևան վերադառնալով՝ բժշկուհին բերեց Փափազյանի
երկտողը, որով հիշեցնում էր իր հրավերը՝ մի տասն օրով
հյուր լինել իր ամառանոցում, Օլգինոյում:

Լենինգրադից հասնող լուրերը մխիթարական չէին: Հեռա-
խոսով կապվեցի դասեր՝ Մարիայի հետ: Ասաց՝ անհույս է,
միտքը երբեմն մթադնվում է, անկապ բաներ է ասում:

Շտապեցի մեկնել և ապրիլի 21-ին Լենինգրադում էի:

Զորս ժամ քսան ըոպե տեհց թոփչքը: Զտապեցի Օլգինո,
վախ կար մեջս, արդյոք ի՞նչ վիճակի մեջ կգտնեմ իրեն:
Երկու ժամից ավելի թափառեցի քաղաքում, բաց հետո մը-
տածեցի, որ արածս երեխայություն է, մեկ է՝ գնալու եմ,
էլ ինչո՞ւ հետաձգել, գուցե օրհասական պահ է և տեղ հաս-
նելս ավելի ճիշտ կլինի:

Իմ դիմաց նստած էր Փափազյանը, ոչ այն Փափազյանը, որին տեսել էի Լենինգրադ մեկնելու նախօրյակին՝ անտրամագիր ու մռայլ, հուսահատված, դառնացած, ընդունակամեն պահ պոռթկալու, ոչ էլ օղանավակայանի Փափազյանը՝ թեև ժպտերես, նույնիսկ հակված՝ կատակներ անելու, բայց մահվան ստվերը դեմքին։ Իմ դիմաց հիմա նստած էր Փափազյանը, որը եթե չասեին՝ չէիր իմանա, թե հիվանդ է։ Ճիշտ է, ժեր էր ու խարխլած, աչքերի փայլը խամրած, բայց նախկինի հետ համեմատած բավական կազդուրված էր, դեմքի արտահայտությունն էլ խաղաղ։ Դատում էր հանգիստ, հիշողությունը տեղը։ Դեպքեր էր պատմում, խորհրդածում և մի անգամ չեղավ, որ մտքի թեւը կորցնեիր։

Մարիային հարցրի, թե սա ի՞նչ է նշանակում։

— Ձեզանից ոչ ոք հորս չի ճանաչում։ Նա այնպիսի կամք ունի, որ ուղածը կանի։ Եթե վճռեց հնարավոր չէ կանգընեցնել նրան։ Իմացավ ձեր գալը և ներքուստ հավաքեց իրեն։ Դուք կզնաք՝ էլի նույնը կլինի։ Հարազատների մոտ իրեն բարձիթողի է անում։ Գալիս են բժիշկները՝ դառնում է ուրիշ մարդ։ Եթե կամենա՝ այսօր բեմ էլ դուրս կգա։ Թե ինչ կլրինի ներկայացումը՝ այլ հարց է, բայց այնքան ուժ, ինչքան պետք է ներկայացումը սկսելու և ավարտելու համար՝ կգտնի իր մեջ։

Լռեց մի պահ, հետո շարունակեց.

— Հավատացե՛ք ինձ, որ եթե նա մինչև հիմա ողջ է, ապա իր կամքի շնորհիվ։ Նա կարողանում է մահը վանել իրենից, լքողնել, որ մոտ գա։ Ճիշտ եմ ասում, մի ուրիշ հիվանդ նրա այժմյան վիճակում՝ վաղուց չէր լինի։

* * *

Հարցրի, թե ի՞նչ է անում։

— Ոչինչ, բարեկամս, երևակայիր՝ ոչինչ։ Ես՝ ու ոչինչ չանեմ, պատկերացնո՞ւմ ես։ Մի ժամանակ կարդում էի և բավական շատ, հիմա թմրություն է իջնում վրաս, հազիվ եմ հասցնում աչքի անցկացնել «Յոմանիտեն», «Ունիտան»։

Շատ, շատ բան կա մտքիս մեջ, պետք է մեկը, որին թելադրեմ, իսկ այստեղ ոչ ոք չկա: Ա՛յ եթե Անահիտը այստեղ լիներ, շատ լավ կլիներ, կթելադրեի նովեմբերս: Մեծածավալ գիրք կլինի, երևի քսանհինգ մամուլ, գուցե նույնիսկ ավելի: Մի-երկու նովել կպատմեմ քեզ, պատահած դեպքեր են բոլորը: Մի մասը մտքիս մեջ է, մի մասն էլ ժամանակին, երիտասարդ տարիներին եմ գրել, շտապ, մշտական վազքիս կարճ դադարներին, վերախմբագրել է պետք, ինչ-որ բան էլ փոխել: Կան և այնպիսիք, որոնց միայն ուրվագիծն եմ քաշել, աչքի զարնող դեպքերը, նրանց միջև ընկած գործողությունը, հիմա պետք է նովել դարձնել, բնավորություններ մշակել, հոգեբանական անցումներն ապահովել, փոխհարաբերություններ ստեղծել ու պատճառաբանել: Մի խոսքով՝ մի քանի ամիս է պետք և գիրքը պատրաստ կլինի:

Կանգ առավ, ձեռքը տարավ դեպի «Ունիտայի» նոր համարը, բայց չբացեց, և առաջ տարավ խոսքը:

— Այդ գրքից առաջ շատ կուզենայի Դանթեին անգրագառնալ: Գևորգին, — Աբաջյանի մասին է խոսքը, — խոստացել եմ գրել Դանթեի մասին, բացատրել, թե ինչպես եմ հասկանում Իտալիո այդ մեծագույն բանաստեղծին: Նա ուզում է, որ հանդես գամ հեռուստատեսությամբ: Շատ երկար բառ է, չէ՞, կարծում եմ, որ հարկավոր է կրճատել. թերևս հեռացույց կամ հեռատեսիլ՞, լավ, դրա մասին թող ուրիշները մտածեն: Հա՛, Գևորգը կամենում է, որ իտալերեն կարդամ և հետո մեկնաբանեմ: Կարևոր է: Ուրեմն դու է՞լ ես կարծում, թե պետք է անել: Նա կարևոր եմ համարում և անպայման կանեմ: Դանթեին շատ եմ սիրում: Մի ժամանակ օր չկար, որ ձեռքս չառնեի և մի քանի էջ նորից չկարդայի:

Մի պահ հետո.

— Զէ՛, պետք է թելադրել, պետք է աշխատել, պետք է, վերջապես, թղթին հանձնել մտքերս, խոհերս: Ինչքա՛ն ժամանակ է չեմ գրել, չեմ թելադրել: Շատ բան է չարչրկում միտքս, շատ գրելիքների կան, բայց ամենից առաջ՝ Դանթեն: Ա՛յ. եթե կարողանայիր կարգադրել Անահիտի գալը՝ մեծ բան արած կլինեիր:

Հարցրի, թե ե՞րբ է զգացել, որ ինքը գրել գիտե:

— Վաղուց, դեռևս Փարիզում: Մի օր հյուր էի Կավրոշի տանը: Բավական մարդ կար, այնտեղ էր նաև Արշակ Չոպանյանը: Մի դեպք պատմեցի, սիրո պատմություն, բոլորը զգացվեցին, իսկ Անահիտը լաց եղավ: Չոպանյանն ասաց. «Պարոն Փափազյան, դուք պետք է գրեք, պետք է անպայման գրեք, դուք գրող եք»:

— Շատ անհասկանալի է, թե ինչպե՞ս դրանից հետո մարդը կարող է չգրել կամ գրել քսան տարի անց միայն: Ժպտաց:

— Դիտե՞ս ինչ, դա էլ իր պատճառն ունի:

— Ժամանակ չե՞ս ունեցել, — շտապեցի ես:

— Այո, իհարկե, ժամանակ չեմ ունեցել: Գրելու համար հանգիստ, նստակյաց կյանք է հարկավոր, իսկ ես միշտ վազքի մեջ եմ եղել, թատրոնով կլանված, թատրոնին անձնատուր և ամեն անգամ, երբ մտքովս անցել է գրիչ առնել ու մի բան գրել, զգացել եմ ինձ դավաճանի դերում: Ինձ թվացել է, թե դավաճանում եմ բեմին, իսկ թատրոնը ինձ համար ամեն ինչ է, թատրոնն այն է, որին երբեք չեմ դավաճանել ոչ մեկ պարագային:

— Իսկ ինչպե՞ս եղավ, որ դա 1954-ին չխանգարեց գրելու «Հետադարձը»:

— Եթե ոչ գիտակցությունս, ապա բնազդս երևի ասում էր, որ մայրամուտիս եմ մոտենում և, դժբախտաբար, այլևս այն չեմ թատրոնի համար, ինչ էի:

Մի քանի անգամ անդրադարձավ հոբելյանին: Ես նրան հասկանում էի: Փափազյանին հոբելյանը, որպես այդպիսին՝ պետք չէր: Նա պարզապես երազում էր հանդիսատեսի հետ մի նոր հանդիպում ունենալ: Թեկուզ այլ կերպ, այլ ձևով, թեկուզ վերջին անգամ, բայց այդ հանդիպումը պետք է լիներ: Հոբելյանը մի առիթ էր՝ վերադարձնելու իր հաղթական երիտասարդության օրերից մեկը՝ տեսնել իրեն նորից հասարակու-

թյան կենտրոնում՝ որոտընդոստ ծափահարություն, խանդավառ բացականչություններ, բեմ նետվող ծաղիկներ... Դերասան էր նա և սիրում էր այդ բոլորը: Շատ էր տեսել, շատ էր վայելել, ավելի, քան որևէ հայ դերասան վերջին կես դարում, բայց դարձյալ ծարավի էր այդ ամենին, որ արտիստի հաջողության անբաժան մասն է կազմում մշտապես, դառնում անհրաժեշտություն, կենսական պահանջ: Դժվար է ասել՝ ում վիճակն է ավելի ծանր, նրա՞նը, ով տեսել է ու վայելել այդ ամենը, և դրանից մնացել է լոկ մի հուշ, թե նրանը, որ երբեք չի հասել փառքի, կատարին և չգիտե, թե ինչ բան է դա, բայց երազում է դրա մասին:

Ասաց, թե ինքը Երևան կգա երեք օրով միայն, և չի կամենում իջևանել իր տանը, խնդրում է սենյակ վերցնել հյուրանոցում:

— Չսիրեցի բնակարանս: Երբեք լավ չեմ զգացել ինձ այդ տանը, արդյոք: Նոր բնակարանս մինչև տարվա վերջը պատրաստ կլինի...

Նա խոսում էր, իսկ ես մտածում էի, որ թափառումների սովոր արտիստը նորից գլուխ է բարձրացրել և, ըստ երևույթին, հոբելյանն էլ դիտում է որպես հերթական մի հյուրախաղ:

— Ձեի համաձայնի, որ հոբելյանս արվի, բայց եթե համաձայնությունս տվի և հիմա էլ ուզում եմ ու սրտանց եմ ուզում, ապա նրա համար, որ իմ հոբելյանը չի լինելու, դա կլինի հայ թատրոնի հոբելյանը:

Մի պահ կանգ առավ, ղենոդ հայացքով նայեց ինձ ու ավելացրեց.

— Օ՛, եթե ողջ լինեիր Սիրանուշն ու Աբելյանը, իմ թանկագին խաղընկերները՝ Արուսն ու Հասմիկը, Մանվելյանը, Զանանը, Հրաչը վերջապես, այո, իմ հոբելյանը կլինիր իմ հոբելյանը, սակայն, քանի որ նրանք չկան, մնացել եմ ես և, բնականաբար, ես կրնիալվեմ ոչ միայն որպես փափազյան, այլ որպես մեկը դերասանական հին փաղանգից: Իմ մեջ կտեսնեն նաև նրանց, իմ մեջ կփնտրեն նրանց: Ինձ կմեծարեն, բայց նկատի կունենան նաև նրանց, իսկ նրանց անդրադառնալ, թեկուզ մտքով՝ նշանակում է անդրադառնալ հայ

թատրոնին: Եթե Սիրանուշը հայ թատրոնի անուշիկ մաման էր, ապա Աբելյանն էլ հայր էր դալիս ամենքիս: Եկ դիմենք աշակերտական թվանշանների օգնությանը. հոբելյանական մեծարանքը տարբեր չափեր ունի ամեն պարագային: Եթե մեծարանքիս չափը պետք է լիներ թվանշաններով, ասենք, թե գերագույնը՝ հինգ, ապա հիմա կլինի հինգ ու խաչ: Չկասկածես մի պահ և իմացիր, որ հինգին գումարված խաչը թեև հասցեագրված ինձ՝ բայց կըլինի անցած-գնացած ընկերներիս արդար բաժինը: Դա կըլինի մի հավելում, որ կառաջանա նրանց պայծառ հիշատակին տուրք տալու բնական պահանջից:

* * *

Մի օր հարցրեց.

— Ի՞նչ ես կարծում՝ հոբելյանից հետո դժվա՞ր է լինելու վիճակս:

— Ուրիշինը՝ դուցե, բայց քոնը՝ հազիվ թե. դու թատրոնից բացի, մի ասպարեզ էլ ունես, գրում ես:

— Ճիշտ է, իրավացի ես, բայց դերասան եմ նախ և առաջ,— խուլ արձագանքեց խոսքերիս: Պատկերացրու մի վայրկյան՝ մարդը ութսուն տարեկան է դարձել, հոբելյան են անում, մեծարում, հիշեցնում փառքը, փայլդ, ամպագոռոռ խոսքեր ասում և հետո մնում ես տանը, ձեռքերդ իրար բերած: Ի՞նչ անել. օրվա լրագիր՞րն աչքի անկացնել, թո՞ւղթ բանալ ու եթե մեկը հիշեց՝ ու դուռդ բացեց՝ լավ, իսկ եթե չէ՝ գնա ու ապրիր մեն-մենակ: Տարիների բուռն ու աղմկալի կյանք, հորիզոնից հորիզոն, իսկ հիմա՝ հուշ և ուրիշ ոչինչ: Սոսկալի՞ է...

Լոնց:

— Չէ, իսկապես լավ է, որ ես գրել գիտեմ և մի բան կարող եմ անել, հակառակ պարագային սարսափելի կլիներ: Ես չէի դիմանա, կխենթանայի. ես սովոր չեմ պարապ մնալու:

— Գրելուց բավականություն չե՞ս ստանում:

— Օ՛, մեծ հաճույք:

— Մանավանդ որ ընթերցողն անհամբեր է քո նոր գրքերին:

— Հասկանում եմ, հասկանում, բայց դու էլ հասկացիր. այնուամենայնիվ, նույնը չէ, համենայն դեպս թատրոնի մարդու համար: Թատրոնն ուրիշ է, հասկանում ես, թատրոնը՝ այդ եջ եմ: Գիրքն ապրում է գրողից անկախ, ինչպես ծնողի համար նրա զավակը: Դերասանը թատրոնը կրում է իր մեջ: Ես ամեն ինչ պատկերացնում եմ, բայց թատրոն չլինի՝ այդ մեկը անկարելի է պատկերացնել: Սիրելիս, քեզ լավ հայտնի է, թե ինչպես է միտքս հիմա շարչրկվում՝ ի՞նչ պիտի լինի թատրոնի հետ, վաղը, մյուս օր ի՞նչ է սպասում նրան: Գրել թե նկարել նույնն է, բայց բեմում խաղալը նույնը չէ, ոչ, նույնը չէ. ի՞նչ անճարելի հաճույք է՝ զգալ քո դիմաց հազարաչքանի մի հրեշ՝ պահանջկոտ, հավակնոտ, և կարենալ նրա, այդ հրեշի շլինքից բռնել ու տանել քո հետեից՝ ուր ուզում ես. ի՞նչ երջանկություն է և ո՞ր արվեստը կարող է դրա հետ համեմատվել, ի՞նչը կարող է տալ այդ արբեցնող ուրախությունը:

Մի պահ լռելուց հետո, գլուխն օրորելով.

— Մի՛ զարմանա, մի՛ զարմանա բոլորովին, բարեկամս, եթե վերջերս աշխարհն ինձ երբեմն փուչ է թվում, կյանքը՝ անարժեք մի բան:

— Ով՞ ով,— բողոքեցի ես,— դու իրավունք չունես գանգատվելու: Փառահեղ կյանք ունեցար և գանգատվելդ մեղքի պես բան է:

Վշտով լի հայացքն ուղղեց ինձ:

— Վերջերս դու դադարել ես ինձ հասկանալ: Ա՛յ հենց դրա համար, որ շա՛տ բանի հասա, դրա շնորհիվ էլ հիմա, երբ այդ բոլորը արդեն չկա, և կա միայն որպես անցյալ, որպես հիշողություն, ա՛յ դրա համար էլ դատարկություն եմ զգում շուրջս և ինձ մնում է մխիթարվել, որ կյանքիս այս օրերին մի երկու լավ բարեկամ ունեցա:

* * *

Մի երեկո հարցրի, թե ինչո՞վ բացատրել, որ երբ թելադրում է, շատ ավելի լավ է ստացվում, քան երբ գրիչը ձեռքն է առնում: Արդյոք, ստեղծագործակա՞ն խառնվածքի հարց է: Այդպես է եղել, օրինակ, նաև Սունդուկյանը:

— Դուք ինձ գրող եք համարում: Ես ճիշտն ասած, մըտքումս ծիծաղում եմ, բայց մտածում եմ, եթե ուզում են՝ թող համարեն: Դերասան եմ, միշտ դերասան եմ, գրելիս էլ դերասան եմ, գրելիս էլ շարունակում եմ խաղալ: Ես կերպար եմ ստեղծում ինձ համար, մտնում նրա էություն մեջ ու թելադրելիս ես չեմ, այլ նա է, որ խոսում է: Եվ եթե մեկմեկ էլ պատմածիս մեջ անցած-գնացած դեպքն այնպես չեմ ներկայացնում, ինչպես եղել է, ոչ թե նրա համար, որ չեմ հիշում,— թեև այդ էլ է պատահում,— այլ նրա համար, որ կերպարը, որ ես եմ այդ պահին, այլ կերպ է մտածում, այլ բան է զգում, երևակայությունը թելադրում է և տանում նրան մի ուրիշ ուղղություն: Գրածս, սիրելիս, նույն դերասանությունն է, բայց զրական ձևերի մեջ զրված:

* * *

Հարցրեց մի օր, թե Արևելյան Եվրոպայի ո՞ր երկրներում եմ եղել:

— Միայն Ռումինիայում:

Հետաքրքրվեց, թե ի՞նչ տպավորություն եմ: Ասացի, որ համարյա թե չի զիջում Արևմտյան Եվրոպայի մյուս երկրներին:

— Ճիշտ ես:

Մի փոքր հետո:

— Շա՛տ ճիշտ ես:

Հեռացրեց մի պահ հայացքը, ապա նորից դառնալով ինձ՝ հարցրեց.

— Իսկ գիտե՞ս, թե ինչու:

Եվ չսպասելով, թե ինչ կասեմ, պատասխան տվեց իր հարցին.

— Հնում Ռումինիան Հռոմի գաղութն էր: Եղե՞լ ես Կոստանցա: Տեսե՞լ ես հնագիտական պեղումների ժամանակ գտնված նմուշները: Հին հռոմեական մշակույթ է, որ եկել ու թափանցել է Պոնտական ծովի այդ ափերը:

Չարաճճի ժպտաց:

— Մի բանաստեղծ է եղել, անունն ի՞նչ էր, չեմ հիշում, ա՛յ, դրան Կեսարը աքսորել է Կոստանցա: Նկատելով բանաս-

տեղծի սիրագեղ հայացքն իր կնոջ վրա՝ բռնել ու քշել է խեղճին:

Հայացքը լարվեց:

— Զէ, չեմ հիշում, չեմ կարողանում հիշել անունը: Դու է՞լ չես հիշում:

— Գիտեմ, բայց միտս չի գալիս: Արձանն էլ դրված է Կոստանցայում, ծովի ափին:

— Լեզվիս ծայրին է անունն ու չեմ կարողանում հիշել:

— Վարպետ, հիշողությունը չի սիրում բռնություն, միտքդ հանգիստ թող ու կհիշե՛ս:

— Ծիշտ ես: Զեմ հասկանում, թե դո՞ւ ինչու չես հիշում, երիտասարդ մարդ ես:

— Նախ՝ երիտասարդ չեմ արդեն, հետո, վերջապես, ես էլ կարող եմ մոռանալ:

— Հա՛, իհարկե:

Գիշերվա կեսին, մի արթուն պահի, հիշեցի՝ Օվիդիոս: Առավոտյան նախաճաշին ասացի:

— Օ՛, իհարկե, Օվիդիո՞ս,— ուրախ բացականչեց,— ե՛րբ հիշեցիր:

— Գիշերը, ժամը երեքը կլիներ:

— Ամո՛թ քեզ: Ի՞նչպես էլ համբերել ես, Գայիր, արթնացնեիր:

Կարճ դադարից հետո:

— Օվիդիոս, իհարկե՛, Օվիդիոս,— նորից բացականչեց մի բան գտած մարդու ուրախությամբ, որին հաջորդեց լատիններեն մի հրկու քառատող՝ բանաստեղծի գրածներից:

* * *

— Ի՞նչ ես կարծում, հոբելյանից հետո կառավարությանը չխնդրե՞մ ուղարկի ինձ արտասահման: Շատ չէ, մի ամսով:

Ասաց ու որսաց իմ զարմացած հայացքը:

— Կարծում ես խաղալո՞ւ համար: Զէ, այլևս խաղալ չեմ կարող: Կկամենայի Իտալիա գնալ և ուսուցիչներին հետքերը գտնել: Կկամենայի Ֆրանսիա գնալ, Մարսելում քույրեր ունեմ, կարոտս առնեմ նրանցից: Փարիզում էլ Անահիտի եղբայրներն են:

— Իսկ առողջական վիճակդ թույլ կտա՞:

— Ի՞նչ է եղել որ, ես շատ լավ եմ զգում ինձ: Բժիշկներին էլ մի հավատա, հաճախ չափազանցում են: Դա նրանց սովորությունն է և ինչ-որ չափով՝ պարտքը: Հետո, վերջապես, դու էլ արի հետս, միասին կլինենք: Ինձ համար էլ լավ կլինի, քեզ համար էլ:

— Իսկ Պոլիս չե՞ս ուզում գնալ, չե՞ս ուզում մի անգամ էլ վերհիշել մանկությունդ:

— Որ ճիշտն ասեմ՝ ուզում եմ, ու երեի չափազանց, բայց չեմ գնա:

— Ինչո՞ւ:

— Ստամբուլի թուրքերը միշտ էլ իմ մասին մեծարանքով են խոսում: Վերջերս էլ, — դեռ Երևանումն էի, — ռադիոյով թատրոնի մասին էին խոսում: Հիշեցին Վարդովյանին, Մնակյանին: Իմ անունն էլ տվին՝ «Վահրամ բեյ»: Բայց չեմ գնա, ժողովրդիս աղաղակը ականջիս մեջ է, չի մոռացվում:

* * *

Այս խոսակցության հաջորդ օրը, երեկոյան դեմ, ասաց.

— Երեկվա ասածիս շատ չհավատա: Ուսուցիչներ, քույրեր, այնպես էի ասում: Գնալուս պատճառն ուրիշ է:

Լռեց:

— Ճիշտն ես ուզում իմանալ: Կամենում եմ վերջապես արտասահմանը տեսնել:

— Ինչե՞ր ես ասում, վարպետ, չեմ հասկանում, ինչպե՞ս թե արտասահմանը տեսնես, երկրագնդի վրա տեղ չի մնացել, որ չլինես:

— Ա՛խ, դու էլ չես հասկանում ինձ: Վա՛յ ինձ, ի՛նչ մեղք եմ ու ի՛նչ մեղակ:

Գլուխը բռնեց և հուսահատ օրորեց:

— Ես եղել եմ արտասահմանում, շատ տեղեր եմ եղել, շատ տեղեր էլ, երևակայիր, չեմ եղել: Բայց դրա մասին չէ խոսքը հիմա: Ամբողջ կյանքս վազք է եղել, ինչպես գիտես: Քաղաքից քաղաք եմ անցել, երկրից երկիր՝ առանց շունչ քաշելու: Իմ բոլոր շրջագայությունները գործ են եղել, աշխատանք, պարտականություն: Երբ Փարիզ եմ հասել ու

մի հայտնի սրճարանում նստել, նախաճաշել, ծխել, ըմպել՝ դարձյալ լարված վիճակի մեջ: Մտածել եմ, թե ինչպես նստեմ, ինչպես պահեմ ինձ, որ զավառացու տեղ չդնեն: Երիտասարդ տարիներս Իտալիայում կամ նույն Փարիզում չէի մտածում այդ մասին: Իսկ հետո, արդեն ուրիշ էր: Ցերեկը խաղ, երեկոյան խաղ: Միշտ մտածել եմ, թե մի ժողովուրդ եմ ներկայացնում, մի ազգ: Եվ այդ պարտականության մեջ՝ հանգիստ չեմ ունեցել: Հանգիստ պահիս էլ՝ օտարության մեջ լարված եմ եղել: Հիմա ուզում եմ գնալ, գնալ անցած կյանքիս հետքերով, բայց արդեն հանգիստ: Ուզում եմ Իտալիո փոքր քաղաքներն անցնել, մի-երկու օրով սենյակ վարձել, վայելել տանտիրուհու ծառայելու պատրաստակամությունը, իսկ ամուսնուն խոսեցնել, իմանալ, թե միտքն ինչով է ապրում: Ուզում եմ գնալ սուրբ Մարկոսի հրապարակը, այնտեղ հին, շատ հին սրճարաններ կան: Կա մի սրճարան, ուր Գարիբալդին է եղել, նստեմ ժամերով, նստեմ անվրդով հոգով, չճանաչված, փառքից և աղմուկից հեռու: Հասկացիր, ուզում եմ այնտեղ ինձ զգալ այնպես, ինչպես այստեղ եմ զգում, առանց այն լարումի, որի մեջ էի, երբ միտս էի դրել աշխարհի փառքից մի բեռ մեջքիս տուն դառնալ: Փարիզում էլ շատ հին սրճարաններ կան, և ինչ մեծ բավականություն կլինի ինձ համար նստել ու դիտել շուրջս, ինչպես մի պարզ այցելու, մի գավաթ սուրճի առջև, նստել ու խորհել, թե մարդն ի՞նչով է մարդ: Ես գիտեմ, որ իմ այս պահանջի մեջ ինչ-որ հիվանդագին բան կա, բայց ի՞նչ անենք եթե մի այդպիսի անմեղ, թեկուզ առաջին հայացքից փոքր-ինչ արտառոց ցանկություն մտել է ուղեղս և հանգիստ չի տալիս ինձ: Մի՞թե չեմ վաստակել այդ իրավունքը:

Ասաց ու նայեց ինձ:

— Հիմա հասկացա՞ր:

* * *

Ապրիլի 27-ին ճանապարհվեցի Երևան: Բաժանվելիս ասաց.

— Ասում ես հոբելյանը նշանակված է 10-ին: Կալ, շատ

լավ: Ուրեմն հունիսի ութին կամ իննին կհանդիպենք Երև-վանում: Զեկուցումդ պատրաստ է, թե նոր ես գրելու: Մի հետաձգիր, խնդրում եմ, մի թողնիր վերջին օրվան: Քո այդ սովորությունը բոլորովին չսիրեցի:

— Վարպետ, ես կգամ քո հուկից, այստեղից միասին կգնանք: Բժշկուհուն էլ հետս կբերեմ:

— Բժշկուհուն. ինչի՞ համար: Ես այն վիճակում չեմ, որ բժշկուհու կարիքը լինի: Իսկ ինքդ արի, այն ժամանակ ոչ թե ինքնաթիռով, այլ մեքենայով կճանապարհվենք: Օ՜, սիրում եմ մեքենայով ճամփորդել: Կդիտենք մեր շրջակա բնությունը, և գիտե՞ս քանի՞ բնություն կփոխվի մինչև տեղ հասնենք:

* * *

... Հունիսի 5-ին Արփենիկ խաչանյանին թելադրում էի Փափազյանի հոբելյանական երեկոյին կարդացվելիք զեկուցումը, երբ զանգահարեցին ինստիտուտից ու ասացին, թե Մարիան հեռախոսով հայտնել է հոր մահը: Ինչքան էլ լավատեղյակ էի Փափազյանի վիճակից, բայց բոթը մուրճի հարվածի նման իջավ գլխիս:

Հենց նույն օրը, երեկոյան, կուլտուրայի միևնույն պահին հանձնարարությամբ Մոսկվա թռավ մի պատվիրակություն՝ Գուրգեն Բորյան, Մխիթար Դավթյան, Ալբերտ Ասլամազյան, Գևորգ Աբաջյան և ես: Մոսկվայից գնացքով մեկնեցինք Լենինգրադ և ապա մեքենաներով Փափազյանի ամառանոցը՝ Օլգինո:

Դռների մոտ հանդիպեցինք Մարիային, նրա դստերը՝ Ժաննային, սպասուհուն՝ Վալյային, որ այդ տանն է տասներկու տարեկան հասակից: Ուրիշ մարդիկ էլ կային: Մտանք այն սենյակը, որտեղ մի ամիս առաջ, սեղանի մոտ նստած զրուցել ենք, կատակել, ծրագրեր կազմել... Սեղանը չկու: Սեղանի փոխարեն՝ դադաղ: Դա Փափազյանը չէ, ուրիշ մարդ է, բոլորովին այլ մարդ: Փափազյանը նա է, որ մեր մտքի ու հիշողության մեջ մնացել է որպես հավերժ կենդանի մի գե-

դեցկութիւն: Այդ Փափազյանը պատին փակցված մեծ լուսանկարից ժպտադեմ նայում էր դազաղի մեջ պառկածին: Մեկը կյանքն է, մյուսը՝ մահը: Մահն ու կյանքն իրար կողքի էին, ինչպես կյանքում՝ համարյա ամեն ժամ, ամեն վայրկյան:

■ ■ ■

Ես այստեղ պետք է վերջակետ դնեի, եթե ժաննայի պատմածներից մի երկուսը կարեւոր չհամարեի թղթին հանձնել:

— Ձեր գնալուց հետո հայրիկի (նա պապին հայրիկ էր կոչում) վիճակը ծանրացավ: Օր-օրի վատանում էր: Թմրութիւն էր իջնում վրան և անվերջ քնելու պահանջ էր զգում, բայց անկողին չէր մտնում: Վատ էր զգում, բայց բժիշկներից, ինչպես միշտ, թաքցնում էր: Նա կարծում էր, որ եթե ասի լավ եմ՝ իսկապես լավ կլինի: Չէր խոսում մահից ոչ այդ ժամանակ, ոչ էլ դրանից առաջ: Երկու ամսից ավելի այստեղ էր, ու երբեք մահվան մասին չխոսեց: Երբեք շատաց, թե վատ է, երբեք չգանգատվեց վիճակի ծանրութիւնից, շատաց, թե ցավ է զգում: Երբ, վերջապես, հասկացավ վիճակի լրջութիւնը, այլևս չպառկեց, գիշերն անց էր կացնում նստած: Անկողինը նրան վախ էր ներշնչում: Մտածում էր՝ եթե պառկի, կենթարկվի մահվան, իսկ այսպես թվում էր նրան, թե ինքն է տնօրինում իր կյանքի ընթացքը:

Մի օր այսպիսի բան պատահեց:

Բազկաթոռին նստած, լուռ ու մունջ, նայում էր լուսամուտից դուրս, հասակ գցած սոճիներին, որ ինքն էր տնկել մի ժամանակ, երբ ես նոր էի աշխարհ եկել: Հանկարծ թափով ոտքի ելավ, նայեց շուրջը ինչ-որ բան որոնողի հայացքով և իրեն նետեց սենյակից պատշգամբ, այնտեղից էլ այգի ու վազեց դեպի տատիկիս հողաթումբը: Շտապեցինք ետևից: Դիմադրում էր, չէր ուզում տուն դառնալ:

— Որտե՞ղ է իմ տունը: Ես տուն ունեի, բնակարան, ամառանոց, որտե՞ղ է, ասացեք խնդրեմ, որտե՞ղ է, ես իմ

տունն հմ ուզում, իմ տունը: Ես իմ անկյունն հմ որոնում
այս աշխարհում:

Ուժ էր պետք գործ դնել՝ նրան տուն բերելու և խաղա-
ղեցնելու համար:

Մի ուրիշ օր, մտամոլոր, դանդաղ քայլերով եկավ խոհա-
նոց, որտեղ ճաշի պատրաստութուն էինք տեսնում, և շատ
հանգիստ, կարծես ոչինչ չէր եղել՝ հարցրեց.

— Որտե՞ղ է իմ զարդասենյակը:

— Դու թատրոնում չես, հայրիկ, — ասացինք, — տանն
ես:

— Տանը չեմ, ես լավ գիտեմ, որ թատրոնումն եմ, բայց
չեմ հասկանում, թե ինչո՞ւ չեմ կարողանում զարդասենյակս
գտնել: Որտե՞ղ է, ո՞ր կողմով գնամ, չե՞ք ասի:

Մտածեցինք, որ հակառակվելու կարիք չկա և տարանք
նրան իմ սենյակը, որտեղ դուք էիք քնում, ինչպես գիտեք,
այնտեղ մի մեծ հայելի կա:

Նստեց հայելու առաջ: Նայեց իրեն ուշագրի, զննական
հայացքով, իսկ հետո շրջվեց դեպի մեզ՝ մեղմ, ներող մի
ժպիտ անփայլ աչքերի մեջ, կարծես ասելիս լինելով՝ «չէ՞ որ
ասում էի...»:

Նորից նայեց հայելուն, հետո ձեռքը տարավ դեպի երեսը,
և, իր կարծիքով, ճակատին մի գիծ քաշեց, հետո մատները
տարավ դեպի աչտերը... Գրիմավորվում էր, պատրաստվում
էր կայացման: Թե իր դերերից ո՞րն էր խաղում՝ հնարավոր
չեղավ հասկանալ: Գուցե Օթելլո՞ն:

Իրեն մենակ թողինք:

Երբ մի կես ժամ հետո եկանք, տեսանք՝ գլուխը թեքված
ձախ կողմի վրա՝ հանգիստ ննջում է:

Ժաննան շարունակեց.

— Հունիսի երեքին ոչ մի խոսք չասաց: Լուռ էր ամբողջ
ժամանակ: Հարց տալինք՝ գլխով կպատասխաներ կամ էլ
անորոշ, շտեմնող հայացքով կնայեր մեր կողմը, որպես դա-
տարկ մի տարածության: Տպավորությունն այնպես էր, որ
նայում է, բայց չի տեսնում: Հունիսի չորսին հրաժարվեց
ուսելուց: Այդ գիշեր չքնեց, չխոսեց, բոլորին նայում էր մա-
րած աչքերով: Լույս հինգի առավոտյան այլևս չկարողացավ

հաղթահարել վրա հասնող թմրությունը: Քունը հաղթեց: Եվ այլևս աչքերը չբացեց: Սիրտը դաժաճանել էր նրան քրնած պահին, և այդպես էլ չիմացավ, որ տեղի ունեցավ անխուսափելին...

* * *

Փափազյանի թաղումից երկու շաբաթ հազիվ էր անցել: Շտապում էի Սունդուկյանի անվան թատրոն՝ գեղարվեստական խորհրդի նիստի: Ցերեկվա ժամը 12-ը կլիներ: Կանգնեցրի մի տաքսի: Ասացի, թե ուր եմ շտապում: Վարորդը մոռալադեմ մի երիտասարդ էր, երեի մի 35 տարեկան և տրամադրված չէր զրույցի: Իմ երկու հարցերի պատասխանն էլ տվեց հեռագրական ոճի այդպիսի կտրուկությամբ, որ չհամարձակվեցի հրրորդ հարցը տալ:

Մեքենան կանգնեց «Կոմունարների այգու» մուտքի մոտ: Խնդրեցի տանել ինձ թատրոնի «հետևի» դռան կողմը, որտեղ դերասանները ելումուտ ունեն:

— Դերասան ես, — հարցրեց վարորդը:

— Այ:

— Իսկ թատրոնի հետ կա՞յ ունես:

— Այո:

— Ուրեմն թատրոնի հետ կապնված մարդ ես:

Ես ուղղեցի նրան, ասացի, չի կարելի ասել՝ կապնվել, ճիշտ ձևը կապվելն է:

Ջարմացած նայեց ինձ:

— Ուրեմն ասում ես կապվել: Չգիտեի, լավ, շատ լավ: Միտս կպահեմ:

Մի պահ լուռ մնաց, ապա դարձավ իմ կողմը հետաքրքրված հայացքով:

— Փափազյանին ճանաչո՞ւմ էիր:

— Այո:

— Ծանոթ էիր հետը:

— Այո:

— Անձա՞մբ:

— Այո:

— Մեծ դերասան էր, չէ՞:

Լավ չհասկացա՝ հարցրեց, թե ասաց: Հենց այդ ժամանակ էլ տեղ հասանք:

— Սպասե՛մ:

— Միտք չունի, նիստի եմ գնում:

Մտա թատրոն, բարձրացա վեր և պարզվեց, որ դիրեկտորին շտապ գործով կոչտուրայի մինիստրություն են կանչել և նիստը հետաձգված է: Ցավեցի, որ մեքենան բաց էի թողել: Դուրս եկա փողոց, տեսնեմ մեքենան կանգնած է, վարորդն էլ դռան մոտ է:

— Ձեզ էի սպասում:

Զարմացա. վարորդը ժպտաց:

— Ներս մտա՝ ինձ ասացին, որ նիստը չի լինելու: Որոշեցի սպասել. մտածեցի՝ ուր որ է կգա: Հարցրի, թե դուք ով եք: Հիմի ես ձեր ազգանունն էլ գիտեմ. Զարյան, Ռուբեն Զարյան, այնպես չէ՞: Ներող կլինեք, մինչև էսօրվա օրը չէի լսել: Դե՛, ես թերթ, գիրք չեմ կարդում, բայց գրագետ եմ: Գլուխ չեմ գնում, ժամանակ էլ չի լինում: Մի խոսքով՝ ասացին, թե թատերագետ եք, դերասանների մասին եք գրում: Է՛հ, Փափազյանի մասի՞ն էլ եք գրել:

— Ինչպես չէ:

Մի պահ լուռ մնաց: Իսկ ես մտքով անդրադարձա այն բանին, որ նա դու-ից անցել էր դուք-ի:

— Գիտեք ինչ կա, ընկեր... հա՛, Զարյան. սրտիս վրա մի բան է ծանրացած: Ուզում եմ ասել. դե՞մ չեք: Շնորհակալ եմ, որ դեմ չեք, խնդրում եմ չմերժեք,— ասաց ու մեքենան կանգնեցրեց մի խորտկարանի առջև:

Նա այնպես նայեց, որ մերժել չկարողացա և լուռ հպատակվելով, հետևեցի նրան:

— Ընդամենը մի ոչումկա: Ես ձեզ պատվիլ եմ ուզում:

Մի փոքր հետո օդին բերին: Նախ ինձ համար լցրեց, հետո՝ իրեն: Բաժակ բաժակի տվինք. ես խմեցի, ինքը՝ չէ:

— Անուշ եղա՞վ:

— Բա դո՞ւք:

— Կիմեի, բայց իրավունք չունեմ, ոռլի վրա եմ:

Մի խորտիկ բերանս զցեցի և ոտքի կանգնեցի:

— Ախպորս ասեմ,— սկսեց նա մեքենայի շարժվելուն պես:— Մի օր մի մարդ կանգնեցրեց մեքենաս, նստեց ու ասաց՝ «Կիւկյան»: Երբ տեղ հասանք, ասաց՝ «Հնորհակալություն» ու գնաց: Մնացի զարմացած:

— Ընկե՛ր, ընկե՛ր,— գոռացի ես,— բա փո՞ղը:

Կանգ առավ, շուռ եկավ իմ կողմն ու ասաց.

— Ես Փափազյանն եմ:

Ասաց ու գնաց:

— Է՛հ, ինչ անեմ, որ Փափազյանն ես,— գոռացի նրա հետեից, իսկ նա իսկի շուռ էլ չեկավ ու մտավ դաշանը:

Մի պահ լուռ մնաց: Երևում էր, որ հուզված է: Մի փոքր հետո շարունակեց.

— Ժամանակ անցավ, մի տարու շափ կլինեիր: Ու մի օր էլ հաճախորդներից ով նստեց կողքիս, լրագիր էր կարդում, մեջն էլ եմ մարդու նկարը սև շրջանակի մեջ: Հայերեն թերթի մեջ էլ, ուսականի էլ: Ու մեծ-մեծ տառերով գրված էր՝ «Փափազյան»: Ու հարցրի.

— Դերասա՞ն էր:

Սա թե՛

— Հա՛, դերասան էր:

Հարցրի.

— Մե՞ծ:

— Համաշխարհային:

Էս, որ ասաց, սիրտս կանգ առավ, քրտինքը վրա տվեց:

— Ե՛րբ է թաղումը:

— Այսօր, ժամը 3-ին:

Մեքենան տարա մի տեղ կանգնեցրի, ինքս վազեցի թատրոն: Շատ մարդ կար. ես մի տասը հազար ասեմ, դուք քսանն ասեք, ամբողջ քաղաքը լցվել էր «Կոմունարների այգին»: Մի կերպ, ուժի զոռով ինձ գցեցի թատրոն: Դազաղը բեմի վրա էր դրված, գլխավերեն էլ կրակ էր վառվում: Ջահել ժամանակվա նկարն էր կախված, ի՞նչ սիրուն տղամարդ է եղել: Բոլորը լաց էին լինում, ասես իրենց հարազատին կորցրած լինեին: Ինձ բեմի հետև գցեցի, ուղեցի սգո պահակ կանգնել, մեղքս քավել, շթողին, քշեցին: Ու ես խառնվեցի քաղաքին, որ ոտք առած գնում էր դազաղի հետևից:

Լուռ մնաց մի պահ:

— Սրտիս վրա ոնց որ քար ծանրացած լինի: Դե՛, ասենք, էն ժամանակ չէի ճանաչում, թե ով է: Չէի ճանաչում, փող ուզեցի, էդ ոչինչ, էդ մեղք չէ, բայց էդ ոնց պատահեց, որ լեզուս չորացավ երբ ասի՝ «է՛հ, ինչ անեմ, որ Փափազյանն ես»։ Էդ մեկը չպիտի ասեի, չէ՛, չպիտի ասեի:

Տեղ հասանք:

— Ես էլ իմ խոստովանությունը վերջացրի:

Ասաց ու ազատ շունչ քաշեց:

Ես ձեռքս դրի նրա ուսին:

— Պետք չի տանջվել, կյանքում ամեն բան էլ պատահում է: Իհարկե, լավ կլիներ չպատահեր, բայց որ եղել-եղել է. մեր մեծերին պետք է ամենքն իմանան:

Ուզեցի փող տալ, չվերցրեց:

— Խոստովանահայրը փող չի տալիս, այլ առնում է: Մեկին պիտի պատմեի, ձեզ պատմեցի ու հանգստացա:

Ասաց ու ժպտաց:

Ես այլևս այդ վարորդին չտեսա, եթե նկատի չառնվի մի «հանդիպում» հեռակա կարգով:

Գնացել էի Մահարուն տեսնելու:

— Այ տղա, — ասաց նա, — մի բան պատմեմ, քեզ կհետաքրքրի: Երկու օր առաջ մի տաքսի բռնեցի, որ տուն գամ: Ասի՝ «տար Կասյան փողոց՝ գրողների բնակելի տուն»:

— Գրող եք:

Հարցրեց վարորդը:

— Այո:

— Կարելի՞ է իմանալ ձեր ազգանունը:

— Ինչու չէ. Գուրգեն Մահարի:

Ու այլևս ոչ մի խոսք:

Տեղ հասանք, փող եմ տալիս, չի առնում:

— Փափազյանին ճանաչո՞ւմ էիք, մեծ, համաշխարհային դերասան Փափազյանին:

— Իհարկե:

— Դե որ՝ իհարկե, էլ ոչ մի խոսք: Եթե ուզում եք էդ մեծ մարդու հիշատակը վիրավորել, վճարեք:

Ասաց ու մեքենան քշեց:

Մահարին ավարտեց խոսքը:

— Հետաքրքիր է, չէ՞. դու մի բան հասկանո՞ւմ ես:
Ու ես նրան արի վարորդի հետ կապված ամբողջ պատմությունը:

— Այ տղա, էդ հո գրելու բան է. իսկական նովել:

* * *

Վարորդի պատմածը վերջին գրառումս է: Մաքրագրեցի ու տարբեր ժամանակներ գրված մյուս թերթիկների հետ այս էլ ամփոփվեց թղթապանակում:

Օրվա այս ուշ պահին Փափազյանի շուրջն են մտքերս: Գլրապահարանից հանում եմ «Հետադարձ հայացքը» ու թերթում: Անցնում են ժամեր, ու ես նույն բավականությունն եմ ստանում, ինչպես առաջին անգամ, երբ որպես խմբագիր ձեռք առա գրքի ձեռագիրը: Թերթում եմ ու գրքի էջերից նայում է ինձ կյանքով լի, ժպտադեմ Փափազյանը՝ մեկ կյանքի խորքերը մտնող, մեկ թեթև արկածների սիրահար, մեկ վերլուծող լուրջ միտք, մեկ անհոգ կատակող, հաճախ չարաճճի, բայց ոչ երբեք չար, մի տեղ իմաստուն, մի տեղ հրճվող երեխա, բայց միշտ սիրտը լայն ու գրեթե ամենքի համար մի լավ, մի բարի խոսք գտնելու հազվագյուտ ձիրքով հարուստ: Թերթում եմ առաջին գիրքը, թերթում եմ երկրորդը, հասնում վերջին էջի վերջին տողերին:

Դերասանն ասում է, թե ինքը ընթերցողին բերեց հասցերեց իր կյանքի այն կետին, որից դենը մի նեղ արահետ է բացվում ճամփին, ուր տեղ չի լինի երկուսի համար: Եվ վերջացնում է այսպես. «Մնա՛ երջանիկ և զավակներիդ, որոնց օրհնեցի, երբեմն պատմիր, թե՛ այսպիսի մի մարդ եղավ մեզանում... եկա՛վ ու անցա՛վ»:

Գրվել է այս 1956-ին:

Այն ժամանակ ոչ միայն մենք էինք հեռու հրաժեշտի այս խոսքին լուրջ նշանակություն տալուց, այլ նաև ինքը՝ Փափազյանը, որը մահվան անդրադարձել է իրեն հատուկ թեթև սրտով, որի համար կյանքի պարտամուրհակում վերջին ժամկետի տակ ստորագրելը նույնն էր, ինչ որ պատանու համար հավիտենական սիրտ երգում տալը:

Փափագյանն այն ժամանակ խաղում էր «մահ» հասկացողության հետ, ճիշտ այնպես, ինչպես սարսափում էր անդրադառնալու այդ նույն մտքին իր կյանքի վերջին երկու-երեք ամիսը, երբ մահը չոքել էր արտիստի դռանը:

Մնում էր, որ ողբերգակը իր խոսքերին հավելի բեմում հազար անգամ կրկնածը՝ «մնացյալը լուսթյուն»։ Լուսթյան տեղ սակայն բարձրագույն տարիներ եկան՝ նոր դերեր, նոր տիտղոս, երեք ծավալուն հատոր...

Հիմա, երբ չկա Փափագյանը՝ ականջիս լսում եմ նրա շշուկը. «Պատմիր, թե այսպիսի մի մարդ եղավ մեզանում... եկա՛վ ու անցա՛վ»:

Պատմությունն այդ գրվելու է, անշուշտ, ե՞րբ և ո՞ւմ ձեռքով՝ հայտնի չէ, գուցե և ես գրեմ, չգիտեմ, եթե ուժս պատի միայն։ Բայց այն, ինչ արձանագրել եմ նրա գլխով անցածից՝ ականատես բարեկամ լինելով, թեկուզ հատուկենտ դեպքեր, թող նկատվի իբր նյութ այդ մեծ կյանքի պատմությունը գրելու համար:

Զարյան Ռուբեն Վարոսի

Հուշապատում

Գիրք առաջին

Հրատ. խմբագիր՝ Վ. Լ. ՎԱՐԳԱՆՅԱՆ
Նկարիչ՝ Կ. Կ. ՂԱՖԱԴԱՐՅԱՆ
Գեղ. խմբագիր՝ ՕԳ. Ա. ԱՍԱՏՐՅԱՆ
Լուսանկարները ԱՆԴՐԱՆԻԿ ՔՈԶՍՐԻ
Տեխ. խմբագիր՝ Լ. Գ. ՓԻՐՈՒՋՅԱՆ
Վերատպող սրբագրիչ՝ Ա. Գ. ՀՈՎՀՍՆԻՍՅԱՆ

Рубен Варосович Зарян

ВОСПОМИНАНИЯ

(На армянском языке)

Издательство «Айастан»

Ереван 1975

Հանձնված է շարվածքի 27/XI 1974 թ.: Ստորագրված է տպագրության 9/IV 1975 թ.: Թուղթ տպագրական № 1 84 × 103¹/₃₂, տպ. 16,75 մամ. = 28,14 պայմ. տպ. մամ., հրատ. 22,3 մամ.:

Պատվեր 1381: ՎՖ 03443: Տպաքանակ 10 000: Գինը 1 ռ. 66 կ.:

«Հայաստան» հրատարակչություն, Երևան-9, Տեղյան-91:

ՀՍՍՀ Մինիստրների սովետի հրատարակչությունների, պոլիգրաֆիայի և գրքի առևտրի գործերի պետական կոմիտեի № 1 տպարան, Երևան, Ալավերդյան 65:

